

西汉会要
四库本
]

徐天麟

文硕阁

wenshuoge.com

目录

关于我们	4
提要	6
卷一	7
卷二	12
卷三	18
卷四	22
卷五	26
卷六	31
卷七	38
卷八	41
卷九	45
卷十	49
卷十一	52
卷十二	57
卷十三	62
卷十四	66
卷十五	73
卷十六	79
卷十七	84
卷十八	91
卷十九	96
卷二十	102
卷二十一	105
卷二十二	108
卷二十三	113
卷二十四	120
卷二十五	126
卷二十六	130
卷二十七	137
卷二十八	142
卷二十九	149
卷三十	157
卷三十一	165
卷三十二	180
卷三十三	190
卷三十四	205

卷三十五	212
卷三十六	217
卷三十七	224
卷三十八	232
卷三十九	237
卷四十	243
卷四十一	248
卷四十二	253
卷四十三	260
卷四十四	266
卷四十五	272
卷四十六	280
卷四十七	284
卷四十八	289
卷四十九	296
卷五十	301
卷五十一	306
卷五十二	311
卷五十三	316
卷五十四	319
卷五十五	323
卷五十六	328
卷五十七	336
卷五十八	343
卷五十九	348
卷六十	356
卷六十一	360
卷六十二	364
卷六十三	369
卷六十四	375
卷六十五	381
卷六十六	389
卷六十七	397
卷六十八	400
卷六十九	407
卷七十	412

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 史部十三

西汉会要 政书类一【通制之属】提要

【臣】等谨案西汉会要七十卷宋徐天麟撰天麟字仲祥临江人开禧元年进士调抚州教授历武学博士通判惠潭二州权知英德府事蹟附见宋史徐梦莘传传称天麟为通直郎得之之子梦莘之从子晁公武读书志则称为梦莘之子考楼钥攻媿集有西汉会要序曰徐思叔为左氏国记其兄秘阁商老为北盟录已而思叔之子孟坚着汉官考次子仲祥又作汉会要商老梦莘之字思叔得之之字也然则史不悞而晁氏悞矣其书仿唐会要之体取汉书所载制度典章见於纪志表传者以类相从分门编载其无可隶者亦依苏冕旧例以杂录附之分十有五门共三百六十七事嘉定四年具表进之於朝有旨付尚书省藏之秘阁班固书最称博赡於一代礼乐刑政悉综括其大端而理密文繁骤难得其体要天麟为之区分别白经纬本末一一犁然其詮次极为精审惟所采祇据本史故于汉制之见於他书者槩不采掇未免失之於隘又如舆服门中于司马相如扬雄诸赋铺张扬厉之语一槩摘入殊非事实亦为有乖义例然其贯串详洽实未有能过之者昔人称顔师古为汉书功臣若天麟者固亦无愧斯目矣乾隆四十四年六月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

西汉会要卷一

宋 徐天麟 撰

帝系一

帝号

丰公太上皇父也春秋晋史蔡墨有言陶唐氏既衰其後有刘累学扰龙事孔甲范氏其後也而大夫范宣子亦曰祖自虞以上为陶唐氏在夏为御龙氏在商为豕韦氏在周为唐杜氏晋主夏盟为范氏范氏为晋士师鲁文公世奔秦後归於晋其处者为刘氏刘向云战国时刘氏自秦获於魏秦灭魏迁大梁都于丰故周市说雍齿曰丰故梁徙也是以颂高祖云汉帝本系出自唐帝降及于周在秦作刘涉魏而东遂为丰公丰公盖太上皇父其迁日浅坟墓在丰鲜焉及高祖即位置祠祝官则有秦晋梁荆之巫世祠天地綴之以祀岂不信哉由是推之汉承尧运德祚已盛断蛇着符旗帜上赤协于火德自然之应得天统矣【出本纪赞】

太上皇高帝父太公也汉六年夏五月诏曰人之至亲莫亲於父子故父有天下传归於子子有天下尊归於父此人道之极也前日天下大乱兵革并起万民苦殃朕亲被坚执锐自帅士卒犯危难平暴乱立诸侯偃兵息民天下大安此皆太公之教训也诸王通侯将军羣卿大夫已尊朕为皇帝而太公未有号今上尊太公曰太上皇十年秋七月太上皇崩葬万年【出本纪】

太祖高皇帝【字季讳邦之字曰国】沛丰邑中阳里人姓刘氏【母媼後追尊曰昭灵后】高祖为人隆準而龙颜美须髯左股有七十二黑子寬仁爱人意豁如也及壮试吏为泗上亭长秦二世元年立为沛公汉元年立为汉王五年二月甲午即皇帝位于汜水之阳十二年夏四月甲辰帝崩于长乐宫五月丙寅葬长陵羣臣曰帝起细微拨乱世反之正平定天下为汉太祖功最高上尊号曰高皇帝【着纪十二年壽五十三】諡【諡法无高以功高特起名】

丞相相国【萧何】

太尉【卢绾 周勃】

御史大夫【周苛 周昌 赵尧】

孝惠皇帝【讳盈字曰满】高祖太子也【母曰吕皇后】帝年五岁高祖初为汉王二年立

为太子五年为皇太子十二年四月高祖崩五月丙寅即皇帝位明年改元七年秋八月戊寅帝崩于未央宫九月辛丑葬安陵【着纪七年壽二十四】諡【柔质慈民曰惠】

相国【萧何 曹参】

右丞相【王陵】

左丞相【陈平】

太尉【周勃】

御史大夫【赵尧】

高皇后吕氏【讳雉字曰野鸡】父单父人吕公好相人见高祖状貌因重敬之吕公曰臣少好相人相人多矣无如季相愿季自爱臣有息女愿为箕帚妾吕媼怒吕公曰公始常欲奇此女与贵人沛令善公求之不与何自妄许与刘季吕公曰此非儿女子所知卒与高祖生孝惠帝鲁元公主高帝五年尊王后曰皇后惠帝即位尊为皇太后太后立帝姊鲁元公主女为皇后无子取後宫美人子名之以为太子惠帝崩太子立为皇帝年幼太后临朝称制四年少帝自知非皇后子出怨言皇太后幽之永巷五月丙辰立常山王弘为皇帝八年七月辛巳皇太后崩于未央宫既诛诸吕大臣相与陰谋以为少帝及三弟为王者皆非孝惠子复共诛之【着纪八年】

太傅【王陵 审食其】

右丞相【陈平】

左丞相【审食其】

御史大夫【任敖 曹窋 张苍】

太宗孝文皇帝【讳恒字曰常】高祖中子也【母曰薄姬】高祖十一年立为代王十七年秋高后崩【张晏曰代王之十七年也】大臣迎代王入代邸羣臣从至上议曰丞相陈平等再拜言大王足下子弘等皆非孝惠皇帝子不当奉宗庙大王高皇帝子宜为嗣愿大王即天子位代王西乡逊者三南乡逊者再丞相平等奉天子玺符再拜上代王遂即天子位後七年夏六月己亥帝崩于未央宫乙巳葬霸陵【着纪二十三年壽四十六】孝景元年申屠嘉等奏德莫盛於孝文皇帝宜为帝者太宗之庙制曰可諡【慈惠爱民曰文】

改元【前十六年 後七年】

丞相【陈平 周勃 灌婴 张苍 申屠嘉】

太尉【灌婴】

御史大夫【张苍 圉 冯敬 申屠嘉 陶青】孝景皇帝【讳启字曰开】文帝太子也【母曰窦皇后】文帝元年正月立为皇太子後七年六月文帝崩丁未即皇帝位後三年正月甲子帝崩于未央宫二月癸酉葬阳陵【着纪十六年壽四十六】諡【布议行刚曰景】

改元【前七年 中六年 後三年】

丞相【申屠嘉 陶青 周亚夫 刘舍 卫綰】

太尉【周亚夫】

御史大夫【陶青 晁错 介 刘舍 卫綰直不疑】

世宗孝武皇帝【讳彻字曰通】景帝中子也【母曰王美人】年四岁立为胶东王七岁为皇太子十六岁後三年正月景帝崩甲子太子即皇帝位後元二年二月丁卯帝崩于五柞宫三月甲申葬茂陵【着纪五十四年壽七十一】孝宣本始二年诏尊孝武庙为世庙諡【威强叡德曰武】

年号【建元六年 元光六年 元朔六年 元狩六年 元鼎六年 元封六年 太初四年 天汉四年 太始二年 征和四年 後元二年 共着纪五十四年壽七十一】

丞相【窦庆 许昌 田蚡 薛泽 公孙弘 李蔡 严青翟 赵周 石庆 公孙贺 刘屈氂

田千秋】

太尉【田蚡】

大司马【卫青 霍去病 霍光】

御史大夫【牛抵 赵綰 严青翟 韩安国 张欧 公孙弘 江播孙 李蔡 张苍 石庆 卜式 儿寛 延广 王卿 杜周 暴胜之 商丘成 桑弘羊】

孝昭皇帝【讳弗陵後止 讳弗字曰不】武帝少子也【母曰赵婕妤】武帝後元二年二月立为皇太子年八岁以侍中奉车都尉霍光为大司马大将军受遗诏辅少主明日武帝崩戊辰太子即皇帝位元凤四年帝加元服元平元年夏四月癸未帝崩于未央宫六月壬申葬平陵【着纪十三年壽二十一】諡【圣闻周達曰昭】

年号【始元六年 元凤六年 元平一年】

丞相【田千秋 王诉 杨敞 蔡义】

大司马【霍光】

御史大夫【桑弘羊 王诉 杨敞 蔡义 田广明】中宗孝宣皇帝【讳询字曰谋】武帝曾孙戾太子孙也太子纳史良娣生史皇孙皇孙纳王夫人生宣帝号曰皇曾孙生数月遭巫蛊事太子良娣皇孙王夫人皆遇害曾孙虽在襁褓犹坐收系郡邸狱邴吉为廷尉监曾孙赖吉得全因遭大赦有诏掖庭养视上属籍宗正元平元年四月昭帝崩无嗣大将军霍光请皇后召昌邑王六月王受皇帝玺绶癸巳光奏王贺淫乱请废太后诏曰可光奏议曰孝武帝曾孙病已【潜邸名也】操行节俭慈仁爱人可以嗣孝昭皇帝後奏可宗正德至曾孙尚冠里舍洗沐赐御府衣太仆以轸猎车奉迎曾孙庚申入未央宫见皇太后封为阳武侯已而羣臣奏上玺绶即皇帝位元康元年诏更讳询黄龙元年冬十二月甲戌帝崩于未央宫【着纪二十五年壽四十二】初元元年正月辛丑葬杜陵平帝元始四年尊孝宣庙为中宗
諡【圣善周闻曰宣】

年号【本始四年 地节四年 元康四年 神爵四年 五凤四年 甘露四年 黄龙一年】丞相【蔡义 韦贤 魏相 丙吉 黄霸 于定国】大司马【霍光 张安世 霍禹 韩增 许延壽 史高】御史大夫【周广明 丙吉 萧望之 黄霸 杜延年 于定国 陈万年】高宗孝元皇帝【讳奭字曰盛】宣帝太子也【母曰共哀许皇后】宣帝微时生民间年二岁宣帝即位八岁立为太子黄龙元年十二月宣帝崩癸巳太子即皇帝位竟宁元年夏五月壬辰帝崩于未央宫秋七月丙戌葬渭陵【着纪十六年壽四十三】平帝元始四年尊为高宗庙
諡【行义悦民曰元】

年号【初元五年 永光五年 建昭五年 竟宁一年】丞相【于定国 韦玄成 匡衡】

大司马【史高 王接 许嘉 王凤】

御史大夫【陈万年 夏禹 薛广德 韦成 郑弘衡】孝成皇帝【讳骞之字曰俊】元帝太子也【母曰王皇后】元帝在太子宫生甲观画堂为世嫡皇孙宣帝爱之字曰太孙年三岁而宣帝崩元帝即位帝为太子竟宁元年五月元帝崩六月己未太子即皇帝位绥和二年三月丙戌帝崩于未央宫四月己卯葬延陵【着纪二十六年壽四十五】諡【安民立政曰成】
年号【建始四年 河平四年 阳朔四年 鸿嘉四年 永始四年 元延四年 绥和二年】丞相【匡衡 王商 张禹 薛宣 翟方进 孔光】大司马【许嘉 王凤 王音 王商 王根 王莽 师舟】御史大夫【张沆 尹忠 张忠 王音 于永 薛宣 王骏 翟方进 孔光 何武】大司空【何武 师丹】

孝哀皇帝【讳欣之字曰喜】元帝庶孙定陶恭王子也【母曰丁姬】年三岁嗣立为王元

延五年立为皇太子绥和二年三月成帝崩四月丙午太子即皇帝位元壽二年六月戊午帝崩于未央宫秋九月壬寅葬义陵【着纪六年壽二十六】諡【恭仁短折曰哀】年号【建平四年 元壽二年】

大傅【孔光】

丞相【孔光 朱博 平当】

大司徒【马宫】

大司马【傅喜 丁明 王嘉 傅晏 韦赏 董贤王莽】大司空【朱博 彭宣 王崇】

御史大夫【朱博 赵元 平当 王嘉 王崇 贾延孔光 何武 彭宣】孝平皇帝【讳衍字曰乐】元帝庶孙中山孝王子也【母曰卫姬】年三岁嗣立为王元壽二年六月哀帝崩太皇太后遣车骑将军王舜大鸿胪左咸使持节迎中山王九月辛酉中山王即皇帝位帝年九岁太皇太后临朝大司马莽秉政百官总已以听於莽元始二年更名【平帝本名箕子今更名衍】告祠高庙五年十二月丙午帝崩于未央宫【汉注云帝春秋益壮以母卫太后故怨不悦莽自知益疎篡弑之谋由是生图到腊日置酒药中弑帝】有司议曰礼臣不殇君皇帝年十有四岁宜以礼敛加元服奏可葬康陵【着纪五年壽十有四】諡【布纲治纪曰平】

年号【元始五年】

太师【孔光】

太傅【王莽】

太保【王舜】

大司徒【马宫 平晏】

大司空【王崇 甄丰】

西汉会要卷一

卷二

钦定四库全书

西汉会要卷二

宋 徐天麟 撰

帝系二

太皇太后皇太后皇后

汉兴因秦之称号帝母称皇太后祖母称太皇太后适称皇后妾皆称夫人【外戚传】

昭灵后高祖母媼也尝息大泽之陂梦与神遇是时雷电晦冥太公往视则见蛟龙於上已而有娠遂产高祖高祖即位追尊母媼为昭灵夫人【汉仪注云高祖母兵起时死小黄北後葬於小黄作陵庙】吕后七年尊曰昭灵后【以本纪修】

高祖吕皇后【见帝号】

高祖薄姬生文帝年八岁立为代王出从子之代为代太后文帝即位尊太后为皇太后孝景即位尊为太皇太后前二年崩葬南陵【以外戚传及本纪修下同】

孝惠张皇后宣平侯敖尚帝姊鲁元公主有女惠帝即位吕太后欲为重亲以公主女配帝为皇后吕太后崩废处北宫孝文後元年薨葬安陵不起坟

孝文窦皇后景帝母也吕太后时以良家子选入宫太后出宫人以赐诸王各五人误置籍代伍中代王独幸窦姬生景帝文帝立数月公卿请立太子而窦姬男最长立为太子而窦姬为皇后景帝即位尊为皇太后建元六年崩合葬霸陵

孝景薄皇后孝文薄太后家女也景帝为太子时薄太后取以为太子妃景帝立立薄妃为皇后无子立六年薄太后崩皇后废後四年薨葬长安城东平望亭南孝景王皇后武帝母也嫁为金王孙妇生一女矣母臧儿卜筮曰两女当贵欲倚两女夺金氏纳太子宫生三女一男男方在身时王夫人梦日入其怀以告太子太子曰此贵兆也未生而文帝崩景帝即位王夫人生男会薄皇后废立王夫人为皇后立九年景帝崩武帝即位为皇太后元朔三年崩合葬阳陵

孝武陈皇后长公主嫖女也【嫖窦太后女也】初武帝得立为太子长主有力取主女为妃及帝即位立为皇后元光五年赐皇后策曰皇后失序惑於巫祝不可以承天命其上玺绶罢

退居长门宫後数年薨葬霸陵郎官亭东孝武卫皇后字子夫为平阳主讴者武帝拔霸上还过平阳主既饮讴者进帝独说子夫主因奏送入宫元朔元年生男据遂立为皇后皇后立七年而男立为太子卫后立三十八年巫蛊事起皇后自杀宣帝立乃改葬谥曰思后置园邑三百家长丞周卫奉守焉

孝武赵婕妤昭帝母也武帝巡狩过河间望气者言此有奇女天子亟使使召之既至女两手皆拳上自披之手即时伸由是得幸号曰拳夫人进为婕妤居钩弋宫大有宠生昭帝号钩弋子任身十四月乃生上曰闻昔尧十四月而生今钩弋亦然乃命其所生门曰尧母门婕妤从幸甘泉有过见谴以忧死因葬云阳後上疾病乃立钩弋子为皇太子明日帝崩昭帝即位追尊婕妤为皇太后发卒二万人起云陵邑

孝昭上官皇后祖父桀受武帝遗诏辅少主昭帝初立年八岁桀子安有女即霍光外孙因帝姊鄂邑盖长公主内安女後宫为婕妤月余遂立为皇后年甫六岁後桀安谋废立事发觉宗族既灭皇后以年少不与谋亦光外孙故得不废皇后立十岁而昭帝崩后年十四五云昌邑王即位尊为皇太后宣帝即位为太皇太后凡立四十七年卒年五十二建昭二年合葬平陵

宣帝祖母戾后本卫太子史良娣也巫蛊事起遇害宣帝即位追尊曰戾后

宣帝母悼后本史皇孙王夫人也名翁须生宣帝数月卫太子败家人子皆坐诛宣帝即位追尊母王夫人谥曰悼后与祖母戾后皆改葬起园邑长丞奉守

孝宣许皇后元帝母也父广汉坐论为鬼薪时宣帝养於掖庭号皇曾孙与广汉同寺居广汉有女平君年十四五当为欧侯氏子妇临当入欧侯氏子死遂与曾孙一岁生元帝数月曾孙立为帝平君为婕妤公卿议立皇后大臣白立许婕妤霍光夫人显欲贵其小女道无从明年许皇后当娠显使女医淳于衍以附子并合大医大丸以饮皇后有顷曰我头岑岑也药中得无有毒遂崩谥曰恭哀皇后葬杜南是为杜陵南园

孝宣霍皇后大司马大将军博陆侯光女也母显既使淳于衍陰杀许后显劝光纳之果立为皇后立三岁而光薨上立许后男为太子显恚不食呕血复教皇后令毒太子皇后数召太子赐食阿保辄先尝之后挟毒不得行後杀许后事颇泄显与诸壻兄弟谋反发觉皆诛灭后废处昭台宫後十二岁徙云林馆乃自杀葬昆吾亭东

孝宣王皇后父奉光宣帝在民间数与奉光会有女十余岁每当适人所当适辄死宣帝即位召入後宫为婕妤霍皇后废後上怜许太子蚤失母於是选後宫素谨而无子者遂立王婕妤为皇后令母养太子自为后後希见无宠封父奉光为邛成侯立十六年宣帝崩元帝即位为皇太后成帝即位为太皇太后成帝母亦姓王氏故世号太皇太后为邛成太后凡立四十九年年七十余永始元年崩合葬杜陵称东园

孝元王皇后成帝母王莽之姑也五凤中献入掖庭宣帝选送太子宫生成帝字大孙宣帝崩

太子即位是为元帝立大孙为太子以母王妃为婕妤後三日立为皇后元帝崩太子立是为成帝尊皇后为皇太后哀帝即位为太皇太后哀帝崩无子太皇太后以莽为大司马共立中山王是为平帝平帝年九岁常年被疾太后临朝委政於莽莽践祚居摄太后力不能禁及莽即位更命太皇太后为新室文母年八十四建国五年崩合葬渭陵

孝元傅皇后哀帝祖母也少为上宫太后才人自元帝为太子得进幸元帝即位立为婕妤生定陶恭王更号昭仪元帝崩傅昭仪随王归国称定陶太后恭王薨子代为王王母曰丁姬太后躬自养视成帝无继嗣遂立定陶王为太子哀帝即位尊定陶恭王为恭皇哀帝傅太后为恭皇太后岁余尊为帝太太后丁姬为帝太后後又更帝太太后为皇太后称永信宫帝太后称中安宫而成帝母太皇太后本称长信宫成帝赵后为皇太后并四太后各置少府太仆元壽元年崩合葬渭陵称老元傅皇后云

孝成许皇后大司马车骑将军平恩侯嘉女也元帝悼伤母恭哀后居位日浅而遭霍氏之辜故选嘉女以配皇太子成帝即位立为皇后是时大将军凤用事威权尤盛其後比三年日蚀言事者颇归咎於凤矣而永谷等遂着之许氏后姊为媚道祝诅事发觉许后坐废处昭台宫後九年赐药自杀

孝成赵皇后本长安宫人号曰飞燕成帝召入宫大幸有女弟复召入俱为婕妤许后废乃立婕妤为皇后弟为昭仪姊弟颛宠十余年卒皆无子成帝崩民间归罪赵昭仪皇太后诏治问皇帝起居发病状昭仪自杀哀帝立尊赵皇后为皇太后哀帝崩王莽白太后贬皇太后为孝成皇后徙居北宫後月余废为庶人是日自杀哀帝母丁太后定陶恭王姬也哀帝即位尊恭王为恭哀皇帝丁姬爲恭皇后後又更为帝太后建平二年丁太后崩上令起陵恭皇之园哀帝崩王莽秉政使有司奏举丁傅罪恶贬傅太后号为定陶恭王母丁太后号曰丁姬又奏发恭王母及丁姬冢取其玺绶莽又周棘其处以为世戒云

孝哀傅皇后定陶太后从弟子也哀帝为定陶王时傅太后欲重亲取以配王王入为汉太子傅氏女为妃哀帝即位为皇后帝崩王莽白太皇太后废为庶人自杀孝平王皇后安汉公莽女也平帝即位年九岁成帝母太皇太后称制而莽秉政欲依霍光故事以女配帝太后不得已而许之明年遣大司徒宫等奉乘輿法驾迎皇后於安汉公第后立岁余平帝崩莽立子婴尊皇后为皇太后莽即真以婴为定安公改皇太后为定安公太后太后时年十八矣汉兵诛莽自投火中而死

杂录

皇太后皇后公主所食曰邑【百官表】

成帝即位匡衡上疏曰匹配之际生民之始万福之原婚姻之礼正然後品物遂而天命全孔子论诗以关雎为始言夫上者民之父母后夫人之行不侔乎天地则无以奉神灵之统而理万物之宜故诗曰窈窕淑女君子好逑言能致其正淑不貳其操情欲之感无介乎容仪宴私

之意不形乎动静夫然後可以配至尊而为宗庙主此纲纪之首王教之端也自上世以来三代兴废未有不由此者也愿陛下详览得失盛衰之效以定大基采有德戒声色近严敬远技能【匡衡传】

自上为太子时以好色闻及即位皇太后诏采良家女杜钦因是说大将军凤曰礼壹取九女所以极阳数广嗣重祖也必乡举求窈窕不问华色所以助德理内也娣侄虽缺不复补所以养寿塞争也故后妃有正淑之行则继嗣有贤圣之君制度有威仪之节则人君有寿考之福废而不由则女德不厌女德不厌则寿命不究於高年书云或四三年言失欲之生害也男子五十好色未衰妇人四十容貌改前以改前之容侍於未衰之年而不以礼为制则其原不可救而後徠异态後徠异态则正后自疑而支庶有间适之心是以晋献被纳谗之谤申生蒙无罪之辜今圣主富於春秋未有适嗣方乡术入学未来后妃之议将军辅政宜因始初之隆建九女之制详择有行义之家求淑女之质母有必声色音技能为万世大法夫少戒之在色小弁之作可为寒心唯将军常以为忧凤白之太后太后以为故事无有钦复重言诗云殷鉴不远在夏后氏之世刺戒者至迫近而省听者常怠忽可不谨哉前言九女略陈其祸福甚可悼惧窃恐将军不深留意后妃之制夭寿治乱存亡之端也迹三代之季世览宗宣之飨国察近属之符验祸败曷常不由女德是以佩玉晏鸣关雎叹之知好色之伐性短年离制度之生无厌天下将蒙化凌夷而成俗也故咏淑女几以配上忠孝之笃仁厚之作也夫君亲寿尊国家治安诚臣子之至愿所当勉之也易曰正其本万物理凡事论有疑未可立行者求之往古则典刑无考之来今则吉凶同卒摇易之则民心惑若是者诚难施也今九女之制合於往古无害於今不逆於民心至易行也行之至有福也将军辅政而不蚤定非天下之所望也唯将军信臣子之愿念关雎之思逮委政之隆及始初清明为汉家建无穷之基诚难以忽不可以遯凤不能自立法度循故事而已【杜钦传】

河平元年夏四月己亥晦日有食之诏公卿百僚陈过失无有所讳光禄大夫刘向对曰四月交於五月月同孝惠日同孝昭其占恐害继嗣是时许皇后专宠後宫希得进见中外皆忧上无继嗣故杜钦谷永及向所对皆及之上於是减省椒房掖庭用度服御舆驾所发诸宫官府及所造作遗赐外家羣臣妾皆如竟宁以前故事皇后上疏自陈以为时世异制长短相补不出汉制而已纖微之间未必可同若竟宁前与黄龙前岂相放哉家吏不晓今壹受诏如此且使妾摇手不得设妾欲作某屏风张於某所曰故事无有或不能得则必绳妾以诏书矣此诚不可行唯陛下省察故事以特牛嗣大父母戴侯敬侯皆得蒙恩以太牢祠今当率如故事唯陛下哀之今吏甫受诏读记直豫言使后知之非可复若私府有所取也其萌牙所以约制妾者恐失人理唯陛下深察焉上於是采谷永刘向所言灾异咎验皆在後宫之意以报之且曰吏拘於灋亦安足过盖矫枉者过直古今同之且财币之省特牛之祠其於皇后所以扶助德美为华宠也咎根不除灾变相袭祖宗且不血食何戴侯也传不云虐以约失之者鲜审皇后欲从其奢与朕亦当灋孝武皇帝也如此则甘泉建章可复兴矣孝文皇帝朕之师也皇太后皇后成灋也假使太后在彼时不如职今见亲厚又恶可以踰虐皇后其刻心秉德谦约为右垂则列妾使有灋焉【外戚传】

永始元年帝欲立赵婕妤为皇后先下诏封婕妤父临为列侯刘辅上书言臣闻天之所与必

先赐以符瑞天之所违必先降以灾变此神明之徵应自然之占验也昔武王周公承顺天地以飨鱼鸟之瑞然犹君臣祇惧动色相戒况於季世不蒙继嗣之福屡受威怒之异者虜虽夙夜自责改过易行畏天命念祖业妙选有德之世考卜窈窕之女以承宗庙顺神祇心塞天下望子孙之祥犹恐晚暮今乃触情从欲倾於卑贱之女欲以母天下不畏于天不媿于人惑莫大焉里语曰腐木不可以为柱卑人不可以为主天人之所不予必有祸而无福市道皆共知之朝廷莫肯壹言臣窃伤心自念得以同姓拔擢尸禄不忠污辱谏争之官不敢不尽死唯陛下深察书奏上使侍御史收缚辅繫掖庭秘狱【刘辅传】初哀帝即位成帝母称太皇太后成帝赵皇后称皇太后而上祖母傅太后与母丁后皆在国邸自以定陶共王为称高昌侯董宏上书言秦庄襄王母本夏氏而为华阳夫人所子及即位後俱称太后宜立定陶共王后为皇太后事下有司时师丹以左将军与大司马王莽共劾奏宏知皇太后至尊之号天下一统而称引亡秦以为比喻诖误圣朝非所宜言大不道上新立谦逊纳用莽丹言免宏为庶人傅太后大怒要上欲必称尊号上於是追尊定陶共王为共皇帝尊傅太后为共皇太后丁后为共皇后郎中令冷褒黄门郎段犹等复奏言定陶共皇太后共皇后皆不宜复引定陶蕃国之名以冠大号车马衣服宜皆称皇之意置吏二千石以下各共厥职又宜为共皇立庙京师上复下其议有司皆以为宜如褒犹言丹议独曰圣王制礼取法於天地故尊卑之礼明则人伦之序正人伦之序正则乾坤得其位而陰阳顺其节人主与万民俱蒙佑福尊卑者所以正天地之位不可乱也今定陶共皇太后共皇后以定陶共为号者母从子妻从夫之义也欲立官置吏车服与太皇太后并非所以明尊卑亡二上之义也定陶共皇号谥已前定义不得复改【师丹传】

三宫【王嘉传贡献三宫师古曰三宫天子太后皇后也】

两宫【五行志两宫亲属师古曰谓太后家王氏皇后家赵氏故云亲属】

东宫【刘向传依东宫之尊师古曰东宫太子所居也】

中宫【哀纪食邑如中宫师古曰中宫皇后之宫】

东朝【灌夫传东朝廷办之如淳曰东朝太后朝也】

永信宫中安宫长信宫【传昭仪皇太太后称永信宫帝太后称中安宫成帝母太皇太后称长信宫】

椒房【车千秋传未央椒房师古曰椒房殿名皇后所居也以椒和泥涂壁取其温而芳也】

青蒲【史丹传应劭曰青蒲非皇后不得至此】

西汉会要卷二

卷三

钦定四库全书

西汉会要卷三

宋 徐天麟 撰

帝系三

皇太子

汉二年六月立太子赦罪人【高纪】

五年汉王即皇帝位太子曰皇太子【高纪】

惠帝即位太后立帝姊鲁元公主女为皇后无子取後宫美人子名之以为太子【高后纪】

孝文元年正月有司请蚤建太子所以尊宗庙也诏曰朕既不德上帝神明未歆飨也天下人民未有志今从不能博求天下贤圣有德之人而嬗天下焉而曰豫建太子是重吾不德也谓天下何其安之有司曰豫建太子所重宗庙社稷不忘天下也上曰楚王季父也春秋高閼天下之义理多矣明於国家之体吴王於朕兄也淮南王弟也皆秉德以陪朕岂为不豫哉诸侯王宗室昆弟有功臣多贤及有德义者若举有德以陪朕之不能终是社稷之灵天下之福也今不选举焉而曰必子人其以朕为忘贤有德者而专於子非所以忧天下也朕甚不取有司固请曰古者殷周有国治安皆且千岁有天下者莫长焉用此道也立嗣必子所从来远矣高帝始平天下建诸侯为帝者太祖诸侯王列侯始受国者亦皆为其国祖子孙继嗣世世不絶天下之大义也故高帝设之以抚海内今释宜建而更选於诸侯宗室非高帝之志也更议不宜子启最长敦厚慈仁请建以为太子上乃许之因赐天下民当为父後者爵一级【本纪】

孝景四年立皇子荣为皇太子【本纪】

七年正月废皇太子荣为临江王四月丁巳立皇子彻为皇太子赐民为父後者爵一级【本纪】

孝武元狩元年夏四月丁卯立皇太子赐中二千石爵右庶长民为父後者一级【本纪】

征和二年七月按道侯韩说使者江充等掘蛊太子宫壬午太子与皇后谋斩充以节发兵与丞相刘屈氂大战长安死者数万人庚寅太子亡皇后自杀八月辛亥太子自杀于湖【本纪】

武帝末戾太子败燕王旦广陵王胥行骄嫚後元三年二月上疾病遂立昭帝为太子年八岁明日武帝崩太子即皇帝位【昭纪】

孝宣地节三年立皇太子大赦天下赐御史大夫爵关内侯二千石爵右庶长天下当为父後者爵一级【本纪】五凤元年正月皇太子冠皇太后赐丞相将军列侯中二千石帛人百匹大夫人八十匹夫人六十匹又赐列侯嗣子爵五大夫男子为父後者爵一级【本纪】

孝成皇帝元帝太子也母曰王皇后元帝在太子宫生甲观画堂为世嫡皇孙宣帝爱之字曰太孙常置左右年三岁而宣帝崩元帝即位帝为太子壮好经书寬博谨慎初居桂宫上尝急召太子出龙楼门不敢絶驰道西至直城门得絶及度还入作室门上迟之问其故以状对上大说乃着令令太子得絶驰道云其後幸酒乐燕乐上不以为能而定陶恭王有材艺母傅昭仪又爱幸上以故常有意欲以恭王为嗣赖侍中史丹护太子家辅助有力上亦以先帝尤爱太子故得无废竟宁元年五月元帝崩六月己未太子即皇帝位【成纪】

成帝绥和元年二月癸丑诏曰朕承太祖鸿业奉宗庙二十五年德不能绥理宇内百姓怨望者衆不蒙天佑至今未有继嗣天下无所系心观于往古近事之戒祸乱之萌皆由斯焉定陶王欣於朕为子慈仁孝顺可以承天序继祭祀其立欣爲皇太子封中山王舅諫大夫冯参为宜乡侯益中山国三万户以慰其意赐诸侯王列侯金天下当为父後者爵三老孝弟力田帛各有差【纪同上】孝哀皇帝元帝庶孙定陶恭王子也母曰丁姬年三岁嗣立为王长好文辞法律元延四年入朝尽从傅相中尉时成帝少弟中山孝王亦来朝独从傅上怪之以问定陶王对曰令诸侯王朝得从其国二千石傅相中尉皆国二千石故尽从之上令诵诗通习能说他说日问中山王独从傅在何法令不能对令诵尚书又废及赐食於前後饱起下韞系解成帝由此以为不能而贤定陶王数称其材时王祖母傅太后随王来朝私赂遗上所幸赵昭仪及帝舅票骑将军曲阳侯王根昭仪及根见上亡子亦欲豫自结为长久计皆更称定陶王劝帝以为嗣成帝亦自美其材为加元服而遣之时年十七矣明年使执金吾任宏守大鸿臚持节召定陶王立为皇太子谢曰臣幸得继父守藩为诸侯王材质不足以假充太子之宫陛下圣德寬仁敬承祖宗奉顺神祇宜蒙福佑子孙千亿之报臣愿且得留国邸旦夕奉问起居俟有圣嗣归国守藩书奏天子报闻後月余立楚孝王孙景为定陶王奉恭王祀所以獎厉太子专为後之谊【哀纪】

杂录【上】

高帝欲废太子立戚夫人子赵王如意大臣多争未能得坚决也吕后恐不知所为或谓吕后曰留侯善画计上信用之吕后乃使建成侯吕泽劫良曰君常为上谋臣今上日欲易太子君安得高枕而卧良曰始上数在急困之中幸用臣策今天下安定以爱欲易太子骨肉之间虽臣等百人何益吕泽强要曰为我画计良曰此难以口舌争也顾上有所不能致者四人四人老年矣皆以上嫚侮士故逃匿山中义不为汉臣然上高此四人今公诚能毋爱金玉璧帛令太子为书卑辞安车因使辩士固请宜来来以为客时从入朝令上见之则一助也於是吕后令吕泽使人奉太子书卑辞厚礼迎此四人四人至客建成侯所汉十一年黥布反上疾欲使

太子往繫之四人相谓曰凡来者将以存太子太子将兵事危矣乃说建成侯曰太子将兵有功即位不益无功则从此受祸且太子所与俱诸将皆与上定天下梟将也今乃使太子将之此无异使羊将狼皆不肯为用其无功必矣臣闻母爱者子抱今戚夫人日夜侍御赵王常居前上终不使不肖子居爱子上明其代太子位必矣君何不急请吕后承间为上泣言黥布天下猛将善用兵今诸将皆陛下故等夷乃令太子将此属莫肯为用且布闻之鼓行而西耳上虽疾强载辎车卧而护之诸将不敢不尽力上虽苦强为妻子计於是吕泽夜见吕后吕后承间为上泣而言如四人意上曰吾惟之孺子固不足遣乃公自行耳於是上自将而东羣臣居守皆送至霸上良疾强起至曲邮见上曰臣宜从疾甚楚人剽疾愿上谨毋与楚争锋因说上令太子为将军监关中兵上谓子房虽疾强卧傅太子是时叔孙通已为太傅良行少傅事汉十二年上从破布归疾益甚愈欲易太子良諫不听因疾不视事叔孙通太傅称说引古以死争太子上阳许之犹欲易之及宴置酒太子侍四人者从太子年皆八十有余须眉皓白衣冠甚伟上怪问曰何为者四人前对各言其姓名上乃惊曰吾求公避逃我今公何自从吾儿游乎四人曰陛下轻士善骂臣等义不辱故恐而亡匿今闻太子仁孝恭敬爱士莫不延颈愿为太子死者故臣等来上曰烦公幸卒调护太子四人为壽已毕趋去上目送之召戚夫人指视曰我欲易之彼四人为之辅羽翼已成难动矣吕氏真乃主矣【张良传】

叔孙通为太子太傅高帝欲以赵王如意易太子通諫曰昔者晋献公以骊姬故废太子立奚齐晋国乱者数十年为天下笑秦以不早定扶苏胡亥诈立自使灭祀此陛下所亲见今太子仁孝天下皆闻之吕后与陛下攻苦食啖【师古曰当作淡】其可背哉陛下必欲废适而立少臣愿先伏诛以颈血污地高帝曰公罢矣吾特戏耳通曰太子天下本本壹摇天下震动奈何以天下戏高帝曰吾听公及上置酒见留侯所招客从太子入见上遂无易太子志矣【叔孙通传】

高帝欲废太子而立戚姬子如意为太子大臣固争莫能得上以留侯策止而周昌庭争之强上问其说昌为人吃又盛怒曰臣口不能言然臣期期知其不可陛下欲废太子臣期期不奉诏上欣然而笑即罢吕后侧耳於东厢听见昌为跪谢曰微君太子几废【周昌传】

孝文时晁错为太子舍人门大夫迁博士上书言人主所以尊显功名扬於万世之後者以知术数也故人主知所以临制臣下而治其衆则羣臣畏服矣知所以听言受事则不欺蔽矣知所以安利万民则海内必从矣知所以忠孝事上则臣子之行备矣此四者臣窃为皇太子急之人臣之议或者皇太子亡以知事为也臣之愚诚以为不然窃观上世之君不能奉其宗庙而劫杀於其臣者皆不知术数者也皇太子所读书多矣而未深知术数者不问书说也夫多诵而不知其说所谓劳苦而不为功臣窃观皇太子材智高奇馭射伎艺过人絶远然於术数未有所守者以陛下为心也窃愿陛下幸择圣人之术可用今世者以赐皇太子因时使太子陈明於前唯陛下裁察上善之於是拜错为太子家令以其辩得幸太子太子家号曰智囊【晁错传】

文帝时贾谊上书曰古之王者太子乃生因举以礼使士负之有司齐肃端冕见之南郊见于天也过阙则下过庙则趋孝子之道也故自为赤子而教固已行矣昔者成王幼在襁抱之中

召公为太保周公为太傅太公为太师保其身体傅傅之惠义师道之教训此三公之职也於是置三少皆上大夫也曰少保少傅少师是与太子宴者也故乃孩提有识三公三少固明孝仁礼义以道习之逐去邪人不使见恶行於是皆选天下之端士孝悌博闻有道术者以卫翼之使与太子居处出入故太子乃生而见正事闻正言行正道左右前後皆正人也夫习与正人居之不能毋正犹生长於齐不能不齐言也习与不正人居之不能毋不正犹生长於楚之地不能不楚言也故择其所耆必先受业乃得尝之择其所乐必先有习乃得为之孔子曰少成若天性习贯如自然及太子少长知妃色则入于学学者所学之官也及太子既冠成人免於保傅之严则有记过之史彻膳之宰进善之旌诽谤之木敢谏之鼓瞽史诵诗工诵箴谏大夫进谋士传民语习与智长故切而不媿化与心成故中道若性三代之礼春朝朝日秋暮夕月所以明有敬也春秋入学坐国老执酱而亲馈之所以明有孝也行以鸾和步中采齐趣中肆夏所以明有度也其於禽兽见其生不见其死闻其声不食其肉故远庖厨所以长恩且明有仁也夫三代之所以长久者以其辅翼太子有此具也天下之命垂於太子太子之善在於早谕教与选左右夫心未滥而先谕教则化易成也开於道术智谊之指则教之力也若其服习积贯则左右而已臣故曰选左右早谕教最急夫教得而左右正则太子正矣太子正而天下定矣【贾谊传】

太子与梁王共车入朝不下司马门张释之追止太子梁王毋入殿门遂劾不下公门不敬奏之薄太后闻之文帝免冠谢曰教儿子不谨薄太后使使承诏赦太子梁王然後得入文帝由是奇释之【张释之传】

西汉会要卷三

<史部,政书类,通制之属,西汉会要>

卷四

钦定四库全书

西汉会要卷四

宋 徐天麟 撰

帝系四

皇太子下【杂录下】

孝景前三年梁孝王入朝是时上未置太子与梁王言曰千秋万岁後传於王王辞谢虽知非至言然心内喜明年汉立太子前七年上废栗太子太后心欲以梁王为嗣大臣及爰盎等有所关说於帝太后议格孝王不敢复言太后以嗣事【文三王传】

景帝弟梁孝王母窦太后爱之孝王朝因燕昆弟饮是时上未立太子酒酣上从容曰千秋万岁後传王太后驩窦婴引卮酒进上曰天下者高祖天下父子相传汉之约也上何得以传梁王太后由此憎婴婴亦薄其官【窦婴传】

武帝春秋二十九乃得皇子枚臯与东方朔作皇太子生赋及立皇子襍祝受诏所为皆不从故事重皇子也【枚乘传】

孝武皇帝六男卫皇后生戾太子据元狩元年立为皇太子年七岁矣初上年二十九乃得太子甚喜为立襍使东方朔枚臯作襍祝少壮诏受公羊春秋又从瑕丘江公受谷梁及冠就宫上为立博望苑使通宾客从其所好故多以异端进者武帝末卫后宠衰江充用事充与太子及卫氏有隙恐上晏驾後为太子所诛会巫蛊事起充因此为奸是时上春秋高意多所恶以为左右皆为蛊道祝诅穷治其事丞相公孙贺父子阳石诸邑公主及皇后弟子长平侯卫伉皆坐诛充典治巫蛊既知上意白言宫中有蛊气入宫至省中坏御座掘地上使按道侯韩说御史章赣黄门苏文等助充充遂至太子宫掘蛊得桐木人时上疾辟暑甘泉宫独皇后太子在太子召问少傅石德德惧为师傅并诛因谓太子曰前丞相父子两公主及卫氏皆坐此今巫与使者掘地得徵验不知巫置之邪将实有也无以自明可矫以节收捕充等系狱穷治其奸诈且上疾在甘泉皇后及家吏请问皆不报上存亡未可知而奸臣如此太子将不念秦扶苏事邪太子急然德言征和二年七月壬午乃使客为使者收捕充等按道侯说疑使者有诈不肯受诏客格杀说御史章赣被创突亡自归甘泉太子使舍人无且持节夜入未央宫殿长秋门因长御倚华具白皇后发中廋车载射士出武库兵发长乐宫卫告令百官曰江充反乃斩充以徇炙胡巫上林中遂部宾客为将率与丞相刘屈氂等战长安中扰乱言太子反以故衆不附太子兵败亡不得上怒甚羣下忧惧不知所出壶关三老茂上书曰臣闻父者犹天母者犹地子犹万物也故天平地安陰阳和调物乃茂成父慈母爱家室之中子乃孝顺陰阳不

和则万物夭伤父子不和则室家丧亡故父不父则子不子君不君则臣不臣虽有粟吾岂得而食诸昔者虞舜孝之至也而不中於瞽叟孝已被谤伯奇放流骨肉至亲父子相疑何者积毁之所生也由是观之子无不孝而父有不察今皇太子为汉适嗣承万世之业体祖宗之重亲则皇帝之宗子也江充布衣之人间阎之隶臣耳陛下显而用之銜至尊之命以迫釐皇太子造饰奸诈羣邪错谬是以亲戚之路隔塞而不通太子进则不得上见退则困於乱臣独冤结而亡告不忍忿忿之心起而杀充恐惧逋逃子盗父兵以救难自免耳臣窃以为无邪心诗曰营营青蝇止于藩岂弟君子无信谗言谗人罔极交乱四国往者江充谗杀赵太子天下莫不闻其罪固宜陛下不省察深过太子发盛怒举大兵而求之三公自将智者不敢言辩士不敢说臣窃痛之臣闻子胥尽忠而忘其号比干尽仁而遗其身忠臣竭诚不顾鈇钺之诛以陈其愚志在正君安社稷也诗云取彼谗人投畀豺虎唯陛下寛心慰意少察所亲母患太子之非亟罢甲兵无令太子久亡臣不胜惓惓出一旦之命待罪建章阙下书奏天子感寤太子之亡也东至湖藏匿泉鸠里主人家贫常卖屨以给太子太子有故人在湖闻其富贍使人呼之而发觉吏围捕太子太子自度不能脱即入室距户自经山阳男子张富昌为卒足蹋开户新安令史李壽趋抱解太子主人公遂格鬪死皇孙二人皆并遇害上既伤太子乃下诏曰盖行疑赏所以申信也其封李壽为侯张富昌为侯侯久之巫蛊事多不信上知太子惶恐无他意而田千秋复讼太子冤上遂擢千秋为丞相而族灭江充家焚苏文於横桥上及泉鸠里加兵刃於太子者初为北地太守後族上怜太子无辜乃作思子宫为归来望思之台於湖天下闻而悲之【戾太子传】宣帝地节三年立皇太子选丙吉为太傅疏广为少傅数月吉迁御史大夫广徙为太傅广兄子受字公子亦以贤良举为太子家令受好礼恭谨敏而有辞宣帝幸太子宫受迎谒应对及置酒宴奉觴上壽辞理闲雅上甚驩说顷之拜受为少傅太子外祖父特进平恩侯许伯以为太子少白使其弟中郎将舜监护太子家上以问广广对曰太子国储副君师友必於天下英俊不宜独亲外家许氏且太子自有太傅少傅官属已备今复使舜护太子家亲陋非所以广太子德於天下也上善其言以语丞相魏相相免冠谢曰此非臣等所能及广繇是见器重数受赏赐太子每朝因进见太傅在前少傅在後父子并为师傅朝廷以为荣【疏广传】

太子既壮大柔仁好儒见宣帝所用多文法吏以刑名绳下大臣杨惲盖寛饶等坐刺讥辞语为罪而诛尝侍燕从容言陛下持刑太深宜用儒生宣帝作色曰汉家自有制度本以霸王道杂之奈何纯任德教用周政乎且俗儒不达时宜好是古非今使人眩於名实不知所守何足委任乃叹曰乱我家者太子也繇是疏太子而爱淮阳王曰淮阳王明察好法宜为吾子而王母张婕妤尤幸上有意欲用淮阳王代太子然以少依许氏俱从微起故终不背焉【元纪】

张婕妤有宠於宣帝霍皇后废後上欲立张婕妤为后久之惩艾霍氏欲害皇太子乃更选後宫无子而谨重者乃立长陵王婕妤为后令母养太子后无宠希御见唯婕妤最幸子淮阳宪王壮大好经书法律聪达有材帝甚爱之太子寛仁喜儒术上嗟叹宪王曰真我子也尝有意欲立张婕妤与宪王然因太子起於微细上少依倚许氏及即位而许后以弑死太子蚤失母故弗忍也久之上以韦玄成逊侯兄经明行高称於朝廷乃召拜玄成为淮阳中尉欲感谕宪王辅以推逊之臣由是太子遂安【淮阳宪王传】

元帝即位史丹为驸马都尉侍中出常骖乘甚有宠上以丹旧臣皇考外属亲信之诏丹护太子家是时傅昭仪子定陶共王有材艺子母俱爱幸而太子颇有酒色之失母王皇后无宠建昭之间元帝被疾不亲政事留好音乐或置鼙鼓殿下天子自临轩槛上墮铜丸以撻鼓声中严鼓之节後宫及左右习知音者莫能为而定陶王亦能之上数称其材丹进曰凡所谓材者敏而好学温故知新皇太子是也若乃器人於丝竹鼓鼙之间则是陈惠李微高於匡衡可相国也於是上嘿然而笑其後中山哀王薨太子前吊哀王者帝之少弟与太子游学相长大上望见太子感念哀王悲不能自止太子既至前不哀上大恨曰安有人不慈仁而可奉宗庙为民父母者乎上以责谓丹丹免冠谢上曰臣诚见陛下哀痛中山王至以感损向者太子当进见臣窃戒属毋涕泣感伤陛下罪乃在臣当死上以为然意乃解丹之辅相皆此类也竟宁元年上寝疾傅昭仪及定陶王常在左右而皇太子希得进见上疾稍侵意忽忽不平数问尚书以景帝时立胶东王故事是时太子长舅阳平侯王凤为卫尉侍中与皇太子皆忧不知所出丹以亲密臣得侍视疾候上间独寝时丹直入卧内顿首伏青蒲上涕泣言曰皇太子以适长立积十余年名号系於百姓天下莫不归心臣子见定陶王雅素爱幸今者道路流言为国生意以为太子有动摇之议审若此公卿以下必以死争不奉诏臣愿先赐死以示羣臣天子素仁不忍见丹涕泣言又切至上意大感喟然太息曰吾日困劣而太子两王幼少意中恋恋亦何不念乎然无有此议且皇后谨慎先帝又爱太子吾岂可违指驸马都尉安所受此语丹即却顿首曰愚臣妄闻罪当死上因纳谓丹曰吾病寢加恐不能自还善辅道太子毋违我意丹嘘唏而起太子由是遂为嗣矣【史丹传】

绥和中上即位二十五年无继嗣至亲有同产弟中山孝王及同产弟子定陶王在定陶王好学多材於帝子行而王祖母傅太后陰为王求汉嗣私事赵皇后昭仪及帝舅大司马骠骑将军王根故皆劝上上於是召丞相翟方进御史大夫光右将军廉褒後将军朱博皆引入禁中议中山定陶王谁可为嗣者方进根以为定陶王帝弟之子礼曰昆弟之子犹子也为其後者为之子也定陶王宜为嗣褒博皆如方进根议孔光独以为礼立嗣以亲中山王先帝之子帝亲弟也以尚书般庚殷之及王为比中山王宜为嗣上以礼兄弟不相入庙又皇后昭仪欲立陶王故遂立为太子光以议不中意左迁廷尉【孔光传】

皇子

太上皇四男高祖兄伯蚤卒追封武哀侯高后六年追封武哀王次兄仲名喜初封宜信侯汉六年立为代王匈奴攻代仲弃国自归天子不忍致法废为合阳侯楚元王交高祖同父少弟也自有传【以本纪及吴王濞传修】

高皇帝八男吕后生孝惠帝曹夫人生齐悼惠王肥薄姬生孝文帝戚夫人生赵隐王如意赵姬生淮南厉王长诸姬生赵幽王友赵共王恢燕灵王建【高五王传】

孝文皇帝四男窦皇后生孝景帝梁孝王武诸姬生代孝王参梁怀王揖【文三王传】

孝景皇帝十四男王皇后生孝武皇帝栗姬生临江闵王荣河间献王德临江哀王闳程姬生

鲁共王余江都易王非胶西于王端贾夫人生赵敬肃王彭祖中山靖王胜唐姬生长沙定王发王夫人生广川惠王越胶东康王寄清河哀王乘常山宪王舜【景十三王传】

孝武皇帝六男卫皇后生戾太子赵婕妤生孝昭帝王夫人生齐怀王闾李姬生燕刺王旦广陵厉王胥李夫人生昌邑哀王髡【武五子传】

孝宣皇帝五男许皇后生孝元帝张婕妤生淮阳宪王钦卫婕妤生楚孝王躡公孙婕妤生东平思王宇戎婕妤生中山哀王竟【宣元六王传】

孝元皇帝三男王皇后生孝成帝傅昭仪生定陶共王康冯昭仪生中山孝王兴【宣元六王传】

杂录

五宗【司马迁传作五宗世家师古曰景帝子凡十三人为王而母五人所生迁谓同母者为一宗故云五宗也】

西汉会要卷四

卷五

钦定四库全书

西汉会要卷五

宋 徐天麟 撰

帝系五

诸侯王

汉兴之初海内新定同姓寡少惩戒亡秦孤立之败於是割裂疆土立二等之爵功臣侯者百有余邑尊王子弟大启九国自鴈门以东尽辽阳为燕代常山以南太行左转度河济渐於海为齐赵谷泗以往奄有龟蒙为梁楚东带江湖薄会稽为荆吴北界淮濒略庐衡为淮南波汉之阳亘九嶷为长沙诸侯比境周匝三垂外接胡越天子自有三河东郡颍川南阳自江陵以西至巴蜀北自云中至陇西与京师内史凡十五郡公主列侯颇邑其中而藩国大者跨州兼郡连城数十宫室百官同制京师可谓矫枉过其正矣虽然高祖创业日不暇给孝惠享国又浅高后女主摄位而海内晏如亡狂狡之忧卒折诸吕之难成大宗之业者亦赖之於诸侯也然诸侯原本以大末流滥以致溢小者淫荒越法大者睽孤横逆以害身丧国故文帝采贾生之议分齐赵景帝用鼂错之计析吴楚武帝施主父之册下推恩之令使诸侯王得分户邑以封子弟不行黜陟而藩国自析自此以来齐分为七赵分为六梁分为五淮南分为三皇子始立者大国不过十余城长沙燕代虽有旧名皆亡南北边矣景遭七国之害抑损诸侯减黜其官武有衡山淮南之谋作左官之律设附益之法诸侯惟得衣食税租不与政事至於哀平之际皆继体苗裔亲属疎远生於帷墙之中不为士民所尊执与富室亡异而本朝短世国统三絶是故王莽知汉中外殫微本末俱弱亡所忌憚生其奸心因母后之权假伊周之称顓作威福庙堂之上不降阶序而运天下诈谋既成遂据南面之尊分遣五威之吏驰传天下班行符命汉诸侯王厥角□首奉上玺韞惟恐在後或乃称美颂德以求容媚岂不哀哉【诸侯王表】

杂録

诸侯王金玺螭绶掌治其国【百官表】

高帝王子弟犬牙相制所谓盘石之宗也【文纪】

悼惠之王齐最为大国以海内初定子弟少激秦孤立亡藩辅故大封同姓以填天下时诸侯得自除御史大夫羣卿以下衆官如汉朝汉独为置丞相自吴楚诛後稍夺诸侯权左官附益阿党之法设其後诸侯惟得衣食租税贫者或乘牛车【高五王赞】

高皇帝规土连城布王子孙是以支叶扶疏异姓不得间也【燕刺王传】

文帝时贾谊上疏曰高皇帝以明圣威武即天子位割膏腴之地以王诸公多者百名城少者乃三四十县惠至渥也然其後十年之间反者九起诸王虽名为臣实皆有布衣昆弟之心虑亡不帝制而天子自为者擅爵人赦死辜甚者或戴黄屋汉法令非行也欲天下治安莫若衆建诸侯而少其力力少则易使以义国小则亡邪心令海内之执如身之使臂臂之使指莫不制从诸侯之君不敢有异心辐凑并进而归命天子虽在细民且知其安故天下咸知陛下之明割也定制令齐赵楚各为若干国使悼惠王幽王元王之子孙毕以次各受祖之分地地尽而止及燕梁它国皆然其分地衆而子孙少者建以为国空而置之须其子孙生者举使君之诸侯之地其削颇入汉者为徙其侯国及封其子孙也所以数偿之【臣天麟按也字合作他传写之误也所字合属上句】一寸之地一人之衆天子亡所利焉诚以定治而已故天下咸知陛下之廉地制壹定宗室子孙莫虑不王下无倍畔之心上无诛伐之志故天下咸知陛下之仁法立而不犯令行而不逆贯高利几之谋不生柴奇开章之计不萌细民乡善大臣致顺故天下咸知陛下之义卧赤子天下之上而安植遗腹朝委裘而天下不乱当时大治後世诵圣壹动而五业附陛下谁惮而久不为此【贾谊传】景帝即位鼂错为御史大夫请诸侯之罪过削其支郡诸侯譴譴吴楚七国反以诛错为名丞相劾奏错当要斩错已死谒者仆射邓公见上曰鼂错患诸侯强大不可制故请削地以尊京师万世之利也计画始行卒受大戮臣窃为陛下不取也於是景帝喟然长息曰公言善吾亦恨之【鼂错传】

景帝中五年令诸侯王不得复治国天子为置吏【百官表】武帝初即位大臣惩吴楚七国行事议者多冤鼂错之策皆以诸侯连城数十泰强欲稍侵削数奏暴其过恶诸侯王自以骨肉至亲先帝所以广封连城犬牙相错者为盘石宗也今或无罪为臣下所侵辱有司吹毛求疵答服其臣使证其君多自以侵冤建元三年王登长沙王发中山王胜济川王明以来朝天子置酒胜闻乐声而泣问其故对曰臣闻悲者不可为象歆思者不可为叹息故高渐离击筑易水之上荆轲为之低而不食雍门子壹微吟孟尝君为之於邑今臣心结日久每闻窃眇之声不知涕泣之横集也夫衆嘘漂山聚蠱成蠹朋党执虎十夫挠椎是以文王拘於牖里孔子厄於陈蔡此乃烝庶之成风增积之生害也臣身远与寡莫为之先衆口铄金积毁销骨丛轻折轴羽翮飞肉纷惊逢罗潜然出涕臣闻白日晒光幽隐皆照明月曜夜蠱蠱宵见然云蒸列布杳冥昼昏尘埃掩覆不见泰山何则物有蔽之也今臣雍阂不得闻谗言之徒?生道辽路远曾莫为臣闻臣窃自悲也臣闻社鼂不灌屋鼠不熏何则所托者然也臣虽薄也得蒙肺附位虽卑也得为东藩属又称兄今羣臣非有葭莩之亲鸿毛之重羣居党议朋友相为使夫宗室摈却骨肉冰释斯伯奇所以流离比干所以横分也诗云我心忧伤惄焉如捣假寐永叹唯忧用老心之忧矣疾如疾首臣之谓也具以吏所侵闻於是上乃厚诸侯之礼省有司所奏诸侯事加亲亲之恩焉其後更用主父偃谋令诸侯以私恩自裂地分其子弟而汉为定制封号辄别属汉郡汉有厚恩而诸侯地稍自分析弱小云【中山靖王传】

元狩六年四月乙巳庙立皇子闳为齐王旦为燕王胥为广陵王初作诰【武纪】

王子侯

主父偃说武帝曰古者诸侯地不过百里强弱之形易制今诸侯或连城数十地方千里缓则骄奢易为淫乱急则阻其强而合从以逆京师今以法割削则逆节萌起前日晁错是也今诸侯子弟或十数而适嗣代立余虽骨肉无尺地之封则仁孝之道不宣愿陛下令诸侯得推恩分子弟以地侯之彼人人喜得所愿上以得施实分其国必稍自销弱矣於是上从其计【主父偃传】

武帝元朔二年春正月诏曰梁王城阳王亲慈同生愿臣邑分弟其计之诸侯王请与子弟邑者朕将亲览使有列位於是藩国始分而子弟毕侯矣【本纪】

大哉圣祖之建业也後嗣承序以广亲亲至於孝武以诸侯王疆土过制或僭差失轨而子弟为匹夫轻重不相准於是制诏御史诸侯王或欲推私恩分子弟邑者令各条上朕且临定其号名自是支庶毕侯矣【表上】孝元之世亡王子侯者盛衰终始岂非命哉元始之际王莽擅朝伪褒宗室侯及王之孙焉居摄而愈多非其正故弗录旋踵亦絶悲夫【表下】

孝平元始元年封宣帝耳孙信等三十六人皆为列侯【本纪】

宗室

高祖七年置宗正官以叙九族【本纪又百官表云影正出属籍】

孝惠内修亲亲【本赞】

文帝诏曰诸侯王宗室昆弟功臣多贤及有德者【本纪】四年复诸刘有属籍者家土所与【本纪】

孝景三年楚元王子艺等与濞等为逆朕不忍加法除其籍毋令污宗室【本纪】

孝武元光元年复七国宗室前絶属者【本纪】

後元二年正月朝诸侯于甘泉宫赐宗室【本纪】

武帝时刘辟强以宗室子随二千石论议冠诸宗室清静少欲常以书自娱不肯仕昭帝即位或说大将军霍光曰将军不见诸吕之事乎处伊尹周公之位摄政擅权而背宗室不与共职是以天下不信卒至於灭亡今将军当盛位帝春秋富宜纳宗室又多与大臣共事反诸吕道如是则可以免患光然之乃择宗室可用者辟强子德待诏丞相府【楚元王传】

孝昭始元二年以宗室母在位者举茂材刘辟强刘长乐皆为光禄大夫辟强守长乐卫尉【本纪】

元凤二年四月上自建章宫徙未央宫赐宗室子钱人二十万【本纪】

四年正月丁亥帝加元服赐列侯宗室金帛牛酒各有差【本纪】

孝宣地节元年六月诏曰盖闻尧亲九族以和万国朕蒙遗德奉承圣业惟念宗室属未尽而以罪絶若有贤材改行劝善其复属使得自新【本纪】

地节四年刘德以宗正关内侯行谨重为宗室率封阳城侯【思泽侯表】

成帝时刘向上封事言王氏一姓朱轮华毂者二十三人大将军秉事用权五侯骄奢排摈宗室孤弱公族其有智能者尤非毁而不进远絶宗室之任不令得给事朝省恐其与已分权事執不两大王氏与刘氏且不并立宜发明诏吐德音援近宗室亲而纳信黜达外戚毋授以政所以褒睦外内之姓子子孙孙无疆之计也【刘向传】建始二年罢博望苑以赐宗室朝请者【本纪】

哀帝即位赐宗室王子有属者马各一驷【本纪】

平帝元始元年诏宗室属未尽而以罪絶者复其属其为吏举廉佐史补四百石【本纪师古曰宗室为吏者皆令举廉各从本秩而依廉吏迁之为佐史者例补四百石】

四年二月赐宗室有属籍者爵目五大夫以上各有差【本纪】五年正月祫祭明堂宗室子九百人召助祭礼毕皆益户赐爵及金帛增秩补吏各有差诏曰盖闻帝王以德抚民其赐亲亲以相及也昔尧睦九族舜惇叙之朕以皇帝幼年且统国政惟宗室子皆太祖高皇帝子孙及兄弟吴顷楚元之後汉元至今十有余万人虽有王侯之属莫能相纠或陷入刑罪教训不至之咎也传不云虞君子笃於亲则民兴於仁其为宗室自太上皇以来族亲各以世氏郡国置宗师以纠之致教训焉二千石选有德义者以为宗师考察不从教令有冤失职者宗师得因邮亭书言宗伯请以闻常以岁正月赐宗师帛各十匹【本纪】

杂录

高皇帝规土连城布王子孙是以支叶扶疏异姓不得间也【燕刺王传】

大雅卓尔不羣河间献王近之【景十三王赞】

刘德召见甘泉宫武帝谓之千里驹【传】

肺附【中山靖王胜传又刘向传】同姓末属【刘向】

宗室遗老【上】河间王良宗室仪表

宗英【叙传】

元狩五年沈猷侯受坐为宗正听请不具宗室耐为司寇【王子侯表】

西汉会要卷五

卷六

钦定四库全书

西汉会要卷六

宋 徐天麟 撰

帝系六

公主

公主【高纪如淳曰公羊传曰天子嫁女於诸侯必使诸侯同姓者主之故谓之公主帝姊妹曰长公主诸王女曰翁主师古曰如是说也天子不亲主婚故谓之公主诸王即自主婚故其女曰翁主翁者父也】太上皇女

昭哀后【高帝姊初封宣夫人吕后七年尊曰昭哀后】

高祖一女

鲁元公主【宣于侯张敖尚之孝惠时齐悼惠王尊为鲁元太后】

文帝二女

馆陶长公主【窦后生女嫖文帝即位为馆陶长公主师古曰年最长故谓长公主堂邑侯陈午尚之见窦后传】

公主【周勃太子胜之尚之见周勃传】

景帝三女

平阳公主【王皇后长女本阳信长公主也为平阳侯曹壽所尚故称平阳公主曹壽有恶疾上乃诏卫青尚平阳主见卫青传】

南宫公主【王皇后次女】

隆虑公主【王皇后少女并见王皇后传】

武帝五女

鄂邑盖长公主【昭帝姊燕刺王传云食邑鄂而为盖侯妻也张晏云盖侯王信师古曰信不取鄂主为妻当是信子顷侯充耳】

夷安公主【隆虑公主子昭平君尚见东方朔传】

卫长公主【外戚传云子夫生三女长主卫太子姊也帝以妻栾大见郊祀志】

诸邑公主【五行志征和二年巫蛊事兴帝女诸邑公主阳石公主皆下狱死】

阳石公主【见上又武纪注云二公主皆卫皇后女】

宣帝二女

馆陶公主【华婕妤女名施于定国子于永尚】

敬武公主【张临尚临死元帝令薛宣尚後王莽白太后赐药死见宣传】

元帝三女

平都公主【傅昭仪女】

平阳公主【卫婕妤女见中山卫朋传】

颍邑公主【杜业尚】

王主【本纪建始元年张晏曰王主王之女也师古曰王主则翁主也王自主婚故曰王主】

杂录

诸公主家令门尉皆属宗正【百官表】

主傅【东方朔传昭平君醉杀主傅师古曰傅姆是也】

中府【东方朔传馆陶公主中府师古曰中府掌金帛之藏】

孝惠二年十月齐悼惠王来朝献城阳郡以益鲁元公主邑尊公主为太后【本纪】

江充出逢馆陶长公主行驰道中充呵问之公主曰有太后诏充曰独公主得行车骑皆不得尽劾没入官【江充传】卫青父郑季以县吏给事侯家平阳侯曹壽尚武帝姊阳信长公主

季与主家僮卫媼通生青青既尊贵而平阳侯曹壽有恶疾就国长公主问列侯谁贤者左右皆言大将军主笑曰此出吾家常骑从我奈何左右曰於今尊贵无比於是公主风白皇后皇后言之乃诏青尚平阳公主【卫青霍去病传】

王吉曰汉家列侯尚公主诸侯则国人承翁主使男事女夫诎於妇逆陰阳之位故多女乱【王吉传】

夏侯婴曾孙颇尚平阳公主主随外家姓号孙公主故滕公子孙更为孙氏【夏侯婴传】

博成侯张建坐尚阳邑公主与婢奸主旁数醉罵主免【昭宣功臣表】

和蕃公主

高帝罢平城归是时冒顿单于兵强控弦四十万骑数苦北边上患之以问娄敬敬曰陛下诚能以适长公主妻单于厚奉遗之彼知汉女送厚蛮夷必慕以为阼氏生子必为太子代单于冒顿在固为子婿死外孙为单于岂曾闻外孙敢与大父亢礼哉可毋战以渐臣也若陛下不能遣长公主而令宗室及後宫诈称公主彼亦知不肯贵近无益也高帝曰善遣长公主吕后泣曰妾唯以一太子一女奈何弃之匈奴上竟不能遣长公主而取家人子为公主妻单于使敬往结和亲约【娄敬传】孝惠三年以宗室女为公主嫁匈奴单于【本纪】

匈奴老上单于初立文帝复遣宗人女翁主为单于阼氏使官者中行说傅翁主【匈奴传】

孝景五年遣公主嫁匈奴单于【本纪】

孝武元封中乌孙昆莫使使献马愿得尚汉公主为昆弟天子问羣臣议许曰必先纳聘然後遣女乌孙以马千匹聘汉遣江都王建女细君为公主以妻焉赐乘輿服御物为备官属宦官侍御数百人赠送甚盛昆莫以为右夫人昆莫年老欲使其孙尚公主公主不听上书言状天子报从其国俗岑陼遂妻公主生一女少夫公主死汉复以楚王戊之孙解忧为公主妻岑陼【西域传】宣帝元康二年乌孙昆弥上书欲以汉外孙元贵靡为嗣得令复尚汉公主结婚重亲畔絕匈奴愿聘马羸各千匹上遣使至乌孙先迎取聘昆弥及太子左右大将军都尉皆遣使凡三百余人入汉迎取少主上廼以乌孙主解忧弟子相夫为公主置官属侍御百余人舍上林学乌孙言天子自临平乐观会匈奴使者外国君长大角抵设乐而遣之未出塞闻乌孙昆弥翁归靡死天子徵还少主【西域传】

先是乌孙昆弥归靡因长罗侯常惠上书愿以汉外孙元贵靡为嗣得复尚少主结婚内附畔去匈奴诏下公卿议望之以为乌孙絕域信其美言万里结婚非长策也天子不听神爵二年遣长罗侯惠使送公主配元贵靡未出塞翁归靡死其兄子狂王背约自立惠从塞下上书愿留少主炖煌郡惠至乌孙责以负约因立元贵靡还迎少主诏下公卿议望之复以为不可乌孙持两端亡坚约其效可见前少主在乌孙四十余年恩爱不亲密边境未以安此已事之验

也今少主以元贵靡不得立而还信无负於四夷此中国之大福也少主不止繇役将兴其原起此天子从其议召少主还後乌孙虽分国两立以元贵靡为大昆弥汉遂不复与结婚【萧望之传】甘露三年楚公主上书言年老土思愿得归骸骨葬汉地天子闵而迎之公主与乌孙男女三人俱来至京师时年且七十赐田宅奴婢奉养甚厚朝见仪比公主【西域传】元帝竟宁元年匈奴呼韩邪单于复入朝自言愿婿汉氏以自亲帝以後宫良家子王嫱字昭君赐单于单于驩喜王昭君号宁胡阼氏生一男呼韩邪死株橐单于复妻王昭君生二女长女为须卜居次小女为当于居次【居次者女之号若汉言公主也见匈奴传】

内职

汉兴因秦之称号妾皆称夫人又有美人良人八子七子长使少使之号焉至武帝制婕妤嫕娥俗华充依各有爵位而元帝加昭仪之号凡十四等云

昭仪位视丞相爵比诸侯王

婕妤视上卿比列侯

嫕娥视中二千石比关内侯

俗华视真二千石比大上造

美人视二千石比少上造

八子视千石比中更

充依视千石比左更

七子视八百石比右庶长

良人视八百石比左庶长

长使视六百石比五大夫

少使视四百石比公乘

五官视三百石

顺常视二百石

无涓共和娱灵保林良使夜者皆视百石【以上凡十四等】上家人子中家人子视有秩斗食【并外戚传】

诸姬【诸姬见高五王传又文纪薄姬注如淳曰姬衆妾之总称汉官仪曰姬妾数百外戚传亦曰幸姬戚夫人师古曰姬本周之姓贵於衆国之女所以妇人美号皆称姬焉史记云高祖居山东时多美姬是也】长御【戾太子传长御奇华赵皇后传宫长李南汉官考云长御即宫长也】

材人【翼奉传未央建章甘泉材人名以百数艺文志未央材人师古曰材人天子内官】

待诏掖庭【元帝赐单于待诏掖庭王嫱为阼氏应劭曰郡国献女未御见须命於掖庭故曰待诏】中宫史【许皇后传曹立】

学事史【许皇后传曹宫】

太子有妃有良娣有孺子凡三等【外戚传】

太子中人【李敢女为太子中人】

皇孙妻称夫人【史皇孙王夫人】

皇孙妾无位号皆称家人子【外戚】

杂录

元帝既重傅婕妤及冯婕妤亦幸生中山孝王上欲殊之於後宫以二人皆有子为王上尚在未得称太后乃更号曰昭仪赐以印绶在婕妤上昭其仪尊之也至成哀时赵昭仪董昭仪皆无子犹称焉【傅昭仪传】

傅昭仪及子定陶王爱幸宠於皇后太子匡衡上疏曰臣闻室家之道修则天下之理得故诗始国风礼本冠婚始乎国风原情性而明人伦也本乎冠婚正基兆而防未然也福之兴莫不本乎室家之道衰莫不始乎梱内故圣王必谨妃后之际别适长之位礼之於内也卑不隲尊新不先故所以统人情而理陰气也其尊适而卑庶也适子冠乎阼礼之用醴衆子不得与列所以贵正体而明嫌疑也非虚加其礼文而已乃中心与之殊异故礼探其情而见之外也圣人动静游燕所亲物得其序则海内自修百姓从化如当亲者疏当尊者卑则佞巧之奸因时而动以乱国家故圣人谨防其端禁於未然不以私恩害公义陛下圣德纯备莫不修正则天下无为而治诗云于以四方克定厥家传曰正家而天下定矣【匡衡传】

孝成赵皇后既立後?少衰而弟絶幸为昭仪居昭阳舍其中庭彤朱而殿上髹漆切皆铜沓冒

黄金涂白玉阶壁带往往为黄金釭函蓝田璧明珠翠羽饰之自後宫未常有焉【赵后传】

建始三年冬日食地震同日俱发诏举方正直言极谏之士谷永对曰明王即位正五事建大中以承天心则庶徵序於下日月理於上如人君淫溺後宫般乐游田五事失於躬大中之道不立则咎徵降而六极至凡灾异之发各象过失以类告人乃十二月朔日食婺女之分地震萧墙之内二者同日俱发以丁宁陛下厥咎不远宜厚求诸身意岂陛下志在闺门内宠太盛女不遵道嫉妬专上妨继嗣欤古之王者废五事之中失夫妇之纪妻妾得意谒行於内执行於外至覆倾国或乱陰阳昔褒姒用国宗周以丧閹妻骄扇日以不臧此其效也夫妻之际王事纲纪安危之机圣王所致谨也昔舜飭正二女以崇至德楚庄忍絶丹姬以成伯功幽王惑於褒姒周德降亡鲁威胁於齐女社稷以倾诚修後宫之政明尊卑之序贵者不得嫉妬专宠以絶骄嫚之端抑褒閹之乱贱者咸得秩进各得厥职以广继嗣之统息白华之怨後宫亲属饶之以财勿与政事以远皇父之类损妻党之权未有闺门治而天下乱者也【谷永传】其夏复令方正对策永对曰日食地震皇后贵妾专宠所致陛下诚深察愚臣之言平天覆之施使列妾得人人更进犹尚未足也急复益纳宜子妇人毋择好丑毋避尝字母论年齿推法言之陛下得继嗣於微贱之间乃反为福得继嗣而已母非有贱也後宫女史使令有直意者广求於微贱之间以遇天所开右慰释皇太后之忧愠解谢上帝之谴怒则继嗣蕃滋灾异訖息【谷永传】杜钦对策曰日以戊申蚀时加未戊未土也土者中宫之部其夜地震未央宫殿中此必适妾将有争宠相害而为患者唯陛下深戒之正后妾抑女宠防奢泰去佚游如此即尧舜不足与比隆咎异何足消灭【杜钦传】哀帝召董贤女弟以为昭仪位次皇后更名其舍为椒风以配椒房云【董贤传】

五官以下葬司马门外【外戚传】

出宫人

吕太后时出宫人以赐诸王各五人【窦皇后传】

孝文十二年出孝惠皇帝後宫美人令得嫁【本纪】

後七年遗诏归夫人以下及少使【本纪】

孝景後三年遗诏出宫人归其家复终身【本纪】

元帝初即位年岁不登谏大夫贡禹奏言古者宫女不过九人高祖考文考景皇帝循古节俭宫女不过十余後世争为奢侈转转益甚武帝时又多取好女至数千人以填後宫及弃天下昭帝幼弱霍光专事皆以後宫女置於园陵大失礼逆天心昭帝晏驾光复行之至孝宣皇帝时陛下恶有所言羣臣亦随故事甚可痛也故使天下承化取女皆大过度诸侯妻妾或至数百人豪富吏民蓄歌者至数十人是以内多怨女外多旷夫皆在大臣循故事之臯也唯陛下审察後宫择其贤者留二十人余悉归之及诸园陵女无子者宜悉遣独杜陵宫数百诚可哀

怜也天子纳善其忠【本传】

成帝永始四年出杜陵诸未尝御者归家【本纪张晏曰宫人无子乃守国陵也】哀帝即位掖庭宫人年三十以下出嫁之【本纪】

平帝崩太后诏出媵妾皆归家得嫁如孝文时故事【本纪】西汉会要卷六

卷七

钦定四库全书

西汉会要卷七

宋 徐天麟 撰

礼一【吉礼】

礼

秦兼天下燔诗书杀术士六学从此缺矣陈涉之王也鲁诸儒持孔氏礼器往归之於是孔甲为涉博士卒与俱死陈涉起匹夫毆适戍以立号不满岁而灭亡其事至微浅然而搢绅先生负礼器往委质为臣者何也以秦禁其业积怨而发愤於陈王也及高皇帝诛项籍引兵围鲁鲁中诸儒尚讲诵习礼弦歌之音不絶岂非圣人遗化好学之国哉於是诸儒始得修其经学讲大射乡饮之礼【儒林序】

汉王已并天下诸侯共尊为皇帝於定陶叔孙通就其仪号高帝悉去秦仪法为简易羣臣饮醉或争功妄呼按劒击柱上患之通知上益厌之说上曰夫儒者难与进取可与守成臣愿召鲁诸生与臣弟子共起朝仪高帝曰得无难乎通曰五帝异乐三王不同礼礼者因时世人情为之节文者也故夏殷周礼所因损益可知者谓不相复也臣愿颇采古礼与秦仪杂就之上曰可试为之令易知度吾所能行为之於是通使召鲁诸生三十余人鲁有两生不肯行曰今天下初定死者未葬伤者未起又欲起礼乐礼乐所由起百年积德而後可兴也吾不忍为公所为公所为不合古吾不行公往矣毋污我通笑曰若真鄙儒不知时变遂与所召三十人西及上左右为学者与其弟子百余人为縣蕞野外【如淳曰谓以茅剪植地为纂位尊卑之次也】习之月余通曰上可试观上使行礼曰吾能为此乃令羣臣习肄会十月汉七县长乐宫成诸侯羣臣朝十月仪先平明谒者治礼引以次入殿门廷中陈车骑戍卒卫官设兵张旗志【志与帜同】传曰趋殿下郎中侠陛陛数百人功臣列侯诸将军军吏以次陈西方东郷文官丞相以下陈东方西郷大行设九宾胪句传【苏林曰上传语告下为胪下告上为句也韦昭曰大行掌宾客之礼今之鸿胪也九宾则周礼九仪也谓公侯伯子男孤卿大夫士也】於是皇帝辇出房百官执戟传警【戟史记作职】引诸侯王以下莫不震恐肃敬至礼毕尽伏置法酒【师古曰法酒犹言礼酌谓不饮之至醉】诸侍坐殿上皆伏抑首以尊卑次起上壽觴九行谒者言罢酒御史执法举不如仪者辄引去竟朝置酒无敢譴譏失礼者於是高帝曰吾乃今日知为皇帝之贵也拜通为奉常赐金五百斤九年高帝徙通为太子太傅孝惠即位乃谓通曰先帝园陵寝庙羣臣莫习徙通为奉常【师古曰又重为之也】定宗庙仪法及稍定汉诸仪法皆通所论着也【叔孙通传】

文帝时贾谊以为汉兴至今二十余年宜定制度兴礼乐然後诸侯轨道百姓素朴狱讼衰息

乃草具其仪天子说焉而大臣絛灌之属害之故其仪遂寢【志又谊传云谊乃草具其仪奏之文帝谦让未遑也】

贾谊言今民卖僮者为之绣衣丝履偏诸缘内之闲中是古天子后服所以庙而不宴者也而庶人得以衣婢妾白縠之表薄纨之里縵以偏诸美者黼绣是古天子之服今富人大贾嘉会召客者以被墙古者以奉一帝一后而节适今庶人屋壁得为帝服倡优下贱得为后饰然而天下不屈者殆未有也且帝之身自衣皂绋而富民墙屋被文绣天子之后以缘其领庶人□妾缘其履此臣所谓舛也夫百人作之不能衣一人欲天下无寒胡可得也一人耕之十人聚而食之欲天下亡饥不可得也饥寒切於民之饥肤欲其亡为奸邪不可得也国已屈矣盗贼直须时耳然而献计者曰毋动为大耳夫俗至大不敬也至亡等也至冒上也进计者犹曰无为可为长太息者此也商君遗礼义弃仁恩并心於进取行之二岁秦俗日败故秦人家富子壮则出分家贫子壮则出赘借父耰耜虑有德色母取箕箒立而谄语抱哺其子与公并倨妇姑不相说则反唇而相稽其慈子耆利不同禽兽者亡几耳然并心而赴时犹日蹙六国兼天下功成求得矣终不知反廉愧之节仁义之厚信并兼之法遂进取之业天下大败衆掩寡智欺愚勇威怯壮陵衰其乱至矣是以大贤起之威震海内德从天下曩之为秦者今转而为汉矣然其遗风余俗犹尚未改今世以侈靡相竞而上亡制度弃礼谊捐廉耻日甚可谓月异而岁不同矣逐利不耳虑非顾行也今其甚者杀父兄矣盗者剽寝户之帘搴两庙之器白昼大都之中剽吏而夺之金矫伪者出几十万石粟赋六百多万钱乘传而行郡国此其亡行义之先至者也而大臣特以簿书不报期会之间以为大故至於俗流失世坏败因恬而不知怪虑不动於耳目以为是适然耳夫移风易俗使天下同心而乡道类非俗吏之所能为也俗吏之所务在於刀笔筐篋而不知大体陛下又不自忧窃为陛下惜之夫立君臣等上下使父子有礼六亲有纪此非天之所为人之所设也夫人之所设不为不立不植则僵不修则坏筦子曰礼义廉耻是谓四维四维不张国乃灭亡使筦子愚人也则可筦子而稍知治体则是岂可不为寒心哉秦灭四维而不张故君臣乖乱六亲殃戮奸人并起万民离叛凡十五岁而社稷为虚今四维犹未备也故奸人几幸而衆心疑惑岂如今定经制令君君臣臣上下有差父子六亲各得其宜奸人亡所几幸而羣臣衆信上不疑惑此业壹定世世常安而後有所持循矣若夫经制不定是犹度江河亡维楫中流而遇风波船必覆矣可为长太息者此也夫礼者禁於将然之前而法者禁於已然之後是故法之所用易见而礼之所为至难知也曰礼云礼云者贵絶恶於未萌而起教於微眇使民日迁善远鬯而不自知也【贾谊传】武帝即位进用英隲议立明堂制礼服以兴太平会窦太后好黄老言不说儒术其事又废後董仲舒对策言汉得天下以来常欲善治而至今不能善治者失之於当更化而不更化也更化则可以善治而灾害日去福祿日来矣时上方征讨四夷不暇留意礼文之事【志】元朔五年夏六月诏曰盖闻导民以礼风之以乐今礼坏乐崩朕甚闵焉故详延天下方闻之士咸荐诸朝其令礼官博学通经之士讲习治闻举遗兴礼以为天下先太常其议予博士弟子崇乡党之化以厉贤材焉【本纪】

汉承百王之弊高祖拨乱反正文景务在养民至于稽古礼文之事犹多阙焉孝武初立卓然罢黜百家表章六经遂畴咨海内举其俊茂与之立功兴大学修郊祀改正朔定历数协音律作诗乐建封禅礼百神绍周後号令文章焕焉可述後嗣得遵洪业而有三代之风如武帝之

雄材大略不改文景之恭俭以济斯民虽诗书所称何有加焉【武帝赞】

宣帝时琅邪王吉为谏大夫上疏言欲治之主不世出公卿幸得遭遇其时未有建万世之长策举明主於三代之隆者也其务在於簿书断狱听讼而已此非太平之基也今俗吏所以牧民者非有礼义科指可世世通行者也以意穿凿各取一切是以诈伪萌生刑罚无极质朴日消恩爱浸薄孔子曰安上治民莫善於礼非空言也愿与大臣延及儒生述旧礼明王制驱一世之民跻之仁壽之域则俗何以不若成康壽何以不若高宗上不纳其言吉以病去至成帝时犍为郡於水滨得古磬十六枝议者以为譱祥刘向因是说上宜兴辟雍设庠序陈礼乐隆雅颂之声盛揖逊之容以风化天下如此而不治者未之有也或曰不能具礼礼以养人为本如有过差是过而养人也刑罚之过或至死伤今之刑非皋陶之法也而有司请定法削则削笔则笔救时务也至於礼乐则曰不敢是敢於杀人不敢於养人也为其俎豆箠弦之间小不备因是絶而不为是去小不备而就大不备或莫甚焉夫教化之比於刑法刑法轻是舍所重而急所轻也且教化所恃以为治也刑法所以助治也今废所恃而独立其所助非所以致太平也自京师有諄逆不顺之子孙至於陷大辟受刑戮者不絶繇不习五常之道也夫承千岁之衰周继暴秦之余敝民渐渍恶俗贪黷险詖不闲义理不示以大化而独馭以刑罚终已不改故曰导之礼乐而民以和睦初叔孙通将制定礼仪见非於齐鲁之士然卒为汉儒宗业垂後嗣斯成法也成帝以向言下公卿议会向病卒丞相大司空奏请立辟雍案行长安城南营表未作遭成帝崩羣臣引以定諡及王莽为宰衡欲耀衆庶遂兴辟雍因以篡位海内畔之世祖受命中兴拨乱反正改定京师于土中即位三十年四夷宾服百姓家给政教清明乃营立明堂辟雍显宗即位躬行其礼宗祀光武皇帝于明堂养三老五更於辟雍威仪既盛美矣然德化未流洽者礼乐未具羣下无所诵说而庠序尚未设之故也孔子曰辟如为山未成一簣止吾止也今叔孙通所撰礼仪与律令同录藏於理官法家又复不传汉兴寝而不着民臣莫有言者又通没之後河间献王采礼乐古事稍稍增辑至五百余篇今学者不能昭见但推士礼以及天子说义又颇谬异故君臣长幼交接之道寢以不章【志】

司徒掾班彪曰汉承亡秦絶学之後祖宗之制因时施宜自玄成後学者蕃滋贡禹毁宗庙匡衡改郊兆何武定三公後皆数复故纷纷不定何者礼文缺微古今异制各为一家未易可偏定也【韦玄成赞】

西汉会要卷七

卷八

钦定四库全书

西汉会要卷八

宋 徐天麟 撰

礼二【吉礼】

封禪

孝文十五年用新垣平言既郊见渭阳五帝於是使博士诸生刺六经中作王制谋议巡狩封禪事明年人有上书告平所言皆诈也下吏治诛垣平是後文帝怠於改正服鬼神之事【郊祀志】

武帝初即位尤敬鬼神之祀汉兴已六十余岁矣天下乂安缙绅之属皆望天子封禪改正度也而上乡儒术招贤良赵绾王臧等以文学为公卿欲议古立明堂城南以朝诸侯草巡狩封禪改历服色事未就窦太后不好儒术使人微伺赵绾等奸利事按绾臧自杀诸所兴为皆废【郊祀志】

元狩元年上幸雍祠五畤获白麟奇木博谋羣臣终军对曰宜因昭时令日改定告元苴白茅於江淮发嘉号于营丘以应缉熙使着事者有纪焉【终军传】

司马相如既病免家居茂陵天子曰相如病甚可往从悉取其书若後之矣使所忠往【师古曰使者姓名也】而相如已死家无遗书问其妻对曰长卿未死时为一卷书曰有使来求书奏之其遗札书言封禪事所忠奏焉天子异之其辞曰伊上古之初肇自顓穹生民历选列辟以迄乎秦率迹者踵武听逝者风声纷轮威蕤堙灭而不称者不可胜数也继昭夏崇号謚略可道者七十有二君罔若淑而不昌畴逆失而能存黄帝之前遐哉邈乎其详不可得闻已五三六经载籍之传维见可观也书曰元首明哉股肱良哉因斯以谈君莫盛於尧臣莫贤於后稷后稷创业於唐公刘发迹於西戎文王改制爰周郅隆大行越成而后陵迟衰微千载亡声岂不善始善终哉然无异端审所由於前谨遗教於後耳故轨迹夷易易遵也湛恩厯洪易丰也宪度着明易则也垂统理顺易继也是以业隆於繼保而崇冠乎二后揆厥所元终都攸卒未有殊尤絶迹可考於今者也然犹躋梁父登太山建显号施尊名大汉之德?涌原泉沕涌曼羨旁魄四塞云布雾散上畅九垓下泝八埏怀生之类沾濡浸润协气横流武节焱逝迹陋游原迴阔泳末首恶郁没闇昧昭晰昆虫闔悻回首面内然后囿驹虞之珍羣徼麋鹿之怪兽导一茎六穗於庖牺双觚共抵之兽获周余放龟于岐招翠黄乘龙於沼鬼神接灵圉宾於闲馆奇物譎诡倏倏穷变欽哉符瑞臻兹犹以为薄不敢道封禪盖周跃鱼陨杭休之以燎微夫斯之为符也以登介丘不亦恶乎进逊之道何其爽与於是大司马进曰陛下仁育羣生义征不

諫諸夏樂貢百蠻執贄德牟往初功无与二休烈液洽符瑞衆變期應紹至不特創見意者太山梁父設壇塲望幸盖号以况榮上帝垂恩儲祉將以庆成陛下嘽让而弗發也挈三神之欢缺王道之儀羣臣惡焉或謂且天為贊闇示珍符固不可辭若然辭之是泰山靡記而梁甫罔几也亦各并時而榮咸濟厥世而屈說者尚何稱於後而云七十二君哉夫修德以錫符奉符以行事不為越進也故聖王弗替而修禮地祇謁欸天神勒功中岳以章至尊舒盛德發号榮受厚福以浸黎民皇皇哉斯事天下之壮观王者之卒業不可貶也愿陛下全之而后因雜縉紳先生之略術使获曜日月之末光絕災以展采錯事犹兼正列其義祓飾厥文作春秋一藝將襲旧六為七攄之无穷俾萬世得激清流揚微波蜚英聲騰茂實前聖之所以永保鴻名而常為稱首者用此宜命掌故悉奏其儀而覽焉於是天子沛然改容曰俞乎朕其試哉乃迂思回慮總公卿之議詢封禪之事詩大澤之博廣符瑞之富遂作頌曰自我天覆云之油油甘露時雨厥壤可游滋液滲漉何生不育嘉谷六穗我穡曷蓄匪唯雨之又潤澤之匪唯偏我汜布护之万物熙熙懷而慕之名山显位望君之來君兮君兮侯不迈哉 之兽樂我君圃白質黑章其儀可喜眈眈穆穆君子之态盖聞其聲今視其來厥塗靡从天瑞之徵茲尔於舜虞氏以興濯濯之麟游彼灵時孟冬十月君徂郊祀馳我君輿帝用享祉三代之前盖未嘗有宛宛黃龍興德而升采色玄耀煥炳輝煌正阳显見覺寤黎烝於傳載之云受命所乘厥之有章不必諄諄依类托寓諭以封岱披藝觀之天人之際已交上下相發允答聖王之事兢兢翼翼故曰於興必慮衰安必思危是以湯武至尊严不失肅祇舜在假典顧省厥遺此之謂也相如既卒五歲上始祭后土八年而遂禮中岳封於太山至梁父禪肅然【司馬相如傳】是時李少君以祠竈却老方見上言祠竈皆可致物而丹砂可化為黃金黃金成為飲食器則益壽益壽則海中蓬萊仙者可見之以封禪則不死黃帝是也於是天子始親祠竈後二年郊雍获一角兽若麋然有司曰陛下肅祇郊祀上帝報享錫一角兽盖麟云於是以荐五時時加一牛以燎賜諸侯白金以風符應合乎天也於是濟北王以為天子且封禪上書獻泰山及其旁邑天子以它县償之常山王有罪□天子封其弟貞定以续先王祀而以常山為郡然後五岳皆在天子之郡【郊祀志】元鼎四年上始巡幸郡县寢尋於泰山矣其夏六月上得寶鼎公孫卿有札書曰黃帝得寶鼎冕候問於鬼臿區鬼臿區對曰黃帝得寶鼎神策是歲己酉朔旦冬至得天之紀終而复始於是黃帝迎日推策後率二十歲复朔旦冬至凡二十推三百八十年黃帝仙登于天卿因所忠欲奏之所忠視其書不经疑其妄言謝曰寶鼎事已決矣尚何以為卿因嬖人奏之上大說乃召問卿對曰受此書申公申公已死上曰申公何人也卿曰齊人与安期生通受黃帝言无書独有此鼎書曰漢興复當黃帝之時曰漢之聖者在之高祖孫且曾孫也寶鼎出而与神通封禪封禪七十二王唯黃帝得上泰山封申公曰漢帝亦當上封禪封禪則能僊登天矣黃帝萬諸侯而神灵之封君七千天下名山八而三在變夷五在中國中國華山首山太室山泰山东萊山此五山黃帝之所常游与神會黃帝且战且學僊患百姓非其道乃斷斬非鬼神者百歲然後得与神通黃帝郊雍上帝宿三月鬼臿區号大鴻死葬雍故鴻冢是也其後黃帝接万灵明庭明庭者甘泉也所謂寒門者谷口也黃帝采首山銅铸鼎於荆山下鼎既成有龍垂胡?下迎黃帝黃帝上騎羣臣後宮从上龍七十餘人龍乃上去余小臣不得上乃悉持龍?龍?拔墮墮黃帝之弓百姓仰望黃帝既上天乃抱其弓与龍?号故後世因名其處曰鼎湖其弓曰烏号於是天子曰嗟乎誠得如黃帝吾視去妻子如脱屣耳【郊祀志】帝議欲放古巡守封禪之事諸儒對者五十餘人未能有所定先是司馬相如病死有遺書頌功德言符瑞足以封泰山上奇其書以問兒寬寬對曰陛下躬發聖德統輯羣元宗祀天地荐

礼百神精神所乡徵兆必报天地并应符瑞昭明其封泰山禅梁父昭姓考瑞帝王之盛节也然享荐之义不着於经以为封禅告成合祛於天地神祇祇戒精专以接神明总百官之职各称事宜而为之节文唯圣王所由制定其当非羣臣之所能列今将举大事优游数年使羣臣得人自尽终莫能成唯天子建中和之极兼总条贯金声而玉振之以顺成天庆垂万世之基上然之乃自制仪采儒术以文焉【儿寛传】元封元年冬上议曰古者先振兵释旅然後封禅乃遂北巡朔方勒兵十余万骑还祭黄帝冢桥山释兵凉如上曰吾闻黄帝不死有冢何也或对曰黄帝以僊上天羣臣葬其衣冠既至甘泉为且用事泰山先类祠泰一日得宝鼎上与公卿诸生议封禅封禅用希旷世莫知其仪体而羣儒采封禅尚书周官王制之望祀射牛事齐人丁公年九十余曰封禅者古不死之名也秦皇帝不得上封陛下必欲上稍上即无风雨遂上封矣上於是乃令诸儒习射牛草封禅仪数年至且行天子既闻公孙卿及方士之言黄帝以封禅皆致怪物与神通欲放黄帝以接神人蓬莱高世比德於九皇而颇采儒术以文之羣儒既已不能辨明封禅事又拘於诗书古文而不敢骋上为封祠器视羣儒羣儒或曰不与古同徐偃又曰太常诸生行礼不如鲁善周霸属图封事於是上黜偃霸而尽罢诸儒弗用三月乃东幸缙氏礼登中岳太室从官在山上闻若有言万岁云问上上不言问下下不言乃令祠官加增太室祠禁无伐其山木以山下户凡三百封密高为之奉邑独给祠复无有所与上因东上泰山泰山草木未生乃令人上石立之泰山颠上遂东巡海上行礼祠八神齐人之上疏言神怪奇方者以万数乃益发船令言海中神山者数千人求蓬莱神人公孙卿持节常先行候名山至东莱言夜见大人长数丈就之则不见见其迹甚大类禽兽云羣臣有言见一老父牵狗言吾欲见钜公已忽不见上既见大迹未信及羣臣又言老父则大以为僊人也宿留海上与方士传车及间使求神僊人以千数四月还至奉高上念诸儒及方士言封禅人殊不经难施行天子至梁父礼祠地主至乙卯令侍中儒者皮弁缙绅射牛行事封泰山下东方如郊祠泰一之礼封广丈二尺高九尺其下则有玉牒书秘礼毕天子独与侍中奉车子侯上泰山亦有封其事皆禁明日下陰道丙辰禅泰山下址东北肃然山如祭后土礼天子皆亲拜见衣上黄而尽用乐焉江淮间一茅三脊为神籍五色土益杂封纵远方奇兽飞禽及白雉诸物颇以加祠兕牛象犀之属不用皆至泰山然後去封禅祠其夜若有光昼有白云出封中天子从禅还坐明堂羣臣更上壽下诏改元封元年又曰古者天子五载一巡狩用事泰山诸侯有朝宿地其令诸侯各治邸泰山下天子既已封泰山无风雨而方士更言蓬莱诸神若将可得於是上欣然庶几遇之复东至海上望焉车子侯暴病一日死上乃遂去并海上北至碣石巡自辽西历北边至九原五月乃至甘泉周万八千里云其秋有星孛于东井後十余日有星孛于三能望气王朔言复独见填星出如瓜食顷复入有司皆曰陛下建汉家封禅天其报德星云【郊祀志】

又本纪云春正月行幸缙氏诏曰朕用事华山至于中岳获駮廋见夏后啓母石翌日亲登嵩高御史乘属在庙旁吏卒咸闻呼万岁者三登礼罔不答其令祠官加增太室祠禁无伐其草木以山下户三百为之奉邑名曰崇高独给祠复亡所与行遂东巡海上夏四月癸卯上还登封泰山降坐明堂诏曰朕以眇身承至尊兢兢焉惟德菲薄不明于礼乐故用事八神遭天地况施着见景象然如有闻震于怪物欲止不敢遂登封泰山至於梁父然後升肃然自新嘉与士大夫更始其以十月为元封元年行所巡至博奉高蛇丘历城梁父民田租逋赋贷已除加年七十以上孤寡帛人二疋四县无出今年算赐天下民爵一级女子百户牛酒行自泰山

复东巡海上至碣石自辽西历北边九原归于甘泉【郊祀志】元封五年行南巡狩春三月还至泰山增封【纪下同】太初元年冬十月行幸泰山十二月?高里【按封禅书云祠上帝明堂毋修封禅徐广曰常五年一修耳今适二年故但祠明堂】

三年修泰山?石闾【自元封五年修封至是五年】

天汉三年行幸泰山修封

太始四年行幸泰山修封?石闾

征和四年上幸泰山修封禅石闾

泰山五年一修封武帝凡五修封【郊祀志】

霍去病伐匈奴封狼居胥山禅於姑衍登临翰海【本传】封禅议对十九篇【武帝时也】

汉封禅羣祀三十六篇【艺文志】

西汉会要卷八

卷九

钦定四库全书

西汉会要卷九

宋 徐天麟 撰

礼三【吉礼】

亲郊

孝文亲郊二

幸雍始郊见五帝【十五年四】

郊祀五帝于渭阳【月十六年】

孝景亲郊一

幸雍郊五畤【四月中六年】

孝武亲郊十一

幸雍祠五畤八【十月元光二年十月元狩元年十月二年十月元

鼎四年十月五年十月元封二年十月四年十月大】

幸甘泉郊泰畤三【始四年十二月元封五年四月天汉元年】

孝宣亲郊六

幸雍祠五畤一【正月後元元】

幸甘泉郊泰畤五【神爵元年正月 五凤元年正月甘露元年正月 三年正月

黄龙元年正月】

孝元亲郊八

幸雍祠五畤三【初元五年三月
永光四年三月建昭元年三月】幸甘泉郊泰畤五【初元二年正月
四年正月永光元年正月 五年正月

建昭二年正月】

孝成亲郊九

幸雍祠五畤四【永始二年十一月 元延元年三月三年三月
绥和元年三月】幸甘泉郊泰畤四【永始四年正月 元延二年正月四年正月
绥和二年正月】郊祀长安南北郊一【建始二年正月南郊三月北郊】

孝平亲郊一

郊祀高祖以配天【元始四年已上并本纪】

杂录

汉王二年冬东击项籍而还入关问故秦时上帝祠何帝也对曰四帝有白青黄赤帝之祠高祖曰吾闻天有五帝而四何也莫知其说於是高祖曰吾知之矣乃待我而具五也乃立黑帝祠名曰北畤有司进祠上不亲往悉召故秦祀官复置太祝太宰如其故仪礼下诏曰吾甚重祠而敬祭今上帝之祭及山川诸神当祠者各以其时礼祠之如故

孝文帝十四年以岁比登诏有司增雍五畤路车各一乘驾被具西畤畦畤禺车各一乘禺马四疋驾被具诏曰有异物之神见于成纪毋害於民朕几郊祀上帝诸神礼官议毋讳以朕劳有司皆曰古者天子夏亲郊祀上帝於郊故曰郊於是夏四月文帝始幸雍郊见五畤祠衣皆上赤

赵人新垣平以望气见上言长安东北有神气成五采若人冠冕焉或曰东北神明之舍西方神明之墓也天瑞下宜立祠上帝以合符应於是作渭阳五帝庙同宇帝一殿面五门各如其帝色祠所用及仪亦如雍五畤明年夏四月文帝亲拜霸渭之会以郊见渭阳五帝五帝庙临渭其北穿蒲池沟水权火举而祠若光辉然属天焉文帝出长门若见五人於道北遂因其直立五帝坛祠以五牢其明年平使人持玉杯上书阙下献之平言上曰阙下宝玉气来者已视之果有献玉杯者刻曰人主延寿平又言臣候日再中居顷之日却复中於是始更以十七年为元年令天下大酺平言曰周鼎亡在泗水中今河决通於泗臣望东北汾陰直有金宝气意周鼎其出乎兆见不迎则不至於是上使使治庙汾陰南临河欲祠出周鼎人有上书告平所言皆诈也下吏治诛夷平是後文帝怠於改正服鬼神之事而渭阳长门五帝使祠官领以时致礼不往焉

武帝时亳人谬忌奏祠泰一方曰天神贵者泰一泰一佐曰五帝古者天子以春秋祭泰一东南郊日一太牢七日为坛门八通之鬼道於是天子令太祝立其祠长安城东南郊常奉祀如忌方其後人上书言古者天子三年一用太牢祠三一天一地一泰一天子许之令太祝领祠之於忌泰一坛上如其方後人复有言古天子常以春解祠祠黄帝用一梟破镜冥羊用羊祠马行用一青牡马泰一皐山山君用牛武夷君用乾鱼陰阳使者以一牛令祠官领之如其方而祠泰一於忌泰一坛旁後二年郊雍获一角兽若麋然有司曰陛下肃祗郊祀上帝报享锡一角兽盖麟云於是以荐五時時加一牛以燎赐诸侯白金以风符应合于天也

元鼎中上雍且郊或曰五帝泰一之佐也宜立泰一而上亲郊之上疑未定明年上遂郊雍至陇西登空桐幸甘泉令祠官寬舒等具泰一祠坛坛放亳忌泰一坛三陔五帝坛环居其下各如其方黄帝西南除八通鬼道泰一所用如雍一時物而加醴枣脯之属杀一犛牛以为俎豆牢具而五帝独有俎豆醴进其下四方地为膾食羣神从者及北斗云已祠胙余皆燎之其牛色白白鹿居其中毚在鹿中鹿中水而酒之祭日以牛祭月以羊毚特泰一祝宰则衣紫及绣五帝各如其色日赤月白十一月辛巳朔旦冬至昉爽天子始郊拜泰一朝朝日夕夕月则揖而见泰一如雍郊礼其赞飧曰天始以宝鼎神策授皇帝朔而又朔终而复始皇帝敬拜见焉而衣上黄其祠列火满坛坛旁亨炊具有司曰祠上有光公卿言皇帝始郊见泰一云阳有司奉瑱玉嘉牲荐飧是夜有美光及昼黄气上属天大史令谈祠官寬舒等曰神灵之休佑福兆祥宜因此地光域立泰時坛以明应令太祝领秋及腊间祠三岁天子壹郊见

宣帝元康四年下诏曰盖闻天子尊事天地修祀山川古今通礼也间者上帝之祠阙而不亲十有余年朕甚惧焉朕亲飭躬齐戒亲奉祀为百姓蒙嘉气获丰年焉明年正月上始幸甘泉郊见泰時数有美祥修武帝故事盛车服敬齐祠之礼颇作诗歌【已上并郊祀志】

亲祠后土【北郊附】

孝武祠后土五

幸河东祠后土【元封四年三月 六年三月太初元年十二月 二年三月

天汉元年三月】

孝宣祠后土二

幸河东祠后土【神爵元年三月五凤元年三月】

孝元祠后土三【郊祀志云五奉后土之祠今纪之所书止存其三】

幸河东祠后土【初元四年三月 永光五年三月建昭二年三月】

孝成祠后土五

祀后土于长安北郊【建始二年三月】

幸河东祠后土四【永始四年三月 元延二年三月元延四年三月 绥和二年三月】

武帝元鼎四年天子郊雍曰今上帝朕亲郊而后土无祀则礼不答也有司与太史令谈祠官
寬舒议天地牲角茧栗今陛下亲祠后土后土宜於泽中圜丘为五坛坛一黄犢牢具已祠尽
瘞而从祠衣上黄於是天子东幸汾陰汾陰男子公孙滂洋等见汾旁有光如绛上遂立后土
祠於汾陰睢上如寬舒等议上亲望拜如上帝礼【郊祀志】

成帝建始元年徙甘泉泰畤河东后土於长安南北郊永始元年【纪作三年】三月以未有
皇孙复甘泉河东祠绥和二年以卒不获佑复长安南北郊建平三年惧孝哀皇帝之疾未瘳
复甘泉汾陰祠平帝元始五年王莽言宜如建始时丞相衡等议复长安南北郊奏可三十余
年间天墜之祠五徙焉【详见郊议】

莽又与大师光大司徒宫羲和歆等八十九人议皆曰天子父事天母事地今称天神曰皇天
上帝泰一兆曰泰畤而称墜只曰后土与中央黄灵同又兆北郊未有尊称宜令墜只称皇墜
后只兆曰广畤奏可【并郊祀志】

杂录

元延二年三月将祭后土上乃率羣臣横大河湊汾陰既祭行游介山回安邑顾龙门览盐池
登历观陟西岳以望八荒迹殷周之虚眇然以思唐虞之风扬雄以为临川羡鱼不如归而结
罔还上河东赋以劝【扬雄传】

西汉会要卷九

卷十

钦定四库全书

西汉会要卷十

宋 徐天麟 撰

礼四【吉礼】

郊议

成帝初即位丞相衡御史大夫谭奏言帝王之事莫大乎承天之序承天之序莫重於郊祀故圣王尽心极虑以建其制祭天於南郊就阳之义也瘞地於北郊即陰之象也天之於天子也因其所都而各飨焉往者孝武皇帝居甘泉宫即於云阳立泰畤祭於宫南今行常幸长安郊见皇天反北之泰陰祠后土反东之少阳事与古制殊又至云阳行谿谷中阨陝且百里汾陰则渡大川有风波舟楫之危皆非圣主所宜数乘郡县治道共张吏民困苦百官烦费劳所保之民行危险之地难以奉神灵而祈福佑殊未合於承天子民之意昔者周文武郊於丰鄠成王郊于雒邑由此观之天随王者所居而飨之可见也甘泉泰畤河东后土之祠宜可徙置长安合於古帝王愿与羣臣议定奏可大司马车骑将军许嘉等八人以为所从来久远宜如故右将军王商博士师丹议郎翟方进等五十人以为礼记曰燔柴於太坛祭天也瘞薶於大圻祭地也兆於南郊所以定天位也祭地於大圻在北郊就陰位也郊处各在圣王所都之南北书曰越三日丁巳用牲于郊牛二周公加牲告徙新邑定郊礼於雒明王圣主事天明事地察天地明察神明章矣天地以王者为主故圣王制祭天地之礼必於国郊长安圣主之居皇天所观视也甘泉河东之祠非神灵所飨宜徙就正阳大陰之处违俗复古循圣制定天位如礼便於是衡谭奏议曰陛下圣德聪明上通承天之大典览羣下使各悉心尽虑议郊祀之处天下幸甚臣闻广谋从衆则合於天心故洪范曰三人占则从二人言言少从多之义也论当往古宜於万民则依而从之违道寡与则废而不行今议者五十八人其五十人言当徙之义皆着於经传同於上世便於吏民八人不按经艺考古制而以为不宜无法之议难以定吉凶太誓曰正稽古立功立事可以永年丕天之大理诗曰毋曰高高在上陟降厥土日监在兹言天之日监王者之处也又曰乃眷西顾此维予宅言天以文王之都为居也宜於长安定南北郊为万世基天子从之既定衡言甘泉泰畤紫坛八觚宣通象八方五帝坛周环其下又有羣神之坛以尚书禋六宗望山川徧羣神之义紫坛有文章采镂黼黻之饰及玉女乐石坛僊人祠瘞鸾路騂驹寓龙马不能得其象於古臣闻郊紫坛飨帝之义埽地而祭上质也歌大吕舞云门以俟天神歌大簇舞咸池以俟地祇其牲用犊其席橐籥其器陶匏皆因天地之性贵诚上质不敢修其文也以为神只功德至大虽修精微而备庶物犹不足以报功唯至诚为可致上质不饰以章天德紫坛伪饰女乐鸾路騂驹龙马石坛之属宜皆勿修衡又言王者本以其礼制事天地非因异世所立而继之今雍鄜密上下畤本秦侯各以其意所立非礼之所载术也汉兴之初仪制未及定即且因奉故祠复立北畤今既稽古建定天地之大礼郊见上帝青赤

白黄黑五方之帝皆毕陈各有位饌祭祀备具诸侯所妄造王者不当长遵及北時未定时所立不宜复修天子皆从焉及陈宝祠由是皆罢明年上始祀南郊赦奉郊之县及中都官耐罪囚徒是岁衡谭复条奏长安厨官县官给祠郡国候神方士使者所祠凡六百八十三所其二百八所应礼及疑无明文可奉祠如故其余四百七十五所不应礼或复重请皆罢奏可本雍旧祠二百三所唯山川诸星十五所为应礼云若诸布诸严诸逐皆罢社主有五祠置其一又罢高祖所立梁晋秦荆巫九天南山莱中之属及孝文渭阳孝武薄忌泰一三一黄帝冥羊马行泰一臯山山君武夷夏后啓母石万里沙八神延年之属及孝宣参山蓬山之罍成山莱山四时蚩尤劳谷五牀僊人玉女径路黄帝天神原水之属皆罢候神方士使者副佐本草待诏七十余人皆归家明年衡坐事免官爵衆庶多言不当变动祭祀者又初罢甘泉泰時作南郊日大风坏甘泉竹宫折拔時中林木十围以上百余天子异之以问刘向对曰家人尚不欲絶种祠况於国之神宝旧時且甘泉汾陰及雍五時始立皆有神祇感应然後营之非苟而已也武宣之世奉此三神礼敬敕备神光尤着祖宗所立神祇旧位诚未易动而始纳贡禹之议後人相因多所动摇易大传曰诬神者殃及三世恐其咎不独止禹等上意恨之後上以无继嗣故令皇太后诏有司曰盖闻王者承事天地交接泰一尊莫着於祭祀孝武皇帝大圣通明始建上下之祀营泰時于甘泉定后土于汾陰而神祇安之飡国长久子孙蕃滋累世遵业福流于今今皇帝寬仁孝顺奉循圣绪靡有大愆而久无继嗣思其咎职殆在徙南北郊违先帝之制改神祇旧位失天地之心以妨继嗣之福春秋六十未见皇孙食不甘味寢不安席朕甚悼焉春秋大复古善顺祀其复甘泉泰時汾陰后土如故及雍五時陈宝祠在陈仓者天子复亲郊礼如前又复长安雍及郡国祠着明者且半後成都侯王商为大司马卫将军辅政杜邺说商曰东邻杀牛不如西邻之禴祭言奉天之道贵以诚质大得民心也行稷祀丰犹不蒙佑德修荐薄吉必大来古者坛場有常处燎禋有常用赞见有常礼牺牲玉帛虽备而财不匮车輿臣後虽动而用不劳是故每举其礼助者欢说大路所历黎元不知今甘泉河东天地郊祀咸失方位违陰阳之宜及雍五祀皆旷远奉尊之役休而复起繕治共张无解已时皇天着象殆可略知前上甘泉先毆失道礼月之夕奉引复迷祠后土还临河当渡疾风起波船不可御又雍大雨坏平阳宫垣乃三月甲子震电灾林光宫门祥瑞未着咎徵仍臻迹三郡所奏皆有变故不答不飡何以甚此诗曰率由旧章旧章先王法度文王以之交神于祀子孙千亿宜如异时公卿之议复还长安南北郊後数年成帝崩皇太后诏有司曰皇帝即位思顺天心遵经义定郊礼天下说熹惧未有皇孙故复甘泉泰時汾陰后土庶几获福皇帝恨难之卒未得其佑其复南北郊长安如故以顺皇帝之意也哀帝即位寢疾博延方术士京师诸县皆有侍祠使者尽复前世所常兴诸神祠官凡七百余所一岁三万七千祠云明年复令太皇太后诏有司曰皇帝孝顺奉承圣业靡有解怠而久疾未瘳夙夜惟思殆继体之君不宜改作其复甘泉泰時汾陰后土祠如故上亦不能亲至遣有司行事而礼祠焉後三年哀帝崩平帝元始五年大司马王莽奏言王者父事天故爵称天子孔子曰人之行莫大於孝孝莫大於严父严父莫大於配天王者尊其考欲以配天缘考之意欲尊祖推而上之遂及始祖是以周公郊祀后稷以配天宗祀文王於明堂以配上帝礼记天子祭天地及山川岁徧春秋谷梁传以十二月下辛卜正月上辛郊高皇帝受命因雍四時起北時而备五帝未共天地之祀孝文十六年用新垣平初起渭阳五帝庙祭泰一地祇以太祖高皇帝配日冬至祠泰一夏至祠地祇皆并祠五帝而共一牲上亲郊拜後平伏诛迺不复自亲而使有司行事孝武皇帝祠雍曰今上帝朕亲郊而后土无祠则礼不答也於是元鼎四年十一月甲子始立后土祠於汾陰或曰五帝泰一之

佐宜立泰一五年十一月癸未始立泰一祠於甘泉三岁一郊与雍更祠亦以高祖配不岁事天皆未应古制建始元年徙甘泉泰畤河东后土於长安南北郊永始元年三月以未有皇孙复甘泉河东祠绥和二年以卒不获佑复长安南北郊建平三年惧孝哀皇帝之疾未瘳复甘泉汾陰祠竟复无福臣谨与太师孔光长乐少府平晏大司农左咸中垒校尉刘歆太中大夫朱阳博士薛顺议郎国由等六十八人议皆曰宜如建始时丞相衡等议复长安南北郊如故莽又颇改其祭礼曰周官天璫之祀乐有别有合其合乐曰以六律六钟五声八音六舞大合乐祀天神祭璫祗祀四望祭山川享先妣先祖凡六乐奏六歌而天璫神只之物皆至四望盖谓日月星海也三光高而不可得亲海广大无限界故其乐同祀天则天文从祭璫则璫理从三光天文也山川地理也天地合祭先祖配天先妣配璫其谊一也天璫合精夫妇判合祭天南郊则以璫配一体之谊也天璫位皆南乡同席璫在东共牢而食高帝高后配于坛上西乡后在北亦同席共牢牲用茧栗玄酒陶匏礼记曰天子籍田千亩以事天璫繇是言之宜有黍稷天地用牲一燔黍醢蕤用牲一高帝高后用牲一天用牲左及黍稷燔黍南郊璫用牲右及黍稷瘞于北郊其旦东乡再拜朝日其夕西乡再拜夕月然後孝弟之道备而神祇嘉享万福降辑此天璫合祀以祖妣配者也其别乐曰冬至至於璫上之圜丘奏乐六变则天神皆降夏至至於泽中之方丘奏乐八变则璫只皆出天璫有常位不得常合此其各特祀者也陰阳之别於日冬夏至其会也以孟春正月上辛若丁天子亲合祀天璫于南郊以高帝高后配陰阳有离合易曰分陰分阳迭用柔刚以日冬至使有司奉祀南郊高帝配而望羣阳日夏至使有司奉祭北郊高后配而望羣陰皆以助致微气通道幽弱当此之时后不省方故天子不亲而遣有司所以正承天顺地复圣王之制显太祖之功也渭阳祠勿复修羣望未悉定定复奏奏可三十余年间天璫之祠五徙焉【郊祀志】

西汉会要卷十

<史部,政书类,通制之属,西汉会要>

卷十一

钦定四库全书

西汉会要卷十一

宋 徐天麟 撰

礼五【吉礼】

祖宗配侑

孝文十六年起渭阳五帝庙祭泰一地祇以太祖高皇帝配【郊祀志王莽疏】

孝武元鼎五年立泰一祠於甘泉亦以高祖配【同上】元封四年祠泰一五帝於明堂上坐合高皇帝祠坐对之【服?曰时未以高祖配天故言对刘攽曰按王莽疏文帝已用高祖配矣何谓未乎】

孝平元始四年郊祀高祖以配天宗祀孝文以配上帝【本纪】

元始五年安汉公莽奏以正月上辛若丁天子亲合祀天墜于南郊以高帝高后配以日冬至使有司奉祀南郊高帝配日夏至使有司奉祭北郊高后配【郊祀志】

總天神

高帝初或言周兴而邑立后稷之祠至今血食天下於是高祖制诏御史其令天下立灵星祠【张晏曰龙星左角曰天田则农祥也晨见而祭之】常以岁时祠以牛【郊祀志徐天麟按後汉志云言祠后稷而谓之灵星者以后稷又配食星也】

孝武作泰一祠坛祭日以牛祭月以羊彘特朝朝日夕夕月则揖而见泰一【郊祀志】

元封三年夏旱其令天下尊祠灵星焉【郊祀志】

孝宣又立岁星辰星太白荧惑南斗祠於长安城旁成山祠日莱山祠月又祠四时於琅邪蚩尤於壽良【郊祀志】平帝元始五年王莽已奏复长安南北郊又言书曰类於上帝禋於六宗欧阳大小夏侯三家说六宗皆曰上不及天下不及墜旁不及四方在六者之间助陰阳变化实一而名六名实不相应礼记祀典功施於民则祀之天文日月星辰所昭仰也地理山川海泽所生殖也易有八卦乾坤六子水火不相逮雷风不相悖山泽通气然後能变化既成万物也臣前奏徙甘泉泰畤汾陰后土皆复于南北郊谨按周官兆五帝于四郊山川各因其方

今五帝兆居在雍五時不合於古又日月雷风山泽易卦六子之尊气所谓六宗也星辰水火沟渎皆六宗之属也今或未特祀或无兆居谨与太师光大司徒宫羲和歆等八十九人议皆曰天子父事天母事地今称天神曰皇天上帝泰一兆曰泰時而称墜只曰后土与中央黄灵同又兆北郊未有尊称宜令墜祇称皇墜后祇兆曰广時易曰方以类聚物以羣分分羣神以类相从为五部兆天墜之别神中央帝黄灵后土時及日庙北辰北斗填星中宿中宫于长安城之未墜兆东方帝太昊青灵勾芒時及雷公风伯庙岁星东宿东宫于东郊兆南方炎帝赤灵祝融時及荧惑星南宿南宫于南郊兆西方帝少皞白灵蓐收時及太白星西宿西宫于西郊兆北方帝颛顼黑灵玄冥時及月庙雨师庙辰星北宿北宫于北郊兆奏可於是长安旁诸庙兆時甚盛矣【郊祀志】

山川

始名山大川在诸侯诸侯祝各自奉祠天子官不领及齐淮南国废令太祝尽以岁时致礼如故【郊祀志】

孝文十二年诏河湫汉水玉各加二【同上】

十五年修名山大川尝祀而絶者有司以岁时致礼【本纪】孝武建元元年诏曰河海润千里其令祠官修山川之祠为岁事曲加礼【本纪】

元封元年上登封泰山用事八神八神者一曰天主祠天齐天齐渊水居临菑南郊山下下者二曰地主祠泰山梁父盖天好陰祠之必於高山之下時命曰時地贵阳祭之必於泽中圜丘云三曰兵主祠蚩尤蚩尤在东平陆监乡齐之西竟也四曰陰主祠三山五曰阳主祠之罘山六曰月主祠之莱山皆在齐北竝勃海七曰日主祠盛山盛山斗入海最居齐东北阳以迎日出云八曰四时主祠琅邪琅邪在齐东北盖岁之所始【郊祀志】孝宣神爵元年制诏大常夫江海百川之大者也今阙焉无祠其令祠官以礼为岁事以四时祠江海頌水祈为天下丰年焉自是五岳四渎皆有常礼东岳太山於博中岳泰室於嵩高南岳灋山於灋西岳华山於华阴北岳常山於上曲阳河於临晋江於江都淮於平氏济於临邑界中皆使者持节侍祠唯泰山与河岁五祠江水四余皆一祷而三祠云又祠太室山於即墨三户山於下密祠天封苑火井於鸿門又立岁星辰星太白荧惑南斗祠於长安城旁又祠叁山八神於曲城蓬山石社石鼓於临朐之罘山於腫成山於不夜莱山於黄成山祠日莱山祠月【郊祀志】

高禘

武帝年二十九乃得太子甚喜为立禘使东方朔枚臯为禘祝【武五子传】

腊蜡

高祖十年有司请令县官常以春二月及腊祠稷以羊彘【志汉旧仪云十二月岁事腊以亥

日祠皆太牢】

孝武太初二年祠门户比腊【本纪师古曰冬至後腊祭百神】

严延年毋欲从延年腊【本传注云建丑之月为腊祭因会饮若今之蜡节也】

藉田【亲蚕】

文帝二年正月丁亥诏曰夫农天下之本也其开藉田朕亲率耕以给宗庙粢盛【本纪应邵曰古者天子耕藉田千亩藉者帝王典藉之常也臣瓚曰藉谓蹈藉也】

文帝即位贾谊说上曰汉之为汉几四十年矣公私之积犹可哀痛今殴民而归之农皆着於本使天下各食其力末技游食之民转而缘南亩则菑积足而民乐其所矣於是上感谊言始开藉田躬耕以劝百姓【食货志】十三年春二月甲寅诏曰朕亲率天下农耕以供粢盛皇后亲桑以奉祭服其具礼仪【本纪】

景帝後二年夏四月诏曰雕文刻镂伤农事者也锦绣纂组害女红者也农事伤则饥之本也女红害则寒之原也夫饥寒并至而能亡为非者寡矣朕亲耕后亲桑以奉宗庙粢盛祭服为天下先欲天下务农蚕素有蓄积以备灾害【本纪】

武帝制曰朕亲耕藉田以为农先【董仲舒传】

征和四年三月上耕于钜定【本纪应邵曰应国县也】

昭帝始元元年二月己亥上耕于钩盾弄田【应邵曰时帝年九岁未能亲耕帝藉钩盾官者近着故往试耕为戏弄也臣瓚曰西京故事弄田在未央宫中师古曰弄田谓游宴之田天子所戏弄耳非为昭帝年幼创有此名】

六年春正月上耕于上林【并本纪】

杂録

大司农属官有藉田令丞【百官表】

蜚館【元后传汉宫阙疏云上林苑有蜚館盖蚕蜚之所也】

成帝建始四年谷永对曰皇后桑蚕以治祭服共事天地宗庙正以是日疾风自西北大寒雨雪坏败其功以章不乡【读曰向】宜齐戒避寝以深自责【五行志】

社稷

高祖初起祷丰枌榆社天下已定诏御史令丰枌榆社常以时春以羊彘祠之【郊祀志】

汉二年令民除秦社稷立汉社稷【纪又郊祀志云令县为公社】十年春有司请令县常以春二月及腊祠稷以羊彘民里社各自裁以祠制曰可【郊祀志】

武帝立子闾为齐王策曰受兹青社立子且为燕王策曰受兹元社立子胥为广陵王策曰受兹赤社褚先生曰诸侯王始封者必受土於天子之社归立之以为国社以岁时祠之春秋大传曰天子之国有泰社东方青南方赤西方白北方黑上方黄故将封於东方者取青土封於南方者取赤土封於西方者取白土封於北方者取黑土封於上方者取黄土各取其色物裹以白茅封以为社此始受封於天子者也此之为主土主土者立社而奉之也【史记三王世家】

平帝元始三年王莽言帝王建立社稷社者土也宗庙王者所居稷者百谷之主所以奉宗庙共粢盛人所食以生活也王者莫不尊重亲郊自为之主礼如宗庙诗曰乃立冢土又曰以御田祖以祈甘雨礼记曰维祭宗庙社稷为越绋而行事圣汉兴礼仪稍定已有官社未立官稷【臣瓚曰高帝除秦社稷立汉社稷礼所谓大社也时立官又社以夏禹所谓王社也见汉祀令而未立官稷至此始立之世祖中兴不立官稷相承至今也】遂於官社後立官稷以夏禹配食官社后稷配食官稷稷种穀树徐州牧岁贡五色土各一斗【郊祀志又按平纪师古曰初立官稷於官社之後是为一处今更创置建於别所不相从也】

杂錄

栾布为燕相燕齐之齐皆为立社号曰栾公社【本传】昌邑有枯社木卧复生【眭弘传师古曰社木社主之木也】

建昭五年兖州刺史浩赏禁民私所自立社山阳橐茅乡社有大槐吏伐断之其夜槐复立其故处【五行志】

明堂

文帝时贾山言愿以夏岁二月定明堂【本传】

武帝建元元年议立明堂遣使者安车蒲轮束帛加璧迎鲁申公上乡儒术招贤良赵绾王臧等以文学为公卿欲议古立明堂城南以朝诸侯事未就窦太后不好儒术使人微伺赵绾等奸利按绾臧绾臧自杀诸所兴为皆废【以本纪及郊祀志修】

赵绾王臧请立明堂以朝诸侯不能就其事乃言师申公於是上使使束帛加璧安车以蒲里

轮驾驷迎申公弟子二人乘轺传从至舍鲁邸议明堂事大喜窦太后喜老子言不说儒术得绾臧之过以责上上因废明堂事【申公传】元封元年登封泰山降坐明堂【本纪臣瓚曰泰山东北址古时有明堂处则此所坐者也明年乃作明堂耳】

元封二年作明堂于泰山下初太子封泰山泰山东北址古时有明堂处处险不敞上欲治明堂奉高旁未晓其制度济南人公玉带上黄帝时明堂图明堂中有一殿四面无壁以茅盖通水水圜宫垣为复道上有楼从西南入名曰昆仑天子从之入以拜祀上帝焉於是上令奉高作明堂汶上如带图及是岁修封则祠泰一五帝於明堂上坐合高皇帝祠坐对之祠后土於下房以二十太牢天子从昆仑道入始拜明堂如郊礼毕祭堂下而上【以本纪及郊祀志修】

太初元年行幸泰山以十一月甲子朔旦冬至日祀上帝於明堂後每修封其赞飨曰天增授皇帝泰元神策周而复始皇帝敬拜泰一【郊祀志】

天汉三年三月行幸泰山祀明堂因受计还【本纪】

太始四年三月行幸泰山壬午祀高帝于明堂以配上帝因受计癸未祀孝景皇帝于明堂【本纪】

平帝元始四年正月宗祀孝文以配上帝二月王莽奏立明堂【本纪应劭曰明堂所以正四时出教化明堂上圜下方八窗四达布政之宫在国之阳上八窗法八风四达法四时九室法九州十二重法十二月三十六户法三十六风七十二牖法七十二雨孝经曰宗祀文王於明堂以配上帝上帝谓五时帝太昊之属黄帝曰合宫有虞曰总章商曰阳馆周日明堂】五年正月祫祭明堂诸侯王二十八人列侯百二十人宗室子九百余人召助祭礼毕皆益户赐爵及金帛增秩补吏各有差羲和刘歆等四人使治明堂辟雍令汉与文王灵台周公作洛同符皆封为列侯【本纪按功臣表平晏刘歆孔永孙迁使治明堂辟雍得万国驩心侯各千户】

西汉会要卷十一

卷十二

钦定四库全书

西汉会要卷十二

宋 徐天麟 撰

礼六【吉礼】

宗庙

太上皇庙【三辅黄图云在长安西北长安故城中香室街南鸿翔府北关辅记云在酒池北】孝元永光五年毁 建昭五年复

竟宁元年五月毁 孝成河平元年复 世世奉祠

高庙【三辅黄图高祖庙在长安西北故城中汉旧仪云高祖盖地六顷三十亩四步祠曰立九旗堂下撞千石钟十枚声闻百里】

孝惠尊高庙为太祖庙【韦玄成传】

孝景元年申屠嘉等奏世功莫大於高皇帝宜为帝者太祖之庙天子宜世世献制曰可【纪】

孝惠庙【三辅黄图云惠帝庙在高庙後】

元帝永光五年毁 竟宁元年三月复

五月毁

孝文庙【三辅黄图云文帝庙在长安城南】

四年作顾成庙【本纪应劭曰文帝自为庙制度卑狭若顾望而成故曰顾成】孝景元年申屠嘉等奏德莫盛於孝文皇帝宜为帝者太宗之庙制曰可【纪】

孝景庙【西京故事景帝庙号德阳】

中四年三月起德阳宫【本纪臣瓚曰帝自作之讳不言庙故言宫】

元帝竟宁元年毁

孝武庙【文纪注武帝庙号龙渊三辅黄图龙渊庙在茂陵东】

元光三年起龙渊宫【本纪】

宣帝本始二年诏尊孝武庙为世宗庙天子世世献【本纪】

哀帝即位孔光与羣臣杂议孝武皇帝虽有功烈亲尽宜毁刘歆议曰孝宣皇帝既以为世宗之庙建立万世不宜毁上覽其议制曰歆议可【韦玄成传】

孝昭庙【文纪注云昭帝庙号徘徊】

悼皇考庙

宣帝元康元年立皇考庙【本纪】

成帝永光五年定迭毁礼韦玄成奏皇考庙亲未尽不宜毁至平帝元始中王莽奏皇考庙本不当立请毁勿修奏可【韦玄成传】

孝宣庙【文纪注云宣帝庙号乐游三辅黄图云在杜陵西北】

平帝元始四年尊孝宣庙为中宗天子世世献祭【本纪】

孝元庙【文纪注云元帝庙号长壽】

平帝元始四年尊孝元庙为高宗天子世世献祭【本纪】

孝成庙【三辅黄图云成帝庙号阳池】

哀帝建平二年立共皇帝庙于京师【本纪】

共皇帝庙

平帝即位隳废共皇帝庙【师丹传】

孝哀庙

孝平庙

京师自高祖至宣帝与太上皇悼皇考各自居陵旁立庙【韦玄成传】

孝景元年十月诏曰盖闻古者祖有功而宗有德制礼乐各有由歌者所以发德也舞者所以明功也高庙酎奏武德文始五行之舞孝惠庙酎奏文始五行之舞孝文皇帝临天下通关梁不异远方除诽谤去肉刑赏赐长老收恤孤独以遂羣生减嗜欲不受献罪人不帑不诛亡罪不私其利也除宫刑出美人重絶人之世也朕既不敏弗能胜识此皆上世之所不及而孝文皇帝亲行之德厚侔天地利泽施四海靡不获福明象乎日月而庙乐不称朕甚惧焉其为孝文皇帝庙为昭德之舞以明休德然后祖宗之功德施於万世永永无穷朕甚嘉之其与丞相列侯中二千石礼官具礼仪奏丞相臣嘉等奏曰陛下永思孝道立昭德之舞以明孝文皇帝之盛德皆臣嘉等愚所不及臣谨议世功莫大於高皇帝德莫盛於孝文皇帝高皇帝庙宜为帝者太祖之庙孝文皇帝庙宜为帝者太宗之庙天子宜世世献祖宗之庙郡国诸侯宜各为孝文皇帝立太宗之庙诸侯王列侯使者侍祠天子所献祖宗之庙请宣布天下制曰可【本纪】

宣帝初即位欲褒先帝诏丞相御史曰朕以眇身蒙遗德承圣业奉宗庙夙夜惟念孝武皇帝躬仁谊厉威武北征匈奴单于远遁南平氐羌昆明瓠貉两越东定葳貉朝鲜广地斥境立郡县百蛮率服歟塞自至珍贡陈於宗庙协音律造乐歌荐上帝封太山立明堂改正朔易服色明开圣绪尊贤显功兴继絶褒周之後备天地之礼广道术之路上天报况符瑞并应宝鼎出白麟获海效钜鱼神人并见山称万岁功德茂盛不能尽宣而庙乐未称朕甚悼焉其与列侯二千石博士议於是羣臣大议廷中皆曰宜如诏书长信少府夏侯胜独曰武帝虽有攘四夷广土斥境之功然多杀士衆竭民财力奢侈泰亡度天下虚耗百姓流离物故者半蝗虫大起赤地数千里或人民相食蓄积至今未复亡德泽於民不宜为立庙乐公卿共难胜曰此诏书也胜曰诏书不可用也人臣之谊宜直言正论非苟阿意顺指议已出口虽死不悔於是丞相义御史大夫广明劾奏胜非议诏书毁先帝不道及丞相长史黄霸阿纵胜不举劾俱下狱有司遂请尊孝武帝庙为世宗庙奏盛德文始五行之舞天子世世献纳以明盛德武帝巡狩所幸郡国凡四十有九皆立庙如高祖太宗焉【夏侯胜传】

哀帝已追尊定陶共王为共皇帝郎中令冷褒黄门郎段犹等复奏言宜为共皇立庙京师上复下其议有司皆以为宜如褒犹言师丹议独曰礼父为士子为天子祭以天子其尸服以士服以亡爵父之义尊父母也为人後者为之子故为所後服斩衰三年而降其父母朞明尊本祖而重正统也孝成皇帝圣恩深远故为共王立後奉承祭祀令共皇长为一国太祖万世不毁恩义已备陛下既继体先帝持重太宗承宗庙天地社稷之祀义不得复奉定陶共皇祭入其庙今欲立庙于京师而使臣下祭之是无主也又亲尽当毁空去一国太祖不堕之祀而就无主当毁不正之礼非所以尊厚共皇也丹由是浸不合上意建平二年遂立共皇庙于京师平帝即位王莽白太后隳废共皇庙诸造议冷褒段犹等皆徙合浦【师丹传】

杂録

奉常掌宗庙礼仪景帝更名太常【百官表】

惠帝即位徙叔孙通为奉常定宗庙仪法【叔孙通传】

高后时患臣下妄议先帝宗庙寝园官故定着令敢有擅议者弃市至元帝改制蠲除此令成帝以无继嗣又复擅议宗庙之令【韦玄成传臣天麟按贡禹建迭毁之议乃在元帝删除此令时】人有盗高庙坐前玉环得文帝怒下廷尉治案盗宗庙服御物者为奏当弃市上大怒曰人亡道迺盗先帝器吾属廷尉者欲致之族而君以法奏之非吾所以共承宗庙意也释之谢曰法如是足矣今盗宗庙器而族之有如万分一假令愚民取长陵一抔土陛下且何以加其法乎文帝与太后言之乃许廷尉当是【张释之传】

内史府居太上庙堧中门东出不便鼂错迺穿门南出凿庙堧垣丞相大怒为奏请诛错景帝曰此非庙垣迺堧中垣不致于法【鼂错传】

临江王荣坐侵太宗庙地召诣中尉自杀【景纪中二年】元鼎二年任越人坐为太常庙酒酸不敬国除【表】太初三年石德坐为太常庙牲瘦赎论【表】

後元元年御史大夫商邱成坐为詹事侍祠孝文庙醉歌堂下曰出居安能鬱鬱大不敬自杀

二年魏不害坐为太常孝文庙风发瓦免【表】

始元六年江德坐为太常庙廊夜饮失火免【表】

甘露元年魏弘坐酎宗庙骑至司马门不敬削爵一级【恩泽侯表】

四月丙申太上皇庙火甲辰孝文庙火上素服五日【本纪】丙显坐酎宗庙骑至司马门不敬夺爵一级【恩泽侯表】韦弘为太常丞识奉宗庙典诸陵邑烦剧多罪过父贤以弘当为後故勅令自免弘怀谦不去官竟坐宗庙事繫狱【韦玄成传】

宣帝时八月饮酎行祠孝昭庙先毆旄头劒挺墮墜首垂泥中刃乡乘輿车马惊於是召梁邱贺筮之有兵谋不吉上还使有司侍祠是时霍氏外孙代郡太守任宣坐谋反诛宣子章为公车丞亡在渭城界中夜玄服入庙居郎间执戟立庙门待上至欲为逆发觉伏诛故事上常夜入庙其後待明而入自此始也【梁邱贺传】

霍山曰丞相擅减宗庙羔菟鼃可以此罪也【霍光传师古曰羔菟鼃所以供祭也】

韦玄成以列侯侍祀孝惠庙当晨入庙天雨淖不驾驷马车而骑至庙下有司劾奏等辈数人皆削爵为关内侯【本传】

高庙仆射【王莽传上哀韦持金匱至高庙以付仆射】

原庙

惠帝为东朝长乐宫及间往数步烦民作复道方筑武库南叔孙通奏事因请间曰陛下何自筑复道高帝?衣冠月出游高庙子孙奈何乘宗庙道以行哉惠帝惧曰急坏之通曰人主无过举今已作百姓皆知之矣愿陛下为原庙渭北衣冠月出游之益广宗庙大孝之本上乃诏有司立原庙【叔孙通传臣天麟按汉旧仪云原庙一岁十二祠闰加一祠月游衣冠以庙馈食之日】

元帝罢原庙【年月未详】

建昭五年复原庙【本纪】

郡国庙

高祖十年令诸侯王皆立太上皇庙于国都【本纪】

孝惠即位令郡诸侯王立高庙【本纪】

孝景即位诏郡国诸侯宜各为孝文皇帝立太宗之庙【本纪】

孝武建元六年辽东高庙灾董仲舒曰高庙不当在辽东【五行志】

孝宣本始二年令武帝巡狩所幸之郡国皆立庙【本纪】四年地震北海琅邪坏祖宗庙上以宗庙堕素服避正殿五日【本纪】

元帝初元二年地震於陇西郡毁落太上皇庙殿壁木饰【本纪】

凡祖宗庙在郡国者六十八合百六十七所【韦玄成传师古曰六十八者郡国之数也百六十七所宗庙之数也】

永光四年罢祖宗庙在郡国者【本纪详见庙议】

西汉会要卷十二

卷十三

钦定四库全书

西汉会要卷十三

宋 徐天麟 撰

礼七【吉礼】

庙议

初高祖时令诸侯王都皆立太上皇庙至惠帝尊高帝庙为太祖庙景帝尊文帝庙为太宗庙行所尝幸郡国各立太祖太宗庙至宣帝本始三年复尊孝武庙为世宗庙行所巡狩亦立焉凡祖宗庙在郡国六十八合百六十七所而京师自高祖下至宣帝与太上皇悼皇考各自居陵旁立庙并为百七十六又园中各有寝便殿日祭於寝月祭於庙时祭於便殿寝日四上食庙岁二十五祠便殿岁四祠又月一游衣冠而昭灵后武哀王昭哀后孝文太后孝昭太后卫思后戾太子戾后各有寝园与诸帝合凡三十所一岁祠上食二万四千四百五十五至元帝时贡禹奏言古者天子七庙今孝惠孝景庙皆亲尽宜毁及郡国庙不应古礼宜正定天子是其议未及施行而禹卒永光四年乃下诏先议罢郡国庙曰朕闻明王之御世也遭时为法因事制宜往者天下初定远方未宾因尝所亲以立宗庙盖建威销萌一民之至权也今赖天地之灵宗庙之福四方同轨蛮貊贡职久遵而不定令疏远卑贱共承尊祀殆非皇天祖宗之意朕甚惧焉传不云乎吾不与祭如不祭其与将军列侯中二千石二千石诸大夫博士议郎议丞相玄成御史大夫郑弘太子太傅严彭祖少府欧阳地余谏大夫尹更始等七十人皆曰臣闻祭非自外至者也繇中出生於心也故唯圣人为能飨帝孝子为能飨亲立庙京师之居躬亲承事四海之内各以其职来助祭尊亲之大义五帝三王所共不易之道也诗云有来雍雍至止肃肃相维辟公天子穆穆春秋之义父不祭於支庶之宅君不祭於臣仆之家王不祭於下土诸侯臣等愚以为宗庙在郡国宜无修臣请勿复修奏可因罢昭灵后武哀王昭哀后卫思后戾太子戾后园皆不奉祠裁置吏卒守焉罢郡国庙後月余复下诏曰盖闻明王制礼立亲庙四祖宗之庙万世不毁所以明尊祖敬宗着亲亲也朕获承祖宗之重惟大礼未备战栗恐惧不敢自颺其与将军列侯中二千石二千石诸大夫博士议玄成等四十四人奏议曰礼王者始受命诸侯始封之君皆为太祖以下五庙而迭毁毁庙之主藏乎太祖五年而再殷祭言壹禘壹祫也祫祭者毁庙与未毁庙之主皆合食於太祖父为昭子为穆孙复为昭古之正礼也祭义曰王者禘其祖自出以其祖配之而立四庙言始受命而王祭天以其祖配而不为立庙亲尽也立亲庙四亲亲也亲尽而迭毁亲疏之杀示有终也周之所以七庙者以后稷始封文王武王受命而王是以三庙不毁与亲庙四而七非有后稷始封文武受命之功者皆当亲尽而毁成王成二圣之业制礼作乐功德茂盛庙犹不世以行为諡而已礼庙在大门之内不敢远亲也臣愚以为高帝受命定天下宜为帝者太祖之庙世世不毁承後属尽者宜毁今宗庙异处昭穆不序宜入就太祖庙而序昭穆如礼太上皇孝惠孝文孝景庙皆亲尽宜毁皇

考庙亲未尽如故大司马车骑将军许嘉等二十九人以为孝文皇帝除诽谤去肉刑躬节俭不受献罪人不孥不私其利出美人重絶人类宾赐长老收恤孤独德厚侔天地利泽施四海宜为帝者太宗之庙廷尉忠以为孝武皇帝改正朔易服色攘四夷宜为世宗之庙谏大夫尹更始等十八人以为皇考庙上序於昭穆非正礼宜毁於是上重其事依违者一年乃下诏曰盖闻王者祖有功而宗有德尊尊之大义也存亲庙四亲亲之至恩也高皇帝为天下诛暴除乱受命而帝功莫大焉孝文皇帝国为代王诸吕作乱海内摇动然羣臣黎庶靡不一意北面而归心犹谦辞固逊而後即位削乱秦之迹兴三代之风是以百姓晏然咸获嘉福德莫盛焉高皇帝为汉太祖孝文皇帝为太宗世世承祀传之无穷朕甚乐之孝宣皇帝为孝昭皇帝後於义一体孝景皇帝庙及皇考庙皆亲尽其正礼义玄成等奏曰祖宗之庙世世不毁继祖以下五庙而迭毁今高皇帝为太祖孝文皇帝为太宗孝景皇帝为昭孝武皇帝为穆孝昭皇帝与孝宣皇帝俱为昭皇考庙亲未尽太上孝惠庙皆亲尽宜毁太上庙主宜瘞园孝惠皇帝为穆主迁於太祖庙寝园皆无复修奏可议者又以为清庙之诗言交神之礼无不清静今衣冠出游有车骑之衆风雨之气非所谓清静也祭不欲数数则渎渎则不敬宜复古礼四时祭於庙诸寝园日月闲祀皆可勿复修上亦不改也明年玄成复言古者制礼别尊卑贵贱国君之母非适不得配食则荐於寝身没而已陛下躬至孝承天心建祖宗定迭毁序昭穆大礼既定孝文太后孝昭太后寝祠园宜如礼勿复修奏可後岁余玄成薨匡衡为丞相上寝疾梦祖宗遣罢郡国庙上少弟楚孝王亦梦焉上诏问衡议欲复之衡深言不可上疾久不平衡惶恐祷高祖孝文孝武庙曰嗣曾孙皇帝恭承洪业夙夜不敢康宁思育休烈以章祖宗之盛功故动作接神必因古圣之经往者有司以为前因所幸而立庙将以繫海内之心非为尊祖严亲也今赖宗庙之灵六合之内莫不附亲庙宜一居京师天子亲奉郡国庙可止毋修皇帝祇肃旧礼尊重神明即告于祖宗而不敢失今皇帝有疾不豫廼梦祖宗见戒以庙楚王梦亦有其序皇帝悼惧即诏臣衡复修立谨案上世帝王承祖祢之大义皆不敢不自亲郡国吏卑贱不可使独承又祭祀之义以民为本间者岁数不登百姓困乏郡国庙无以修立礼凶年则岁事不举以祖祢之意为不乐是以不敢复如诚非礼义之中违祖宗之心咎尽在臣衡当受其殃大被其疾队在沟渎之中皇帝至孝肃谨宜蒙佑福唯高皇帝孝文皇帝孝武皇帝省察右飡皇帝之孝开赐皇帝眉壽亡疆令所疾日瘳平复反常永保宗庙天下幸甚又告谢毁庙曰往者大臣以为在昔帝王承祖宗之休典取象於天地天序五行人亲五属天子奉天故率其意而尊其制是以禘尝之序靡有过五受命之君躬接于天万世不堕继烈以下五庙而迁上陈太祖间岁而祫其道应天故福祿永终太上皇非受命而属尽义则当迁又以为孝莫大於严父故父之所尊子不敢不承父之所异子不敢同礼公子不得为母信为後则於子祭於孙止尊祖严父之义也寝日四上食园庙间祠皆可亡修皇帝思慕悼惧未敢尽从惟念高皇帝圣德茂盛受命溥将钦若稽古承顺天心子孙本支陈錫亡疆诚以为迁庙合祭久长之策高皇帝之意廼敢不聽即以令日迁太上孝惠庙孝文太后孝昭太后寝将以昭祖宗之德顺天人之序定亡穷之业今皇帝未受兹福乃有不能共职之疾皇帝愿复修立承祀臣衡等咸以为礼不得如不合高皇帝孝惠皇帝孝文皇帝孝武皇帝孝昭皇帝孝宣皇帝太上皇孝文太后孝昭太后之意罪尽在臣衡等当受其咎今皇帝尚未平诏中朝臣具复毁庙之文臣衡中朝臣咸复以为天子之祀义有所断礼有所承违统背制不可以奉先祖皇天不佑鬼神不飡六艺所载皆言不当无所依缘以作其文事如失指罪廼在臣衡当深受其殃皇帝宜厚蒙祉福嘉气日兴疾病平复永保宗庙与天亡极羣生百神有所归息诸庙皆同文久之上疾连年遂尽

复诸所罢寝庙园皆修祀如故初上定迭毁礼独尊孝文庙为太宗而孝武庙亲未尽故未毁上於是廼复申明之曰孝宣皇帝尊孝武庙曰世宗损益之礼不敢有与焉他皆如旧制唯郡国庙遂废云元帝崩衡奏言前以上体不平故复诸所罢祠卒不蒙福案卫思后戾太子戾后园亲未尽孝惠孝景庙亲尽宜毁及太上皇孝文孝昭太后昭灵后昭哀后武哀王祠请悉罢勿奉奏可初高后时患臣下妄非议先帝宗庙寝园官故定着令敢有擅议者弃市至元帝改制蠲除此令成帝时以无继嗣河平元年复复太上皇寝庙园世世奉祠昭灵后武哀王昭哀后并食於太上寝庙如故又复擅议宗庙之命成帝崩哀帝即位丞相孔光大司空何武奏言永光五年制书高皇帝为汉太祖孝文皇帝为太宗建昭五年制书孝武皇帝为世宗损益之礼不敢有与臣愚以为迭毁之次当以时定非令所为擅议宗庙之意也臣请与羣臣杂议奏可於是光禄勳彭宣詹事满昌博士左咸等五十三人皆以为继祖宗以下五庙而迭毁後虽有贤君犹不得与祖宗并列子孙虽欲褒大显扬而立之鬼神不飨也孝武皇帝虽有功烈亲尽宜毁太仆王舜中垒校尉刘歆议曰臣闻周室既衰四夷并侵猘狁最强於今匈奴是也至宣王而伐之诗人美而颂之曰薄伐猘狁至于太原又曰嘽嘽推推如霆如雷显允方叔征伐猘狁荆蛮来威故称中兴及至幽王犬戎来伐杀幽王取宗器自是之後南夷与北夷交侵中国不絶如綫春秋纪齐威南伐楚北伐山戎孔子曰微管仲吾其被髮左衽矣是故弃桓之过而録其功以为伯首及汉兴冒顿始强破东胡禽月氏并其土地地广兵强为中国害南越尉佗总百粤自称帝故中国虽平犹有四夷之患且无宁岁一方有急三面救之是天下皆动而被其害也孝文皇帝厚以货赂与结和亲犹侵暴无已甚者兴师十余万衆近屯京师及四边岁发屯备虏其为患久矣非一世之渐也诸侯郡守连匈奴及百粤以为逆者非一人也匈奴所杀郡守都尉略取人民不可胜数孝武皇帝愍中国罢劳无安宁之时乃遣大将军骠骑伏波楼船之属南?百粤起七郡北攘匈奴降昆邪十万之衆置五属国起朔方以夺其肥饶之地东伐朝鲜起玄菟乐浪以断匈奴之左臂西伐大宛并三十六国结乌孙起炖煌酒泉张掖以鬲婼羌裂匈奴之右臂单于孤特远遁于幕北四垂无事斥地远境起十余郡功业既定廼封丞相为富民侯以大安天下富实百姓其规抚可见又招集天下贤俊与協心同谋兴制度改正朔易服色立天地之祠建封禅殊官号存周後定诸侯之制永无逆争之心至今累世赖之单于守藩百蛮服从万世之基也中兴之功未有高焉者也高帝建大业为太祖孝文皇帝德至厚也为文太宗孝武皇帝功至着也为武世宗此孝宣帝所以发德音也礼记王制及春秋谷梁传天子七庙诸侯五大夫三士二天子七日而殡七月而葬诸侯五日而殡五月而葬此丧事尊卑之序也与庙数相应其文曰天子三昭三穆与太祖之庙而七诸侯二昭二穆与太祖之庙而五故德厚者流光德薄者流卑春秋左氏传曰名位不同礼亦异数自上以下降杀以两礼也七者其正法数可常数者也宗不在此数中宗变也苟有功德则宗之不可预为设数故於殷太甲为太宗太戊曰中宗武丁曰高宗周公为无逸之戒举殷三宗以劝成王繇是言之宗无数也然则所以劝帝者之功德博矣以七庙言之孝武皇帝未宜毁以所宗言之则不可谓无功德礼记祀典曰夫圣王之制祀也功施於民则祀之以劳定国则祀之能救大灾则祀之窃观孝武皇帝功德皆兼而有焉凡在於异姓犹将特祀之况於先祖或说天子五庙无见文又说中宗高宗者宗其道而毁其庙名与实异非尊德贵功之意也诗云蔽芾甘棠勿翦勿伐召伯所茇思其人犹爱其木况宗其道而毁其庙乎迭毁之礼自有常法无殊功异德固以亲疏相推及至祖宗之序多少之数经传无明文至尊至重难以疑文虚说定也孝宣皇帝举公卿之议用衆儒之谋既以为世宗之庙建之万世宣布天下臣愚以为孝武皇帝功烈

如彼孝宣皇帝崇立之如此不宜毀上覽其議而從之制曰太仆舜中壝校尉歆議可歆又以爲禮去事有殺故春秋外傳曰日祭月祀時享歲貢終王祖祢則日祭曾高祖月祀二祢則時享壇墠則歲貢大禘則終王德盛而游廣親親之殺也彌遠則彌尊故禘爲重矣孫居王父之處正昭穆則孫常與祖相代此遷廟之殺也聖人於其祖出於情矣禮無所不順故無毀廟自貢禹建迭毀之議惠景及太上寢園廢而爲虛失禮意矣至平帝元始中大司馬王莽奏本始元年丞相義等議謚孝宣皇帝親曰悼園置邑三百家至元康元年丞相相等奏父爲士子爲天子祭以天子悼園宜稱尊號曰皇考立廟益故奉園民滿千六百家以爲縣臣愚以爲皇考廟本不當立累世奉之非是又孝文太后南陵孝昭太后云陵園雖前以禮不復修陵名未正謹與大司徒晏等百四十七人議皆曰孝宣皇帝以兄孫繼統爲孝昭皇帝後以數故孝元世以孝景皇帝及皇考廟親未盡不毀此兩統貳父違於禮制案義奏親謚曰悼裁置奉邑皆經義相奏悼園稱皇考立廟益民爲縣違離祖統乖謬本義父爲士子爲天子祭以天子者乃謂若虞舜夏禹殷湯周文漢之高祖受命而王者也非謂繼祖統爲後者也臣請皇高祖考廟奉明園毀勿修罷南陵云陵爲縣奏可【韋玄成傳】

元帝時韋玄成爲丞相奏罷太上皇寢廟園平當上書言臣聞孔子曰如有王者必世而後仁三十年之間道德和洽制禮興樂災害不生禍亂不作今聖漢受命而王繼體承業二百余年孜孜不怠政令清矣然風俗未和陰陽未調災害數見意者大本有不立與何德化休證不應之久也既福不虛必有因而至者焉宜深迹其道而務修其本昔者帝堯南面而治先克明俊德以親九族而化及萬國孝經曰天地之性人爲貴人之行莫大於孝孝莫大於嚴父嚴父莫大於配天則周公其人也夫孝子善述人之志周公既成文武之業而制作禮樂修嚴父配天之事知文王不欲以子臨父故推而序之上極於后稷而配以天此聖人之德亡以加於孝也高皇帝聖德受命有天下尊太上皇猶周文武之追王太王王季也此漢之始祖後嗣所宜尊奉以廣盛德孝之至也書云正稽古建功立事可以永年傳於亡窮上納其言下詔復太上皇寢廟園【平當傳】

卷十四

钦定四库全书

西汉会要卷十四

宋 徐天麟 撰

礼八【吉礼】

庙祭

京师自高祖下至宣帝与太上皇悼皇考各自居陵旁立庙又园中各有寝便殿日祭於寝月祭於庙时祭於便殿寝日四上食庙岁二十五祠【如淳曰月祭朔望加腊为二十五晋灼曰汉仪注宗庙一岁十二祠五月尝麦六月七月三伏立秋糝黍又尝粢八月先夕馈飧皆一太牢酎祭用九太牢十月尝稻又饮蒸二太牢十月尝十二月腊二太牢又每月一太牢如闰加一祀与此上十二为二十五祀师古曰晋说是也】便殿岁四祠又月一游衣冠而昭灵后武哀王昭哀后孝文太后孝昭太后卫思后戾太子戾后各有寝园与诸帝合凡三十所一岁祠上食二万四千四百五十五用卫士四万五千一百二十九人祝宰乐人万二千一百四十七人养牺牲卒不在数中【韦玄成传】叔孙通言於惠帝曰古者有春尝菓今樱桃熟可献愿陛下取樱桃献宗庙诸菓献由此兴【叔孙通传】

高庙酎孝惠庙酎孝文庙酎【景纪注云酎三重酿酒也味厚故以荐宗庙】孝景元年令诸侯王列侯使者侍祠天子所献祖宗之庙【本纪】

孝武元鼎五年列侯坐献黄金酎祭宗庙不如法夺爵者百六人丞相赵周下狱死【本纪汉仪注云八月尝酎会诸侯庙中出金助祭谓之酎金金黄金也不如法者夺爵】

宗庙羔菟鼯【霍光传丞相擅减宗庙羔菟鼯注云羔菟鼯所以供祭也】

孝宣地节四年襄堤侯圣坐酎金斤八两少四两免【表】五凤四年朝侯因城坐酎金少四两免【表】

鄼侯萧胜王不齐耐为隶臣【表】

衣冠出游

高帝寝衣冠月出游高庙【叔孙通传师古曰谓从高帝陵寝出衣冠游於高庙月一为之汉制则然】

自高祖下至宣帝以太上皇悼皇考各自居陵旁立庙又园中各有寝便殿月一游衣冠【韦玄成传】

叔孙通言於惠帝愿陛下作原庙渭北衣冠月出游之【叔孙通传】

元帝时议者以为清庙之诗言交神之礼无不清静今衣冠出游有车骑之衆风雨之气非所谓清静也【韦元成传】

禘祫

孝平元始五年正月祫祭明堂【应劭曰礼五年而再殷祭一禘一祫祫祭者毁庙与未毁庙之主皆合食於太祖】诸侯王二十八人列侯百二十人宗室子九百人召助祭礼毕皆益户赐爵及金帛增秩补吏各有差【本纪臣天麟按後汉张纯传云汉旧制三年一祫毁庙主合食高庙有庙主未尝合祭元始五年诸王列侯庙会始为禘祭】

祠孔子

高祖十二年行过鲁以太牢祀孔子【本纪】

孔霸以初元元年为关内侯食邑霸上书求奉孔子祭祀元帝下诏曰其令霸以所食邑八百户祀孔子焉霸还长安子福名数於鲁【福霸长子也霸前徙名数于长安今还其子名数于鲁国】奉夫子祀【孔光传】

平帝元始元年封孔子後孔均为褒成侯奉其祀追谥孔子曰褒成宣尼公【本纪】

祷旱

武帝元封二年旱廼祷万里沙【郊祀志】

三年夏旱其令天下尊祠灵星焉【同上】

昭帝始元六年夏旱大雩不得举火【本纪臣瓚曰抑阳助陰也】董仲舒治国以春秋灾异之变推陰阳所以错行故求雨闭诸阳纵诸陰其止雨反是行之一国未尝不得所欲【本传】

杂祭祀

高祖置祠祀官女巫其梁巫祠天地天社天水房中堂上之属晋巫祠五帝东君云中君巫社巫祠族人炊之属秦巫祠杜主巫保族累之属荆巫祠堂下巫先司命施糜之属九天巫祠九

天皆以岁时祠宫中其河巫祠河於临晋而南山巫祠南山秦中秦中者秦二世皇帝也各有
时日【郊祀志】

武帝时求神君舍之上林礪氏馆神君者长陵女子以乳死见神於先後宛若【孟康曰兄弟
妻相谓先後宛若字也师古曰先苏见反古谓之娣姒关中俗呼为先後吴楚俗呼为妯娌】
宛若祠之其室民多往祠平原君亦往祠其後子孙以尊显及上即位则厚礼置祠之内中闻
其言不见其人云是时李少君亦以祠竈谷道郤老方见上上尊之少君者故深泽侯人主方
【如淳曰侯家人主方药也】匿其年及所生长常自谓七十能使物郤老其游以方徧诸侯
无妻子人闻其能使物及不死更馈遗之常余金钱衣食人皆以为不治产业而饶给又不知
其何所人愈信争事之少君资好方善为巧发奇中尝从武安侯宴坐中有年九十余老人少
君廼言与其大父游射处老人为儿从其大父识其处一坐尽惊少君见上有故铜器问少君
曰此器齐桓公十年陈於柏寝已而按其刻果齐桓公器一宫尽骇以为少君神数百岁人也
少君言上祠竈皆可致物致物而丹沙可化为黄金黄金成以为饮食器则益壽益壽而海中
蓬莱仙者廼可见之以封禪则不死黄帝是也臣尝游海上见安期生安期生食臣枣大如瓜
安期生僊者通蓬莱中合则见人不合则隐於是天子始亲祠竈遣方士入海求蓬莱安期生
之属而事化丹砂诸药齐为黄金矣久之少君病死天子以为化去不死也使黄锤史寬舒受
其方而海上燕齐怪迂之方士多更来言神事矣

天子病鼎湖甚巫医无所不致游水发根言【师古曰游水姓也发根名也】上郡有巫病而
鬼下之上召置祠之甘泉及病使人问神君神君言曰天子无忧病病少瘳强与我会甘泉於
是上病瘳遂起幸甘泉病良已大赦置壽宫神君神君最贵者曰大一其佐曰太禁司命之属
皆从之非可得见闻其言言与人音等时去时来来则风肃然居室帷中时昼言然常以夜天
子祓然後入因巫为主人关饮食所欲言行下又置壽宫北宫张羽旗设共具以礼神君神君
所言上使受书其名曰画法【孟康曰策画之法也】其所言世俗之所知也无絶殊者而天
子心独熹其事秘世莫知也

是时既?两粤粤人勇之乃言粤人俗鬼而其祠皆见鬼数有效昔东甌王敬鬼壽百六十岁後
世怠慢故衰耗廼命粤巫立粤祝祠安台无坛亦祠天神帝百鬼而以鸡卜上信之粤祠鸡卜
自此始用

帝东巡海上考神仙之属未有验者方士言黄帝时为五城十二楼以候神人於执期名曰迎
年上许作之如方名曰明年上亲礼祠上黄犊焉後至泰山修封东幸琅邪礼日成山登之罘
大海用事八神延年【师古曰延年即上所谓迎年者】又祠神人於交门宫若有乡坐拜者
云其後方士之候神入海求蓬莱者终无验公孙卿犹以大人之迹为解天子犹羈縻不絶几
遇其真诸所兴如薄忌泰一及三一冥羊马行赤星五牀寬舒之祠宫以岁时致礼凡六祠皆
太祝领之至如八神诸明年凡山它名祠行过则祠去则已方士所兴祠各自主其人终则已
祠官不主它祠皆如故

宣帝时南郡获白虎献其皮牙爪上为立祠又以方士言为随侯劔宝玉宝璧周康宝鼎立四

祠於未央宫中又祠太室山於即墨三户山於下密祠天封苑火井於鸿门又立岁星辰星太白荧惑南斗祠於长安城旁又祠叁山八神於曲城蓬山石社石鼓於临朐之罍山於睡成山於不夜莱山於黄成山祠日莱山祠月又祠四时於琅邪蚩尤於壽良京师近县鄠则有劳谷五牀山日月五帝仙人玉女祠云阳有径路神祠祭休屠王也又立五龙山僊人祠及黄帝天神帝原水凡四祠於肤施或言益州有金马碧鸡之神可醮祭而致於是遣諫大夫王褒使持节而求之大夫刘更生献淮南枕中洪宝苑秘之方令尚书铸作事不验更生坐论京兆尹张敞上疏諫曰愿明主时忘车马之好斥远方士之虚语游心帝王之术太平庶几可兴也後尚方待诏皆罢【郊祀志】

成帝建始二年匡衡张谭条奏长安厨官县官给祠郡国 神方士使者所祠凡六百八十三所其二百八所应礼及疑无明文可奉祠如故其余四百七十五所不应礼或复重请皆罢奏可本雍旧祠二百三所唯山川诸星十五所为应礼云若诸布诸严诸逐皆罢社主有五祠置其一又罢高祖所立梁晋秦荆巫九天南山莱中之属及孝文渭阳孝武薄忌泰一三一黄帝冥羊马行泰一臯山山君武夷夏后啓母石万里沙八神延年之属及孝宣叁山蓬山之罍成山莱山四时蚩尤劳谷五牀僊人玉女径路黄帝天神原水之属皆罢候神方士使者副佐本草待诏七十余人皆归家【郊祀志】

哀帝即位寢疾博延方术士京师诸县皆有侍祠者尽复前世所常兴神祠官凡七百余所一岁三万七千祠云【郊祀志】

平帝元始元年禁淫祀【本纪】

币玉

文帝十三年诏广诸祀坛场珪币【本纪】

十四年河湫汉水玉各加二【郊祀志】

武帝郊见泰一有司奉瑱玉嘉牲荐飧【同上孟康曰璧大六寸谓之瑱】天汉三年幸北帝祠常山瘞元玉【同上】

牲牢

高祖祠丰粉榆社以羊彘

令天下立灵星祠常以岁时祠以牛

十年有司请令县祠稷以羊彘

孝文十六年用新垣平初起渭阳五帝庙祭泰一地祇以太祖高皇帝配日冬至祠泰一夏至祠地祇皆并祠五帝而共一牲

文帝立长门五帝坛祠以五牢

武帝祠泰一日一太牢七日

解祠黄帝用一梟破镜冥羊用羊祠马行用一青牡马泰一臯山山君用牛武夷君用乾鱼陰阳使者以一牛郊雍获一角兽於是以荐五時時加一牛

元鼎四年祠后土五坛坛一黄犢牢具已祠尽瘞五年郊泰時泰時所用如雍一時物而加醴枣脯之属杀一犛牛以为俎豆牢具而五帝独有俎豆醴进其下四方地为餼食羣臣从者及北斗云已祠胙余皆燎之其牛色白白鹿居其中彘在鹿中鹿中水而酒之祭日以牛祭月以羊彘特

太初二年有司言雍五時无牢孰具芬芳不备廼令祠官进時犢牢具色食所胜而以木寓马代驹云及诸名山大川用驹者悉以木寓马代独行过亲祠廼用驹平帝元始五年王莽奏复长安南北郊莽又颇改其祭礼曰天墜位皆南乡同席墜在东共牢而食高帝高后配於坛上西乡后在北亦同席共牢牲用蜚栗玄酒陶匏礼记曰天子籍田千畝以事天墜繇是言之宜有黍稷天地用牲一燔黍瘞用牲一高帝高后用牲一天用牲左及黍稷燔黍南郊墜用牲右及黍稷瘞于北郊【并郊祀志】

水衡都尉为宗庙取牲官【龚遂传】

栾布子贲坐为太常牺牲不如令国除【栾布传按功臣表云坐雍牺牲不如令免】

萧何之後壽成坐为太常牺牲瘦免【功臣表与传同百官表云坐牺牲不如令】

石德坐庙牲瘦赎论【表】

车輅

文帝十四年诏增雍五時路车各一乘驾被具西時畦時寓车各一乘寓马四匹驾被具【郊祀志】

祭服

文帝郊见五帝祠衣皆上赤【郊祀志按是时虽尚水德以有赤帝子之符故祠衣上赤】

武帝祠后土祠衣皆上黄【郊祀志按黄者土之色也】

泰一祝宰衣紫及绣五帝各如其色日赤月白【同上】

受厘

文帝受厘坐宣室【贾谊传应劭曰厘祭余肉也师古曰厘福也受神之福也】

巫祝

太常属官有太祝令丞景帝中六年更名太祝为祠祀武帝太初元年更曰庙祀【百官表】

高祖即位置祠祀官则有秦晋梁荆之巫【高帝赞详见上文祭祀条】文帝十三年诏曰秘祝之官移过於下朕甚弗取其除之【郊祀志】

十四年诏曰祠官祝厘皆归福於朕躬不为百姓朕甚媿之其令祠官致敬无有所祈【本纪】

尊宝鼎

文帝後元年新垣平言曰周鼎亡在泗水中今河决通於泗臣望东北汾陰直有金宝气意周鼎其出乎兆见不迎则不至於是上使使治庙汾陰南临河欲祠出周鼎人有上书告平所言皆诈也下吏治诛夷平【郊祀志】武帝元鼎四年夏六月汾陰巫锦为民祠魏脰后土营旁见地如鉤状掊视得鼎鼎大异於衆鼎文镂无款识怪之言吏吏告河东太守胜胜以闻天子使验问巫得鼎无奸诈迺以礼祠迎鼎至甘泉从上行荐之至中山晏温有黄云焉有鹿过上自射之因之以祭云至长安公卿大夫皆议尊宝鼎天子曰间者河溢岁数不登故巡祭后土祈为百姓育谷今年丰稌未报鼎曷为出哉有司皆言闻昔泰帝兴神鼎一一者一统天地万物所系象也黄帝作宝鼎三象天地人禹收九牧之金铸九鼎象九州皆尝鬯亨上帝鬼神其空足曰鬲以象三德飡承天佑夏德衰鼎迁于殷殷德衰鼎迁于周周德衰鼎迁于秦秦德衰宋之社亡鼎迺沦伏而不见周颂曰自堂徂基自羊徂牛鼐鼎及鼯不?不敖胡考之休今鼎至甘泉以光润龙变承休无疆合兹中山有黄白云降盖若兽为符路弓乘矢集获坛下报祠大亨唯受命而帝者心知其意而合德焉鼎宜视宗祢庙藏於帝庭以合明应制曰可【同上】

汾陰得宝鼎武帝嘉之荐见宗庙藏於甘泉宫羣臣皆上壽贺曰陛下得周鼎壽王独曰非周鼎上闻之召而问之曰今朕得周鼎羣臣皆以为然壽王独以为非何也有说则可无说则死壽王对曰臣安敢无说臣闻周德始乎后稷长於公刘大於太王成於文武显於周公德泽上昭天下漏泉无所不通上天报应鼎为周出故名曰周鼎今汉自高祖继周亦昭德显行布恩施惠六合和同至於陛下恢弘祖业功德愈盛天瑞并至珍祥毕见昔秦始皇亲出鼎於彭城而不能得天祚有德而实鼎自出此天之所以与汉乃汉鼎非周宝也上曰善羣臣皆称万壽

是日赐壽王黄金十斤【吾邱壽王传】

宣帝时美阳得鼎献之下有司议多以为宜荐见宗庙如元鼎时故事张敞好古文字按鼎铭勒而上议曰臣闻周祖始乎后稷后稷封于釐公刘发迹于豳太王建国於岐梁文武兴於鄠鎬由此言之则岐梁丰鎬之间周旧居也固宜有宗庙坛场祭祀之藏今鼎出於岐东中有刻书曰王命尸臣官此枸邑赐尔旗鸞黼黻琫戈尸臣拜手稽首曰敢对扬天子丕显休命臣愚不足以迹古文窃以传记言之此鼎殆周之所以褒赐大臣大臣子孙刻铭其先功藏之於宫庙也昔宝鼎之出於汾睢也河东太守以闻诏曰朕巡祭后土祈为百姓蒙丰年今谷暉未报鼎焉为出哉博问耆老意旧藏与诚欲考得事实也有司验睢上非旧藏处鼎大八尺一寸高三尺六寸殊异於衆鼎今此鼎细小又有欵识不宜荐见於宗庙制曰京兆尹议是【郊祀志】

西汉会要卷十四

卷十五

钦定四库全书

西汉会要卷十五

宋 徐天麟 撰

礼九【嘉礼】

朝会

汉七县长乐宫成羣臣朝十月仪先平明谒者治礼引以次入殿门廷中陈车骑戍卒卫官设兵张旗志传曰趋殿下郎中挟陛陛数百人功臣列侯诸将军军吏以次陈西方东乡文官丞相以下陈东方西乡大行设九宾胪句传於是皇帝辇出房百官执职传警【职汉书作戟】引诸侯王以下至吏六百石以次奉贺自诸侯王以下莫不震恐肃敬至礼毕尽伏置法酒诸侍坐殿上皆伏抑首以尊卑次起上寿觴九行谒者言罢酒御史执法举不如仪者辄引去竟朝置酒无敢譴譏失礼者於是高帝曰吾廼今日知为皇帝之贵也【叔孙通传】

九年未央宫成高祖大朝诸侯羣臣置酒未央前殿高祖奉玉卮【应劭曰乡饮酒礼器也受四升】起为太上皇寿【史记本纪】

中朝【刘辅传孟康曰中朝内朝也大司马左右前後将军侍中常侍散骑诸吏以下为中朝丞相以下至六百石为外朝】

法坐【梅福传师古曰法坐正坐也听朝之处犹言法宫法驾也】

东朝【灌夫传东朝廷辨之如淳曰东朝太后朝也】

文帝时申屠嘉入朝邓通居上旁有怠慢之礼嘉奏事毕因言曰陛下幸爱羣臣则富贵之至於朝廷之礼不可以不肃上曰君勿言吾私之罢朝坐府中嘉为檄召通诣丞相府不来且斩通通恐入言上上曰汝第往吾今使人召若通至诣丞相府免冠徒跣顿首谢嘉嘉坐自如弗为礼责曰夫朝廷者高皇帝之朝廷也通小臣戏殿上大不敬当斩史今行斩之通顿首首尽出血不解上度丞相已困通使使持节召通而谢丞相此吾弄臣君释之邓通既至为上泣曰丞相几杀臣【申屠嘉传】武帝元鼎中士卒暴露连岁为朝会不置酒【责杨仆书】哀帝诏罢乐府官丞相孔光大司空何武奏大乐鼓员六人嘉至鼓员十人邯鄲鼓员二人骑吹鼓员三人江南鼓员二人淮南鼓员四人巴俞鼓员三十六人歌鼓员二十四人楚严鼓员一人梁皇鼓员四人临淮鼓员三十五人兹邠鼓员三人凡鼓十二员百二十八人朝贺置酒陈殿下应古兵法外安世乐鼓员二十人十九人可罢沛吹鼓员十二人族歌鼓员二十七人陈吹

鼓员十三人商乐鼓员十四人东海鼓员十六人长乐鼓员十三人缦乐鼓员十三人凡鼓八员百二十八人朝贺置酒陈前殿房中不应经法皆可罢【礼乐志】

诸侯朝覲

高祖九年冬十月淮南王梁王赵王楚王朝未央宫【本纪】十年冬十月淮南王燕王荆王梁王楚王齐王长沙王来朝【本纪】

十一年令诸侯王通侯常以十月朝献及郡各以其口数率人岁六十三钱以给献费【本纪】

汉之仪注朝见贺正月者常一王与四侯俱朝见十余岁一至【史记王世】

诸侯王朝见天子汉法凡当四见耳始到入小见到正月朔旦奉皮为璧玉贺正月法见後三日为王置酒赐金钱财物後二日复入小见辞去凡留长安不过二十日小见者燕见於门内饮於省中非士人所得入也王侯朝贺以苍璧【食货志】

武帝为皮币王侯宗室朝覲聘享必以皮币荐璧然後得行【食货志】

宣帝神爵元年诏军旅暴露转输烦劳其令诸侯王列侯蛮夷王侯君长当朝二年者皆毋朝【本纪】

诸侯正月朝覲天子观以礼乐飧醴乃归【匡衡传】

成帝河平三年楚王嚣朝正月诏与子男一人俱【本传】哀帝对成帝曰令诸侯王朝得从其国二千石【哀帝纪】吴王□使人为秋请【本传孟康曰律春曰朝秋曰诸如古诸侯朝聘也如淳曰□不自行使人代已致请礼】

重侯檐坐不使人为秋请免【王子侯表】

建成侯拾坐使行人奉璧荐皮贺元年十月不会免【王子侯表】

上尊号

汉五年诸侯上疏曰楚王韩信韩王信淮南王英布梁王彭越故衡山王吴芮赵王张敖燕王臧荼昧死再拜言大王陛下先时秦为无道天下诛之大王先得秦王定关中於天下功最多存亡定危救败继絶以安万民功盛德厚又加惠於诸侯王有功者使得立社稷地分已定而位号比擬亡上下之分大王功德之着於後世不宜昧死再拜上皇帝尊号汉王曰寡人闻帝者贤者有也虚言亡实之名非所取也今诸侯王皆推高寡人将何以处之哉诸侯王皆曰大

王起於细微灭乱秦威动海内又以辟陋之地自汉中行威德诛不义立有功平定海内功臣皆受地食邑非私之也大王德施四海诸侯王不足以道之居帝位甚实宜愿大王以幸天下汉王曰诸侯王幸以为便於天下之民则可矣於是诸侯王及太尉长安侯臣绾等三百人与博士稷嗣君叔孙通谨择良日二月甲午上尊号汉王即皇帝位于汜水之阳【高纪】

六年上归栎阳五日一朝太公太公家令说太公曰天亡二日土亡二王皇帝虽子人主也太公虽父人臣也奈何令人主拜人臣如此则威重不行後上朝太公拥彗迎门卻行上大惊下扶太公太公曰帝人主奈何以我乱天下法於是上心善家令言赐黄金五百斤夏五月丙午诏曰人之至亲莫亲於父子故父有天下传归於子子有天下尊归于父此人道之极也前日天下大乱兵革并起万民苦殃朕亲被坚执锐自帅士卒犯危难平暴乱立诸侯偃兵息民天下大安此皆太公之教训也诸王通侯将军羣卿大夫已尊朕为皇帝而太公未有号今上尊太公曰太上皇【高纪】

羣臣迎代王至邸上议曰丞相臣平太尉臣勃大将军臣武御史大夫臣苍宗正臣郢朱虚侯臣章东牟侯臣兴居典客臣揭再拜言大王足下子弘等皆非孝惠皇帝子不当奉宗庙臣谨请陰安侯顷王后列侯吏二千石议大王高皇帝子宜为嗣愿大王即天子位代王曰奉高帝宗庙重事也寡人不佞不足以称愿请楚王计宜者寡人弗敢当羣臣皆伏固请代王西乡逊者三南乡逊者再丞相平等皆曰臣伏计之大王奉高祖宗庙最宜称虽天下诸侯万民皆以为宜臣等为宗庙社稷计不敢忽愿大王幸聽臣等臣谨奉天子玺符再拜上代王曰宗室将相王列侯以为其宜寡人寡人不敢辞遂即天子位【文纪】

上壽

高帝令叔孙通起朝仪会长乐宫成羣臣朝十月诸侯王以下至吏六百石以次奉贺礼毕尽伏置法酒以尊卑次起上壽觴九行谒者言罢酒竟朝置酒无敢譴譁失礼者【详见上朝会条】

九年冬十月淮南王梁王赵王楚王朝未央宫置酒前殿上奉玉卮为太上皇壽曰始大人常以臣亡赖不能治产业不如仲力今某之业所就孰与仲多殿上羣臣皆称万岁大笑为乐【高纪】

汾陰得宝鼎武帝嘉之荐见宗庙藏于甘泉宫羣臣皆上壽【吾邱壽王传】

武帝登封泰山从禅还坐明堂羣臣更上壽【郊祀志】儿寛为御史大夫从东封泰山还登明堂寛上壽曰臣闻三代改制属象相因间者圣统废絶陛下发愤合指天地祖立明堂辟雍宗祀泰一六律五声幽赞圣意神乐四合各有方象以承嘉祀为万世则天下幸甚将见大元本瑞登告岱宗发祉闔门以候景至癸亥宗祀日宣重光上元甲子肃雍永享光辉充塞天文粲然见象日昭报降符应臣寛奉觴再拜上千万岁壽制曰敬举君之觴【儿寛传】

昭平君醉杀主傅以公主子廷尉上请请论上可其奏哀不能自止左右尽悲东方朔前上壽曰臣闻圣王为政赏不避仇讎诛不择骨肉书曰不偏不党王道荡荡此二者五帝所重三王所难也陛下行之是以四海之内元元之民各得其所天下幸甚臣朔奉觴昧死再拜上万岁寿上乃起入省中夕时召责朔曰传曰时然後言人不厌其言今先生上壽时乎朔免冠顿首曰臣闻乐太甚则阳溢哀太甚则陰损陰阳变则心气动心气动则精神散精神散而邪气及消忧者莫若酒臣朔所以上壽者明陛下正而不阿因以止哀也愚不知忌讳当死【东方朔传】

车千秋为丞相见上连年治太子狱诛罚尤多羣下恐惧思欲寬广上意慰安衆庶廼与御史中二千石共上壽颂德美劝上施恩惠缓刑罚玩听音乐养志和神为天下自虞乐上报曰朕之不德自左丞相与贰师陰谋逆乱巫蛊之祸流及士大夫朕日一食者累月廼何乐之听痛士大夫常在心既事不咎虽然巫蛊始发诏丞相御史督二千石求捕廷尉治未闻九卿廷尉有所鞠也曩者江充先治甘泉宫人转至未央椒房以及敬声之畴李禹之属谋入匈奴有司无所发今丞相亲掘兰台蛊验所明知也至今余巫颇脱不止陰贼侵身远近为蛊朕媿之甚何壽之有敬不举君之觴谨谢丞相二千石各就館【车千秋传】

昭帝始元元年二月黄鹄下建章宫太液池中公卿上壽【本纪】

宣帝幸太子宫太子家令疏受奉觴上壽辞理闲雅【本传】元帝建昭四年以诛郅支单于告祠郊庙赦天下羣臣上壽置酒以其图书示後宫贵人【本纪】

册立皇子

武帝元狩六年四月乙巳庙立皇子闳为齐王旦为燕王胥为广陵王初作诰【本纪】

初大司马去病昧死再拜上疏皇帝陛下陛下过听使臣去病待罪行间宜专边塞之思虑暴骸中野无以报乃敢惟他议以干用事者诚见陛下忧劳天下哀怜百姓以自忘亏膳贬乐损郎员皇子赖天能胜衣趋拜至今无号位师傅官陛下恭谦不恤羣臣私望不敢越职而言臣窃不胜犬马心昧死愿陛下诏有司因盛夏吉时定皇子位唯陛下幸察臣去病昧死再拜以闻皇帝陛下三月乙亥御史臣光守尚书令奏未央宫制曰下御史六年三月戊申朔乙亥御史臣光守尚书令丞非下御史书到言丞相臣青翟御史大夫臣汤太常臣充大行令臣息太子少傅臣安行宗正事昧死上言大司马去病上疏曰陛下过听使臣去病待罪行间宜专边塞之思虑暴骸中野无以报乃敢惟他议以干用事者诚见陛下忧劳天下哀怜百姓以自忘亏膳贬乐损郎员皇子赖天能胜衣趋拜至今无号位师傅官陛下恭谦不恤羣臣私望不敢越职而言臣窃不胜犬马心昧死愿陛下诏有司因盛夏吉时定皇子位唯陛下幸察制曰下御史臣谨与中二千石臣贺等议古者裂地立国并建诸侯以承天子所以尊宗庙重社稷也今臣去病上疏不忘其职因以宣恩乃道天子卑逊自贬以劳天下虑皇子未有号位臣青翟臣汤等宜奉义遵职愚僮而不逮事方今盛夏吉时臣青翟臣汤等昧死请立皇子臣闳臣旦臣胥为诸侯王昧死请所立国名制曰盖闻周封八百姬姓并列或子男附庸礼支子不祭云

并建诸侯所以重社稷朕无闻焉且天非为君生民也朕之不德海内未洽乃以未教成者强君连城即股肱何劝其更议以列侯家之三月丙子奏未央宫丞相臣青翟御史大夫臣汤昧死言臣谨与列侯臣婴齐中二千石二千石臣贺谏大夫博士臣安等议曰伏闻周封八百姬姓并列奉承天子康叔以祖考显而伯禽以周公立成为建国诸侯以相传为辅百官奉宪各遵其职而国统备矣窃以为并建诸侯所以重社稷者四海诸侯各以其职奉贡祭支子不得奉祭宗庙礼也封建使守藩国帝王所以扶德施化陛下奉承天统明开圣绪尊贤显功兴灭继绝续萧文终之後于酇褒厉羣臣平津侯等昭六亲之序明天施之属使诸侯王封君得推私恩分子弟户邑锡号尊建百有余国而家皇子为列侯则尊卑相踰列位失序不可以垂统於万世臣请立臣闾臣旦臣胥为诸侯王三月丙子奏未央宫制曰康叔亲属有十而独尊者褒有德也周公祭天命郊故鲁有白牡騂刚之牲羣公不毛贤不肖差也高山仰之景行向之朕甚慕焉所以抑未成家以列侯可四月戊寅奏未央宫丞相臣青翟御史大夫臣汤昧死言臣青翟等与列侯吏二千石谏大夫博士臣庆等议昧死奏请立皇子为诸侯王制曰康叔亲属有十而独尊者褒有德也周公祭天命郊故鲁有白牡騂刚之牲羣公不毛贤不肖差也高山仰之景行向之朕甚慕所以仰未成家以列侯可臣青翟臣汤博士臣将行等伏闻康叔亲属有十武王继体周公辅成王其八人皆以祖考之尊建为大国康叔之年幼周公在三公之位而伯禽据国於鲁盖爵命之时未至成人康叔後扞禄父之难伯禽殄淮夷之乱昔五帝异制周爵五等春秋三等皆因时而序尊卑高皇帝拨乱世反诸正昭至德定海内封建诸侯爵位二等皇子或在襁褓而立为诸侯王奉承天子为万世法则不可易陛下躬亲仁义体行圣德表里文武显慈孝之行广贤能之路内褒有德外讨强暴极临北海西溱月氏匈奴西域举国奉师輿械之费不赋於民虚御府之藏以赏元戎开禁仓以赈贫穷减戍卒之半百蛮之君靡不乡风承流称意远方殊俗重译而朝泽及方外故珍兽至嘉谷兴天应甚彰今诸侯支子封至诸侯王而家皇子为列侯臣青翟臣汤等窃伏熟计之皆以为尊卑失序使天下失望不可臣请立臣闾臣旦臣胥为诸侯王四月癸未奏未央宫留中不下丞相臣青翟太仆臣贺行御史大夫事太常臣充太子太傅臣安行宗正事昧死言臣青翟等前奏大司马臣去病上疏言皇子未有号位臣谨与御史大夫臣汤中二千石二千石谏大夫博士臣庆等昧死请立皇子臣闾等为诸侯王陛下逊文武躬自切及皇子未教羣臣之议儒者称其术或諄其心陛下固辞弗许家皇子为列侯臣青翟等窃与列侯臣壽成等二十七人议皆曰以为尊卑失序高皇帝建天下为汉太祖王子孙广支辅先帝法则弗改所以宣至尊也臣请令史官择吉日具礼仪上御史奏輿地图他皆如前故事制曰可四月丙申奏未央宫太仆臣贺行御史大夫事昧死言太常臣充言卜入四月二十八日乙巳可立诸侯王臣昧死奏輿地图请所立国名礼仪别奏臣昧死请制曰立皇子闾为齐王旦为燕王胥为广陵王四月丁酉奏未央宫六年四月戊寅朔癸卯御史大夫汤下丞相丞相下中二千石二千石下郡太守诸侯相丞书从事下当用者如律令【史记三王世家下同】

维六年四月乙巳皇帝使御史大夫汤庙立子闾为齐王曰於戏小子闾受兹青社朕承祖考维稽古建尔国家封於东土世为汉藩辅於戏念哉恭朕之诏惟命不于常人之好德克明显光义之不图俾君子怠悉尔心允执其中天禄永终厥有????不臧乃凶於而国害於尔躬於戏保国艾民可不敬与王其戒之

右齐王策

维六年四月乙巳皇帝使御史大夫汤庙立子旦为燕王曰於戏小子旦受兹玄社朕承祖考维稽古建尔国家封於北土世为汉藩辅於戏荤粥氏虐老兽心侵犯寇盗加以奸巧边萌於戏朕命将卒徂征厥罪万夫长千夫长三十有二君皆来降旗奔师荤粥徙域北州以绥悉尔心毋作怨毋侮德毋乃废备非教士不得从召於戏保国艾民可不敬与王其戒之

右燕王策

维六年四月乙巳皇帝使御史大夫汤庙立子胥为广陵王曰於戏小子胥受兹赤社朕承祖考维稽古建尔国家封於南土世为汉藩辅古人有言曰大江之南五湖之闲其人轻心扬州保疆三代要服不及以政於戏悉尔心战兢兢乃惠乃顺毋侗好佚毋迓宵人维法维则书云臣不作威不作福靡有後羞於戏保国艾民可不敬与王其戒之

右广陵王策

西汉会要卷十五

卷十六

钦定四库全书

西汉会要卷十六

宋 徐天麟 撰

礼十【嘉礼】

行幸

高帝六年冬人告楚王信谋反上问左右左右争欲系之用陈平计乃伪游云梦十二月会诸侯于陈信迎谒因执之【本纪下同】

七年冬上自将击韩王信於铜鞮上从晋阳连乘胜逐北至楼烦会大寒士卒堕指者什二三遂至平城为匈奴所围七日用陈平秘计得出十二月上还过赵不礼赵王二月自栎阳徙都长安

七年夏四月行如雒阳八年冬上击韩信余寇於东垣还过赵赵相贯高等耻上不礼其王陰谋欲弑上上欲宿心动问县名何曰柏人上曰柏人者迫於人也去弗宿十二月行自东垣至

八年春三月行如雒阳九月行自雒阳至

九年十二月行如雒阳二月行自雒阳至

十一年淮南王布反上自将击布十二年上还过沛留置酒沛宫悉召故人父老子弟佐酒发沛中儿得百二十人教之歌酒酣上击筑自歌曰大风起兮云飞扬威加海内兮归故乡安得猛士兮守四方令儿皆和习之上乃起舞愴慨伤怀泣数行下谓沛父兄曰游子悲故乡吾虽都关中万岁之後吾魂魄犹思家沛且朕自沛公以诛暴逆遂有天下其以沛为朕汤沐邑复其民世世无有所与沛父老诸母故人日乐饮极欢道旧故为笑乐十余日上欲去沛父兄因请上曰吾人衆多父兄不能给乃去沛中空县皆之邑西献上留止张饮三日沛父兄皆顿首曰沛幸得复丰未得唯陛下哀矜上曰丰者吾所生长极不忘耳吾特以其为雍齿故反我为魏沛父兄固请之廼并复丰比沛

文帝三年上幸甘泉【如淳曰蔡邕云天子车驾所至民臣以为幸故曰幸见令长三老官属亲临轩益乐赐以酒食帛葛越巾佩之属民爵有级数或赐田租之半故因谓之幸也师古曰甘泉在云阳本泰林光宫】自甘泉之高奴因幸太原留游太原十余日七月上自太原至

十年冬行幸甘泉

後二年夏行幸雍棧阳宮

四年五月行幸雍

五年正月行幸陇西三月行幸雍秋七月行幸代【并本纪】後六年匈奴大入边以宗正刘礼为将军军霸上祝兹侯徐厉为将军军?門以河内守亚夫为将军军细柳以备故上自劳军至霸上及?門军直驰入将以下骑出入送迎已而之细柳军军士吏被甲銳兵刃张弓弩持满天子先驱至不得入先驱曰天子且至军门都尉曰军中闻将军之令不闻天子之诏有顷上至又不得入於是上使使持节诏将军曰吾欲劳军亚夫乃传言开壁門壁門士请车骑曰将军约军中不得驱驰於是天子乃按轡徐行至中营将军亚夫揖曰介冑之士不拜请以军礼见天子为动改容式车使人称谢皇帝敬劳将军成礼而去【周亚夫传】

景帝中六年行幸雍郊五畤

武帝元光二年十月行幸雍祠五畤

六年六月行幸雍

元狩元年十月行幸雍祠五畤获白麟

二年冬十月行幸雍祠五畤

元鼎四年行幸雍祠五畤自夏阳东幸汾陰立后土祠礼毕行幸荣阳还至洛阳

五年冬十月行幸雍祠五畤遂踰陇登空同西临祖厉河而还【并本纪】

六年天子亲幸缙氏观大人迹於是郡国各除道繕治宫馆名山神祠所至望幸矣【郊祀志】

元封元年行自云阳北历上郡西河五原出长城北登单于台至朔方临北河勒兵十八万骑旌旗径千余里威震匈奴还祠黄帝於桥山廼归甘泉春正月行幸缙氏遂幸东海登封泰山降坐明堂行自泰山复东巡海上北至碣石巡自辽西历北边九原五月乃至甘泉周万八千里云【本纪及郊祀志】

二年十月行幸雍祠五畤春幸缙氏遂至东莱夏四月还祠泰山至瓠子临决河

四年十月行幸雍祠五畤通回中道遂北出萧关历独鹿鸣泽自代而还幸河东祠后土幸中

都赦汾陰夏阳中都死罪以下赐三县及杨氏皆无出今年租赋五年冬行南巡狩至于盛唐望祀虞舜于九嶷登?天柱山自寻阳浮江亲射蛟江中获之舳舻千里薄枞阳而出遂北至琅邪并海所过礼祠其名山大川三月还至泰山增封赦所幸县毋出今年租赋赐鰥寡孤独帛贫穷者粟还幸甘泉郊泰畤

六年冬行幸回中三月行幸河东祠后土

太初元年冬十月行幸泰山十一月祀上帝于明堂十二月?高里祠后土东临勃海望祠蓬莱

二年行幸河东祠后土

三年正月行东巡海上夏四月还修封泰山礼石闾四年行幸回中

天汉元年正月行幸甘泉郊泰畤三月行幸河东祠后土

二年春行幸东海还幸回中

三年三月行幸泰山修封祀明堂因受计还幸北地祠常山瘞玄玉夏四月赦天下行所过毋出田租

太始二年行幸回中

三年春行幸甘泉宫飧外国客二月行幸东海获赤鴈幸琅邪礼日成山登之罘浮大海山称万岁冬赐行所过户五千钱鰥寡孤独帛人一匹

四年春行幸泰山祀高祖于明堂因受计四月幸不其祠神人于交门宫夏五月还幸建章宫大置酒赦天下十二月行幸雍祠五畤西至安定北地

征和元年正月还幸建章宫

二年夏行幸甘泉

三年正月行幸雍至安定北地

四年正月行幸东莱临大海三月上耕于钜定还幸泰山修封庚寅祀于明堂癸巳?石闾夏六月还幸甘泉後元元年正月行幸甘泉郊泰畤遂幸安定

二年二月行幸螭屋五柞宫

宣帝神爵元年正月行幸甘泉郊泰畤三月行幸河东祠后土

五凤元年正月行幸甘泉郊泰畤

二年行幸雍祠五畤

三年三月行幸河东祠后土

甘露元年正月行幸甘泉郊泰畤

二年十二月行幸萑阳宫属玉观

三年正月行幸甘泉郊泰畤上自甘泉宿池阳宫上登长平阪诏单于毋謁其左右当户之羣皆列观蛮夷君长王侯迎者数万人夹道陈上登渭桥咸称万岁单于就邸置酒建章宫飧赐单于观以珍宝

黄龙元年正月行幸甘泉郊泰畤

元帝初元二年正月行幸甘泉郊泰畤

四年正月行幸甘泉郊泰畤三月行幸河东祠后土赦汾陰徒赐民爵一级女子百户牛酒鰥寡高年帛行所过无出租赋

五年三月行幸雍祠五畤

永光元年正月行幸甘泉郊泰畤赦云阳徒赐民爵一级女子百户牛酒高年帛行所过毋出租赋

四年三月行幸雍祠五畤

五年春正月行幸甘泉郊泰畤三月上幸河东祠后土冬上幸长杨射熊馆布车骑大猎

建昭元年三月上幸雍祠五畤

二年正月行幸甘泉郊泰畤三月行幸河东祠后土成帝永始二年冬十一月行幸雍祠五畤

四年春正月行幸甘泉郊泰畤神光降集紫殿大赦天下赐云阳吏民爵女子百户牛酒鰥寡孤独高年帛三月行幸河东祠后土赐吏民如云阳行所过毋出田租元延元年三月行幸雍祠五畤

二年正月行幸甘泉郊泰畤三月行幸河东祠后土三年三月行幸雍祠五畤

四年春正月行幸甘泉郊泰畤三月行幸河东祠后土绥和元年三月行幸雍祠五畤

二年正月行幸甘泉郊泰畤三月行幸河东祠后土【并本纪】

西汉会要卷十六

<史部,政书类,通制之属,西汉会要>

卷十七

钦定四库全书

西汉会要卷十七

宋 徐天麟 撰

礼十一【嘉礼】

诏令章奏

制诏御史【师古曰天子之言一曰制书二曰诏书制书者谓为制度之命也】

制诏丞相【宣帝制诏丞相封丙吉为博阳侯】

制诏丞相御史【成帝封丙吉孙昌哀帝改元见李寻传】

制诏丞相御史大夫【左迁毋将隆见本传】

制诏丞相太尉御史大夫【文帝即位赦天下】

制诏丞相大司空【免孙宝为庶人】

高帝十一年求贤诏御史大夫昌下相国相国下诸侯王御史中执法下郡守【本纪】

诏书无京兆文不当发【王尊传】

高帝下诏击吴王有敢议诏及不如诏皆要斩【吴王濞传】宣帝二千石有治理效辄以玺书勉励【循吏传】

夏侯胜言武帝不宜立庙乐公卿共难胜曰此诏书也胜曰诏书不可用也於是田广明劾奏胜非议诏书不道下狱【夏侯胜传】

哀帝建平二年诏曰六月甲子制书非赦令也皆蠲除之【本纪】

文帝遗单于书牋以尺一寸【匈奴传】

武帝元狩六年四月乙巳庙立皇子闾为齐王旦为燕王胥为广陵王初作诰【本纪】

元狩六年四月立三王初大司马臣去病昧死再拜上疏皇帝陛下愿因盛夏吉时定皇子位臣去病昧死再拜臣闻皇帝陛下三月乙亥御史臣光守尚书令奏未央宫制曰下御史六年三月戊申朔乙亥御史臣光守尚书令丞非下御史书到言丞相臣青翟御史大夫臣汤太常臣充大行令臣息太子少傅臣安行宗正事昧死上言大司马去病上疏愿定皇子位制曰下御史臣谨与中二千石二千石臣贺等议方今盛夏吉时臣青翟臣汤等昧死请立皇子臣闾臣旦臣胥为诸侯王昧死请所位国名制曰其更议以列侯家之三月丙子奏未央宫丞相臣青翟御史大夫臣汤昧死言臣谨与列侯臣婴齐中二千石二千石臣贺谏大夫博士臣安等议曰家皇子列侯不可以垂统於万世臣请立臣闾臣旦臣胥为诸侯王三月丙子奏未央宫制曰家以列侯可四月戊寅奏未央宫丞相臣青翟御史大夫臣汤昧死言臣青翟等与列侯吏二千石谏大夫博士臣庆等议昧死奏请立皇子为诸侯王制曰家以列侯可臣青翟臣汤博士臣将行等伏闻云云今诸侯支子封至诸侯王而家皇子为列侯臣青翟臣汤等窃熟计之不可臣请立臣闾臣旦臣胥为诸侯王四月癸未奏未央宫留中不下丞相臣青翟太仆臣贺行御史大夫事太常臣充太子少傅臣安行宗正事昧死言臣青翟等前奏大司马臣去病上疏言皇子未有号位臣谨与御史大夫臣汤中二千石二千石谏大夫博士臣庆等昧死请立皇子臣闾等为诸侯王陛下固辞弗许臣青翟等窃与列侯臣壽成等二十七人议臣请令史官择吉日具礼仪上御史奏舆地图他皆如前故事制曰可四月丙申奏未央宫太仆臣贺行御史大夫事昧死言太常臣充言卜入四月二十八日乙巳可立诸侯王臣昧死奏舆地图请所立国名礼仪别奏臣昧死请制曰立某为某王四月丁酉奏未央宫六年四月戊寅朔癸卯御史大夫汤下丞相丞相下中二千石二千石下郡太守诸侯相丞书从事下当用者如律令【三王世家】

御史中丞受公卿奏事举劾案章【百官表】

大臣奏事不宜漏泄【师丹传】

王嘉曰故事尚书希下章为烦扰百姓章文必有敢告之字乃下【本传】

昌邑王淫乱霍光与羣臣连名奏王尚书令读奏曰丞相臣敞大司马大将军臣光车骑将军臣安世度辽将军臣明友前将军臣增後将军臣充国御史大夫臣谊宜春侯臣谭当?侯臣圣随桃侯臣昌乐杜侯臣屠耆堂太仆臣延年太常臣昌大司农臣延年宗正臣德少府臣乐成廷尉臣光执金吾臣延壽大鸿胪臣贤左冯翊臣广明右扶风臣德长信少府臣嘉典属国臣武京辅都尉臣广汉司隶校尉臣辟兵诸吏文学光禄大夫臣迁臣畸臣吉臣赐臣管臣胜臣梁臣长幸臣夏侯胜大中大夫臣德臣卬昧死言皇太后陛下臣敞等顿首死罪云云臣敞等谨与博士臣霸臣隼舍臣德臣虞舍臣射臣仓议皆曰当废臣请有司御史大夫臣谊宗正臣德太常臣昌与太祝以一太牢告祠高庙臣敞等昧死以闻皇太后诏曰可【霍光传】

故事诸上书者皆为二封题其一曰副领尚书者先发副封所言不善屏去不奏魏相因许伯白去副封以防壅蔽宣帝善之【魏相传】

吏民上书字或不正辄举劾【艺文志】

杂录

衍简侯不疑坐挟诏书论耐为司寇【功臣表】

武帝时公孙弘奏谨按诏书下者明天人分际通古今之谊文章尔雅训辞深厚【儒林传序】

武帝每为淮南王报书常召司马相如视草乃遣【淮南王安传】

刘向曰今出令未能踰时而反是反汗也【本传】

傅太后遗诏益封高安侯贤二千户丞相王嘉封还诏书【王嘉传】

文帝时山东吏布诏令民虽老羸癯疾莫不扶杖而往听之愿少须臾无死思见德化之成【贾山传】

宣帝诏书每下民欣然若更生【王吉传】

元帝罢朱崖诏匡衡云诸见罢朱崖诏书者人人自以为将见太平也【匡衡传】

温水侯安国坐上书为妖言会赦免【王子侯表】

新利侯偃坐上书谩免【王子侯表】

冠礼

孝惠五年皇帝冠【本纪】

孝昭元凤四年加元服【本纪臣天麟按後汉礼仪志注云孝昭帝冠辞曰陛下摛显先帝之光耀以承皇天之嘉祿钦奉仲春之吉辰普尊大道之郊域秉率百福之休灵始加昭明之元服推远冲孺之幼志蘊积文武之成德肃勒高祖之清庙六合之内靡不蒙德永永与天无极】

孝宣五凤元年正月皇太子冠皇太后赐丞相将军列侯中二千石帛人百匹太夫人八十匹夫人六十匹又赐列侯嗣子爵五大夫男子为父後者爵一级【本纪】

婚礼

宣帝时王吉上疏曰窃见当世趋务不合於道者谨条奏吉意以为夫妇人伦大纲夭壽之萌也世俗嫁娶太早未知为人父母之道而有子是以教化不明而民多夭聘妻送女亡节则贫人不及故不举子又汉家列侯尚公主诸侯则国人承翁主使男事女夫诘於妇逆陰阳之位故多女乱【王吉传】

五凤二年八月诏曰夫婚姻之礼人伦之大者也酒食之会所以行礼乐也今郡国二千石或擅为苛禁禁民嫁娶不得酒食相贺召由是废乡党之礼令民亡所乐非所以导民也诗不云乎民之失德乾餱以愆勿行苛政【本纪】

平帝元始三年诏刘歆等杂定婚礼四辅公卿大夫博士郎吏家属以礼娶亲迎立輅并马【本纪服?曰輅立乘小车也并马俪驾也】

四年立皇后王氏遣长乐少府夏侯淳宗正刘宏少府宗伯凤尚书令平晏纳采太师光大司徒马宫大司空甄丰左将军孙建执金吾尹赏行太常事太中大夫刘歆及太卜太史令以下四十九人赐皮弁素积以礼杂卜筮大牢祠宗庙待吉月日明年春遣大司徒宫大司空丰左将军建右将军甄邯光禄大夫歆奉乘輿法驾迎皇后於安汉公第宫丰歆授皇后玺绂登车称警蹕便时上林延壽门入未央宫前殿羣臣就位行礼大赦天下益封父安汉公地满百里赐迎皇后及行礼者自三公以下至驺宰执事长乐未央宫安汉公第者皆增秩赐金帛各有差皇后立三月以礼见高庙【王后传】故事聘皇后黄金二万斤为钱二万万【王莽传】

乡射

高帝引兵围鲁鲁中诸儒尚讲习礼弦歌之音不絶於是诸儒始得修其经学讲明大射乡饮之礼【儒林传序】河间献王修兴雅乐董仲舒等皆以为音中正雅立之大乐春秋乡射作於学官希濶不讲【礼乐志】

韩延壽为东郡太守修治学官春秋乡射陈钟鼓管弦盛升降揖逊【本传】

成帝鸿嘉二年行幸云阳博士行饮酒礼【本纪】

鸿嘉二年三月博士行大射礼【五行志】

武帝时丞相公孙弘奏言民不得挟弓弩十贼张弩百吏不敢前盜賊不輒伏辜免脱者衆害寡而利多此盜賊所以蕃也禁民不得挟弓弩则盜賊执短兵短兵接则衆者胜以衆吏捕寡賊其勢必得盜賊有害无利则莫犯法刑错之道也臣愚以为禁民毋得挟弓弩便上下其议吾邱壽王对曰臣闻古者作五兵非以相害以禁暴讨邪也安居则以制猛兽而备非常有事则以设守卫而施行阵及至周室衰微上无明王诸侯力政强侵弱衆暴寡海内抗敝巧诈并生是以知者?愚勇者威怯苟以得胜为务不顾义理故机变械饰所以相贼害之具不可胜数於是秦兼天下废王道立私议灭诗书而首法令去仁恩而任刑戮堕名城杀豪杰销甲兵折

鋒刃其後民以耰鋤箠挺相撻击犯法滋衆盜賊不胜至於赭衣塞路羣盜滿山卒以亂亡故聖王務教化而省禁防知其不足恃也今陛下昭明德建太平舉俊材興學官三公有司或由窮巷起白屋裂地而封宇內日化方外向風然而盜賊猶有者郡國二千石之罪非挾弓弩之過也禮曰男子生桑弧蓬矢以舉之明示有事也孔子曰吾何執執射乎大射之禮自天子降及庶人三代之道也詩云大侯既抗弓矢斯張射夫既同獻爾發功言貴中也愚聞聖王合射以明教矣未聞弓矢之為禁也且所為禁者為盜賊之以攻奪也攻奪之罪死然而不止者大奸之於重誅固不避也臣恐邪人挾之而吏不能止良民以自備而抵法禁是擅賊威而奪民救也竊以為無益於禁奸而廢先王之典使學者不得習行其禮大不便書奏上以難丞相弘弘詘服焉【吾邱壽王傳】

賜酺

文帝初即位賜民酺五日【本紀服虔曰酺音蒲文穎曰漢律三人以上無故羣飲酒罰金四兩今詔橫賜令會聚飲食五日也】

十六年得玉杯令天下大酺

景帝後元年夏大酺五日

武帝元光二年令民大酺五日

元朔三年城朔方大酺五日

太初二年祠后土令大酺五日

太始三年令天下大酺五日

昭帝元鳳四年令天下酺五日

宣帝五鳳三年大酺五日【并本紀】

賜姓氏【更姓氏附】

高祖封項伯等四人為列侯賜姓劉氏【項伯傳】

蒯敬勸高祖都關中上曰蒯者劉也賜姓劉氏【本傳】孝文時吏居官者或長子孫以官為氏倉氏庫氏則倉庫吏之後也【王嘉傳】

武帝之初七十年間國家亡事為吏者長子孫居官者以為姓號【食貨志】

金日磾本匈奴休屠王太子也以休屠作金人祭天故因赐姓金氏云【本赞】

更姓氏

汉兴济北王田安失国齐人谓之王家因以为氏【元后传】夏侯婴曾孙颇尚主主随外家姓号孙公主故滕公子孙更为孙氏【夏侯婴传】

周阳由其父赵兼以淮南王舅侯周阳故因氏焉【周阳由传】马宫公姓马矢宫仕学称马氏【本传】

京房本姓李推律自以为京氏【本传】

车千秋本姓田氏为相年老上优之得乘小车入宫殿中故因号车丞相【本传】

明德马皇后恶其先人有反易姓莽【武纪】

灌夫父张孟为灌婴舍人得幸荐之至二千石故蒙灌氏姓为灌孟【灌夫传】

卫青父郑季与卫媼通生青青有同母兄卫长君及姊子夫故青冒姓卫氏【卫青传】

周公後褒鲁节侯公子寬薨侯相如嗣更姓公孙氏後更为姬氏【恩泽侯表】

禁踰侈

汉初定与民无禁【叙传师古曰国家不设车旗衣服之禁】

高祖八年爵非公乘以上毋得冠刘氏冠贾人毋得衣锦绣绮縠絺紵罽毼操兵乘骑马【本纪】

高祖令贾人不得衣丝乘车重税租以困辱之孝惠高后时复弛商贾之律然市井子孙亦不得为吏【食货志】文帝时贾谊上疏曰今民卖僮者为之绣衣丝履偏诸缘内之闲中是古天子后服所以庙而不宴者也而庶人得以衣婢妾白縠之表薄绮之里縋以偏诸美者黼绣是古天子之服今富人大贾嘉会召客者以被墙庶人屋壁得为帝服倡优下贱得为后饰且帝之身自衣皂绋而富民墙屋被文绣天子之后以缘其领庶人□妾缘其履此臣所谓舛也岂如今定经制使君君臣臣上下有差而後有所持循矣【本传】

武帝天汉元年秋闭城门大搜【本纪臣瓚曰汉帝年纪六月禁踰侈七月闭城门大搜索踰侈者也师古曰踰法度而奢侈者也】

二年秋大搜【本纪】

元帝时贡禹奏言高祖孝文孝景皇帝循古节俭後世争为奢侈转转益甚臣下亦相放效衣服履綦刀剑乱於主上主上时临朝入庙衆人不能别异今大夫僭诸侯诸侯僭天子天子过天道其日久矣矫复古化在於陛下天子纳善其忠乃下召令太仆减食谷马水衡减食肉兽省宜春下苑以与贫民又罢角抵诸戏及齐三服官【本传】

成帝永始四年诏曰圣王明礼制以叙尊卑异车服以章有德方今世俗奢僭罔极靡有厌足公卿列侯亲属近臣四方所则或廼奢侈逸豫务广第宅治园池多蓄奴婢被服绮縠设钟鼓备女乐车服嫁娶葬埋过制吏民慕效寢以成俗其申勅有司以渐禁之青緑民所常服且勿止列侯近臣各自省改司隶校尉察不变者【纪】哀帝即位下诏曰制节谨度以防奢淫为政所先百王不易之道也诸侯王列侯公主吏二千石及豪富民多蓄奴婢田宅亡限与民争利百姓失职重困不足其议限列有司条奏诸王列侯得名田国中列侯在长安及公主名田县道关内侯吏民名田皆无得过三十顷诸侯王奴婢二百人列侯公主百人关内侯吏民三十人六十以上十岁以下不在数中贾人皆不得名田为吏犯者以律论诸名田蓄奴婢过品皆没入县官【本纪】平帝元始三年王莽奏车服制度吏民养生送终嫁娶奴婢田宅器械之品【本纪】

西汉会要卷十七

卷十八

钦定四库全书

西汉会要卷十八

宋 徐天麟 撰

礼十二【宾礼】

封先代後【先贤後附】

殷後绍嘉侯

成帝绥和元年二月甲子封殷後孔子世吉适子孔何齐为殷绍嘉侯千六百七十户【表本纪云考求其後莫正孔吉其封吉为绍嘉侯】後六月进爵为公地满百里【表本纪作三月】

哀帝建平二年益户九百三十二【表】

平帝元始四年正月更为宋公【本纪】

周後承休侯

武帝元鼎四年诏封周後孽子嘉为周子南君三千户【表史记云其以三十里地封周後】

元帝初元五年正月癸巳更封为周承休侯位次诸侯王【表】

成帝绥和元年进爵为公地满百里【表】

平帝元始四年正月改为郑公【本纪】

周公後褒鲁侯

平帝元始元年六月丙午封周公後公孙相如为褒鲁侯【本纪表云公子寬以周公世鲁顷公元孙之元孙奉周祀侯一千户十一月侯相如嗣】

孔子後褒成侯

平帝元始元年六月丙午封孔子後孔均为褒成侯追谥孔子曰褒成宣尼公【本纪表云以孔子世褒成烈君霸曾孙奉孔子祀侯二千户】

乐毅後华成君

高帝十年诏求乐毅有後乎得其孙叔封之乐乡号华成君【本纪】

成帝时梅福上书曰武王克殷未及下车存五帝之後封殷於宋绍夏於杞明着三统示不独有也是以姬姓半天下迁庙之主流出於户所谓存人以自立者也今成汤不祀殷人亡後陛下继嗣久微殆为此也春秋经曰宋杀其大夫谷梁传曰其不称名姓以其在祖位尊之也此言孔子故殷後也虽不正统封其子孙以为殷後礼亦宜之何者诸侯夺宗圣庶夺适传曰贤者子孙宜有土而况圣人又殷之後哉昔成王以诸侯礼葬周公而皇天动威雷风着灾今仲尼之庙不出阙里孔氏子孙不免编户以圣人而歆匹夫之祀非皇天之意也今陛下诚能据仲尼之素功以封其子孙则国家必获其福又陛下之名与天亡极何者追圣人素功封其子孙未有法也後圣必以为则不灭之名可不勉哉福孤远又讥切王氏故终不见纳初武帝时始封周後姬嘉为周子南君至元帝时尊周子南君为周承休侯位次诸侯王使诸大夫博士求殷後分散为十余姓郡国往往得其大家推求子孙絕不能纪时匡衡议以为王者存二王後所以尊其先王而通三统也其犯诛絕之罪者絕而更封他亲为始封君上承其王者之始祖春秋之义诸侯不能守其社稷者絕今宋国已不守其统而失国矣则宜更立殷後为始封君而上承汤统非当继宋之絕侯也宜明得殷後而已今之故宋推求其嫡久远不可得虽得其嫡嫡之先已絕不当得立礼记孔子曰丘殷人也先师所共传宜以孔子世为汤後上以其语不经遂见寢至成帝时梅福复言宜封孔子後以奉汤祀绥和元年立二王後推迹古文以左氏谷梁世本礼记相明遂下诏封孔子世为殷绍嘉公【梅福传】

先代冢墓

高帝十二年十二月诏曰秦皇帝楚隐王魏安厘王齐愍王赵悼襄王皆絕亡後其与秦始皇帝守冢二十家楚魏齐各十家赵及魏公子亡忌各五家令视其冢复亡与它事【本纪】

礼十三【军礼】

亲征

汉五年十二月围羽垓下【刘项战争本末具高纪不详錄】

七月燕王臧荼反上自将征之九月虏荼

利几反上自击破之

七年十月上自将击韩王信於铜鞮斩其将信亡走匈奴与其将曼邱臣王黄共立故赵後赵利为王收信散兵与匈奴共距汉上从晋阳连战乘胜逐北至楼烦会大寒士卒堕指者什二三遂至平城为匈奴所围七日用陈平秘计得出使樊哙留定代地

八年冬上擊韩信余寇於东垣

十年代相国陈豨反上自东至邯鄲上喜曰豨不南据邯鄲而阻鄆水吾知其亡能为矣问豨将皆故贾人上曰吾知与之矣乃多以金募豨将豨将多降豨将赵利守东垣高祖攻之不下卒骂上怒城降卒骂者斩之十一年七月淮南王布反召诸侯兵上自将以击布十二年冬十月上破布军于会缶

武帝元封元年冬十月诏曰南越东瓠咸伏其辜西蛮北夷颇未辑睦朕将巡边陲择兵振旅躬秉武节置十二部将军亲帅师焉行自云阳北历上郡西河五原出长城北登单于台至朔方临北河勒兵十八万骑旌旗径千余里威震匈奴遣使者告单于曰南越王头已县於汉北阙矣单于能战天子自将待边不能亟来臣服何但亡匿幕北寒苦之地为匈奴讐焉【并本纪】

劳军

文帝後六年匈奴大入边以宗正刘礼为将军军霸上祝兹侯徐厉为将军军棘门以河内守亚夫为将军军细柳以备胡上自劳军至霸上及棘门军直驰入将以下骑出入送迎已而之细柳军军士吏被甲鋭兵刃张弓弩持满天子先驱至不得入先驱曰天子且至军门都尉曰军中闻将军之令不闻天子之诏有顷上至又不得入於是上使使持节诏将军曰吾欲劳军亚夫廼传言开壁门壁门士请车骑曰将军约军中不得驱驰於是天子廼按辔徐行至中营将军亚夫揖曰介胄之士不拜请以军礼见天子为动改容式车使人称谢皇帝敬劳军成礼而去既出军门羣臣皆惊文帝曰嗟乎此真将军矣乡者霸上棘门如儿戏耳其将固可袭而虏也至於亚夫可得而犯邪称善者久之【周亚夫传】

田猎

文帝时贾山言治乱之道曰今方正之士皆在朝廷矣又选其贤者使为常侍诸吏与之驰驱射猎一日再三出臣恐朝廷之解弛百官之墮於事也今从豪俊之臣方正之士直与之日日射猎击兔伐狐臣窃悼之愿少衰射猎【贾山传】

贾谊上疏曰夫射猎之娱与安危之机孰急今不猎猛敌而猎田彘不搏反寇而搏蓄兔翫细娱而不图大患非所以为安也【本传】

武帝召见司马相如请为天子游猎之赋上令尚书给笔札相如以子虚虚言也为楚称乌有先生者乌有此事也为齐难亡是公者亡是人也欲明天子之义故藉此三人为辞其卒章归

之於节俭因以风谏【司马相如传】武帝建元三年南猎长杨【东方朔传】

司马相如尝从上至长杨猎是时天子方好自击熊豕驰逐羣兽相如因上疏谏其辞曰臣闻物有同类而殊能者故力称乌获捷言庆忌勇期贲育臣之愚窃以为人诚有之兽亦宜然今陛下好陵险阻射猛兽卒然遇逸材之兽骇不存之地犯属车之清尘輿不及还辕人不暇施巧虽有乌获逢蒙之技不得用枯木朽株尽为难矣是胡越起於毂下而羌夷接轡也岂不殆哉虽万全而无患然本非天子之所宜近也且夫清道而後行中路而驰犹时有衔橛之变况乎涉丰草骋邱虚前有利兽之乐而内无存变之意其为害也不难矣夫轻万乘之重不以为安乐出万有一危之?以为娱臣窃为陛下不取盖明者远见於未萌而知者避危於无形甌固多藏於隐微而发於人之所忽者也故鄙谚曰家累千金坐不垂堂此言虽小可以谕大臣愿陛下留意幸察上善之【相如传】

元鼎中天子行猎新秦中以勒边兵而归新秦中或千里无亭徼於是诛北地太守以下【食货志】

元帝永光元年正月行幸甘泉郊泰畤礼毕因留射猎薛广德上书曰窃见关东困极人民流离陛下日撞亡秦之钟听郑卫之乐臣诚悼之今士卒暴露从官劳倦愿陛下亟反宫思与百姓同忧乐天下幸甚上即日还【本传】

永光五年冬上幸长杨射熊馆布车骑大猎【本纪】

成帝元延二年冬幸长杨宫从胡客大校猎宿萑阳宫赐从官【本纪】

其十二月羽猎扬雄从以为昔在二帝三王宫馆台榭沼池苑囿林麓薮泽财足以奉郊庙御宾客充庖厨而已不夺百姓膏腴谷土桑柘之地女有余布男有余粟国家殷富上下交足故甘露零其庭醴泉流其唐凤凰巢其木黄龙游其沼麒麟臻其囿神爵栖其林昔者禹任益虞而上下和草木茂成汤好田而天下用足文王囿百里民以为尚小齐宣王囿四十里民以为大裕民之与夺民也武帝广开上林南至宜春鼎湖御宿昆吾旁南山而西至长杨五柞北绕黄山濒渭而东周袤数百里穿昆明池象滇河营建章凤阙神明駉娑渐台太液象海水周流方丈瀛洲蓬萊游观侈靡穷妙极丽虽颇割其三垂以贍齐民然至羽猎田车戎马器械储侍禁御所营尚太奢丽夸诩非尧舜成汤文王三驱之意也又恐後世复修前好不折中以泉台故聊因校猎赋以风【扬雄传上】

明年上将大夸胡人以多禽兽秋命右扶风发民入南山西自褒斜东至弘农南段汉中张罗罔置罟捕熊黑豪猪虎豹犵狁狐菟麋鹿载以槛车输长杨射熊馆以罔为周陆纵禽兽其中令胡人手搏之自取其获上亲临观焉是时农民不得收歛雄从至射熊馆还上长杨赋聊因笔墨之成文章故藉翰林以为主人子墨为客卿以风【扬雄传下】

兵祭

高祖立为沛公祠黄帝祭蚩尤於沛廷【黄帝战於阪泉定天下蚩尤庶人之贪者好五兵故祠祭之】而蚺鼓【本纪杀牲以血?鼓蚺呼为蚺】

天下已定令祝立蚩尤之祠於长安【郊祀志】

武帝为伐南越告祷於泰一以牡荆画幡日月北斗登龙以象太一三星为泰一铎旗【李奇曰牡荆作幡柄也如淳曰牡荆荆之无子者皆絜斋之道晋灼曰牡节间不相当也月晕刻之为券以畏病者天文志天极星其一明者太一也旁三星三公也画一星在後三星在前为泰一铎旗师古曰李晋二说是也以牡荆为幡竿而画幡为日月龙及星】命曰灵旗为兵祷则太史奉以指所伐国【郊祀志】

西汉会要卷十八

卷十九

钦定四库全书

西汉会要卷十九

宋 徐天麟 撰

礼十四

山陵

万年陵【太上皇】 长陵【高帝】

安陵【惠帝】 霸陵【文帝】

阳陵【景帝】 茂陵【武帝】

平陵【昭帝】 杜陵【宣帝】

渭陵【元帝】 延陵【成帝】

义陵【哀帝】 康陵【平帝】

小黄【昭灵后】 南陵【文帝母薄太后元始中罢为县】

云陵【昭帝母赵太后元始中罢为县】

杂録

孝文治霸陵皆瓦器不得以金银铜锡为饰【本赞】

东园匠令丞主作陵内器物【百官表】

汉兴立都长安徙齐田楚昭屈景及诸功臣家於长陵後世世徙吏二千石高赀富人及豪杰并兼之家於诸陵【地理志】

孝景五年作阳陵邑【本纪】

孝武建元二年初置茂陵邑【本纪】

元帝即位贡禹奏言武帝弃天下昭帝幼弱霍光专事不知礼正妄多藏金钱财物鸟兽鱼鼈牛马虎豹生禽凡百九十物尽瘞藏之又皆以後宫女置於园陵大失礼逆天心又未必称武帝意也昭帝晏驾光复行之至孝宣皇帝时陛下恶有所言羣臣亦随故事甚可痛也唯陛下深察古道诸园陵女亡子者宜悉遣独杜陵宫数百诚可哀怜也【贡禹传】

永光四年分诸陵属三辅以渭城壽陵亭部原上为初陵诏曰安土重迁黎民之性骨肉相附人情所愿也顷者有司缘臣子之义奏徙郡国民以奉园陵令百姓远弃先祖坟墓破业失产亲戚别离人怀思慕之心家有不自安之意是以东垂被虚耗之害关中有无聊之民非久长之策也诗不云乎民亦劳止迄可小康惠此中国以绥四方今所为初陵者勿置县邑使天下咸安土乐业亡有动摇之心布告天下令明知之【本纪】

陈汤与将作大匠解万年相善自元帝时渭陵不复徙民起邑成帝起初陵数年后乐霸陵曲亭南更营之万年与汤议以为武帝时工杨光以所作数可意自致将作大匠及大司农中丞耿壽昌造杜陵赐爵关内侯将作大匠乘马延年以劳苦秩中二千石今作初陵而营起邑居成大功万年亦当蒙重赏子公妻家在长安儿子生长长安不乐东方宜求徙可得赐田宅俱善汤心利之即上封事言初陵京师之地最为肥美可立一县天下民不徙诸陵三十余岁矣关东富人益衆多规良田役使贫民可徙初陵以强京师衰弱诸侯又使中家以下得均贫富汤愿与妻子家属徙初陵为天下先是天子从其计果起昌陵邑後徙内郡国民万年自詭三年可成後卒不就羣臣多言其不便者下有司议皆曰昌陵因卑为高积土为山度便房犹在平地上客土之中不保幽冥之灵浅外不固卒徙工庸以钜万数至?脂火夜作取土东山且与谷同贾作治数年天下徧被其劳国家罢敝府藏空虚下至衆庶熬熬苦之故陵因天性据真土处執高敞旁近祖考前又已有十年功绪宜还复故陵勿徙民上乃下诏罢昌陵【陈汤传】

孝成永始元年七月诏曰朕执德不固谋不尽下过听将作大匠万年言昌陵三年可成作治五年中陵司马殿内尚未加功天下虚耗百姓罢劳客土疏恶终不可成朕惟其难怛然伤心夫过而不改是谓过矣其罢昌陵及故陵勿徙吏民令天下毋有动摇之心【本纪】

二年诏曰前将作大匠万年知昌陵卑下不可为万岁居奏请营作建置郭邑妄为巧诈积土增高多赋歛繇役兴卒暴之作卒徒蒙辜死者连属百姓罢极天下匱竭常侍阎前为大司农中丞数奏昌陵不可成侍中卫尉长数白宜早止徙家反故处朕以长言下阎章公卿议皆合长计首建至策阎典主省大费民以康宁阎前赐爵关内侯黄金百斤其赐长爵关内侯食邑千户阎五百户万年佞邪不忠毒流衆庶海内怨望至今不息虽蒙赦令不宜居京师其徙万年炖煌郡【本纪】

成帝营起昌陵数年不成复还归延陵制度泰奢刘向上疏諫曰臣闻易曰安不忘危存不忘亡是以身安而国家可保也故贤圣之君博观终始穷极事情而是非分明王者必通三统明

天命所授者博非独一姓也孔子论诗至於殷士肤敏裸将于京喟然叹曰大哉天命善不可不传于子孙是以富贵无常不如是则王公其何以戒谨民萌何以劝勉盖伤微子之事周而痛殷之亡也虽有尧舜之圣不能化丹朱之子虽有禹汤之德不能训末孙之桀纣自古及今未有不亡之国也昔高皇帝既灭秦将都雒阳感寤刘敬之言自以德不及周而贤於秦遂徙都关中共依周之德因秦之阻世之长短以德为効故常战栗不敢违亡孔子所谓富贵无常盖谓此也孝文皇帝居霸陵北临厕意凄怆悲怀顾谓羣臣曰嗟乎以北山石为椁用紵絮□陈漆其间岂可动哉张释之进曰使其中有可欲虽锢南山犹有隙使其中无可欲虽无石椁又何戚焉夫死者无终极而国家有废兴故释之之言为无穷计也孝文寤焉遂薄葬不起山坟易曰古之葬者厚衣之以薪葬之中野不封不树後世圣人易之以棺槨棺槨之作自黄帝始黄帝葬於桥山尧葬济陰邱壠皆小葬具甚微舜葬苍梧二妃不从禹葬会稽不改其列殷汤无葬处文武周公葬於毕秦穆公葬於雍橐泉宫祈年馆下櫟里子葬於武库皆无邱壠之处此圣帝明王贤君智士远覽独虑无穷之计也其贤臣孝子亦承命顺意而薄葬之此诚奉安君父忠孝之至也夫周公武王弟也葬兄甚微孔子葬母於防称古墓而不坟曰丘东西南北之人也不可识也为四尺坟遇雨而崩弟子修之以告孔子孔子流涕曰吾闻之古者不修墓盖非之也延陵季子适齐而反其子死於嬴博之间穿不及泉歛以时服封坟掩坎其高可隐而号曰骨肉归复於土命也魂气则无不之也夫嬴博去吴千有余里季子不归葬孔子往观曰延陵季子於礼合矣故仲尼孝子而延陵慈父舜禹忠臣周公弟弟其葬君亲骨肉皆微薄矣非苟为俭诚便於体也宋桓司马为石椁仲尼曰不如速朽秦相吕不韦集知略之士而造春秋亦言薄葬之义皆明於事者也逮至吴王阖闾违礼厚葬十有余年越人发之及秦惠文武昭庄襄五王皆大作邱壠多其瘞藏咸尽发掘暴露甚足悲也秦始皇帝葬於骊山之阿下锢三泉上崇山坟其高五十余丈周回五里有余石椁为游馆人膏为灯烛水银为江海黄金为鳧鴈珍宝之藏机械之变棺槨之丽宫馆之盛不可胜原又多杀宫人生葬工匠计以万数天下苦其役而反之骊山之作未成而周章百万之师至其下矣项籍燔其宫室营宇往者咸见发掘其後牧儿亡羊羊入其凿牧者持火照求羊失火烧其藏椁自古至今葬未有盛如始皇者也数年之间外被项籍之灾内离牧童之祸岂不哀哉是故德弥厚者葬弥薄知愈深者葬愈微无德寡知其葬愈厚邱壠弥高宫庙甚丽发掘必速由是观之明暗之效葬之吉凶昭然可见矣周德既衰而奢侈宣王贤而中兴更为俭宫室小寝庙诗人美之斯干之诗是也上章道宫室之如制下章言子孙之衆多也及鲁庄公刻饰宗庙多筑台囿後嗣再絶春秋刺焉周宣如彼而昌鲁秦如此而絶是则奢俭之得失也陛下即位躬亲节俭始营初陵其制约小天下莫不称贤明及徙昌陵增埤为高积土为山发民坟墓积以万数营起邑居期日迫卒功费大万百余死者恨於下生者愁於上怨气感动陰阳因之以饥饉物故流离以千万数臣甚愖焉以死者为有知发人之墓其害多矣若其无知又安用大谋之贤知则不说以示衆庶则苦之若苟以说愚夫淫侈之人又何为哉陛下慈仁笃美甚厚聪明疏达盖世宜弘汉家之德崇刘氏之美光昭五帝三王而顾与暴秦乱君竞为奢侈比方邱壠说愚夫之目隆一时之观违贤知之心亡万世之安臣窃为陛下羞之虽陛下上覽明圣黄帝尧舜禹汤文武周公仲尼之制下观贤知穆公延陵櫟里张释之之意孝文皇帝去坟薄葬以俭安神可以为则秦昭始皇增山厚藏以侈生害足以戒初陵之櫟宜从公卿大臣之议以息衆庶书奏上甚感向言而不能从其计【刘向传】

成帝永始四年出杜陵诸未尝御者归家【本纪张晏曰宫人无子乃守园陵也】

元朔二年孔臧坐为太常南陵桥坏衣冠道絶免【百官表】六年周平为大常坐不缮园陵免【百官表】

元狩五年丞相李蔡坐侵卖园陵道墮地自杀【功臣表】绥和二年王况坐山陵未成置酒歌舞免【外戚表】

丞相孔光四时行园陵【鲍宣传】

寝园

太上皇寝园【永光五年毁 建昭五年复 竟宁元年毁 河平元年复】

高祖皇帝寝园

孝惠皇帝寝园【永光五年毁 竟宁元年复】

孝文皇帝寝园

孝景皇帝寝园

孝武皇帝寝园

孝昭皇帝寝园

孝宣皇帝寝园

孝元皇帝寝园

孝成皇帝寝园

孝哀皇帝寝园

孝平皇帝寝园

昭灵后寝园【永光四年罢 建昭五年复 竟宁元年罢】

武哀王寝园【永光四年罢 建昭五年复 竟宁元年罢】

昭哀后寝园【永光四年罢 建昭五年复 竟宁元年罢】

孝文太后寝园【建昭元年罢 竟宁元年三月复 五月罢
平帝元始中罢南陵】 孝昭太后寝园【建昭元年罢 竟宁元年六月复 五月罢
平帝元始中罢云陵】 卫思后园【永光四年罢 建昭五年复】

戾园【永光四年罢 建昭五年复】

戾后园【永光四年罢】

皇曾祖悼孝庙园【平帝元始中毁 奉明园】

孝宣许皇后南园【父戴侯同】

薄太后父灵文侯园

薄太后母灵文夫人园

窦皇后父安成侯园

孝景王皇后父共侯园

孝景王皇后母平原君园

赵婕妤父顺成侯园

史皇孙王夫人父恩成侯园

霍皇后父博陆侯园

孝宣王皇后父其侯园

共皇帝寝园【哀帝建平二年立】

杂录

奉常属官有诸庙寝园令长丞【百官表】

寝郎【冯参】

园郎【班穉】故事近臣皆随陵为园郎【金敞传】

园中各有寝便殿日祭於寝月祭於庙时祭於便殿寝日四上食【韦玄成传详见庙祭】

丞相以四时行园【张汤传】

人有盗孝文园瘞钱丞相严青翟自杀【张汤传】

任官坐为太常人盗茂陵园中物免【百官表】

武帝建元六年二月丁酉辽东高庙灾四月壬子高园便殿火董仲舒曰哀公三年桓厘宫灾四月亳社火天皆燔其不当立者以示鲁今高庙不当居辽东高园殿不当居陵旁於礼亦不当立与鲁灾同【五行志】

西汉会要卷十九

卷二十

钦定四库全书

西汉会要卷二十

宋 徐天麟 撰

礼十五【凶礼】

服制

孝文遗诏曰朕既不德无以佐百姓今崩又使重服久临以罹寒暑之数哀人父子伤长老之志损其饮食絶鬼神之祭祀以重吾不德谓天下何朕获保宗庙以眇眇之身托于天下君王之上二十有余年矣赖天之灵社稷之福方内安宁靡有兵革朕既不敏常畏过行以羞先帝之遗德惟年之久长惧于不终今乃幸以天年得复供养於高庙朕之不明与嘉之其奚哀念之有其令天下吏民令到出临三日皆释服无禁取妇嫁女祠祀饮酒食肉自当给丧事服临者皆无踐絰带无过三寸无布车及兵器无发民哭临宫殿中殿中当临者皆以旦夕十五举音礼毕罢非旦夕临时禁无得擅哭临以下服大红十五日小红十四日纈七日释服它不在令中者皆以此令比类从事【本纪】

孝宣地节四年诏曰导民以孝则天下顺今百姓或遭衰絰凶灾而吏繇事使不得葬伤孝子之心朕甚怜之自今诸有大父母父母丧者勿繇事使得收斂送终尽其子道【本纪】

名京师【本传】

结以倚庐【扬雄传注云行服三年也汉律不为亲行三年丧不得选举】

服舍【江都易王传师古曰倚庐垺室之次也】

丧葬

高祖十二年四月甲辰崩于未央宫丁未发丧五月丙寅葬长陵已下【已下棺也】皇太子羣臣皆反至太上皇庙【本纪】惠帝即位赐给丧事者二千石钱二万六百石以上万五百石二百石以下至佐史五千视作斥上者将军四十金【本纪服?曰斥上圻上也】

文帝至霸陵意凄怆悲怀顾谓羣臣曰嗟乎以北山石为椁用紵絮□陈漆其间岂可动哉左右皆曰善释之前曰使其中有可欲虽锢南山犹有隙使其中亡可欲虽亡石椁又何戚焉文帝称善【张释之传】

文帝遗诏霸陵山川因其故无有所改郎中令张武为复土将军发近县卒万六千人发内史卒万五千人藏郭穿复土属将军武乙巳葬霸陵【本纪】

武帝建元六年窦太后崩丞相许昌御史大夫严青翟坐丧事不办免【田蚡传】

元帝时贡禹奏言武帝时多取好女至数千人以填後宫及弃天下昭帝幼弱霍光专事不知礼正妄多藏金钱财物鸟兽鱼鼈牛马虎豹生禽凡百九十物尽瘞藏之又皆以後宫女置於园陵大失礼逆天道又未必称武帝意也昭帝晏驾光复行之至孝宣皇帝时陛下恶有所言羣臣亦随故事甚可痛也故使天下承化衆庶葬埋皆虚地上以实地下其过自上生皆在大臣循故事之辜也唯陛下深察古道从其俭者诸园陵女亡子者宜悉遣独杜陵宫人数百诚可哀怜也【贡禹传】

元帝崩有司言乘輿牛马禽兽皆非礼不宜以葬奏可【成纪】

哀帝建平二年帝太后丁氏崩上曰朕闻夫妇一体诗云谷则异室死则同穴昔季武子成寢杜氏之殡在西阶下请合葬而许之祔葬之礼自周兴焉郁郁乎文哉吾从周孝子事亡如事存帝太后宜起陵恭皇之园遂葬定陶发陈留济陰近郡国五万人穿复土【本纪】

平帝元始五年崩于未央宫大赦天下有司议曰礼臣不殇君皇帝年十有四岁宜以礼歛加元服奏可葬康陵【本纪】

孝景中二年令诸王薨大鸿胪奏谥诔策列侯薨大行奏谥诔策王薨遣光禄大夫吊襚祠贈视丧事因立嗣子列侯薨遣大中大夫吊祠视丧事因立嗣其薨葬国得发民挽丧穿复土治坟无过三百人毕事【本纪】

杂錄

楚元王夫人薨赐茔【师古曰谓为界域】

霍去病薨上悼之发属国元甲军陈自长安至茂陵为冢象祁连山【本传】

李蔡以丞相坐诏赐冢地阳陵当得二十亩蔡盗取三顷颇卖得四十余万又盗取神道外据地一亩葬其中当下狱自杀【李广传】

张安世薨天子赠印绶送以轻车介士赐茔杜东【本传】霍光薨上及皇太后亲临光丧大中大夫任宣与侍御史五人持节护丧事中二千石治莫府冢上赐金画棺【以朱砂?之而又雕画】四时之色左苍龙右白虎上着金银日月玉衣珠璧以棺至尊无以加臣请没入财物县官【本传】杨王孙病且终先令其子曰吾欲羸葬以反吾真必亡易吾意死则为布囊盛尸入地七尺既下从足引脱其囊以身新土其子欲默而不从重废父命欲从之心又不忍乃

往见王孙友人祁侯祁侯与王孙书曰王孙苦疾仆迫从上祠雍未得诣前愿存精神省思虑进近医药厚自持窃闻王孙先令羸葬令死者亡知则已若有知是戮尸地下将羸见先人窃为王孙不取也且孝经曰为之棺槨衣衾是亦圣人之遗制何必区区独守所闻愿王孙察焉王孙报曰盖闻古之圣王缘人情不忍其亲故为制礼今则越之吾是以羸葬将以矫世也夫厚葬诚无益於死者而俗人竞以相高靡财单帛腐之地下或乃今日入而明日发此真与暴骸於中野何异且夫死者终生之化而物之归者也归者得至化者得变是物各反其真也反真冥冥亡形亡声乃合道情夫饰外以华衆厚葬以鬲真使归者不得至化者不得变是使物各失其所也且吾闻之精神者天之有也形骸者地之有也精神离形各归其真故谓之鬼鬼之为言归也其尸块然独处岂有知哉裹以币帛鬲以棺槨支体络束口含玉石欲化不得鬱为枯腊千载之後棺槨朽腐乃得归土就其真宅由是言之焉用久客昔帝尧之葬也窆木为匱葛藟为緘其穿下不乱泉上不泄殍故圣王生易尚死易葬也不加功於亡用不损财於亡谓今费财厚葬留归鬲至死者不知生者不得是谓重惑於戏吾不为也祁侯曰善遂羸葬

恤死事

汉法父子俱有死事得以丧归【灌夫传】

汉四年下令军士不幸死者吏为衣衾棺斂转送其家【本纪】

八年令士卒从军死者为櫓归其县县给衣衾棺葬具祠以少牢长吏视葬【本纪】

文帝十四年餅侯孙单以父邛北地都尉力战死事子侯【功臣表】

景帝中二年封故楚赵傅相前死事者四人子皆为列侯【本纪】

武帝取从军死事之子孙养羽林教以五兵号曰羽林孤儿【百官表】

西汉会要卷二十

卷二十一

钦定四库全书

西汉会要卷二十一

宋 徐天麟 撰

乐上

乐舞

汉兴乐家有制氏以雅乐声律世世在大乐官但能纪其铎枪鼓舞而不能言其义高祖时叔孙通因秦乐人制宗庙乐太祝迎神于庙门奏嘉至犹古?神之乐也皇帝入庙门奏永至以为行步之节犹古采荠肆夏也乾豆上奏登歌独上歌不以箎弦乱人声欲在位者徧闻之犹古清庙之歌也登歌再终下奏休成之乐美神明既飨也皇帝就酒东厢坐定奏永安之乐美礼已成也又有房中祠乐高祖唐山夫人所作也周有房中乐至秦名曰寿人凡乐乐其所生礼不忘本高祖乐楚声故房中乐楚声也孝惠二年使乐府令夏侯宽备其箫箎更名曰安世乐高祖庙奏武德文始五行之舞孝文庙奏昭德文始四时五行之舞孝武庙奏盛德文始四时五行之舞武德舞者高祖四年作以象天下乐已行武以除乱也文始舞者本舜韶舞也高祖六年更名曰文始以示不相袭也五行舞者本周舞也秦始皇二十六年更名曰五行也四时舞者孝文所作以明示天下之安和也盖乐已所自作明有制也乐先王之乐明有法也孝景采武德舞以为昭德以尊大宗庙至孝宣采昭德舞为盛德以尊世宗庙诸帝庙皆常奏文始四时五行舞云高祖六年又作昭容乐礼容乐昭容者犹古之昭夏也主出武德舞礼容者主出文始五行舞舞入无乐者将至尊之前不敢以乐也出用乐者言舞不失节能以乐终也大氏皆因秦旧事焉初高祖既定天下过沛与故人父老相乐醉酒欢哀作风起之诗令沛中僮儿百二十人习而歌之至孝惠时以沛宫为原庙皆令歌儿习吹以相和常以百二十人为员文景之间礼官肄业而已至武帝定郊祀之礼祠泰一於甘泉就乾位也祭后土於汾陰泽中方丘也乃立乐府采诗夜诵有赵代秦楚之讴以李延年为协律都尉多举司马相如等数十人造为诗赋略论律吕以合八音之调作十九章之歌以正月上辛用事甘泉圜丘使童男女七十人俱歌昏祠至明夜常有神光如流星止集於祠坛天子自竹宫而望拜百官侍祠者数百人皆肃然动心焉其余巡狩福应之事不序郊庙故弗论是时河间献王有雅材亦以为治道非礼乐不成因献所集雅乐天子下大乐官常存肄之岁时以备数然不常御常御及郊庙皆非雅声然诗乐施於後嗣犹得有所祖述昔殷周之雅颂邇上本有娥姜原高稷始生玄王公刘古公太伯王季姜女大任大姒之德乃及成汤文武受命武丁成康宣王中兴下及辅佐阿衡周召太公申伯召虎仲山甫之属君臣男女有功德者靡不褒扬功德既信美矣褒扬之声盈乎天地之间是以光明着於当世遗誉垂於无穷也今汉郊庙诗歌未有祖宗之事八音调均又不协於钟律而内有掖庭材人外有上林乐府皆以郑声施於朝廷至成帝时谒者常山王禹世受河间乐能说其义其弟子宋曩等上书言之下大夫博士平当等考试当以为

汉承秦灭道之後赖先帝圣德博受兼听修废官立太学河间献王聘求幽隐修兴雅乐以助化时大儒公孙弘董仲舒等以为音中正雅立之大乐春秋乡射作於学官希濶不讲故自公卿大夫观听者但闻铿锵不晓其意而欲以风谕衆庶其道无由是以行之百有余年德化至今未成今曩等守习孤学大指归於兴助教化衰微之学兴废在人宜领属雅乐以继絶表微孔子曰人能弘道非道弘人河间区区小国藩臣以好学修古能有所存民到于今称之况于圣主广被之资修起旧文放郑近雅述而不作信而好古于以风示海内扬名後世诚非小功小美也事下公卿以为久远难分明当议复寝是时郑声尤甚黄门名倡丙强景武之属富显於世贵戚五侯定陵富平外戚之家淫侈过度至与人主争女乐哀帝自为定陶王时疾之又性不好音及即位下诏曰惟世俗奢泰文巧而郑卫之声兴夫奢泰则下不孙而国贫文巧则趋末背本者衆郑卫之声兴则淫僻之化流而欲黎庶淳朴家给犹浊其源而求其清流岂不难哉孔子不云乎放郑声郑声淫其罢乐府官郊祭乐及古兵法武乐在经非郑卫之乐者条奏别属他官丞相孔光大司空何武奏郊祭乐人员六十二人给祠南北郊大乐鼓员六人嘉至鼓员十人邯鄲鼓员二人骑吹鼓员三人江南鼓员二人淮南鼓员四人巴俞鼓员三十六人歌鼓员二十四人楚严鼓员一人梁皇鼓员四人临淮鼓员三十五人兹邠鼓员三人凡鼓十二员百二十八人朝贺置酒陈殿下应古兵法外郊祭员十三人诸族乐人兼云招给祠南郊用六十七人兼给事雅乐用四人夜诵员五人刚别柎员二人给盛德主调箎员二人听工以律知日冬至一人钟工磬工箫工员各一人仆射二人主领诸乐人皆不可罢竽工员三人一人可罢琴工员五人三人可罢柱工员二人一人可罢绳弦工员六人四人可罢郑四会员六十二人一人给事雅乐六十一人可罢张瑟员八人七人可罢安世乐鼓员二十人十九人可罢沛吹鼓员十二人族歌鼓员二十七人陈吹鼓员十三人商乐鼓员十四人东海鼓员十六人长乐鼓员十三人纓乐鼓员十三人凡鼓八员百二十八人朝贺置酒陈前殿房中不应经法治箎员五人楚鼓员六人常从倡三十人常从象人四人诏随常从倡十六人秦倡员二十九人秦倡象人员三人诏随秦倡一人雅大人员九人朝贺置酒为乐楚四会员十七人巴四会员十二人铎四会员十二人齐四会员十九人蔡讴员三人齐讴员六人竽瑟钟磬员五人皆郑声可罢师学百四十二人其七十二人给大官捫马酒其七十人可罢大凡八百二十九人其三百八十八人不可罢可领属大乐其四百四十一人不应经法或郑卫之声皆可罢奏可然百姓渐渍日久又不制雅乐有以相变豪富吏民湛沔自若大汉继周久旷大仪未有立礼成乐此贾谊仲舒王吉刘向之徒所为发愤而增叹也【礼乐志】

高祖过沛诗三侯之章令小儿歌之高祖崩令沛得以四时歌舞宗庙孝惠孝文孝景无所增更於乐府习常隶旧而已至今上即位作十九章令侍中李延年次序其声拜为协律都尉通一经之士不能独知其辞皆集会五经家相与共讲习读之乃能通知其意多尔雅之文汉家常以正月上辛祠泰一甘泉以昏时夜祠到明而终常有流星经於祠坛上使僮男女七十人俱歌春歌青阳夏歌朱明秋歌西皞冬歌玄冥世多有故不论又尝得神马渥洼水中复次以为太一之歌歌曲曰太一贡兮天马下沾赤汗兮沫流赭骋容与兮蹀万里今安匹兮龙为友後伐大宛得千里马马名蒲梢次作以为歌歌诗曰天马来兮从西极经万里兮归有德承灵威兮降外国涉流沙兮四夷服中尉汲黯进曰凡王者作乐上以承祖宗下以化兆民今陛下得马诗以为歌协於宗庙先帝百姓岂能知其音雅上默然不说丞相公孙弘曰黯诽谤圣制当族【乐书】

杂錄

太常属官有大乐令丞【百官表】

宫商角徵羽职在大乐【律历志】

武帝策董仲舒曰五帝三王之道改制作乐而天下洽和百王同之当虞氏之乐莫盛於韶於周莫盛於勺圣王已没钟鼓箎弦之声未衰而大道微缺云云仲舒对曰道者所由适於治之路也仁义礼乐皆其具也王者未作乐之时乃用先王之乐宜於世者而以深入教化於民教化之情不得雅颂之乐不成故王者功成作乐乐其德也乐者所以变民风化民俗也其变民也易其化人也着故声发於和而本於情接於肌肤藏於骨髓故王道虽微缺而钟鼓箎弦之声未衰也夫虞氏不为政久矣然而雅颂遗风犹有存者是以孔子在齐而闻韶也【董仲舒传】

嬖臣李延年以好音见上善之下公卿议曰民间祠有鼓舞乐今郊祀而无乐岂称乎公卿曰古者祠天地皆有乐而神祇可得而礼或曰秦帝使素女鼓五十弦瑟悲帝禁不止故破其瑟为二十五弦於是塞南越祷祠泰一后土始用乐舞益召歌儿作二十五弦及空侯瑟自此起【郊祀志】

宣帝本始四年诏乐府减乐人【本纪】

神爵五凤之间天下殷富数有嘉应上颇作歌诗欲兴协律之事丞相魏相奏言知音善鼓雅瑟者渤海赵定梁国龚德皆召见待诏【王褒传】

元帝多材艺善史书鼓琴瑟吹洞箫自度曲被歌声分判节度穷极幼眇【本纪】

元帝被疾不亲政事留好音乐或置鼙鼓殿下天子自临轩槛上铜圆以撓鼓【撓将益反】声中严鼓之节後宫及左右习知音者莫能为而定陶王亦能之上数称其材史丹进曰凡所谓材者敏而好学温故知新皇太子是也若乃器人於丝竹鼓鼙之间则是陈惠李微高於匡衡可相国也【陈惠李微皆黄门鼓吹】於是上嘿然而笑【史丹传】

平帝元始元年放郑声五年召天下通知钟律者【本纪】

西汉会要卷二十一

卷二十二

钦定四库全书

西汉会要卷二十二

宋 徐天麟 撰

乐下

乐章

安世房中歌十七章其诗曰

大孝备矣休德昭清高张四县乐充宫廷芬树羽林云景杳冥金支秀华庶旒翠旌

七始华始肃倡和声神来宴娯庶几是听粥粥音送细齐人情忽乘青玄熙事备成清思呦呦
经纬冥冥我定历数人告其心敕身齐戒施教申申乃立祖庙敬明尊亲大矣孝熙四极爰轸

王侯秉德其邻翼翼显明昭式清明鬯矣皇帝孝德竟全大功抚安四极

海内有奸纷乱东北诏抚成师武臣承德行乐交逆箫勺羣慝肃为济哉盖定燕国

大海荡荡水所归高贤愉愉民所怀大山崔嵬百卉殖民何贵贵有德

安其所乐终产乐终产世继绪飞龙秋游上天高贤愉乐民人

丰草萋女罗施善何如谁能回大莫大成教德长莫长被无极

霭震震电燿燿明德乡治本约治本约泽弘大加被宠咸相保德施大世曼壽

都荔遂芳宵窳桂华孝奏天仪若日月光乘玄四龙回驰北行羽旄殷盛芬哉芒芒孝道随世
我署文章【桂华】冯冯翼翼承天之则吾易久远烛明四极慈惠所爱美若休德杳杳冥冥
克绰永福【美芳】

磴磴即即师象山则呜呼孝哉案抚戎国蛮夷竭欢象来致福兼临是爱终无兵革

嘉荐芳矣告灵飨矣告灵既飨德音孔臧惟德之臧建侯之常承保天休令问不忘

皇皇鸿明荡侯休德嘉承天和伊乐厥福在乐不荒惟民之则

浚则师德下民咸殖令问在旧孔容翼翼

孔容之常承帝之明下民之乐子孙保光承顺温良受帝之光嘉荐令芳壽考不忘

承帝明德师象山则云施称名永受厥福承容之常承帝之明下民安乐受福无疆

郊祀歌十九章其诗曰

练时日侯有望炳觥萧延四方九重开灵之旂垂惠恩鸿佑休灵之车结玄云驾飞龙羽旄纷
灵之下若风马左苍龙右白虎灵之来神哉沛先以雨般裔裔灵之至庆陰陰相放?震澹心灵
既坐五音飭虞至旦承灵亿牲茧栗粢盛香尊桂酒宾八乡灵安留吟青黄徧观此眺瑶堂衆
嫔并绰奇丽顏如荼兆逐靡被华文厠雾縠曳阿锡佩珠玉侠嘉夜?兰芳澹容与献嘉觴

练时日一

帝临中坛四方承宇绳绳意变备得其所清和六合制数以五海内安宁兴文偃武后土富媪
昭明三光穆穆优游嘉服上黄

帝临二

青阳开动根荄以遂膏润并爱?行毕逮霆声发荣曜处顷听枯槁复产乃成厥命衆庶熙熙施
及夭胎羣生嘒嘒惟春之祺

青阳三

朱明盛长勇与万物桐生茂豫靡有所讪敷华就实既阜既昌登成甫田百鬼迪尝广大建祀
肃雍不忘神若宥之传世无疆

朱明四

西颢沆砀秋气肃杀含秀垂颖续旧不废奸伪不萌祆孽伏息隅辟越远四貉咸服既畏兹威
惟慕纯德附而不骄正心翊翊

西颢五

玄冥陵陰蛰虫盖藏?木零落抵冬降霜易乱除邪革正异俗兆民反本抱素怀朴条理信义望
礼五岳籍歛之时掩收嘉谷

玄冥六

惟泰元尊媪神蕃厘经纬天地作成四时精建日月星辰度理陰阳五行周而复始云风雷电降甘露雨百姓蕃滋咸循厥绪继统共勤顺皇之德鸾路龙鳞罔不肸饰嘉筵列陈庶几宴享?除凶灾烈腾八荒钟鼓竽笙云舞翔翔招摇灵旗九夷宾将

惟泰元七

建始元年丞相匡衡奏罢鸾路龙鳞更定诗曰涓选休成

天地并况惟予有慕爰熙紫坛思求厥路恭承禋祀緼豫为纷黼绣周张承神至尊千童罗舞成八溢合好効欢虞泰一九歌毕奏斐然殊鸣琴竽瑟会轩朱璆磬金鼓灵其有喜百官济济各敬厥事盛牲实俎进闻膏神奄留临须摇长丽前掞光耀明寒暑不忒况皇章展诗应律鍚玉鸣函宫吐角激徵清发梁扬羽申以商造兹新音永久长声气远倏凤鸟鵠神夕奄虞盖孔享天地八

丞相匡衡奏罢黼绣周张更定诗曰肃若旧典

日出入安穷时世不与人同故春非我春夏非我夏秋非我秋冬非我冬泊如四海之池徧观是邪谓何吾知所乐独乐六龙六龙之调使我心若訾黄其何不徕下日出入九

太一况天马下沾赤汗沫流赭志倏倪精权奇籀浮云晦上驰体容与逝万里今安匹龙为友

元狩三年马生渥洼水中作

天马徕从西极涉流沙九夷服天马徕出泉水虎脊两化若鬼天马徕历无草径千里循东道天马徕执徐时将摇举谁与期天马徕开远门竦予身游昆仑天马徕龙之媒游阊阖观玉台

天马十

太初四年诛宛王获宛马作

天门开誅荡荡穆并骋以临飡光夜烛德信着灵?平而鸿长生豫大朱涂广夷石为堂饰玉梢以舞歌体招摇若永望星留俞塞隕光照紫幄珠熿黄幡比玳回集貳双飞常羊月穆穆以金波日华耀以宣明假清风轧忽激长至重觴神裴回若留放殪冀亲以肆章函蒙祉福常若期寂漻上天知厥时泛泛溟溟从高旂殷勤此路舡所求佻正嘉吉弘以昌休嘉砰隐溢四方专精厉意逝九阂纷紜六幕浮大海

天门十一

景星显见信星彪列象载昭庭日亲以察参侔开阖爰推本纪汾睢出鼎皇祐元始五音六律
依韦飧昭杂变并会雅声远姚空桑琴瑟结信成四兴邈代八风生殷殷钟石羽龠鸣河龙供
鲤醇牺牲百末旨酒布兰生泰尊柘浆析朝醒微感心攸通修名周流常羊思所并穰穰复正
直往甯冯蠡切和疏写平上天布施后土成穰穰丰年四时荣

景星十二

元鼎五年得鼎汾陰作

齐房产草九茎连叶宫童効异披图案谍玄气之精囿复此都蔓蔓日茂芝成灵华

齐房十三

元封二年芝生甘泉齐房作

后皇嘉坛立玄黄服物发冀州兆蒙祉福沆沆四塞假狄合处经营万亿咸遂厥宇

皇后十四

华??固灵根神之旂过天门车千乘敦昆仑神之出排玉房周流杂拔兰堂神之行旌容容骑
沓沓般僊僊神之徠泛翊翊甘露降庆云集神之揄临坛宇九疑宾夔龙舞神安坐鵷吉时共
翊翊合所思神嘉虞申貳觴福滂洋迈延长沛施佑汾之阿扬金光横泰河莽若云增阳波徧
肱驩腾天歌

华??十五

五神相包四邻土地广扬浮云扞嘉坛椒兰芳璧玉精垂华光益亿年美始兴交於神若有承
广宣延咸毕觴灵輿位偃蹇骧卉汨胪析奚遗淫淥泽?然归

五神十六

朝陇首覽西垠雷电袞获白麟爰五止显黄德图匈奴熏鬻殛辟流离抑不详宾百僚山河飧
掩回轘鬣长驰腾雨师洒路陂流星陨感惟风籥归云抚怀心

朝陇首十七

元狩元年行幸雍获白麟作

象载瑜白集西食甘露饮荣泉赤鴈集六纷员殊翁杂五采文神所见施祉福登蓬莱结无极

象载瑜十八

太始三年行幸东海获赤鴈作

赤蛟绥黄华盖露夜零昼晡溘百君礼六龙位勺椒浆灵已醉灵已享锡吉祥芒芒极降嘉觴
灵殷殷烂扬光延壽命永未央杳冥冥塞六合泽汪濊辑万国灵襍象輿轡票然逝旗逶蛇
礼乐成灵将归托玄德长无衰赤蛟十九

角抵

武帝元封三年作角抵戏【本纪文颖曰名此乐为角抵者两两相当角力角技艺射御故名
角抵盖杂伎乐也师古曰抵当也】

六年京师民观角抵于上林平乐馆【本纪】

孝武之世开玉门通西域设酒池肉林以飨四夷之宾客作巴俞都卢海中磬【徒浪反】极
漫衍鱼龙角抵之戏以观视之【西域传赞晋灼曰都卢国名也李奇曰都卢轻体善缘者也
磬极乐名也师古曰巴人巴州人也巴俞之人所谓宾人也劲鋭善舞本从高祖定三秦有功
高祖喜观其舞因令乐人习之故有巴俞之乐漫衍者即张衡西京赋所云巨兽百寻是为漫
延者也鱼龙者为舍利之兽先戏於庭极毕乃入殿前激水化成比目鱼跳跃漱水作雾障日
毕化成黄龙八丈出水敖戏於庭炫燿日光西京赋云海鳞变而成龙即为此色也】元帝初
元四年罢角抵戏【本纪刑法志云用贡禹议】

西汉会要卷二十二

卷二十三

钦定四库全书

西汉会要卷二十三

宋 徐天麟 撰

輿服上

天子车旗【皇后子附】

王车黄屋左纛【高纪李斐曰天子车以黄繒为盖里纛毛羽幢也在乘与车衡左方上注之蔡邕曰以犁牛尾为之如斗或在駟头或在衡】

文帝初立奉天子法驾迎代邸【本纪案三辅黄图云天子出车驾次第谓之卤簿有大驾有法驾有小驾大驾则公卿奉引大将军参乘太仆御属车八十一乘作三行尚书御史乘之最後一乘垂豹尾豹尾以前皆为省中备千乘万骑出长安出祠天於甘泉备之百官有其仪注名曰甘泉卤簿法驾京兆尹奉引侍中参乘奉车郎御属车三十六乘】

宣帝初立太仆以輅猎车奉迎曾孙【宣纪文颖曰輅猎小车前有曲輿不衣也李奇曰兰輿轻车也师古曰时未备天子车驾故且取其轻便耳】

乘輿副车【霍光传】

輜车【张良传上虽疾强载輜车卧而护之】

鸾旗在前属车在後【贾捐之传师古曰鸾旗编以羽毛列系幢旁载於车上大驾出则陈於道而先行】

属车间豹尾中【杨雄传服?曰大驾属车八十一乘作三行尚书御史乘之最後一乘垂豹尾豹尾以前皆为省中】

属车之清尘【应劭曰古者诸侯贰车九乘秦?九国兼其车服汉依秦制故大驾属车八十一乘师古曰属者言相连续而不絶也尘谓行而起尘也言清者尊贵之意也见司马相如传】

甘泉法从【杨雄传注云从法驾也】

翠凤之驾【扬雄传师古曰天子乘车为凤形而饰以翠羽也】

千乘霆乱万骑屈桥【扬雄传】

乘镂象六玉蚪【张揖曰镂象象路也以象牙疏镂其车骆六玉蚪谓驾六马以玉饰其鑣勒有似玉蚪龙子有角曰蚪】拖蜺旌【析羽毛染以五采缀以缕为旌有似虹蜺之气也】靡云旌【画熊虎为旒於旗似云气】前皮轩後道游【皮轩之上以赤皮为重盖天子将出道车五乘游车九乘言皮轩最居前而道游次皮轩之後司马相如传】

乘輿乃登夫凤凰兮翳华芝【师古曰凤凰者车以凤凰为饰也翳蔽者以华芝为蔽也】駉苍螭兮六素蚪【四六驾数也螭似龙一名螭】流星旒以电烛兮咸翠盖而鸾旗屯万骑於中营兮方玉车之千乘【扬雄传方并也】

张耀日之玄旒扬左纛被云梢【梢与旒同】奋电鞭骖雷辘鸣洪钟建五旗【扬雄传汉旧仪云皇帝车驾建五旗盖谓五色之旗也以木牛承旗下取其负重致远】

建九旒六白虎载灵輿立历天之旗曳捎星之旃【同上】举洪颐植灵旗【同上洪颐旗名也】

建翠华之旗【司马相如传师古曰以翠羽为旗上葆也】

羽葆【韩延寿传】

皇太后御小马车【霍光传张晏曰皇太后所驾游宫中辇车也汉廐有果下马高三尺以驾辇师古曰小马可於果林下乘之故号果下马】

緑车【金日磾传晋灼曰汉注緑车名皇孙车太子有子乘以从】

太仆掌輿马属官有车府路轸骑马骏马四令丞【伏?曰主乘輿路车又主凡小车轸今之小马曲輿也】

中太仆掌皇太后輿马不常置【并百官表】

高宛制侯丙猜曾孙信坐出入属车间免【功臣表天子出入行陈列属车而辄至其间】

先驱【旄头】

旌旗鼓车旄头先驱【燕王旦传师古曰凡此皆天子之制又东方朔传应劭云旄头以羽林为之髮正向上而长衣绣衣在乘輿前】

先驱旄头剑挺堕坠【梁邱贺传师古曰先驱导驾者若今之武侯队矣】

先驱光禄大夫张猛【薛广德传胡公汉官云车驾出有请室令在前先驱】

奉车

奉车都尉掌御乘舆车驸马都尉掌驸马【百官表】

夏侯婴为太仆转为滕令常奉车【本传】

霍光为奉车都尉出则奉车【本传】

杜延年久典朝政出即奉驾【本传】

散骑骑并乘舆车【百官表师古曰骑而散从亡常职也应劭汉官曰前汉置散骑及中常侍各一人散骑并乘舆车献可替否】

辇郎【刘向传十二为辇郎】

参乘

陈平亡楚来降汉王使参乘【纪师古曰乘车之法尊者居左御者居中又有一人处车之右以备倾侧是以戎事则称车右其余则曰骖乘骖者三也盖取三人为名义耳】

周繇以舍人从高祖常为参乘【传】

文帝自代来令宋昌骖乘【纪】

文帝朝东宫赵谈骖乘爰盎伏车前曰臣闻天子所与共六尺舆者皆天下豪英今汉虽乏人独奈何与刀锯余人共载於是上笑下赵谈谈泣下车【盎传】

张释之为谒者仆射文帝召骖乘徐行问秦之敝具以质言【传】

卫绾为中郎将景帝幸上林诏中郎将骖乘还而问曰君知所以得骖乘乎绾曰不知也上问曰吾为太子时召君君不肯来何也【绾传师古曰言以此时识之】

宣帝始立谒见高庙大将军光骖乘上内严憚若有芒刺在背後车骑将军张安世代光骖乘天子从容肆体甚安近焉及光身死而宗族竟诛故俗传之曰霍氏之祸萌於骖乘【传】

金日磾迁侍中驸马都尉光禄大夫出则骖乘【传】

警?

出称警入言?【文三王传师古曰警者戒肃也?止行人也言出入者互文耳出亦有?汉仪注皇帝輦动左右侍帷幄者称警出殿则传?止人清道也】

出称?入言警【韩安国传师古曰?止行人也警令戒肃也天子出入皆备此仪而今云出称?入言警者互举之耳】

文帝拜张释之为廷尉上行出中渭桥有一人从桥下走乘舆马惊於是使骑捕之属廷尉释之治问曰县人来闻蹕匿桥下久以为行过既出见车骑即走耳释之奏当此人犯蹕当罚金上怒曰此人亲惊吾马马赖和柔令它马固不败伤我乎而廷尉廼当之罚金释之曰法者天子所与天下公共也今法如是更重之是法不信於民也且方其时上使使诛之则已今已下廷尉廷尉天下之平也壹倾天下用法皆为之轻重民安所错其手足唯陛下察之上良久曰廷尉当是也【本传】

廐马

太仆掌舆马属官有大廐未央家马三令又车府路轡骑马骏马四令丞又龙马闲驹橐泉駒騊承华五监长丞【百官表臣天麟按汉旧仪云天子六廐未央承华騊騊骑马路轡大廐马皆万匹三辅黄图都廐天子车马所在中廐皇后车马所在】

汉初天子不能具□驂【食货志】

文帝二年诏太仆见马遗财足余皆以给传置

元帝初元元年诏太仆减谷食马

二年罢黄门乘舆狗马

五年诏乘舆秣马毋乏正事而已

成帝建始二年减乘舆廐马【传本纪】

杂録

文帝时有献千里马者诏曰鸾旗在前属车在後吉行日五十里师行三十里朕乘千里之马独先安之於是还马与道里费而下诏曰朕不受献也其令四方毋求献【贾捐之传】

武帝元鼎四年马生渥洼水中【本纪李斐曰南阳新野有暴利长遭刑屯田敦煌界数於此

水旁见羣野马中有奇者与凡马异来饮此水利长先作土人持勒鞵於水旁後马玩习久之代土人持勒鞵收得其马献之欲神异此马云从水中出】作天马之歌【本纪】

後伐大宛得千里马马名蒲梢次作以为歌【乐书】

金日磾输黄门养马牵马过殿下马又肥好拜为马监【本传】

上官桀迁未央廐令武帝尝体不安及愈见马马多瘦上大怒令以我不复见马邪欲下吏桀顿首曰臣闻圣体不安日夜忧惧诚不在马言未卒泣数行下上以为忠【外戚传】

元帝时贡禹奏言高祖孝文孝景皇帝循古节俭廐马百余匹方今廐马食粟将万匹今民大饥而廐马食粟苦其大肥气盛怒至乃日步作之愿减损乘舆服御廐马可亡过数十匹天子纳善其忠乃下诏令太仆减食谷马【贡禹传】

百官车

汉初将相或乘牛车【食货志】

景帝中六年诏曰吏者民之师也车驾衣服宜称令长吏二千石车朱两轡千石至六百石朱左轡【本纪臣天麟按後汉志云景帝诏六百石以上施车轡得铜五朱轡有吉阳箒中二千石以右騂二千石以上皂布盖千石以上乘马车赤画杠其余皆青云】

朱买臣为会稽太守长安廐吏乘驷马来迎【本传张晏曰故事大夫乘官车驾驷】

吴楚诛後诸侯贫者或乘牛车【高五王赞】

黄霸为颍川太守赐车盖持高一丈别驾主簿车缙油屏泥於轼前以章有德【传】

杜延年为御史大夫以老病乞骸骨天子优之赐安车驷马罢就第【本传师古曰坐乘之车也臣天麟按後汉舆服志云公列侯安车朱班轮倚鹿较伏熊轼皂盖倚鹿较者画立鹿於车之前两藩外也伏熊轼者车前横轼为伏熊之形也】

薛广德为御史大夫与丞相定国大司马车骑将军史高俱乞骸骨皆赐安车驷马广德东归沛以为荣垂其安车传子孙【本传】

武帝使使安车以蒲裹轮驾驷迎申公【申公传师古曰以蒲裹轮取其安也】

田千秋为相年老上优之朝见得乘小车出入宫殿中故因号曰车丞相【本传】

武帝闻枚年老廼以安车蒲轮召乘【传】

平帝元始二年王莽奏车服制度【纪】

杂録

輜车【张良传师古曰衣车】

广柳车【季布传置广柳车中服?曰东郡谓广轍车为广柳车郑氏曰作大柳衣车若周礼丧车也李奇曰广柳大隆穹也晋灼曰周礼说衣袂柳柳聚也衆饰之所聚也此为载以丧车欲人不知也师古曰晋郑二说是也隆穹所谓车輦者耳非此之谓也】

轺车百乘牛车千两【货殖传】

始元五年有一男子乘黄犍车建黄旒衣黄檐褕着黄冒诣北阙自谓卫太子【隗不疑传】

蔡义给事大将军莫府家贫常步行资礼不逮衆门下好事者相合为义买犍车令乘之【本传】

东平王数私出入驱驰国中王尊为相召敕廐长大王当从官属鸣和鸾乃出自今有令驾小车叩头争之【王尊传】

杨恽家方隆盛时乘朱轮者十人【本传】

韩延壽在东郡时试骑士治饰兵车画龙虎朱爵延壽衣黄紬方领驾四马传总建幢檠植羽葆鼓车歌车功曹引车皆驾四马载檠戟五骑为伍分左右部军假司马千人持幢旁轂治饰车甲三百万以上萧望之劾延壽上僭不道【本传】

哀帝召龚胜为谏大夫胜荐龚舍甯壽侯嘉有诏皆召胜曰窃见国家聘医巫常为驾骋贤者宜驾上曰大夫乘私车来邪胜曰唯唯有诏为驾

韦元成以列侯侍祀孝惠庙当晨入天雨淖不驾驷马车而骑至庙下有司劾奏等辈数人皆削爵为关内侯元成自伤贬黜父爵作诗自劾责曰惟我小子不肃会同媿彼车服黜此附庸四方羣后我监我视威仪车服惟肃是履【本传】

鲍宣为豫州牧行部乘传去法驾驾一马舍宿乡亭为衆所非宣坐免【鲍宣传】

王氏一姓乘朱轮华轂者二十三人【刘向传】

王莽谒九庙大驾乘六马以五采毛为龙文衣着角长三尺华盖车元戎十乘在前【王莽传】

西汉会要卷二十三

<史部,政书类,通制之属,西汉会要>

卷二十四

钦定四库全书

西汉会要卷二十四

宋 徐天麟 撰

輿服下

天子冠服

高祖以竹皮为冠令求盗之薛治时时冠之及贵常冠所谓刘氏冠也八年令爵非公乘以上毋得冠刘氏冠【本纪臣天麟按後汉輿服志云刘氏冠楚冠制也祀宗庙诸祀则冠之此冠高祖所造故以为祭服尊敬之谓也】

高皇帝所述书天子所服第八【天子袞服之制也於施行诏书第八】曰大谒者臣章受诏长乐宫曰令羣臣议天子所服相国臣何等议曰春夏秋冬天子所服当法天地之数中得人和臣请法之中谒者赵尧举春李舜举夏儿汤举秋贡禹举冬四人各职一时大谒者襄奏制曰可【魏相传服?曰主一时衣服礼物朝祭百事】

文帝身衣弋绋【本赞又贾谊云帝之身自衣皂绋】

孝文身衣弋绋足履革舄以韦带剑莞蒲为席兵木无刃衣縕无文【东方朔传】

圣文躬服节俭绋衣不敝革鞜不穿【扬雄传】

昭帝元凤四年帝加元服【本纪师古曰元尊也冠者首之所着故曰元服】皇太后赐御府衣迎宣帝【纪按少府属官有御府令主天子衣服】

元帝初元五年罢齐三服官【纪李斐曰齐国旧有三服官春献冠帻纵为首服绮素为令服轻绋为夏服臣天麟按贡禹传禹奏故齐三服官输物不过十笥方今齐三服官作工各数千人一岁费数钜万天子纳其言罢齐三服官】

百官冠服

爵非公乘以上毋得冠刘氏冠【见上】

景帝中六年诏曰吏者民之师也车驾衣服宜称亡度者或不吏服出入闾里与民无异令长

吏车骑从者不称其官衣服下吏出入闾巷亡吏体者二千石上其官属三辅举不如法令者【纪】

皂衣【谷永传曰陛下擢之皂衣之吏萧望之曰张敞备皂衣二十余年如淳曰虽有五时服至朝皆着皂衣】

直指使者衣绣衣持斧【武纪】

柱後惠文【张敞传当以柱後惠文弹治之耳晋灼曰汉时法冠也一号柱後惠文以纚裹铁柱卷秦制执法服今御史服之獬廌一角今冠两角以獬廌为名耳师古曰纚即今日方纱也山尔反卷去权反】郎侍中皆鷩冠贝带【佞幸传师古曰以鷩毛羽饰冠司马相如传师古曰鷩鷩鸟也似山鷩而小鷩背毛黄腹下赤项绿色其尾毛红赤光彩鲜明今俗呼为山鷩其实非也】

貂羽黄金附蝉【燕王旦传注云侍中之饰】

司隶冠进贤冠【百官表】

仄注冠【五行志李奇注云仄注冠曰高山冠齐冠也谒者服】

皮弁素绩【孝平王后传刘歆以下四十九人赐皮弁素绩师古曰皮弁以鹿皮为冠形如人手之弁合也素绩谓素裳也朱衣而素裳字或作积积谓襞积之若今之撰为也】

方山冠【五行志邓展曰方山冠以五彩縠为之乐舞人所服】

杂录

武安侯田恬坐衣檐褕入宫不敬免【外戚表师古曰檐褕直裾裋衣】朱博为刺史敕功曹官属多褻衣大褱不中节度自今掾吏衣皆令去地三寸【传】

叔孙通儒服汉王憎之乃变其服服短衣楚制【传】娄敬见高祖虞将军欲与鲜衣敬曰臣衣帛衣帛见衣褐衣褐见不敢易衣【娄敬传】

江充召见愿以所常被服冠见武帝许之充衣纱縠褌衣曲裾後垂交输冠褌纚步摇冠飞翾之纓【传】

隼不疑见暴胜之冠进贤冠带櫜具剑佩环玦褻衣博带盛服至门上谒【传】

董偃绿帟传鞬【东方朔传应劭曰宰人服也韦昭曰鞬形如射鞬以缚左右手於事便也师

古曰綠幘贱人之服也傳着也即今之臂鞞也】

臣庶衣服

汉初定与民无禁【叙传师古曰国家不设车旗衣服之禁】

高祖八年贾人毋得衣锦绣绮縠絺紵罽【纪】

文帝时贾谊上疏言今民卖僮者为之绣衣丝履偏诸缘内之闲中是古天子后服所以庙而不宴者也而庶人得以衣婢妾白縠之表薄绮之里縠以偏诸美者黼绣是古天子之服今富人大贾嘉会召客者以被墙庶人屋壁得为帝服倡优下贱得为后饰帝之身白衣皂绋而富民墙屋被文绣天子之后以缘其领庶人孽妾缘其履此臣所谓舛也【传】

成帝永始四年诏公卿列侯多畜奴婢被服绮縠车服过制申敕有司以渐禁之青绿民所常服且勿止【纪】成帝微行私奴客皆白衣袒幘带刀持剑【百官志】

白衣【龚胜传师古曰白衣给官府趋走贱人若今诸司亭长掌固之属】

玺

汉元年十月沛公至霸上秦王子婴封皇帝玺符节降枳道旁【本纪又霍光传注云汉初有三玺天子之玺自佩行玺信玺在符节台又汉旧仪云皇帝六玺皆白王螭虎纽文曰皇帝行玺皇帝之玺皇帝信玺天子行玺天子之玺天子信玺】

代王至周勃跪上天子玺【文帝纪】

符玺御史【周昌传赵尧为符玺御史百官表去其御史尚符玺者有印绶】

霍光辅少主殿中尝有怪一夜羣臣相惊光召尚符玺郎【恐有变难欲收取玺】郎不肯授光光欲夺之郎按剑曰臣头可得玺不可得也【光传】

霍光奏昌邑王受皇帝信玺行玺大行前就次发玺不封【光传】

初高祖入咸阳至霸上秦王子婴降於轂道奉上始皇玺及高祖诛项籍即天子位因御服其玺世世传受号曰汉传国玺以孺子未立玺藏长乐宫及莽即位请玺太后不肯授莽莽使安阳侯舜谕旨舜素谨敕太后雅爱信之舜既见太后知其为莽求玺怒骂之曰而属父子宗族蒙汉家力富贵累世既无以报受人孤寄乘便利时夺取其国不复顾恩义人如此者狗猪不食其余天下岂有而兄弟邪且若自以金匱符命为新皇帝变更正朔服制亦当自更作玺传之万世何用此亡国不祥玺为而欲求之我汉家老寡妇旦暮且死欲与此玺俱葬终不可得

太后因涕泣而言旁侧长御以下皆垂涕舜亦悲不能自止良久乃仰谓太后臣等已无可言者莽必欲得传国玺太后宁能终不与邪太后闻舜语切恐莽欲胁之乃出汉传国玺投之地以授舜曰我老已死知而兄弟令族灭也舜既得传玺奏之莽大说乃为太后置酒未央宫渐台大纵衆乐【元后传】

羣臣玺绶【印】

诸侯王金玺螭绶【螭音戾緑也汉旧仪云诸侯王黄金玺橐佗纽文曰玺】

相国丞相金印紫绶高帝十一年更名相国緑绶太师太傅太保太尉左右前後将军金印紫绶

御史大夫银印青绶

凡吏秩比二千石以上皆银印青绶光禄大夫无秩比六百以上皆铜印黑绶大夫博士御史谒者郎无其仆射御史治书尚符玺者有印绶比二百石以上皆铜印黄绶绥和元年长相皆黑绶建平二年复黄绶【百官表】武帝太初元年改正朔数用五【纪注云谓印文也若丞相曰丞相之印章诸卿及守相印文不足五字者以之足之】

杨仆怀银黄垂三组【银银印也黄金印也仆怀三印故三组也】

宣帝始赐单于印玺与天子同【食货志上】

匈奴故印文曰匈奴单于玺【本传王莽更曰新匈奴单于章】

方寸之印丈二之组镇抚海内【严助传】

印□【陈遵传谓印之组也】

符节

天子玺符节【高纪师古曰符谓诸所合符以为契者也节以毛为之上下相重取象竹节将命者持之以信】

高祖与功臣剖符作誓【纪】

文帝二年初与郡守为铜虎符竹使符【纪应劭曰铜虎符第一至第五国家当发兵遣使者至郡合符符合乃听受之竹使符皆以竹箭五枚长五寸?刻篆书第一至第五张晏曰符以代古之珪璋从简易也师古曰与郡守为符者谓各分其半右留京师左以与之使音所吏反】

武帝征和二年更节加黄旄初汉节纯赤以戾太子持赤节故更为黄旄加上以相别【本纪及刘屈氂传】

少府属官有符节令丞【百官表】

襄平侯纪通尚符节【吕后纪】

齐王欲发兵诛诸吕魏勃曰王欲发兵非有汉虎符验也【高五王传】

七国败弓高侯诰胶西王卬曰未有诏虎符擅发兵王其自图之【吴王濞传】

武帝曰吾新即位不欲出虎符发兵郡国【严助传】

御史中丞劾冯野王持虎符出界归家遂免【传】

淮南王盗写虎符【贾捐之传】

闽越王弟余善杀王以降遣使者上符节请所立【严助传】伍符【冯唐传伍伍相保之符也】

卫太子擅发兵卢贺坐受太子节掠死【功臣表】

任安坐受太子节怀二心要斩【刘屈氂传】

霍光奏昌邑王自之符玺取节十六朝暮临从官持节从【传】

关传

文帝十二年除关无用传【本纪张晏曰传信也若今过所也师古曰古者或用檠或用繒帛檠者刻木为合符也】

景帝四年复置诸关用传出入【纪应劭曰以吴国新反备非常】

宣帝本始四年诏曰今岁不登民以车船载谷入关者得毋用传【纪】

甯成诈刻传出关【本传】

终军从济南当诣传士步入关关吏予军繻军问以此何为吏曰为复传还当以合符军曰大丈夫西游终不复传还弃繻而去军为谒者使行郡国建节东出关吏识之曰此使者乃前弃

繻生也【本传】

西汉会要卷二十四

卷二十五

钦定四库全书

西汉会要卷二十五

宋 徐天麟 撰

学校上

大学

高祖尚有干戈平定四海未遑庠序之事【儒林传序】

武帝兴大学【本赞臣天麟按三辅黄图云太学在长安西北七里有市有狱】

董仲舒对策曰养士之大者莫大乎大学大学者贤士之所关也教化之本原也愿陛下兴大学置明师以养天下之士武帝立学校之官皆自仲舒发之【本传】

元朔五年制曰盖闻导民以礼风之以乐婚姻者居室之大伦也今礼废乐崩朕甚愍焉故详延天下方闻之士咸登诸朝其令礼官劝学讲义洽闻举遗兴礼以为天下先太常议予博士弟子崇乡里之化以厉贤材焉谨与太常臧博士平等议曰闻三代之道乡里有教夏曰校殷曰序周曰庠其劝善也显之朝廷其惩恶也加之刑罚故教化之行也建首善自京师始繇内及外今陛下昭至德开大明配天地本人伦劝学兴礼崇化厉贤以风四方太平之原也古者政教未洽不备其礼请因旧官而兴焉为博士官置弟子五十人复其身太常择民年十八以上仪状端正者补博士弟子郡国县官有好文学敬长上肃政教顺乡里出入不悖所闻令相长丞上属所二千石二千石谨察可者常与计偕诣太常得受业如弟子一岁皆辄课能通一艺以上补文学掌故阙其高第可以为郎中太常籍奏即有秀才异等辄以其名闻其不事学若下材及不能通一艺辄罢之而请诸能称者臣谨按诏书律令下者明天人分际通古今之谊文章尔雅训辞深厚恩施甚美小吏浅闻弗能究宣亡以明布谕下以治礼掌故以文学礼义为官迁留滞请选择其秩比二百石以上及吏百石通一艺以上补左右内史大行卒史比百石以下补郡太守卒史皆各二人边郡一人先用诵多者不足择掌故以补中二千石属文学掌故补郡属备员请着功令他如律令制曰可自此以来公卿大夫士吏彬彬多文学之士矣昭帝时举贤良文学增博士弟子员满百人宣帝末增倍之元帝好儒能通一经者皆复数年以用度不足更为设员千人郡国置五经百石卒史成帝末或言孔子布衣养徒三千人今天子大学弟子少於是增弟子员三千人岁余复如故平帝时王莽秉政增元士之子得受业如弟子勿以为员岁课甲科四十人为郎中乙科二十人为太子舍人丙科四十人补文学掌故云【儒林传序】

武帝立五经博士开弟子员设科射策讫於元始一经说至百余万言大师衆至千余人【儒林传赞】

元帝初元五年罢博士弟子毋置员以广学者永光三年冬复博士弟子员【纪】

辟雍

武帝封泰山还儿寛上壽曰间者圣统废絶陛下发愤祖立明堂辟雍【儿寛传师古曰祖始也】

河间献王来朝献雅乐对三雍宫【景十三王传应劭曰辟雍明堂灵台也雍和也言天地君臣人民皆和也】

成帝时犍为郡於水滨得古磬十六枚刘向因是说上宜兴辟雍设庠序陈礼乐隆雅颂之声盛揖逊之容以风化天下成帝以向言下公卿议会向病卒丞相大司空奏请立辟雍案行长安城南营表未作遭成帝崩羣臣引以定諡及王莽为宰衡欲耀衆庶遂兴辟雍因以篡位世祖中兴乃营立明堂辟雍显宗即位躬行其礼养三老五更於辟雍威仪既盛美矣【礼乐志臣天麟按三辅黄图汉辟雍在长安西北七里河间献王来朝献雅乐武帝对之三雍宫即此】平帝元始五年刘歆孔永孙迁平晏四人使治明堂辟雍得万国驩心侯各千户【恩泽侯表】

郡国学

文翁为蜀郡守仁爱好教化见蜀地僻陋有蛮夷风文翁欲诱进之乃选郡县小吏开敏有材者张叔等十余人亲自飭厉遣诣京师受业博士或学律令减省少府用度买刀布蜀物贖计吏以遗博士数岁蜀生皆成就还归文翁以为右职用次察举官有至郡守刺史者又修起学宫於成都市中招下县子弟以为学官弟子为除更繇高者以补郡县吏次为孝弟力田常选学官僮子使在便坐受事每出行县益从学官诸生明经饬行者与俱使传教令出入闺合县邑吏民见而荣之数年争欲为学官弟子富人至出钱以求之繇是大化蜀地学於京师者比齐鲁焉至武帝时乃令天下郡国皆立学校官自文翁为之始云【循吏传】

元帝郡国置五经百石卒史【儒林序】

平帝元始三年立学官郡国曰学邑侯国曰校校学置经师一人乡曰庠聚曰序序庠置孝经师一人【纪】何武为刺史行部必先即学宫见诸生试其诵论问以得失【武传】

图书上

汉兴改秦之敝大收篇籍广开献书之路迄孝武世书缺简脱礼坏乐崩圣上喟然而称曰朕

甚憫焉於是建藏書之策置寫書之官下及諸子傳說皆充祕府至成帝時以書頗散亡使謁者陳農求遺書於天下詔光祿大夫劉向校經傳諸子詩賦步兵校尉任宏校兵書太史令尹咸校術數侍醫李柱國校方技每一書已向輒條具篇目撮其指意錄而奏之會向卒哀帝復使向子侍中奉車都尉歆卒父業歆於是總羣書而奏其七略故有輯略有六藝略有諸子略有詩賦略有兵書略有術數略有方技略今刪其要以備篇籍【藝文志下同】

凡易十三家二百九十四篇易道深矣人更三聖世歷三古及秦燔書而易為筮卜之事傳者不絕漢興田何傳之迄於宣元有施孟梁丘京氏列於學官而民間有費高二家之說劉向以中古文易經校施孟梁丘經或脫去无咎悔亡唯費氏經與古文同

凡書九家四百一十二篇書之所起遠矣至孔子纂焉上斷於堯下迄於秦凡百篇而為之序言其作意秦燔書禁學濟南伏生獨壁藏之漢興亡失求得二十九篇以教齊魯之間訖孝宣世有歐陽大小夏侯氏立於學宮古文尚書者出孔子壁中武帝末魯共王壞孔子宅欲以廣其宮而得古文尚書及禮記論語孝經凡數十篇皆古字也共王入往其宅聞鼓琴瑟鐘磬之音於是懼乃止不壞孔安國孔子後也悉得其書以考二十九篇得多十六篇安國獻之遭巫蠱事未列於學宮劉向以中古文校歐陽大小夏侯三家經文酒誥脫簡一召誥脫簡二率簡二十五字者脫亦二十五字簡二十二字者脫亦二十二字文字異者七百有余脫字數十書者古之号令号令於衆其言不立具則听受施行者弗曉古文讀應爾雅故解古今語而可知也

凡詩六家四百一十六卷漢興魯申公為詩訓故而齊轅固燕韓生皆為之傳或取春秋采雜說咸非其本義與不得已魯最為近之三家皆列於學官又有毛公之學自謂子夏所傳而河間獻王好之未得立

凡禮十三家五百五十五篇漢興魯高堂生傳士禮十七篇訖孝宣世后倉最明戴聖庆普皆其弟子三家立于學官禮古經者出於魯淹中及孔氏學七十篇文相似多三十九篇及明堂陰陽王史氏記所見多天子諸侯卿大夫之制雖不能備猶療倉等推士禮而致於天子之說

凡樂六家百六十五篇漢興制氏以雅樂聲律世在樂官頗能紀其鏗鏘鼓舞而不能言其義六國之君魏文侯最為好古孝文時得其樂人竇公獻其書乃周官大宗伯之大司樂章也武帝時河間獻王好儒與毛生等共采周官及諸子言樂事者以作樂記獻八佾之舞與制氏不相遠其內史丞王定傳之以授常山王禹禹成帝時為謁者數言其義獻二十四卷記劉向校書得樂記二十三篇與禹不同其道寢以益微

凡春秋二十三家九百四十八篇周室既微載籍殘缺仲尼與左丘明觀魯史記因興以立功就敗以成罰丘明論本事而作傳及末世有公羊谷梁邾夾之傳四家之中公羊谷梁立於學官邾氏無師夾氏未有書凡論語十二家二百二十九篇漢興有齊魯之說傳齊論者昌邑中尉王吉少府宋畸御史大夫貢禹尚書令五鹿充宗膠東庸生唯王陽名家傳魯論語者常山都尉龔奮長信少府夏侯勝丞相韋賢魯扶卿前將軍蕭望之安昌侯張禹皆名家張氏最後

而行於世

凡孝经十一家五十九篇汉兴长孙氏博士江翁少府后仓諫大夫翼奉安昌侯张禹传之各自名家经文皆同唯孔氏壁中古文为异父母生之续莫大焉故亲生之膝下诸家说不安处古文字读皆异

凡小学十家四十五篇古者八岁入小学故周官保氏掌养国子教之六书谓象形象事象意象声转注假借造字之本也汉兴萧何草律亦着其法曰太史试学童能讽书九千字以上乃得为史又以六体试之课最者以为尚书御史史书令史吏民上书字或不正辄举劾六体者古文奇字篆书隶书缪篆虫书皆所以通知古今文字摹印章书幡信也汉兴闾里书师合苍颉爰历博学三篇断六十字以为一章凡五十五章并为苍颉篇武帝时司马相如作凡将篇无复字元帝时黄门令史游作急就篇成帝时将作大匠李长作元尚篇皆苍颉中正字也凡将作则颇有出矣至元始中召天下通小学以百数各令记字於庭中杨雄取其有用者以作训纂篇顺续苍颉又易苍颉中重复之字凡八十九章臣复续杨雄作十二章凡一百二章无复字六艺羣书所载略备矣苍颉多古字俗师失其读宣帝时召齐人能正读者张敞从受之传至外孙之子杜林为作训故并列焉

凡六艺一百三家三千一百二十三篇

西汉会要卷二十五

卷二十六

钦定四库全书

西汉会要卷二十六

宋 徐天麟 撰

学校下

图书下

儒五十三家八百三十六篇

道三十七家九百九十三篇

陰阳二十一家三百六十九篇

法十家二百一十七篇

名七家三十六篇

墨六家八十六篇

从横十二家百七篇

杂二十家四百三篇

农九家百一十四篇

小说十五家千三百八十篇

凡诸子百八十九家四千三百二十四篇

赋二十家三百六十一篇

赋二十一家二百七十四篇

赋二十五家百三十六篇

杂赋十二家二百三十三篇

歌诗二十八家三百一十四篇

凡诗赋百六家千三百一十八篇

兵权谋十三家二百五十九篇

兵形势十一家九十二篇图十八卷

陰阳十六家二百四十九篇

兵技巧十三家百九十九篇

凡兵书五十三家七百九十篇图四十三卷汉兴张良韩信序次兵法凡百八十二家删取要用定着三十五家诸吕用事而盗取之武帝时军政杨仆捃摭遗逸纪奏兵録犹未能备至於孝成命任宏论次兵书为四种

天文二十一家四百四十五卷

历谱十八家六百六卷

五行三十一家六百五十二卷

蓍龟十五家四百一卷

杂占十八家三百一十三卷

形法六家百二十二卷

凡数术百九十家二千五百二十八卷

医经七家二百一十六卷

经方十一家二百七十四卷

房中八家百八十六卷

神仙十家二百五卷

凡方技三十六家八百六十八卷

大凡书六略三十八种五百九十六家万三千二百六十九卷【并艺文志】

杂錄

汉元年高祖入关萧何尽收秦丞相府图籍文书【本纪】惠帝四年除挟书律【本纪】

御史中丞在殿中兰台掌图籍秘书【百官表臣天麟谨按通典云汉凡图书所在有石渠石室延阁广内贮之於外府又有御史中丞居殿中掌兰台秘书及麒麟天禄二阁藏之於内禁】

成帝河平三年刘向校中秘书谒者陈农使使求遗书於天下【本纪臣天麟按刘歆七略云外则有太常太史博士之藏内则有延阁广内秘丞之府】史记石室金匱之书【司马迁传】

苏昌为太常坐籍霍山书泄秘书免【百官表师古曰以秘书借霍山】霍山坐写秘书自杀【光传】

河间献王修学好古实事求是从民得善书必为好写与之留其真加金帛赐以招之繇是四方道术之人不远千里或有先祖旧书多奉以奏献王者故得书多与汉朝等是时淮南王安亦好书所招致率多浮辩献王所得书皆古文先秦旧书周官尚书礼记孟子老子之属皆经传说记七十子之徒所论其学举六艺立毛氏诗左氏春秋博士修礼乐被服儒术造次必於儒者山东诸儒者从而游【本传】

讲论经义【校讎附】

瑕丘江公受谷梁春秋及诗於鲁申公传子至孙为博士武帝时江公与董仲舒并仲舒通五经能持论善属文江公呐於口上使与仲舒议不如仲舒而丞相公孙弘本为公羊学比辑其议卒用董生於是上因尊公羊家诏太子受公羊春秋由是公羊大兴太子既通复私问谷梁而善之其後寢微唯鲁荣广王孙皓星公二人受焉广尽能传其诗春秋高材敏捷与公羊大师眭孟等论数困之故好学者颇复受谷梁沛蔡千秋少君梁周庆幼君丁姓子孙皆从广受千秋又事皓星公为学最笃宣帝即位闻卫太子好谷梁春秋以问丞相韦贤长信少府夏侯胜及侍中乐陵侯史高皆鲁人也言谷梁子本鲁学公羊氏乃齐学也宜兴谷梁时千秋为郎召见与公羊家并说上善谷梁说擢千秋为谏大夫给事中後有过左迁平陵令复求为谷梁者莫及千秋上愍其学且絶乃以千秋为郎中户将选郎十人从受汝南尹更始翁君本自事千秋能说矣会千秋病死召江公孙为博士刘向以故谏大夫通达待诏受谷梁欲令助之江博士复死乃召周庆丁姓待诏保宫使卒授十人自元康中始讲至甘露元年积十余岁皆明习乃召五经名儒太子太傅萧望之等大议殿中平公羊谷梁同异各以经处是非时公羊博

士严彭祖侍郎申挽伊推宋显谷梁议郎尹更始待诏刘向周庆丁姓并论公羊家多不见从愿请内侍郎许广使者亦并内谷梁家中郎王亥各五人议三十余事望之等十一人各以经谊对多从谷梁由是谷梁之学大盛【儒林传】

孝宣甘露三年三月诏诸儒论五经同异太子太传萧望之等平奏其议上亲称制临决焉【纪】

韦玄成拜淮扬中尉受诏与萧望之及五经诸儒杂论同异於石渠阁条奏其对【玄成传臣天麟谨按三辅黄图云石渠阁萧何造其下龙石为渠以导水若今御沟因为阁名所藏入关所得秦之图籍至成帝又於此藏书焉天禄藏阁藏典籍之所汉宫殿疏云天禄麒麟阁萧何造以藏书处贤才也】

施雠受王孙易为博士甘露中与五经诸儒杂论同异於石渠阁【本传】

梁丘临传贺易甘露中奉使问诸儒於石渠【梁丘贺传】欧阳地余传尚书为博士论石渠【欧阳生传】

林尊为博士论石渠【尊传】

周堪与孔霸俱事大夏侯胜论於石渠经为最高【堪传】张山拊事小夏侯建为博士论石渠【本传】

张生薛广德以鲁诗论石渠【王式传】

戴德号大戴圣号小戴以博士论石渠【孟卿传】

闻人通汉以太子舍人论石渠【上】

刘向受谷梁讲论五经於石渠【本传注云三辅旧事石渠阁在未央宫大殿北以藏秘书】

五经杂议十八篇 书议奏四十二篇

礼议奏三十八篇 春秋议奏三十九篇

论语议奏十八篇【并见艺文志注云宣帝时石渠论】

少府五鹿充宗贵幸为梁丘易自宣帝时善梁丘氏说元帝好之欲考其异同令充宗与诸易家议充宗乘贵辩口诸儒莫能与抗皆称疾不敢会有荐朱云者召入摄斋登堂抗首而请音动左右既论难连柱五鹿君故诸儒为之语曰五鹿岳岳朱云折其角繇是为博士【朱云传】

】

成帝河平三年诏光禄大夫刘向校经传诸子诗赋步兵校尉任宏校兵书太史令尹咸校数术侍医李柱国校方技每一书已向辄条其篇目撮其指意録而奏之会向卒子歆卒父业歆於是总羣书而奏其七略有辑略有六艺略有诸子略有诗赋略有兵书略有术数略有方技略有【艺文志】

班伯受诗於师丹大将军王凤荐伯宜劝学召见宴昵殿容貌甚丽诵说有法拜为中常侍时上方乡学郑寛中张禹朝夕入说尚书论语於金华殿中诏伯受焉既通大义又讲异同於许商迁奉车都尉数年金华之业絶出【叙传】

杨雄校书天禄阁【本传】

国史

楚汉春秋九篇【陆贾所传】

高祖传十三篇【高祖与大臣述古语及诏策也】

孝文传十一篇【文帝所称及诏策】

大史公百三篇【十篇有録无书】

冯商所续大史公七篇【商受诏续】

汉着记百九十卷【师古曰若今之起居注】

汉大年纪五篇【已上并艺文志】

史记石室金匱之书【司马迁传】

柱下方书【张苍为御史主柱下方书】

太常属官有太史令丞

司马氏世典周史至谈为大史公大史公仕於建元元封之间【如淳曰汉仪注大史公武帝置位在丞相上天下计书先上大史公副上丞相序事如古春秋迁死後宣帝以其官为令行大史公文书而已晋灼曰百官表无大史公在丞相上又卫宏所说多不实未可以为正师古曰谈为大史令耳迁尊其父故谓之为公如说非也】大史公既掌天官不治民有子曰迁迁

生龙门耕牧河山之阳年十岁则诵古文二十而南游江淮上会稽探禹穴窥九疑浮沅湘北涉汶泗讲业齐鲁之都观夫子遗风乡射邹峰厄困鄱薛彭城过梁楚以归於是迁仕为郎中奉使西征巴蜀以南略邛笮昆明还报命是岁天子始建汉家之封而太史公留滞周南不得与从事发愤且卒而子迁适反见父於河雒之间大史公执迁手而泣曰予先周室之大史也自上世尝显功名虞夏典天官事後世中衰絕於予乎女复为大史则续吾祖矣今天子接千岁之统封泰山而予不得从行是命也夫命也夫予死尔必为太史毋忘吾所欲论着矣且夫孝始於事亲中於事君終於立身扬名於後世以显父母此孝之大也夫天下称周公言其能论歌文武之德宣周召之风達大王王季思虑爰及公刘以尊后稷也幽厉之後王道缺礼乐衰孔子修旧起废论诗书作春秋则学者至今则之自获麟以来四百有余岁而诸侯相兼史记放絕今汉兴海内一统明主贤君忠臣义士予为大史而不论载废天下之文予甚惧焉尔其念哉迁俯首流涕曰小子不敏请悉论先人所次旧闻不敢阙卒三岁而迁为大史令紬史记石室金縢之书五年而当大初元年十一月甲子朔旦冬至天历始改建於明堂诸神受纪大史公曰先人有言自周公卒五百岁而有孔子孔子至於今五百岁有能绍而明之正易传继春秋本诗书礼乐之际意在斯乎意在斯乎小子何敢让焉於是论次其文卒述陶唐以来至於麟止自黄帝始逮汉继五帝末流接三代絕业周道既废秦拨去古文焚诗书故明堂石室金縢玉版图籍散乱汉兴萧何次律令韩信申军法张仓为章程叔孙通定礼仪则文学彬彬稍进诗书往往间出自曹参荐盖公言黄老而贾谊朝错明申韩公孙弘以儒显百年之间天下遗文古事靡不毕集大史公仍父子相继纂其职曰於戏余维先人尝掌斯事显於唐虞至於周复典之故司马氏世主天官至於余乎钦念哉罔罗天下放失旧闻王迹所兴原始察终见盛观衰论考之行事略三代錄秦汉上记黄帝下至於兹着十二本纪既科条之矣并时异世年差不明作十表礼乐损益律历改易兵权山川鬼神天人之际承敝通变作八书二十八宿环北辰三十辐共一轂运行无穷辅弼股肱之臣配焉忠信行道以奉主上作三十世家扶义俶傥不令已失时立功名於天下作七十列传凡百三十篇五十二万六千五百字为大史公书序略以拾遗补艺成一家言协六经异传齐百家杂语藏之名山副在京师以俟後圣君子而十篇阙有錄无书【张晏曰迁没之後亡景纪武纪礼书乐书兵书汉兴以来将相年表日者列传三王世家龟策列传傳靳列传元成之间褚先生补阙作武帝纪三王世家龟策日者传言辞鄙陋非迁本意也师古曰序日本无兵书张云亡失此说非也刘奉世曰兵书即历书盖当时有二名耳】迁既死後其书稍出宣帝时迁外孙平通侯杨惲祖述其书遂宣布焉【司马迁传】

赐书【诸侯王求书附】

班固进读羣书成帝赐以秘书之副【叙传】

东平思王来朝上疏求诸子及太史公书上以问大将军王凤对曰臣闻诸侯朝聘考文章正法度非礼不信今东平王幸得来朝不思制节谨度以防危失而求诸书非朝聘之义也诸子书或反经术非圣人或明鬼神信物怪大史书有战国从横权譎之谋汉兴之初谋臣奇策天官灾异地形扼塞皆不宜在诸侯王不可予不许之辞宜曰五经圣人所制万事靡不毕载王审乐道傳相皆儒者旦夕讲诵足以正身虞意夫小辩破义小道不通致远恐泥皆不足以留

意诸益於经术者不爱於王对奏天子如凤言遂不与【宣元六王传】

黜百家

孝武初立卓然罢黜百家表章六经【本赞】

董仲舒对策曰春秋大一统者天地之常经古今之通谊也今师异道人异论百家殊方意指不同是以上亡以持一统法制数变人不知所守臣愚以为诸不在六艺之科孔子之术者勿使并进邪辟之说灭息然後统纪可一而法度可明民知所从矣【传】

建元元年丞相绾奏所举贤良或治申商韩非苏秦张仪之言乱国政请皆罢奏可【武纪】

西汉会要卷二十六

卷二十七

钦定四库全书

西汉会要卷二十七

宋 徐天麟 撰

运历上

五运【正朔服色附】

自齐威宣时驺子之徒论着终始五德之运【如淳曰今其书有五德终始五德各以所胜为行秦谓周为火德灭火者水故自谓水德师古曰驺子即驺衍】及秦帝而齐人奏之故始皇采用之【郊祀志】

秦兼天下颇推五胜而自以为获水德乃以十月为正色上黑汉兴方纲纪大基庶事草创袭秦正朔以北平侯张仓言用颛帝历然正朔服色未覩其真云云【律历志】高祖立为沛公旗帜皆赤由所杀蛇白帝子所杀者赤帝子故也【本纪】

汉承尧运德祚已盛断蛇着符旗帜尚赤协於火德自然之应得天统矣【高帝赞】

汉兴高祖曰北時待我而起亦自以为获水德之瑞虽明习历及张仓等咸以为然是时天下初定方纲纪本基高后女主皆未遑故袭秦正朔服色【历书】

文帝时贾谊以为汉兴二十余年宜当改正朔易服色制度乃草具仪其仪法色上黄数用五帝谦逊未遑也【本传】

文帝十六年鲁人公孙臣上书曰始秦得水德及汉受之推终始传则汉当土德土德之应黄龙见宜改正朔服色上黄张苍以为汉乃水德之时河决金堤其符也年始冬十月色外黑内赤与德相应公孙臣言非是罢之明年黄龙见成纪文帝召公孙臣拜为博士与诸生申明土德草改历服色事新垣平玉杯诈觉是後文帝怠於改正服鬼神之事【郊祀志】

武帝即位天下乂安缙绅之属皆望天子封禅改正度也赵绾王臧议草改历服色事未就窦太后不好儒术使人按绾臧自杀【郊祀志】

元封七年司马迁等言历纪坏废宜改正朔是时御史大夫儿寛明经术上乃诏寛曰今宜何以为正朔服色何上寛与博士赐等议皆曰帝王必改正朔易服色所以明受命於天也创业变改制不相复推传序文则今夏时也於是乃诏以七年为元年【律历志】

太初元年夏五月正历以正月为岁首色上黄数用五【张晏曰汉据土德土数五故用五】
定官名协音律【纪】

班固曰汉兴之初庶事草创唯一叔孙生略定朝廷之仪若乃正朔服色郊望之事数世犹未章焉至於孝文始以夏郊而张苍据水德公孙臣贾谊更以为土德卒不能明孝武之世文章为盛太初改制而儿宽司马迁等犹从臣谊之言服色度数遂顺黄德彼以为五德之传从所不胜秦在水德故汉据土而克之刘向父子以为帝出于震故庖羲氏始受木德其後以母传子终而复始自神农黄帝下历唐虞三代而汉得火焉故高祖始起神母夜号着赤帝之符旗章遂赤自得天统矣昔共工氏以水德间于木火与秦同运非其次序故皆不永由是言之祖宗之制盖有自然之应顺时宜矣【郊祀志赞】

历

汉兴方纲纪大基庶事草创袭秦正朔以北平侯张仓言用颛帝历比於六历疏濶中最为微近然正朔服色未覩其真而朔晦月见弦望满亏多非是至武帝元封七年汉兴百二岁矣大中大夫公孙卿壶遂太史令司马迁等言历纪坏废宜改正朔是时御史大夫儿宽明经术上乃诏宽曰与博士共议今宜何以为正朔服色何上宽与博士赐等议皆曰帝王必改正朔易服色所以明受命於天也创业变改制不相复推传序文则今夏时也臣等闻学褊陋不能明陛下躬圣发愤诏配天地臣愚以为三统之制後圣复前圣者二代在前也今二代之统绝而不序矣唯陛下发圣德宣考天地四时之极则顺阴阳以定大明之制为万世则於是乃诏御史曰乃者有司言历未定广延宣问以考星度未能讎也盖闻古者黄帝合而不死名察发斂定清浊起五部建气物分数然则上矣书缺乐弛朕甚难之依违以惟未能修明其以七年为元年遂诏卿遂迁与侍郎尊大典星射姓等议造汉历乃定东西立晷仪下漏刻以追二十八宿相距於四方举终以定朔晦分至躔离弦望乃以前历上元泰初四千六百一十七岁至於元封七年复得阛逢摄提格之岁中冬十一月甲子朔旦冬至日月在建星大岁在子已得太初本星度新正姓等奏不能为算愿募治历者更造密度各自增减以造汉太初历乃选治历邓平及长乐司马可酒泉侯宜君侍郎尊及与民间治历者凡二十余人方士唐都巴郡落下閤与焉都分天部而閤运算转历其法以律起历曰律容一龠积八十一寸则一日之分也与长相终律长九寸百七十一分而终复三复而得甲子夫律阴阳九六爻象所从出也故黄钟纪元气之谓律律法也莫不取法焉与邓平所治同於是皆观新星度日月行更以算推如閤平法法一月之日二十九日八十一分日之四十三先藉半日名曰阳历不藉名曰阴历所谓阳历者先朔月生阴历者朔而後月乃生平曰阳历朔皆先旦月生以朝诸侯王羣臣便乃诏迁用邓平所造八十一分律历罢废尤疏远者七十家复使校律历昏明官者淳于陵渠复覆太初历晦朔弦望皆最密日月如合璧五星如连珠陵渠奏状遂用邓平历以平为太史丞後二十七年元凤三年太史令张寿王上书言历者天地之大纪上帝所为传黄帝调律历汉元年以来用之今阴阳不调宜更历之过也诏下主历使者鲜于妄人诘问寿王不服妄人请与治历大司农中丞麻光等二十余人杂候日月晦朔弦望八节二十四气钩校诸历用状奏可诏与丞相御史大将军右将军史各一人杂上林清台课诸历疏密凡十一家以元凤三年十一月朔旦冬至尽五年十二月各有第寿王课疏远案汉元年不用黄帝调历寿王非汉历

逆天道非所宜言大不敬有诏勿劾复 尽六年大初历第一即墨徐万且长安徐禹治大初历亦第一壽王及待诏李信治黄帝调历课皆疏濶又言黄帝至元凤三年六千余岁丞相属宝长安单安国安陵栢育治终始言黄帝以来三千六百二十九岁不与壽王合壽王又移帝王録舜禹年岁不合人年壽王言伯益为天子代禹骊山女亦为天子在殷周间皆不合经术壽王乃太史官殷历也壽王猥曰安得五家历又妄言太初历亏四分日之三去小余七百五分以故陰阳不调谓之乱世劫壽王吏八百石古之大夫服儒衣诵不祥之辞作妖言欲乱制度不道奏可壽王候课比三年下终不服再劾死更赦勿劾遂不更言诽谤益甚竟以下吏故历本之验在於天自汉历初起尽元凤六年三十六岁而是非坚定至孝成世刘向總六历列是非作五纪论向子歆究其微眇作三统历及谱以说春秋推法密要故述焉【律历志】

汉兴高祖曰北時待我而起亦自以为获水德之瑞虽明习历及张仓等咸以为然是时天下初定方纲纪大基高后女主皆未遑故袭秦正朔服色至孝文时鲁人公孙臣以终始五德上书言汉得土德宜更元改正朔易服色当有黄龙见事下丞相张仓张仓亦学律历以为非是罢之其後黄龙见成纪张仓自黜所欲论着不成而新垣平以望气见颇言正历服色事贵幸後作乱故孝文帝废不复问至今上即位招致四方士唐都分天部【汉书音义曰谓分二十八宿为距度】而巴郡落下閤运算转历然後日辰之度与夏正同乃改元更官号封泰山因诏御史曰乃者有司言星度之未定也广延宣问以理星度未能讐也盖闻昔者黄帝合而不死名察度验定清浊起五部建气物分数【应劭曰言黄帝造历得仙名节会察寒暑致啓闭分至定清浊起五部五部金木水火土也建气物分数皆叙历之意也孟康曰合作也黄帝作历历终复始无穷已故曰不死清浊律声之清浊也五部五行也天有四时分为五行也气二十四气物万物也分历数之分也瓚曰黄帝圣德与虚合契升龙登仙於天故曰合而不死题名宿度候察进退谓三辰之度吉凶之验也】然则尚矣书缺乐弛朕甚闵焉朕唯未能循明也絀绩日分率应水德之胜【徐广曰盖以为土德土胜水】今日顺夏至黄钟为宫林钟为太簇为商南吕为羽姑洗为角自是以後气复正羽声复清名复正变以至子日当冬至则陰阳离合之道行焉十一月甲子朔旦冬至已詹其更以七年为太初元年年名焉逢摄提格【徐广曰岁陰在寅左行岁星在丑右行】月名毕聚日得甲子夜半朔旦冬至【历书】

元始中王莽秉政欲耀名誉召天下通知钟律者百余人使羲和刘歆典领条奏言之最详故删其伪辞取正义着于篇【律历志】

汉高祖皇帝着纪伐秦继周木生火故为火德天下号曰汉距上元年十四万三千二十五岁岁在大棣之东井二十二度鶉首之六度也故汉志曰岁在大棣名曰敦牂太岁在午

八年十一月乙巳朔旦冬至楚元三年也故殷历以为丙午距元朔七十六岁

着纪高帝即位十二年

惠帝着纪即位七年

高后着纪即位八年

文帝前十六年後七年着纪即位二十三年

景帝前七年中六年後三年着纪即位十六年

武帝建元元光元朔各六年元朔六年十一月甲申朔旦冬至殷历以为乙酉距元初七十六岁元狩元鼎元封各六年汉历太初元年距上元十四万三千一百二十七岁前十一月甲子朔旦冬至岁在星纪婺女六度故汉志曰岁名困敦正月岁星出婺女太初天汉太始征和各四年後二年着纪即位五十四年

昭帝始元元凤各六年元平一年着纪即位十三年宣帝本始地节元康神爵五凤甘露各四年黄龙一年着纪即位二十五年

元帝元初二年十一月癸亥朔旦冬至殷历以为甲子以为纪首是岁也十月日食非合辰之会不得为纪首距建武七十六岁初元永光建昭各五年竟宁一年着纪即位十六年

成帝建始河平阳朔鸿嘉永始元延各四年绥和二年着纪即位二十六年

哀帝建平四年元壽二年着纪即位六年

平帝着纪即位元始五年以宣帝玄孙婴为嗣谓之孺子着纪新都侯王莽居摄三年王莽居摄盗袭帝位窃号曰新室始建国五年天凤六年地皇三年着纪盗位十四年更始帝着纪以汉宗室灭王莽即位二年赤眉贼立宗室刘盆子灭更始帝自汉元年讫更始二年凡二百三十岁【并律历志】

改元

文帝十六年新垣平言上曰阙下有宝玉气来者已视之果有献玉杯者刻曰人主延壽平又言臣 日再中居顷之日却复中於是始更以十七年为元年【郊祀志】武帝建元元年【本纪师古曰自古帝王未有年号始起於此刘攽曰封禅书云其後二年有司言元宜以天瑞命不宜以一二数推所谓其後三年者盖尽元符六年至元鼎三年也然元鼎四年方得宝鼎又无缘先三年而称之以此而言自元鼎以前之元皆有司所追命其实年号之起在元鼎耳故元封改元则始有诏书矣】

有司言元宜以天瑞不宜以一二数一元曰建二元以长星曰光今郊得一角兽曰狩云【郊祀志】

元封元年诏曰朕以眇身承至尊兢兢焉惟德菲薄不明于礼乐故用事八神遭天地况施着

见景象?然如有闻震于怪物欲止不敢遂登封泰山至于梁父然後升礼肃然自新嘉与士大夫更始其以十月为元封元年【武纪】

元封七年汉兴百二岁矣大中大夫公孙卿壶遂太史令司马迁等言历纪坏废宜改正朔是时御史大夫儿宽明经术上乃诏宽曰与博士共议今宜何以为正朔服色何上宽与博士赐等议皆曰帝王必改正朔易服色所以明受命於天也创业变改制不相复推传序文则今夏时也臣等闻学褊陋不能明陛下躬圣发愤昭配天地臣愚以为三统之制後圣复前圣者二代在前也今二代之统絶而不序矣唯陛下发圣德宣考天地四时之极则顺陰阳以定大明之制为万世则於是乃诏御史曰乃者有司言历未定广延宣问以考星度未能讎也盖闻古者黄帝合而不死名察发斂定清浊起五部建气物分数然则上矣书缺乐弛朕甚难之依违以惟未能修明其以七年为元年【律历志】

宣帝神爵元年诏曰朕承宗庙战战栗栗惟万事统未烛厥理乃元康四年嘉谷元稷降于郡国神爵仍集金芝九茎产於涵德殿铜池中九真献奇兽南郡获白鹿威凤为宝朕之不明震於珍物飭躬齐精祈为百姓东济大河天气清静神鱼舞河幸万岁宫神爵翔集朕之不德惧不能任其以五年为神爵元年【本纪】

元帝竟宁元年春正月匈奴虔韩邪单于来朝诏曰匈奴郅支单于背叛礼义既伏其辜虔韩邪单于不忘恩德乡慕礼义复修朝贺之礼愿保塞传之无穷边垂长无兵革之事其改元为竟宁【本纪】

成帝河平元年春三月诏曰河决东郡流漂二州校尉王延世堤塞辄平其改元为河平【本纪】

河平四年火生石中改元为阳朔【纪】

哀帝建平二年待诏夏贺良等言赤精子之?汉家历运中衰当再受命宜改元易号诏曰汉兴二百载历数开元皇天降非材之佑汉国再获受命之符朕之不德曷敢不通夫基事之元命必与天下自新其大赦天下以建平二年为太初元年号曰陈圣刘大平皇帝漏刻以百二十为度八月诏曰待诏夏贺良等建言改元易号增益漏刻可以永安国家朕过听贺良等言冀为海内获福卒亡嘉应皆违经背古不合时宜六月甲子制书非赦令也皆蠲除之贺良等反道惑衆下有司皆伏辜【本纪】

西汉会要卷二十七

卷二十八

钦定四库全书

西汉会要卷二十八

宋 徐天麟 撰

运历下

天文

汉元年十月五星聚东井

三年秋太白出西方有光几中乍北乍南过期乃入辰星出四孟

七年月晕围参毕七重

十二年春荧惑守心

孝惠二年天开东北广十余丈长二十余丈

孝文後二年正月壬寅天棓夕出西南其四月乙巳水木火三合于东井八月天狗下梁墜其十一月戊戌土水合于危其七月火东行行毕阳环毕东北出而西逆行至昴即南乃东行

孝景元年正月癸酉金水合于婺女其七月乙丑金木水三合於张其二年七月丙子火与水晨出东方因守斗其十二月水火合於斗是岁彗星出西南七月天狗下

三年填星在娄几入还居奎

四年七月癸未火入东井行陰又以九月己未入輿鬼戊寅出

中元年填星当在觜觿参去东井其三年正月丁亥金木合为觜觿其三月丁酉彗星夜见西北色白长丈在觜觿旦去益小十五日不见其五月甲午金木俱在东井戊金去木留守之二十日其六月壬戌蓬星见西南在房南去房可二丈大如二斗器色白癸亥在心东北可长丈所甲子在尾北可六丈丁卯在箕北近汉稍小旦去时大如桃壬申去凡十日

中三年十一月庚午夕金火合於虚相去一寸

四年四月丙申金木合於东井其五年四月乙巳水火合於参

後元年五月壬午火金合於輿鬼之东北不至柳出輿鬼北可五寸

孝武建元三年三月有星孛于注张历太微干紫宫至於天汉

三年四月有星孛於天纪至织女

六年荧惑守輿鬼

元光元年六月客星见于房

元光中天星尽?

元鼎五年太白入于天苑

元鼎中荧惑守南斗

元封中星孛于河戍

太初中星孛于招摇

孝昭始元中蓬星出西方天市东门行过河鼓入营室中後太白出西方下行一舍复上行二舍而下去後太白出东方入咸池东下入东井後太白入太微西藩第一星北出东藩第一星北东下去後太白入昴後荧惑出东方守太白後流星下燕万载宫极东去

元凤四年九月客星在紫宫中斗枢极间

五年四月烛星见奎娄间

元平元年正月庚子日出时有黑云状如焱风乱鬣转出西北东南行转而西有顷亡

二月甲申晨有大星如月有衆星随而西行乙酉牂云如狗赤色长尾三枚夹汉西行

三月丙戌流星出翼轸东北干太微入紫宫始出小旦入大有光入有顷声如雷三鸣止

孝宣本始元年四月壬戌甲夜辰星与参出西方其二年七月辛亥夕辰星与翼出皆为蚤其後荧惑守房之钩钤

四年七月甲辰辰星在翼月犯之是日荧惑入舆鬼天质

地节元年正月戊午乙夜月食荧惑荧惑在角亢其六月戊戌甲夜客星又居左右角间东南指长可二尺色白其丙寅又有客星见贯索东北南行至七月癸酉夜入天市芒炎东南指其色白

黄龙元年三月客星居王梁东北可九尺长丈余西指出阁道间至紫宫

元帝元初元年四月客星大如瓜色青白在南斗第二星东可四尺

二年五月客星见昴分居卷舌东可五尺青白色炎长三寸

五年四月彗星出西北赤黄色长八尺所後数日长丈余东北指在参分

孝成建始元年九月戊子有流星出文昌色白光烛地长可四丈大一围动摇如龙蛇形有顷长可五六丈大四围所拙折委曲贯紫宫西在斗西北子亥间後拙如环北方不合留一刻所

四年七月荧惑隲岁星居其东北半寸所如连李时岁星在关星西四尺所荧惑初从毕口大星东东北住数日至往疾去迟

四年十一月乙卯月食填星星不见时在舆鬼西北八九尺所

河平二年十月下旬填星在东井轩辕南端大星尺余岁星在其西北尺所荧惑在其西北二尺所皆从西方来填星贯舆鬼先到岁星次荧惑亦贯舆鬼十一月上旬岁星荧惑西去填星皆西北逆行

阳朔元年七月壬子月犯心星

四年闰月庚午飞星大如缶出西南入斗下

永始元年二月癸未夜东方有赤色大三四围长二三丈索索如树南方有大四五围下行十余丈皆不至地灭

元延元年四月丁酉日餗时天喔晏殷殷如雷声有流星头大如缶长十余丈皎然赤白色从日下东南去四面或大如盂或如鷄子燿燿如雨下至昏止

绥和元年正月辛未流星从东南入北斗长数十丈二刻所息

二年春荧惑守心

哀帝建平元年正月丁未日出时有着天白气广如一匹布长十余丈西南行驩如雷一刻而止名曰天狗十二月白气出西南从地上至天出参下贯天厠广如一匹布长十余丈十余日去

二年二月彗星出牵牛七十余日

元壽元年十一月岁星入太微逆行干右执法【并天文志】

权量

张仓定章程【高纪如淳曰章历数之章术也程者权衡丈尺斗斛之平法也】

一曰备数二曰和声三曰审度四曰嘉量五曰权衡数者一十百千万也所以算数事物顺性命之理也夫推历生律制器规圆矩方权重衡平准?嘉量探颐索隐鈎深致远莫不用焉度长短者不失毫厘量多少者不失圭撮权轻重者不失黍粃其法在算术职在太史羲和掌之

声者宫商角徵羽也职在大乐太常掌之

度者分寸尺丈引也所以度长短也本起黄钟之长以子谷秬黍中者一黍之广度之九十分黄钟之长一为一分十分为寸十寸为尺十尺为丈十丈为引而五度审矣其法用铜高一寸广二寸长一丈而分寸尺丈存焉用竹为引高一分广六分长十丈其法方矩高广之数陰阳之象也分者自三微而成着可分别也寸付也尺者莧也丈者张也引者信也夫度者别於分付於寸莧於尺张於丈信於引引者信天下也职在内官廷尉掌之

量者龠合升斗斛所以量多少也本起於黄钟之龠用度数审其容以子谷秬黍中者千有二百实其龠以井水准其槩十龠为合十合为升十升为斗十斗为斛而五量嘉矣其法用铜方尺而圆其外旁有庌焉其上为斛其下为斗左耳为升右耳为合龠其状似爵以縻爵禄上三下二参天两地圆而函方左一右二陰阳之象也其圆象?其重二钧备气物之数合万有一千五百二十声中黄钟始於黄钟而反覆焉君制器之象也龠者黄钟律之实也跃微动气而生物也合者合龠之量也升者登合之量也斗者聚升之量也斛者角斗平多少之量也夫量者跃於龠合於合登於升聚於斗角於斛职在大仓大司农掌之

衡权者衡平也权重也衡所以任权而均物平轻重也其道如底以见准之正?之直左旋见规右折见矩其在天也佐助旋玑斟酌建指以齐七政故曰玉衡论语曰立则见其参於前也在车则见其倚於衡也又曰齐之以礼此衡在前居南方之义也权者铢两斤钧石也所以称物平施知轻重也本起於黄钟之重一龠容千二百黍重十二铢两之为两二十四铢为两十六两为斤三十斤为钧四钧为石付为十八易十有八变之象也五权之制以义立之以物钧之其余小大之差以轻重为宜圆而环之令之肉倍好者周旋无端终而复始无穷已也铢者物繇忽微始至於成着可殊异也两者两黄钟律之重也二十四铢而成两者二十四气之象也

斤者明也三百八十四铢易二篇之爻陰阳变动之象也十六两成斤者四时乘四方之象也钧者均也阳施其气陰化其物皆得其成就平均也权与物均重万一千五百二十铢当万物之象也四百八十两者六旬行八节之象也三十斤成钧者一月之象也石者大也权之大者也始於铢两於两明於斤均於钧終於石物终石大也四钧为石者四时之象也重百二十斤者十二月之象也终于十二辰而复于子黄钟之象也千九百二十两者陰阳之数也三百八十四爻五行之象也四万六千八十铢者万一千五百二十物历四时之象也而岁功成就五权谨矣权与物钧而生衡衡运生规规圓生矩矩方生??直生准准正则平衡而钧权矣是为五则规者所以规圓器械令得其类也矩者所以矩方器械令不失其形也规矩相须陰阳位序圓方乃成准者所以揆平取正也?者上下端直经纬四通也准?连体衡权合德百工繇焉以定法式

凡律度量衡用铜者名自名也所以同天下齐风俗也铜为物之至精不为燥湿寒暑变其节不为风雨暴露改其形介然有常有似於士君子之行是以用铜也用竹为引者事之宜也【并律历志】

时令

文帝元年诏曰方春和时草木羣生之物皆有以自乐而吾百姓鰥寡孤独穷困之人或阡於死亡而莫之省忧为民父母将如何其议所以振贷之【本纪】

宣帝时魏相表采易陰阳及月令明堂奏之臣闻易曰天地以顺动故日月不过四时不忒圣王以顺动故刑罚清而民服天地变化必繇陰阳陰阳之分以日为纪日冬至则八风之序立万物之性成各有常职不得相干东方之神大昊乘震执规司春南方之神炎帝乘离执衡司夏西方之神少昊乘兑执矩司秋北方之神颛帝乘坎执权司冬中央之神黄帝乘坤艮执?司下土兹五帝所司各有时也东方之卦不可以治西方南方之卦不可以治北方春兴兑治则饥秋兴震治则华冬兴离治则泄夏兴坎治则霍明王谨於尊天重於养人故立羲和之官以乘四时节授民事君动静以道奉顺陰阳则日月光明风雨时节寒暑调和三者得叙则灾害不生五谷熟丝麻遂中木茂鸟兽蕃民不夭疾衣食有余若是则君尊民说上下亡怨政教不违礼逊可兴夫风雨不时则伤农桑农桑伤则民饥寒饥寒在身则亡廉耻寇贼奸宄所繇生也臣愚以为陰阳者王事之本羣生之命自古贤圣未有不繇者也天子之义必纯取法天地而观于先圣高祖所述书天子所服第八曰大谒者臣章受诏长乐宫曰令羣臣议天子所服以安治天下相国臣何御史大夫臣昌谨与将军臣陵太子太傅臣通等议春夏秋冬天子所服当法天地之数中得人和故自天子王侯有土之君下及兆民能法天地顺四时以治国家身亡祸殃年壽永究是奉宗庙安天下之大礼也臣请法之中谒者赵尧举春李舜举夏儿汤举秋贡禹举冬四人各职一时大谒者襄章奏制曰可孝文皇帝时以二月施恩惠於天下赐孝弟力田及罢军卒祠死事者颇非时节御史大夫晁错时为太子家令言其状臣相伏念陛下恩泽甚厚然而灾气未息窃恐诏令有未合当时者也愿陛选明经通知陰阳者四人各主一时时至明言所职以和陰阳天下幸甚【相传】

元康三年六月诏三辅毋得以春夏摘巢探卵弹射飞鸟具为令【纪】

立春行冤狱使者出【张敞传】

元帝初元三年诏百官勉之母犯四时之禁【本纪】

永光三年十一月诏曰乃者己丑地动中冬两水大雾盗贼并起吏何不以时禁各悉意对【本纪师古曰时禁谓月令所当禁断者也】

甘延寿陈汤上疏斩郅支头及名王以下宜县头藁街事下有司丞相匡衡御史大夫繁延寿以为月令春掩骼埋胔之时宜勿县车骑将军许嘉右将军王商以为夹谷之会优施笑君孔子诛之方盛夏首足异门而出宜县十日乃埋之有诏将军议是【陈汤传】

建昭五年诏曰方春农桑兴百姓戮力自尽之时也故是月劳农劝民无使後时今不良之吏覆案小罪追召证案兴不急之事以妨百姓使失一时之作亡终岁之功公卿其明察申敕之【纪】

成帝阳朔二年春寒诏曰昔在帝尧立羲和之官命以四时之事令不失其序故书云黎民於变时雍明以阴阳之本也今公卿大夫或不信阴阳薄而小之所奏请多违时政传以不知周行天下而欲望阴阳和调岂不谬哉其务顺四时月令【纪】

鸿嘉元年二月诏曰方春生长时临遣谏大夫理等举三辅三河弘农冤狱【纪】

哀帝即位李寻对曰辰星主四时四时失序则辰星作异令出於岁首之孟天所以譴告陛下也加以号令不顺四时间者春三月治大狱时贼阴立逆恐岁小收季夏举兵法时寒气应恐後有霜雹之灾秋月行封爵其月土湿奥恐後有雷雹之变古之王者尊天地重阴阳敬四时严月令今朝廷忽於时月之令诸侍中尚书近臣宜皆令通知月令之意设羣下请事若陛下出令有谬於时者当知争之以顺时【传】

梁王立杀人遣廷尉大鸿胪杂问对曰冬月迫促贫生畏死即诈僵仆阳病傲幸得踰於须臾【师古曰冀得踰冬而减死】谨以实对时冬月尽其春大赦不治【本传】

孙宝以春月作诋欺免为庶人【本传】

王温舒为河内太守捕郡中豪猾大者至族小者乃死会春温舒顿足叹曰令冬月益展一月足吾事矣【本传师古曰立春之後不复行刑故云然】

张敞收繫舜系狱是时冬月未尽数日昼夜验治竟致其死敞使告舜曰五日京兆竟何如冬月已尽延命乎【敞传】

刘向坐铸伪黄金得踰冬减死论【本传服?曰踰冬至春行寬大而减死罪】诸葛丰以春夏繫治人在位多言其短上乃制诏御史丰前为司隶不顺四时专作苛暴其免为庶人【传】孙宝以立秋日补侯文东部督邮入见勅曰今日鷹隼始擊当顺天气取奸恶以成严霜之诛【宝传】

冬月治请獻【于定国传】

冬月传属县囚会论府上【严延年传】

平当为丞相以冬月赐爵关内侯【本传李奇曰以冬月非封侯时故且先赐爵关内侯】

孔光等请谒者召王嘉诣廷尉诏狱永信少府猛等十人以为今春月寒气错谬霖露数降宜示天下以寬和【王嘉传】

西汉会要卷二十八

卷二十九

钦定四库全书

西汉会要卷二十九

宋 徐天麟 撰

祥异上

符瑞

高祖被酒夜径泽中令一人行前行前者还报曰前有大蛇当径愿还高祖醉曰壮士行何畏乃前拔剑斩蛇蛇分为两道开行数里醉困卧後人来至蛇所有一老妪夜哭人问妪何哭妪曰人杀吾子人曰妪子何为见杀妪曰吾子白帝子也化为蛇当道今者赤帝子斩之故哭人乃以妪为不诚欲苦之妪因忽不见【纪】

秦始皇帝尝曰东南有天子气於是东游以厌当之高祖隐於芒碭山泽间吕后与人俱求常得之高祖怪问之吕后曰季所居上常有云气故往从常得季【纪】汉元年冬十月五星聚东井【纪应劭曰东井秦之分野五星所在当有圣人以义取天下】

文帝十五年黄龙见於成纪【纪】

武帝元狩元年行幸雍祠五畤获白麟作白麟之歌二年夏马生余吾水中南越献驯象能言鸟

元鼎元年得鼎汾水上

四年得宝鼎后上祠旁秋马生渥洼水中作宝鼎天马之歌

元封二年甘泉宫内中产芝九茎连叶作芝房之歌太始二年诏曰往者朕郊见上帝西登陇首获白麟以馈宗庙渥洼出天马泰山见黄金更改故名今更黄金为麟趾褭蹄以协瑞焉因?颁封诸侯王

三年行幸东海获赤雁作朱雁之歌

昭帝始元元年二月黄鹄下建章宫太液池中公卿上壽

三年凤凰集东海遣使者祠其处

宣帝本始元年凤凰集胶东千乘

四年凤凰集北海安丘淳于

地节二年四月凤凰集鲁郡羣鸟从之

元康元年诏曰乃者凤凰集泰山陈留甘露降未央宫朕未能章先帝休烈协宁百姓承天顺地调序四时获蒙嘉瑞赐兹祉福夙夜兢兢靡有骄色内省匪解永惟罔极书不云乎凤凰来仪庶尹克谐其赦天下赐勤事吏中二千石以下至六百石爵自中郎吏至五大夫佐史以上二级民一级女子百户牛酒加赐鰥寡孤独三老孝弟力田帛所振贷勿收

三年春以神爵数集泰山赐诸侯王丞相将军列侯二千石金郎从官帛各有差赐天下吏爵二级民一级女子百户牛酒鰥寡孤独高年帛

六月诏曰前年夏神爵集雍今春五色鸟以万数飞过属县翱翔而舞欲集未下其令三辅毋得以春夏撻巢探卵弹射飞鸟具为令

四年三月诏曰乃者神爵五采以万数集长乐未央北宫高寝甘泉泰畤殿中及上林苑朕之不逮寡于德厚屡获嘉祥非朕之任其赐天下吏爵二级民一级女子百户牛酒加赐三老孝弟力田帛人二匹鰥寡孤独各一匹

神爵元年诏曰朕承宗庙战战栗栗惟万事统未烛厥理乃元康四年嘉谷元稷降于郡国神爵仍集金芝九茎产于涵德殿铜池中九真献奇兽南郡获白鹿威凤为宝朕之不明震于珍物飭躬斋精析为百姓东济大河天气清静神鱼舞河幸万岁宫神爵翔集朕之不德惧不能任其以五年为神爵元年赐天下勤事吏爵二级民一级女子百户牛酒鰥寡孤独高年帛所振贷物勿收行所过毋出田租

二年二月诏曰乃者正月乙丑凤凰甘露降集京师羣鸟从以万数朕之不德屡获天福祇事不怠其赦天下四年二月诏曰乃者凤凰甘露降集京师嘉瑞并见修兴太乙五帝后土之祠祈为百姓蒙祉福鸾凤万举蜚览翱翔集止于旁斋戒之暮神光显着荐鬯之夕神光交错或降于天或登于地或从四方来集于坛上帝嘉向海内承福其赦天下赐民爵一级女子百户牛酒鰥寡孤独高年帛

冬十月凤凰十一集杜陵十二月凤凰集上林

五凤三年诏曰朕飭躬斋戒郊上帝祠后土神光并见或兴於谷烛耀斋宫十有余刻甘露降神爵集已诏有司告祠上帝宗庙三月辛丑鸾凤又集长乐宫东关中木上飞下止地文章五色留十余刻吏民并观朕之不敏惧不能任屡蒙嘉瑞获兹祉福书不云乎虽休勿休祇事不怠公卿大夫其勉焉减天下口钱赦殊死以下赐民爵一级女子百户牛酒大酺五日加赐鰥

寡孤独高年帛

甘露元年黄龙见新丰

三年诏曰乃者凤凰甘露降集黄龙登兴醴泉滂流枯槁荣茂神光并见咸受祺祥其赦天下减民算三十赐诸侯王丞相将军列侯中二千石金钱各有差赐民爵一级女子百户牛酒鰥寡孤独高年帛

三年诏曰乃者凤凰集新蔡羣鸟四面行列皆乡凤凰立以万数其赐汝南太守帛百匹新蔡长吏三老孝弟力田鰥寡孤独各有差赐民爵二级毋出今年租成帝鸿嘉元年冬黄龙见真定

元延四年甘露降京师赐长安民牛酒

平帝元始元年越裳氏重译献白雉一黑雉二

二年春黄支国献犀牛【并纪】

日食

高帝三年十月甲戌晦日有食之在斗二十度

十一月癸卯晦日有食之在虚三度

九年六月乙未晦日有食之既在张十三度

惠帝七年正月辛丑朔日有食之在危十二度

五月丁卯先晦一日日有食之几尽在七星

高后二年六月丙戌晦日有食之

七年正月己丑晦日有食之既在营室九度

文帝二年十一月癸卯晦日有食之在婺女一度三年十月丁酉晦日有食之在斗二十二度

十一月丁卯晦日有食之在虚八度

後四年四月丙辰晦日有食之在东井十三度

七年正月辛未朔日有食之

景帝三年二月壬午晦日有食之在胃二度

七年十一月庚寅晦日有食之在虚九度

中元年十二月甲寅晦日有食之

二年九月甲戌晦日有食之

三年九月戊戌晦日有食之几尽在尾九度

元年七月辛亥晦日有食之在轸七度

後元年七月乙巳先晦一日日有食之在翼十七度武帝建元二年二月丙戌朔日有食之在奎十四度二年九月丙子晦日有食之在尾二度

五年正月己巳朔日有食之

元光元年二月丙辰晦日有食之

七月癸未先晦一日日有食之在翼八度

元朔二年二月乙巳晦日有食之在胃二度

六年十一月癸丑晦日有食之

元狩元年五月乙巳晦日有食之在柳六度

元鼎五年四月丁丑晦日有食之在东井三十三度元封四年六月己酉朔日有食之

大始元年正月乙巳晦日有食之

四年十月甲寅晦日有食之在斗十九度

征和四年八月辛酉晦日有食之不尽如鉤在亢二度昭帝始元三年十一月壬辰朔日有食之在斗九度元凤元年七月己亥晦日有食之几尽在张十二度宣帝地节元年十二月癸亥晦日有食之在营室十五度

元凤元年十二月乙酉朔日有食之在婺女十度四年四月辛丑朔日有食之在毕十九度

元帝永光二年三月壬戌朔日有食之在娄八度四年六月戊寅晦日有食之在张七度

建昭五年六月壬申晦日有食之不尽如鉤

成帝建始三年十二月戊申朔日有食之在婺女九度河平元年四月己亥晦日有食之不尽如鉤在东井六度

三年八月乙卯晦日有食之在房

四年三月癸丑朔日有食之在昴

阳朔元年二月丁未晦日有食之在胃

永始元年九月丁巳晦日有食之

二年二月乙酉晦日有食之

三年正月己卯晦日有食之

四年七月辛未晦日有食之

元延元年正月己亥朔日有食之

哀帝元壽元年正月辛丑朔日有食之不尽如鉤在营室十度

二年三月壬辰晦日有食之

平帝元始元年五月丁巳朔日有食之在东井

二年九月戊申晦日有食之既

凡汉着纪十二世二百一十二年日食五十三朔十四晦三十六先晦一日三【并五行志】

日月变异

武帝建元二年四月戊申有如日夜出【纪】

元帝永光元年四月日色青白亡景正中时有景亡光是夏寒至九月乃有光

成帝建始元年八月戊午晨漏未尽三刻有两月重见河平元年正月壬寅朔日月俱在营室时日出赤二月癸未日朝赤且入又赤夜月赤甲申日出赤如血亡光漏上四刻半乃颇有光烛地赤黄食後乃复三月乙未日出黄有黑气大如钱居日中央【并五行志】

星孛【天文志所载已见天文类五行志所载别见于此】

高帝三年七月有星孛于大角旬余乃入

文帝後七年九月有星孛于西方其本直尾箕末指虚危长丈余及天汉十六日不见

武帝建元六年六月有星孛于北方

八月长星出于东方长终天三十日去是为蚩尤旗见则王者征伐四方

元狩四年四月长星又出西北

元封元年五月有星孛于东井又孛于三台

宣帝地节元年正月有星孛于西方去太白二丈所成帝建始元年正月有星孛于营室青白色长六七丈广尺余

元延元年七月辛未星孛于东井践五诸侯出河戎北率行车袁大微後日六度有余晨出东方十三日夕见西方犯次妃长秋斗填螽炎再贯紫宫中大火当後達天河除於妃后之域南逝度犯大角掇提至天市而按节徐行炎入市中旬而後西去五十六日与苍龙俱伏【并五行志】

星陨

成帝永始二年二月癸未夜过中星陨如雨长一二丈绎绎未至地灭至鷄鸣止【五行志】

亡冰

武帝元狩六年冬亡冰

昭帝始元二年冬亡冰【并五行志纪作六年】

雪

文帝四年六月天雨雪

景帝中六年三月雨雪

武帝元狩元年十二月大雨雪民多冻死

元鼎二年三月雪平地厚五尺

三年三月水冰四月雨雪

元帝建昭二年十一月齐楚地大雪深五尺

四年三月雨雪燕多死【并五行志】

成帝建始四年夏四月雨雪【本纪】

阳朔四年四月雨雪燕雀死【五行志】

霜雹

武帝元光四年四月陨霜杀草木

元封三年十二月雷雨雹大如马头

宣帝地节四年五月山阳济陰雨雹如鷄子深二尺五寸杀二十人蜚鸟皆死

元帝永光元年三月陨霜杀桑九月二日陨霜杀稼成帝河平二年四月楚国雨雹大如斧蜚鸟死【并五行志】

总天变

惠帝二年天雨血於宜阳一顷所【赤眚】

武帝建元四年有风赤如血【纪】

元光五年七月大风拔木【纪】

天汉元年三月天雨白毛三月八月天雨白鼈【毛之强屈曲者】成帝建始元年四月辛丑夜西北有如火光壬寅晨大风从西北起云气赤黄四塞天下终日夜着地者黄土尘也【志】

】

十二月大风拔甘泉時中大木十韦以上【本纪韦与围同】哀帝建平四年山阳湖陵雨血广三尺长五尺大者如钱小者如麻子

平帝元始四年冬大风吹长安城门东屋瓦且尽【并五行志】

西汉会要卷二十九

<史部,政书类,通制之属,西汉会要>

卷三十

钦定四库全书

西汉会要卷三十

宋 徐天麟 撰

祥异下

地震

惠帝二年正月地震陇西厌四百余家【厌一甲反下同】

高后二年正月武都山崩地震至八月乃止

武帝征和二年八月癸亥地震厌杀人

宣帝本始四年四月壬寅地震河南以东四十九郡北海琅邪坏祖宗庙城郭杀六千余人

元帝永先三年冬地震【并五行志】

成帝建始三年十二月戊申其夜未央殿中地震【本纪】河平三年二月犍为地震积二十一日百二十四动绥和二年九月丙辰地震自京师至北边郡国三十余坏城廓凡杀四百一十五人【并五行志】

山崩

高后二年正月武都山崩杀七百六十人

文帝元年四月齐楚地山二十九所同日俱发大水溃出【并五行志】

成帝建始三年越嶲山崩【本纪】

河平三年二月丙戌犍为柏江山崩损江山崩皆痛江水江水逆流坏城杀十三人

元延三年正月丙寅蜀郡岷山崩痛江江水逆流三日乃通【并五行志】

石鸣

成帝鸿嘉三年乙亥天水冀南山石鸣声隆隆如雷有顷止闻平襄二百四十里埤鸡皆鸣石长丈三尺广厚略等旁着岸脇去地二百余丈民俗名曰石鼓石鼓鸣有兵【五行志】

石立

孝昭元凤三年正月泰山莱芜山南匈匈有数千人声民视之有大石自立高丈五尺大四十八围入地深八尺三石为足石立处有白鸟数千集其旁【五行志】

陨石

惠帝三年陨石絳诸一

武帝征和四年二月丁酉陨石雍二天晏亡云声闻四百里

元帝建昭元年正月戊辰陨石梁国六

成帝建始四年正月癸卯陨石橐四肥累一

阳朔三年二月壬戌陨石白马八

鸿嘉二年五月癸未陨石杜衍三

元延四年三月陨石都关二

哀帝建平元年正月丁未陨石北地十其九月甲辰陨石虞二

平帝元始二年六月陨石钜鹿二

自惠尽平陨石凡十一皆有光耀雷声成哀尤屡【并五行志】

火灾【铁飞附】

高后元年五月丙申赵丛台灾

惠帝四年十月乙亥未央宫凌室灾丙子织室灾文帝七年六月癸酉未央宫东阙罌罌灾

景帝中五年八月己酉未央宫东阙灾

武帝建元六年六月丁酉辽东高庙灾四月壬子高园便殿火

太初元年十一月乙酉未央宫栢梁台灾

昭帝元凤元年燕城南门灾

四年五月丁丑孝文庙正殿灾

宣帝甘露元年四月丙申中山太上皇庙灾甲辰孝文庙灾

元帝初元二年四月己未孝武园白鹤馆灾

永光四年六月甲戌孝宣杜陵园东阙南方灾

成帝建始元年正月乙丑皇考庙灾

鸿嘉三年八月乙卯孝景庙北阙灾

永始元年正月癸丑大官凌室灾戊午戾后园南阙灾四年四月癸未长乐宫临华殿及未央宫东司马门灾六月甲午孝文霸陵园东阙南方灾

哀帝建平三年正月癸卯桂宫鸿宁殿灾

平帝元始五年七月己亥高皇帝原庙殿门灾尽武帝征和二年春涿郡铁官铸铁铁销皆飞上去成帝河平二年正月沛郡铁官铸铁铁不下隆隆如雷声又如鼓音二十三人惊走音止还视地地陷数尺鑪分为十一鑪中销铁散如流星皆上去【并五行志】

旱

惠帝五年夏大旱江河水少谿谷絕

文帝三年秋天下旱 後六年春天下大旱

景帝中三年秋大旱 武帝元光六年夏大旱

元朔五年春大旱 元狩三年夏大旱

天汉元年夏大旱 三年夏大旱

征和元年夏大旱 昭帝始元六年大旱

宣帝本始三年夏大旱东西数千里

神爵元年秋大旱 成帝永始三年四月夏大旱【并五行志】蝗螟

景帝中三年秋蝗 武帝元光五年秋螟

六年夏蝗 元鼎五年秋蝗

元封六年秋蝗

大初元年夏蝗从东方飞来至炖煌

三年秋复蝗 征和三年秋蝗

四年夏蝗 平帝元始二年秋蝗徧天下【并五行志】

人妖

哀帝建平中豫章有男子化为女子嫁为人妇生一子建平四年四月山阳方与女子田无啬生子先未生二月儿啼腹中及生不举葬之陌上三日人过闻啼声母掘收养

平帝元始元年二月朔方广牧女子赵春病死斂棺积六日出在棺外自言见夫死父曰二十七不当死六月长安女子有生儿两头异颈面相乡四臂共胷俱前乡尻上有目长二寸所

景帝二年九月胶东下密人年七十余生角角有毛成帝建始三年十月丁未京师相惊言大水至渭水虐上小女陈特弓年九岁走入横城门入未央宫尚方掖门殿门卫户者莫见至句?禁中而觉得

绥和二年八月庚申郑通里男子王褒衣绛衣小冠带劔入北司马门殿东门上前殿入非常室中解帷组结佩之招前殿署长业等曰天帝令我居此业等收问褒故公车大谁卒病狂易不自知入宫状下狱死哀帝建平四年正月民惊走持橐或擲一枚传相付与曰行诏筹道中相过逢多至千数或被髮徒跣或夜折关或踰墙入或乘车骑奔驰以置驿传行经历郡国二十六至京师其夏京师郡国民聚会厓巷阡陌设祭张博具歌舞祠西王母又传书曰母告百姓佩此书者不死不信我言视门枢下当有白髮至秋止

鸟兽之妖【鱼蛙附】

宣帝黄龙元年未央殿辂轸中雌鸡化为雄毛衣变化而不鸣不将无距【鸡祸】

元帝初元中丞相府史家雌鸡伏子渐化为雄冠距鸣将

永光中有献雄鸡生角者

景帝三年十一月有白颈乌与黑乌羣鬪楚国吕县白颈不胜堕泗水中死者数千【白黑祥】

昭帝元凤元年有乌与鹄鬪燕王宫中池上乌堕池死【黑祥】

昭帝时有鵕鹖或曰秃鷩集昌邑王殿下王使人射杀之【青祥】

成帝河平元年二月庚子泰山山桑有?焚其巢巢?尽堕地中有三?雏烧死【黑祥】

鸿嘉二年三月博士行大射礼有飞雉集于庭历阶登堂而鸣後雉又集太常宗正丞相御史大夫大司马车骑将军之府又集未央宫承明殿屋上

绥和二年三月天水平襄有燕生爵哺食至大俱飞去景帝中六年梁孝王田北山有献牛足上出背上昭帝元凤元年燕王宫永巷中豕出圜坏都竈衔其脯六七枚置殿前

昭帝元凤元年九月燕有黄鼠衔其尾舞王宫端门中往视之鼠舞如故王使吏以酒脯祠鼠舞不休一日一夜死【黄祥】

成帝建始四年九月长安城南有鼠衔黄蒿柏叶上民豕柏及榆木上为巢桐柏尤多巢中无子皆有乾鼠矢数十

昭帝时昌邑王贺闻人声曰熊视而见大熊左右莫见高后八年三月祓霸上过枳道见物如苍狗擿高后掖忽而不见【犬祸】

文帝後五年齐雍城门外有狗生角

景帝三年二月邯鄲狗与彘交

成帝河平元年长安男子石良刘音相与同居有如人状在其室中擊之为狗走去後有数人被甲持兵弩至良家良等格擊或死或伤皆狗也自二月至六月乃止鸿嘉中狗与彘交

成帝绥和二年二月大厖马生角在左耳前围长各二寸

哀帝建平二年定襄牡马生驹三足随羣饮食

惠帝二年正月癸酉旦有两龙见於兰陵廷东里温陵井中至乙亥夜去

武帝元鼎五年蛙与虾蟆羣鬪

大始四年七月赵有蛇从郭外入与邑中蛇鬪孝文庙下邑中蛇死【蛇孽】

成帝鸿嘉四年秋雨鱼于信都长五寸以下

永始元年春北海出大鱼长六丈高一丈四枚

哀帝建平二年东莱平度出大鱼长八丈高丈一尺七枚皆死【并五行志】

草木之妖

惠帝五年十月桃李华枣实【五行志】

文帝六年冬十月桃李华【本纪】

昭帝时上林苑中大柳断仆地一朝起立生枝叶有虫食其叶成文字曰公孙病已立又昌邑王国社有枯木复生枝叶眭孟以为当有故废之家公孙氏复民间受命为天子者

元帝初元四年皇后曾祖父济南东平陵王伯墓门梓柱辛生枝叶上出屋

建昭五年元州刺史浩赏禁民私所自立社山阳橐茅乡社有大槐吏伐断之其夜槐复立其故处【并五行志】成帝建始四年秋桃李实【本纪】

永始元年二月河南街邮樗木生支如人头眉目须皆具亡髮耳

哀帝建平二年十月汝南西平遂阳乡柱仆地生支如人形身青黄色面白头有髭髮稍长大凡长六寸一分建平三年零陵有木僵地围丈六尺长十丈七尺民断其本长九尺余皆枯三月卒自立故处

元帝永光三年天雨草而叶相胶结大如弹

平帝元始三年正月天雨草状如永光时【并五行志】

杂变异

景帝三年十二月吴二城门自倾大船自覆

宣帝时大司马霍禹所居第门自坏

成帝元延元年正月长安章城门牡自亡函谷关次门牡亦自亡

哀帝时大司马董贤第门自坏

哀帝建平二年四月乙亥朔御史大夫朱博为丞相少府赵元为御史大夫临延登受策有大声如钟鸣殿中郎吏陛者皆闻焉【并五行志】

元壽元年九月孝元庙殿门铜龟铺首鸣【纪】

平帝元始元年二月乙未义陵寝神衣在柙中丙申旦衣在外床上寝令以闻用太牢祠【纪】

占验

汉兴承秦灭学之後景武之世董仲舒治公羊春秋始推陰阳为儒者宗宣元之後刘向治谷梁春秋数其祸福传以洪范与仲舒错至向子歆治左氏传其春秋意亦已乖矣言五行传又颇不同是以?仲舒别向歆传载眭孟夏侯胜京房谷永李寻之徒所陈行事讫於王莽举十二世以传春秋着于篇【文具五行志此不详载】

汉兴推陰阳言灾异者孝武时有董仲舒夏侯始昌昭宣则眭孟夏侯胜元成则京房翼奉刘向谷永哀平则李寻田终术此其纳说时君着明者也察其所言仿佛一端假经设谊依托象类或不免乎亿则屡中仲舒下吏夏侯囚执眭孟诛戮李寻流放此学者之大戒京房区区不量浅深危言刺讥结怨强臣罪辜不旋踵亦不密以失身悲夫【李?赞】

金度玉衡汉五星客流出入八篇【艺文志下同】

汉五星彗客行事占验八卷

汉日旁气行事占验三卷

汉流星行事占验八卷

汉日旁气行事占验十三卷

汉日食月晕杂变行事占验十三卷

西汉会要卷三十

卷三十一

钦定四库全书

西汉会要卷三十一

宋 徐天麟 撰

职官一

上公【四辅师友附】

太师【臣天麟按沈约宋书云汉制保傅在三公上号曰上公】

太师古官平帝元始元年初置位在太傅上【百官表下同】

太傅

太傅古官高后元年初置金印紫绶後省八年复置後省哀帝元壽二年复置位在三公上

太保

太保古官平帝元始元年初置位次太傅

四辅

平帝元始元年授四辅之职【王莽传张晏曰莽为太傅孔光为太师王舜为太保甄丰为少傅是为四辅】

师友

成帝时张禹以特进为天子师【本传】

平帝即位年幼选置师友大司徒孔光以明经高行为孔氏师京兆尹金钦以家世忠孝为金氏友【金日磾传】

三公

丞相

相国丞相皆秦官金印紫绶掌丞天子助理万几秦有左右高帝即位置一丞相十一年更名相国緑绶【按表下卷九年萧何已迁相国此云十一年当考】孝惠高后置左右丞相文帝二年复置一丞相有两长史秩千石哀帝元壽二年更名大司徒武帝元狩五年初置司直秩比三千石掌佐丞相举不法【臣天麟按司马迁将相表云孝景元年置司徒官本表不载姑俟详考】

丞相徵事【任官以丞相徵事捕斩反者汉仪注徵事比六百石】

丞相史【尹咸孙禁汉旧仪云秩四百石】

丞相少史【王壽王禁汉仪注云武帝又置丞相少史秩四百石】东曹掾【严延平父为东曹掾云敞为大司徒掾】

西曹掾【萧由为丞相西曹掾丙吉传西曹主吏】

集曹掾【匡衡补陆赐集曹掾】

奏曹【匡衡传主陆赐故居奏曹】

议曹【李寻见翟方进传】

主簿【匡衡传主簿陆赐】

大车属【郑崇为丞相大车属】

丞相属【地理志朱贛】

侍曹【陈遵传】

从史【匡衡遣从史之僮取田租】

掾史【翟方进传丞相宣帝戒掾史谨事臣天麟按掾史者属官之總称也汉旧注东西曹掾比四百石余掾比三百石属比二百石正曰掾副曰属方进传又云阖府三百余人】

宰士【翟方进传师古曰谓丞相掾史为宰士者言其宰相之属官而位为士臣】

计相【张苍为计相一月更以列侯为主计四岁萧何为相令苍以列侯居相府领郡国上计者】太尉

太尉秦官金印紫绶掌武事【表袁盎传云本兵柄】

高帝二年太尉长安侯卢绾五年罢太尉官十一年周勃为太尉後官省【司马迁将相表】

惠帝六年置太尉官以周勃为太尉【本传臣天麟按汉书及史记世家皆云六年而功臣表云高后四年为太尉又将相表云高后四年置太尉官绛侯为太尉世家及两表其文自相抵牾今止从世家】

孝文三年罢太尉官属丞相【本纪】

孝景三年置太尉官【司马迁将相表及汉书周亚夫传】

七年罢太尉官【本纪】

孝武建元元年置太尉二年罢太尉官【史记将相表】

元狩四年初置大司马以冠将军之号【师古曰冠者加於其上共为一官也】宣帝地节三年置大司马不冠将军亦无印绶官属成帝绥和元年初赐大司马金印紫绶置官属秩比丞相去将军哀帝建平二年复去大司马印绶官属冠将军如故元寿二年复赐大司马印绶置官属去将军位在司徒上有长史秩千石【百官表】

大司马司直【平帝召金钦为大司马司直汉旧仪云武帝元狩五年初置】大尉史【沟洫志张戎汉仪注大尉史秩四百石】

功曹【大将军王凤除萧育功曹】

西曹掾【楼护传】

大司马掾【孝平本纪】

议曹史【大司马史高辟衡为议曹史】

门下史【大司马车骑将军召扬雄以为门下史】主簿【大司马商除杜邳主簿】

御史大夫

御史大夫秦官位上卿【茂陵书御史大夫秩中二千石】银印青绶掌副丞相有两丞秩千石一曰中丞在殿中兰台掌图籍秘书外督部刺史内领侍御史员十五人受公卿奏事举劾按章成帝绥和元年更名大司空金印紫绶禄比丞相置长史如中丞官职如故哀帝建平二

年复为御史大夫元壽二年复为大司空御史中丞更名御史长史侍御史有绣衣直指【服?曰指事而行无阿私也师古曰衣以绣者尊宠之也】出讨奸猾治大狱武帝所制不当置【百官表】

御史中执法【高纪晋灼曰中执法中丞也】

御史中丞从事【于定国与御史中丞从事治反者狱】

符玺御史【周昌传赵尧为符玺御史】御史治书尚符玺者有印绶【表】

治书御史【见上】

监军御史【胡建传】

御史大夫掾【何并大司空掾严延年为御史掾】

西曹掾【大司空何武除鲍宣为西曹掾】

主簿【御史大夫张忠命孙宝主簿曰西府高士俗不为主簿】

少史【萧望之使少史冠法冠为妻先引苏林曰曹史之下者】

御史属【御史大夫除谷永补属史记匡衡补御史百石属】

柱下令【高帝五年王恬启为柱下令又张苍为御史主柱下方书臣天麟按应劭官仪云侍御史即柱下史故附于此】

列卿

正卿九【刘熙释云汉置十二卿一曰太常二曰太仆三曰卫尉四曰光禄勳五曰宗正六曰执金吾七曰大司农八曰少府九曰大鸿臚十曰廷尉十一曰大长十二曰将作大匠韦昭辨云汉正卿九一曰太常二曰光禄三曰卫尉四曰太仆五曰廷尉六曰鸿臚七曰宗正八曰司农九曰少府是为九卿执金吾本故中尉掌檄巡宫外司执奸邪至武帝更执金吾为外卿不在九列大匠次金吾长秋自皇后官非天子卿员】

太常【博士】

奉常秦官掌宗庙礼仪有丞景帝中六年更名太常【师古曰太常王者旌旗也王有大事则建以行礼官主奉持之故曰奉常也後改曰太常尊大之义也】属官有太乐太祝太宰太史

太卜太医六令丞又均官都水两长丞又诸庙寝园食官令长丞有痈太宰太祝令丞【如淳曰五時在痈故特置太宰以下诸官】五時各一尉又博士及诸陵县皆属焉景帝中六年更名太祝为祠祀武帝大初元年改曰庙祀初置太卜元帝永光元年分诸陵邑属三辅王莽改太常曰秩宗【百官表】

太常掾【朱博】

太常掌故【晁错】

太史掌故【儒林传房凤】

史书令史【艺文志】

待诏【律历志待诏李信治黄帝调历】

大典星【律历志射姓】

治历【律历志邓平】

望气【李广传望气王翔】

望气佐【郊祀志武帝遣望气佐候蓬莱】

高庙仆射【王莽传上哀章持金匱至高庙以付仆射】庙郎【功臣表江德坐庙郎夜失火免】

寝郎【冯参】

园郎【班采又金敞传云故事近日皆随寝为园郎】

礼官大夫【徐生以颂为礼官大夫】

曲台署长【孟喜】

写书官【武帝置写书之官当属太史故附于此】

博士

博士秦官掌通古今秩比六百石员多至数千人武帝建元五年初置五经博士宣帝黄龙元

年稍增员十二人【百官表】

杨何易 欧阳书 后苍礼

公羊春秋【以上武帝立】 施孟易 梁丘易

大小夏侯尚书 谷梁春秋 大小戴礼【以上宣帝立】 京氏易【元帝立】 尤氏春秋
古文尚书

毛诗 逸礼【以上平帝立】

博士弟子五十人【儒林传武帝置】

歌吹诸生【儒林传】

光禄勳【大夫 郎 谒者 期门 羽林 仆射】

郎中令秦官掌宫殿掖门户有丞武帝太初元年更名光禄勳【应劭曰光者明也禄者爵也勳功也】属官有大夫郎谒者皆秦官又期门羽林皆属焉【百官表】

掾【光禄勳于永举王嘉为掾】

主事【张安世为光禄勳郎醉主事白行法】

大夫

大夫掌论议有大中大夫中大夫谏大夫皆无员多至数十人武帝元狩五年初置谏大夫秩比八百石大初元年更名中大夫为光禄大夫秩比二千石大中大夫秩比千石如故【百官表】

文学光禄大夫【夏侯胜】

郎

郎掌守门户出充车骑有议郎中郎侍郎郎中皆无员多至千人议郎中郎秩比六百石侍郎比四百石郎中比三百石中郎有五官左右三将秩皆比二千石郎中有车户骑三将秩皆比千石【百官表如淳曰主车曰车郎主户卫曰户郎汉仪注郎中令主郎中左右车将主左右军郎左右户将主左右户郎也】

外郎【惠纪外郎满六岁赐爵二级苏林曰外郎散郎也】

郎署长【冯唐为郎中署长师古曰为郎中而为郎署之长袁盎传上幸上林郎署长布席引郤谨夫人坐】

车郎【艺文志车郎张丰如淳曰主车曰车郎】

輶郎【刘向】

户卫【功臣郭蒙】

骑郎将【王吸李广师古曰为骑郎之将主骑郎】

郎中骑千人【功臣表靳强】

谒者

谒者掌宾讚受事员七十人秩比六百石有仆射秩比千石【百官表】

期门

期门【服?曰与期门下以微行後遂以名官】掌执兵送从武帝建元三年初置比郎无员多至千人有仆射秩比千石平帝元始元年更名虎贲郎置中郎将秩比二千石【百官表师古曰贲与奔同言如猛兽之奔】

给事期门【史记功臣表董忠】

羽林

羽林【师古曰言其如羽之疾如林之多】掌送从次期门武帝大初元年初置名建章营骑後更名羽林骑又取从军死事之子孙养羽林官教以五兵号曰羽林孤儿羽林有令丞宣帝令中郎将骑都尉监羽林秩比二千石【百官表】

羽林黄头郎【邓通】

仆射

仆射秦官自侍中尚书博士郎皆有古者重武官有主射以督课之军屯吏骑宰永巷宫人皆有取其领事之号【百官表孟康曰皆有仆射随所领之事以为号也若军屯吏则曰军屯仆

射永巷则曰永巷仆射】

卫尉

卫尉秦官掌宫门卫屯兵【师古曰汉旧仪云卫尉寺在宫内胡广云主宫阙之门内卫士於周垣下为区庐若今之宿仗屋矣】有丞景帝初更名中大夫令後元年复为卫尉属官有公车司马卫士旅贲三令丞【师古曰汉官仪云公车司马掌殿司马门夜徼宫中天下上事及阙下凡所徵召皆總领之令秩六百石旅衆也贲与奔同言为奔走之仕也】卫士三丞又诸屯卫候司马二十二官皆属焉长乐建章甘泉卫尉皆掌其宫职略同不常置【百官表】

未央卫尉【李广】

长乐司马【律历志长乐司马可臣天麟按长乐宫四面皆有公车司马门每门各二司马此即八屯司马之一也】

卫司马【谷吉郑吉】

卫候【冯奉世】

长乐屯卫司马【冯遂】

长乐户将【尹更始】

建章监【卫青李陵】

给事建章【卫青】

公车大谁卒【五行志公车大谁卒注云大谁长令在司马殿门卫士之师也】执盾【惠纪又功臣表孔聚】

执戟【惠纪】

武士【应劭曰力士也高祖使武士缚韩信是也】

驹【惠纪师古曰本厩之馭者後又令为骑因谓驹骑也东方朔给驹侏儒】

太仆

太仆秦官掌舆马有两丞属官有大厩未央家马【师古曰家马者主供天子私用非大祀戎

事军国所须故谓之家马也】三令各五丞一尉又车府路轸骑马骏马四令丞又龙马闲驹橐泉騊駼承华五监长丞又边郡六牧师苑令【师古曰汉官仪云牧师诸苑三十六所分布北边西边分养马三十万匹】各三丞又牧橐【师古曰牧橐言牧养佗也】昆蹏【应劭曰昆蹏好马名也蹏音蹄】令丞皆属焉中太仆掌皇太后舆马不常置也武帝太初元年更名家马为橐马【橐音徒孔反应劭曰主乳马取其汁橐治之味酢可饮】初置路轸

骏马监【傅介子】

平乐观监【傅介子】

移中监【苏武师古曰移中厩名如淳曰移园之中马廄】

家车吏【齐受师古曰主汉王之家车非军国所用】

厩司御【夏侯婴为沛厩司御】

农官【食货志武帝水衡少府太仆大农各置农官】

廷尉

廷尉秦官掌刑辟有正左右监秩皆千石景帝中六年更名大理武帝建元四年复为廷尉宣帝地节三年初置左右平秩皆六百石哀帝元寿二年复为大理王莽改曰作士【百官表又宣纪地节三年初置廷尉平四人】

廷尉史【廷尉汤请博士弟子治尚书春秋补廷尉史见本传又路温舒奏曹掾补廷尉史于定国郡次曹补廷尉史】

奏献掾【廷尉汤以儿宽为奏献掾】

奏曹掾【廷尉请路温舒署奏曹掾】

掾【廷尉以从史儿宽为之】

从史【儿宽传师古曰只随官僚不主文书】

廷尉文学卒史【儿宽以掌故功次补卒史】

书佐【薛宣少为廷尉书佐】

大鸿胪

典客秦官掌诸侯归义蛮夷有丞景帝中六年更名大行令武帝太初元年更名大鸿胪【应劭曰郊庙行礼护九宾鸣声胪传之也】属官有行人译官别火三令丞【如淳曰汉仪注别火狱令官主治改火之事】及郡邸长丞武帝太初元年更名行人为大行令初置别火王莽改大鸿胪曰典乐初置郡国邸属少府中属中尉後属大鸿胪【百官表】

主客【武帝时金岑为主客服又云主胡客属大鸿胪】

大鸿胪文学【平当治礼丞功次补文学】

大行治礼【王莽传公宾就故大行治礼】

大行治礼丞【平当】

大行卒史【儒林传】

宗正

宗正秦官掌亲属有丞平帝元始四年更名宗伯属官有都司空令丞【如淳曰律司空主水及罪人贾谊曰输之司空编之徒官】内官长丞【师古曰律历志厘分寸尺丈也】又诸公主家令门尉皆属焉王莽并其官於秩宗初内官属少府中属主爵後属宗正【百官表】

主傅【东方朔传昭平君醉杀主傅】

中府【东方朔传馆陶公主中府师古曰中府掌金帛之藏】

舍人【周长孺师古曰舍人家人也主家事者也】

大司农

治粟内史秦官掌谷货有两丞景帝後元年更名大农令武帝太初元年更名大司农属官有大仓均输平準都内籍田五令丞幹官【如淳曰幹音筦或作干幹主均输之事所谓幹盐铁而酒酤也】铁市两长丞又郡国诸仓农监都水六十五官长丞皆属焉搜粟都尉武帝军官不常置王莽改大司农曰羲和後更为纳言初幹官属少府中属主爵後属大司农【百官表】

大司农中丞管诸会计事【食货志下桑弘羊】

大司农部丞【食货志桑弘羊请置大农部丞数十人分部主郡国平纪元始元年置大司农部丞十三人】

大司农史【萧望之传李宫】

大司农斗食属【薛宣】

治粟都尉【食货志桑弘羊为治粟都尉领大农尽榦天下盐铁】

农官【食货志武帝水衡少府太农太仆各置农官】

稻田使者【昭纪元凤元年假稻田使者燕仓】

酤官【昭纪始元元年罢酤官】

少府【以上九卿】

少府秦官掌山海池泽之税以给共养【应劭曰名曰禁钱以给私养自别为藏师古曰大司农供军国之用少府以养天子也】有六丞属官有尚书符节大医大官汤官导官【师古曰大官主膳食汤官主饼饵导官主择米】乐府若卢【如淳曰若卢主藏兵器】考工室【臣瓚曰主作器械】左弋【师古曰地名】居室甘泉居室左右司空东西织园匠【师古曰东园匠主作陵内器物】十二官令丞又胞人【师古曰胞人主掌宰割者也胞与庖同】都水均官三长丞又上林中十池监又中书谒者黄门钩盾尚方御府【师古曰钩盾主近苑囿尚方主作禁器物御府主天子衣服也】永巷内者宦者七官令丞诸仆射署长中黄门皆属焉武帝太初元年更名考工室为考工左弋为饮飞居室为保宫甘泉居室为昆台永巷为掖廷饮飞掌弋射有九丞两尉大官七丞昆台五丞乐府三丞掖廷八丞宦者七丞钩盾五丞两尉成帝建始四年更名中书谒者令为中书谒者令初置尚书员五人有四丞河平元年省东织更名西织为织室绥和二年哀帝省乐府王莽改少府曰共工【百官表】

萧望之领尚书事建白以为尚书百官之本国家枢机宜以通明公正处之武帝游宴後庭故用宦者非古制也宜罢中书宦官应古不近刑人元帝不听【本传】

成帝建始四年春罢中书宦官【臣瓚曰汉初中人有中谒者令孝武中谒者令为中书谒者令置仆射宣帝加时任中书官弘恭为令石显为仆射元帝即位数年恭死显代为中书令专权用事至成帝乃罢其官】初置尚书员五人【师古曰汉旧仪云尚书四人为四曹常侍尚书主丞相御史事二千石尚书主刺史二千石事户曹尚书主庶人上书事主客尚书主外国事成帝置五人有三公曹主断狱事并见本纪】

尚书郎【史记功臣表王迁宋百官志云西汉旧置四人】

尚书史【艺文志】

给事尚书【张安世为郎用善书给事尚书】

尚符玺郎【霍光传】

大医监【霍光传】

侍医【艺文志侍医李柱国校方书师古曰侍天子之医】

大官献食丞【陈汤】

大官献丞【张勃苏林注云主贡献功】

食监【昌邑王诏大官趣具亡阙食监】

尚食【惠纪】

尚席【周亚夫传汉仪注省中有五尚曰尚食尚冠尚衣尚席尚帐後遂省并尚食於大官汤官】乐府音监【张放传音监景武孟康曰监主乐人】

乐府游徼【张放传游徼莽】

令史【张放传】

东织室令史【宣帝纪张赦】

中书仆射【石显】

黄门倡【艺文志车忠】

倡监【东方朔传】

马监【金日磾】

黄门驸马【苏武传官骑与黄门驸马争船师古曰天子驸马之在黄门者也】狗监【蜀人杨得意为狗监师古曰主天子田猎犬】

给事狗监【李延平】

钩盾冗从【艺文志李步昌】

尚方待诏【郊祀志下】

掖庭狱丞【赵后传籍武】

掖庭牛官令【赵后传】

掖庭户卫【许后传】

少内嗇夫【丙吉传注云掖庭主府藏之官】

暴室丞【一作薄室师古曰掖庭主织作梁练之署三辅黄图谓之暴室取暴晒为名耳有嗇夫官属】

暴室嗇夫【许广汉】

农官【食货志武帝水衡少府皆置农官】

中谒者【高纪封中谒者张释卿为列侯如淳曰灌婴为中谒者後常以阉人为之诸官加中者多阉人也】

中涓【曹参传令以中涓从如淳曰中涓如中谒者也师古曰涓洁也言其在中主知洁清扫洒之事盖亲近左右也】

协律都尉【李延年】

海丞【平纪元始元年置师古曰主海税】

果丞【平纪元始元年置师古曰掌诸果实】

采珠玉金银之官【贡禹传】

执金吾

中尉秦官掌徼循京师有两丞候司马千人武帝太初元年更名执金吾【师古曰金吾鸟名也主辟不祥天子出行主先导以御非常故执此鸟之象】属官有中垒寺互武库都船四令丞都船武库有三丞中垒两尉又式道左右中候候丞及左右京辅都尉尉丞兵卒皆属焉初寺互属少府中属主爵後属中尉自大常至执金吾秩皆中二千石丞皆千石【百官表】

备盗贼中尉【史记淮南王传备盗贼中尉臣福】

都船狱吏【薛宣】

将作大匠

将作少府秦官掌治宫室有两丞左右中候景帝中六年更名将作大匠属官有石库东园主章左右前後中校七令丞又主章长丞武帝太初元年更名东园主章为木工成帝阳朔三年省中候及左右前後中校五丞【百官表】

典属国

典属国秦官掌蛮夷降者武帝元狩三年昆邪王降复增属国置都尉丞候千人属官九译令成帝河平元年省并大鸿胪【百官表】

武帝纪元狩二年【表作三年当考】匈奴昆邪王杀休屠王并将其属合四万余人来降置五属国以处之【注云凡言增属国者皆增属国都尉也】

安定【三水】 天水【勇士】

上都【龟兹】 西河【阙魏】

五原 以上并属国都尉治【地理志】 宣帝神爵二年置金城属国以处降羌【本纪】 五凤三年置西河北地属国以处匈奴降者【本纪】 水衡都尉

水衡都尉武帝元鼎二年初置掌上林苑有五丞属官有上林均输御羞禁圃辑濯锺官技巧六廄辨铜九官令丞【如淳曰御羞地名也在监田其土肥沃多出御物可进者杨雄传谓之御宿三辅黄图御羞宜春皆苑名也辑濯船官也锺官主铸钱官也辨铜主分别铜之种类也师古曰御宿则今长安城南御宿川也不在蓝田羞宿声相近故或云御羞或云御宿耳羞者珍羞所出宿者止宿之义辑读与楫同音集濯音直孝反皆所以行船也汉旧仪云天子六廄未央丞华駟騶骑马辂轸大廄也马皆万匹据此表大仆属官以有大廄未央辂轸骑马駟騶丞华而水衡又云六廄技巧官是则技巧之徒供大廄者其官别属水衡也】又衡官水司空都水农仓又甘泉上林都水七官长丞皆属焉上林有八丞十二尉均输四丞御羞两丞都水三丞禁圃两尉甘泉上林四丞成帝建始二年省技巧六廄官王莽改水衡都尉曰予虞初御羞上林衡官及铸钱皆属少府【百官表】

虎圈啬夫【张释之】

辑濯士【刘屈氂传师古曰主用辑及濯行船者也】

农官【食货志武帝水衡少府皆置农官】

领护三辅都水【息夫躬刘向又冯参领护佐冯翊都水】

西汉会要卷三十一

卷三十二

钦定四库全书

西汉会要卷三十二

宋 徐天麟 撰

职官二

宫官

詹事

詹事秦官【应劭曰詹省也给也臣瓚曰茂陵书詹事秩直二千石】掌皇后太子家有丞【师古曰皇后太子各置詹事随其所在以名官】属官有太子率更家令丞仆中盾卫率厨廐长丞【张晏曰太子称家故曰家令臣瓚曰茂陵中书太子家令秩八百石应劭曰中盾主周卫徼道秩四百石如淳曰汉仪注卫率主门卫秩千石师古曰掌知漏刻故曰率更自此以上太子之官也更音工衡反】又中长秋私府永巷仓廐祠祀食官令长丞诸官官皆属焉【师古曰自此以上皆皇后之官】成帝鸿嘉三年省詹事官并属大长秋【百官表师古曰省皇后詹事总属长秋也】

中廐令【桑弘羊为中廐令三辅黄图云中廐皇后车马所在】

中御府令【霍光传中御府令高昌又谷永传愿减中御府用度】

中少府【王昌韩勲师古曰皇后官】

舍人【功臣表成陶侯周信为昌氏舍人】

长信詹事

长信詹事掌皇太后宫景帝中六年更名长信少府平帝元始四年更名长乐少府【百官表张晏曰以太后所居宫为名也居长信宫则曰长信少府居长乐宫则曰长乐少府也】

哀帝即位尊定陶太后曰共皇太后丁姬曰共皇后各置左右詹事【本纪臣天麟按詹事置左右始於此】

建平二年尊傅太后为皇太太后称永信宫丁太后为帝太后称中安宫而成帝母太皇太后

本称长信宫成帝赵后为皇太后并四太后各置少府太仆秩皆中二千石【外戚传】

中太仆掌皇太后舆马【见太仆条】

长信太仆【王莽传长信太仆閼臣天麟按此官即哀帝所置四太仆之一也】长乐卫尉【见卫尉条】

长乐长御【王莽传上】

长信庭林表【叙传师古曰林表官名长信宫庭之林表孟康曰妇人之官也】太公家令【附】

太公仆【史记功臣表严彭祖】

大长秋

将行秦官【应劭曰皇后卿也】景帝中六年更名大长秋【师古曰秋者收成之时长者常久之义故以为皇后官名】或用中人或用士人【百官表】

太子太傅少傅

太子太傅少傅古官属官有太子门大夫【应劭曰员五人秩六百石】庶子【应劭曰员五人秩六百石】洗马【张晏曰员十六人秩比谒者如淳曰前驱也洗或作先】舍人【汉官仪云秩二百石】

太子中庶子【史丹金敞皆为之臣天麟按邹阳传奏任中庶子蒙恬扁鹊传號有中庶子则六国时已有此官沈约云汉置六典云秦官皆非是也】

太子御骖乘【惠纪】

护太子家【元帝诏史丹】

军官

大将军

高帝拜韩信为大将军【本传】

景帝拜窦婴为大将军【本传】

武帝以卫青为大将军位在诸公上【史记汲黯传】元狩四年置大司马位大将军骠骑将军皆为大司马【霍去病传按後汉志云初武帝以卫青数征伐有功为大将军欲尊之以古尊官唯有三公诸将军始自秦晋以为卿号故置大司马官号以冠之其後霍光王凤等皆然】

莫府

大将军长史【丙吉自军市令迁】

大将军军中司马【王凤奏请王尊补】

莫府校尉【霍光擅调益莫府校尉】

大将军从事中郎【王凤奏以陈汤为之】

大将军军监【匈奴传上治衆等四人】

大将军史【王仲翁汉仪注大将军史秩四百石】

给事大将军莫府【蔡义】

票骑将军【史记作剽骑】

武帝元狩四年置大司马位大将军票骑将军皆为大司马定令票骑将军秩禄与大将军等【霍去病传】莫府

票骑将军司马【赵破奴】

鹰击司马【霍去病传赵破奴】

票姚校尉【霍去病为之荀悦汉纪作嫖姚】

骠骑将军史【艺文志朱字】

车骑将军

高帝八年迁靳歙为车骑将军【本传】

宣帝地节三年拜张安世为大司马车骑将军领尚书事七月罢车骑将军屯兵两宫卫尉城

门北军兵属焉【张安世传】

车骑将军王音以外亲宜典兵马入为将军【元后传】莫府

车骑将军长史【赵充国由中郎迁】

车骑都尉【韩昌夫冯唐拜车骑都尉主车尉及郡国车士】

从事中郎【大司马车骑将军王音踵故选置从事毋将隆】

车骑将军市令【丙吉】

车骑将军掾【王舜表奏云敞为掾】

车骑将军千人【王莽传上扈云师古曰千人官名属车骑将军】

卫将军

山都正侯王恬启以卫将军擊陈豨【功臣表】

文帝即位拜宋昌为卫将军领南北军二年罢卫将军【纪】

张安世拜大司马车骑将军领尚书事数月更为卫将军【本传】

莫府

卫将军舍人【史记卫将军舍人百余人田仁以壮勇为卫将军舍人】

卫将军掾【萧由】

前後左右将军

前後左右将军皆周末官秦因之位上卿金印紫绶汉不常置或有前後或有左右皆掌兵及四夷有长史秩千石【百官表】

莫府

右将军史【律历志诏右将军史杂候清台】

列将军【别将并莫府附】

上将军【高后七年以赵王吕禄为上将军见本纪】游擊将军【功臣表高帝初陈豨以游擊将军别定代】复土将军【文纪後七年张武为复土将军如淳曰主穿圻寘瘞事】

将屯将军【文纪後七年令属国悍为将屯将军】

复土都尉【哀帝崩萧由为复土都尉元后崩原涉守复土都尉】

骁骑将军【武纪元光二年李广】

骁骑都尉【功臣表齐受骁骑都尉又史记功臣表董忠为梟骑都尉】

护军将军【韩安国传元光二年为护军将军诸将皆属焉】

轻车将军【武纪元光二年公孙贺为轻车将军】

轻车都尉

材官将军【武纪元光二年大中大夫李息为材官将军】骑将军【武纪元光六年骑将军公孙敖出代下又云代郡将军】伏波将军【元鼎五年路博德为伏波将军见南粤传】

伏波司马【功臣表苏弘】

楼船将军【元鼎五年杨仆为楼船将军见南粤传】戈船将军【武纪元鼎五年归义越侯严为戈船将军师古曰船下安戈戟以防蛟鼉水虫之害】下瀨将军【武纪元鼎五年甲为下瀨将军】

横海将军【武纪元鼎六年韩说】

横海校尉【东粤传横海校尉福】

浮沮将军【武纪元鼎六年公孙贺】

匈河将军【武纪元鼎六年赵破奴】

十二部将军【武纪元封六年诏曰朕将巡边垂置十二部将军亲帅师焉】

拔胡将军【元封四年郭昌见本传】

中将军【公孙敖以中将军从大将军再出定襄见本传】因杆将军【太初元年公孙敖见本纪服?曰因杆地名因所征以名将军】

贰师将军【太初元年以李广利为贰师将军期至贰师城取善马故号贰师将军见本传】
执马校尉【武帝拜习者二人为执驱马校尉】驱马校尉

浚稽将军【武纪太初三年赵破奴应劭曰浚稽山在武威北】

强弩将军【武帝立十七岁李沮吕尤内史为强弩将军】强弩将军长史【韩延寿请严延年为长史】

强弩都尉

度辽将军【昭纪元凤二年以中郎将范明友为度辽将军应劭曰当度辽水往击乌桓故以为号】虎牙将军【宣纪本始二年田顺】

蒲类将军【宣纪本始二年赵充国晋灼曰匈奴传有蒲类泽】

祁连将军【宣纪本始二年田广明应劭曰祁连匈奴中山名也】

破羌将军【宣纪神爵元年辛武贤】

护羌将军【见王尊传】

护羌将军转校尉【师古曰为校尉主转运事而属护羌将军也王尊为之】

奋威将军【元纪永光二年以太常仕千秋为奋威将军冯奉世传作奋武将军未详孰误】
建威将军【永光三年韩安国】

步兵将军【平帝元始五年执金吾王骏见百官表下】文成将军【武帝元狩中拜少翁文成将军见封禅书】五利将军【封禅书元鼎四年拜栾大为五利将军得四印佩天士将军地士将军大通将军印】天士将军【见上】

地士将军【见上】

大通将军【见上】

天道将军【封禅书天子又刻玉印曰天道将军使使立白茅上五利亦立白茅上天道者且为天子道天神也】

别将

重将【功臣表南安侯宣虎以重将破臧荼侯师古曰主将领辎重也】

厩将【功臣表留侯张良以厩将起下邳】

城将【功臣表东武侯郭蒙入为汉城将师古曰将策城之兵】

右林将【功臣表汉三年宋子侯许惲用赵右林将初从师古曰犹言羽林之将】弩将【功臣表清简侯室中同以弩将初起从入汉】

总莫府

军正【正平杨仆】

军正丞【胡建传天汉中建守军正丞师古曰南北军各有军正正又置丞】

都尉【萧何传上令卒五百人一都尉为何卫爰盎传吴王使一都尉以五百人围守盎】长铗都尉【功臣表周竈史记作长铍】

军门都尉【周亚夫传】

校司马【赵充国传诸校司马】

轻骑校尉【卫青传郭成】

营军司马【车骑将军音请谷永补营军司马】军司马【杨敞给事大将军莫府为军司马】

左司马【孔聚以左司马入汉】

右司马【陈胥以右司马擊项籍侯】

骑司马【王虞人以骑司马从】

车司马【王竞以车司马从张晏曰主车官】

军司空【杜延年补军司空苏林曰主狱官也】军司空令【前将军增奏冯奉世为之】

连敖【韩信归汉为连敖李奇曰楚官名】

军候假丞【陈汤传杜勲】

将军舍人【魏尚飨军吏舍人】

军武库令【王凤奏请杜钦为大将军军武库令】 门尉【芒侯彤跣以门尉初起矟】

垒尉【主垒壁之事】

军匠【梧侯阳城延以军匠从】

职志【沛公以周昌为职志应劭曰掌主帜也】 骈骖【功臣表许奩以骈骖从师古曰二马曰骈骈骖谓并两骑为军翼也】

说卫【许奩以说卫入汉师古曰说读曰税谓军行初舍止之时为卫】

队率【申屠嘉林官迁为队率】

队史【棘丘侯襄以执盾队史从】

执矛【中邑侯朱进以执矛从并功臣表】

护军都尉

护军都尉秦官武帝元狩四年属大司马成帝绥和元年居大司马府比司直哀帝元寿元年更名司寇平帝元始元年更名护军【百官表】

护军中尉【高帝时陈平护军中尉使尽护诸将见本传】

护军射师【艺文志王贺】

司隶校尉

司隶校尉周官武帝征和四年初置持节从中郎都官徒千二百人捕巫蛊督大奸猾後罢其兵察三辅三河弘农元帝初元四年去节成帝元延四年省绥和二年哀帝复置但为司隶冠进贤冠属大司空比司直【百官表】

从事【鲍宣使】

掾【赵后传司隶解光遣从事掾业史望】

史【赵后传见上】

假佐【王尊传假佐放】

城门校尉

城门校尉掌京师城门屯兵有司马十二城门候【百官表又刘屈氂传云武帝征和二年以太子在外始置屯兵长安诸城门】

领城门兵【孔光为太师领城门兵王音为特进领城门兵置莫府得举吏如将军】城门令史【王莽传王兴者故城门令史】

八校尉【中垒 屯骑 步兵 越骑 长水 胡骑 射声 虎贲】

中垒校尉掌北军垒门内外掌西域【师古曰掌北军垒门之内而又外掌西域】屯骑校尉掌骑士步兵校尉掌上林苑门屯兵越骑校尉掌越骑【如淳曰越人内附以为骑也晋灼曰取其材力超越也师古曰宣纪言饮飞射士胡越骑又此有胡骑校尉如说是】长水校尉掌长水宣曲胡骑【师古曰长水胡名也宣曲观名胡骑之屯以宣曲者】又有胡骑校尉掌池阳胡骑不常置【师古曰胡骑之屯池阳者也】射声校尉掌待诏射声士【服虔曰工射者也冥冥中闻声则中之因以名也应劭曰须诏所命而射故曰待诏射也】虎贲校尉掌轻车凡八校尉皆武帝初置有丞司马自司隶至虎贲校尉秩皆二千石【百官表臣天麟按中垒校尉掌北军则知八校皆北军也东都五营即八校之并省者而後书每有北军五校之称则八校属北军又明矣】

监北军使者【刘屈氂传任安又史记武帝使任安护北军】

北军钱官【史记任安答辱北军钱官】

西域都护

西域都护加官宣帝地节二年初置以骑都尉谏大夫使护西域三十六国有副校尉秩比二千石丞一人司马候千人各二人【百官表又西域传云都护治乌垒城去阳关二千七百叁十八里】阳威白虎合骑之校【陈汤斩郅支益置阳威白虎合骑之校见本传】屯田校尉【西域传云武帝通西域而轮台渠犂皆有田卒数百人置使者校尉领护以给使外国者至宣帝置都护匈奴益弱不得近西域於是徙屯田於北胥鞬莎车之地屯田校尉始属都护】

渠犂田官【西域传即谓屯田校尉】

北假田官【元纪初元五年罢北假田官】

伊循都尉【西域传元凤四年立尉屠耆为楼兰王更名其国为鄯善王请曰国中有伊城愿汉遣一将屯田积谷令臣得依其威重於是汉遣司马一人吏士四十人田伊循以镇抚之其後更置都尉伊循官置始此矣】

司马【见上】

护菀使者【大司马音荐长史谷永为之】

戊巳校尉【西域传元帝置戊巳校尉屯田车师前王庭】

戊巳校尉元帝初元元年置有丞司马各一人候五人秩比六百石【百官表师古曰甲乙丙丁庚辛壬癸皆有正位唯戊巳寄治耳今所置校尉亦无常居故取戊巳为名也有戊校尉有巳校尉一说戊巳居中镇覆四方今所置校尉亦处西域之中抚诸国也】

戊巳校尉【王莽传中陈终带】

奉车都尉驸马都尉

奉车都尉掌御乘舆车驸马都尉掌驸马皆武帝初置秩比二千石【百官表师古曰驸副马也非止驾车皆为驸马一曰驸近也疾也】

西汉会要卷三十二

卷三十三

钦定四库全书

西汉会要卷三十三

宋 徐天麟 撰

职官三

三辅

京兆尹【师古曰京大也兆者衆数言大衆所在】

内史周官秦因之掌治京师景帝二年分置左内史右内史武帝大初元年更名京兆尹属官有长安市厨两令丞又都水铁官两长丞左内史更名左冯翊属官有廩牺令丞尉又左都水铁官云垒长安四市四长丞皆属焉【百官表】

长安游徼狱吏秩百官【赵广汉传】

左冯翊【张晏曰冯辅也翊佐也】

见上京兆尹条

司东市令【货殖传】

左冯翊二百石卒史【黄霸入谷补此官】

右扶风【张晏曰扶助也风化也】

主爵中尉秦官掌列侯景帝中六年更名都尉武帝大初元年更名右扶风治内史右地属官有掌畜令丞又有都水铁官廐庖厨四长丞皆属焉与左冯翊京兆尹是为三辅皆有两丞列侯更属大鸿胪元鼎四年更置三辅都尉都尉丞各一人【百官表又元帝纪建昭三年分三辅都尉秩皆二千石】

郡国

诸侯王国

诸侯王高帝初置金玺螭绶掌治其国有大传辅王内史治国民中尉掌武职丞相统衆官群卿大夫都官如汉朝景帝中五年令诸侯王不得复治国天子为置吏改丞相曰相省御史大夫廷尉少府宗正博士官大夫谒者郎诸官长丞皆损其员武帝改汉内史为京兆尹由尉为执金吾郎中令为光禄勳故王国如故损其郎中令秩千石改大仆曰仆秩亦千石成帝绥和元年省内史更令相治民如郡太守中尉如郡都尉【百官表】成帝绥和中何武为御史大夫司空与丞相方进共奏言往者诸侯不断狱治政内史典狱事相总纲纪辅王中尉备盗贼今王不断狱与政【师古曰与读曰豫】中尉官罢职并内史郡国守相委任所以一统信安百姓也今内史位卑而权重威职相踰不统尊者难以为治臣请相如太守内史如都尉以顺尊卑之序平轻重之权制曰可以内史为中尉【何武传】

景遭七国之难抑损诸侯减黜其官武有衡山淮南之谋左官之律【诸侯王表应劭曰人道上右今舍天子而仕诸侯故谓之左官也】

相掾【梁平王襄传】

舍人魏【勃扫齐舍人门】

从史【爰盎传】

内史丞【艺文志河间内史丞王定】

内史掾【广川王传】

侍御史【太仓公传齐侍御史成】

大中大夫【史记年表薄昭】

中大夫【太仓公传齐中大夫病龘齿】

中郎曹将【梁王立传】

中郎【伍被为淮南中郎】

侍郎【王尊传】

卫士长【昌邑王传】

厩长【王尊传】

太仓令【齐太仓令淳于公】

宰人【龚遂传昌邑王尝与驺奴宰人游戏】

私府长【路温舒迁广阳私府长师古曰藏钱之府天子曰少府诸侯曰私府】

中御府长【太仓公传齐中御府长信田叔传云鲁王?中府钱师古曰中府长之财物藏也】

中谒者【东平王传中谒者信】

黄门郎【师丹传段犹】

大官令【燕王旦传】

食官长【梁王襄传】

尚食监【冯唐传高祛】

永巷长【大仓公传】

宦者【齐王肥传】

中傅【武纪济川王明坐射杀其太傅中傅废应劭曰中傅宦者也文三王传作中尉与纪不同】
医工长【燕王旦传】

大医【大仓公传】

侍医【大仓公传】

尚方【郊祀志栾大注云主药方】

少史【河间王恕少史留贵】

侍中【霍光传昌邑王书问侍中君卿】

常侍【楚王聘龚舍为常侍】

长史【梁平王传曰欲以伤梁长史】

司马司空【大仓公传齐淳于司马北宫司空】太子师傅【吴王濞传】

大将军【吴田禄伯为大将军】

将军【齐王襄以魏勃为将军丁宽为梁孝王将军】关内侯【霍光传姊夫昌邑关内侯】

左右关都尉【大仓公传齐左右关都尉】

大与【成侯董朝为济南大与冯解为代大与师古曰主爵禄也】

冗从【枚臯为梁王使与冗从争师古曰冗职之从王者也】

内官

夫人【广川王传明正夫人修靡夫人乘华夫人】美人【淮南王传令故美人材人得幸者从居】材人【见上】

八子【高三王传以令置八子秩比六百石】

孺子【中山王传】

家人子【景十三王传】

永巷仆射【广川王传使其大婢为仆射主永巷】异姓诸侯王

汉亡尺土之阶繇一剑之任五载而成帝业书传所记未尝有焉故据汉受命谱十八王讫于孝文异姓尽矣【表】

昔高祖定天下功臣异姓而王者八国张耳吴芮彭越黥布臧荼卢绾与两韩信【赞】

高后欲立诸吕为王问王陵陵曰高皇帝刑白马而盟曰非刘氏而王者天下共击之今王吕氏非约也太后不说问左丞相平及绛侯周勃等皆曰高帝定天下王子弟今太后称制欲王昆弟诸吕无所不可太后喜罢朝陵责平勃曰始与高帝啖血而盟诸君不在邪今高帝崩太后女主欲王吕氏诸君纵欲阿意背约何面目见高帝於地下乎平曰於面折廷争臣不如君全社稷安刘氏後君亦不如臣陵无以应之【王陵传】

西楚霸王项籍都彭城汉五年诛徙韩信为楚王六年废为侯

衡山王吴芮都郴汉五年芮徙长沙

临江王共敖都江陵汉三年八月子尉嗣为王五年十二月汉虏尉

九江王英布都六汉二年十二月降汉四年汉立布为淮南王十一年布反诛

赵王张耳都襄国汉元年九月耳降汉十月代王歇还王赵二年十月汉灭歇三年十一月汉复立张耳为赵王五年耳薨子敖嗣为王八年敖废为侯

代王赵歇都代汉元年十月徙歇王赵以陈余为代王号安成君二年十一月属汉为太原郡五年以太原为国王韩信九月反降匈奴

齐王田都都临菑汉元年四月降楚田荣为齐王十二月项籍击杀荣立故齐王田假为齐王二年二月田荣弟横击杀假立田荣弟广为齐王三年十一月汉将韩信击杀广属汉为郡四年置齐国王韩信五年徙王楚立济北王田安都博阳汉九年六月田广击杀安属齐胶东王田市都即墨汉元年五月田荣击杀市属齐雍王章邯都废丘汉二年汉杀邯属汉为中地陇西北地郡

塞王司马欣都栢阳汉元年七月降汉为渭南河上郡翟王董医都高奴汉元年七月降汉为上郡

燕王臧荼都蓟汉四年九月反诛後九月卢绾为燕王十一年反降匈奴

辽东王韩广都无终汉元年臧荼击杀广属燕

魏王魏豹都平阳汉二年豹降汉为王从汉伐楚四月归畔汉八月韩信击虏豹属汉为河东上党郡

殷王司马卬都朝歌汉二年二月降属汉为河内郡韩王韩成都阳翟汉元年六月项籍诛成立郑昌为韩王十月汉立韩信为韩王六年信徙太原

河南王申阳都离阳汉元年九月降属汉为河南郡长沙王吴芮汉五年二月立六月薨成王臣嗣传至靖王产无嗣国除

鲁王张偃高后元年四月以外孙立八年为侯

淮阳王吕强高后元年四月立五年薨六年壺关侯武立八年以非孝惠子诛

常山王吕不疑高后元年四月立二年薨襄城侯义立四年立为帝轹侯朝立八年以非惠帝子诛

吕王吕台高后四年以高后兄子立二年薨子嘉嗣六年嘉废十一月王吕产立七年徙梁十一月王吕大立八年以非惠帝子诛

燕王吕通高后八年七月立八月诛

梁王吕产高后七年二月立八年诛

中大夫【淮南王布中大夫贲赫】

大宰【黔布传随何使淮南至太宰主之】

部刺史

监御史秦官掌监郡汉省丞相遣史分刺州不常置武帝元封五年初置部刺史掌奉诏条察州【师古曰汉官典职仪云刺史班宣周行郡国省察治状黜陟能否断治冤狱以六条问事非条所问即不省一条强宗豪右田宅踰制以强陵弱以众暴寡二条二千石不奉诏书遵承典制倍公向私旁招守利侵渔百姓聚敛为奸三条二千石不恤疑狱风厉杀人怒则任刑喜则淫赏烦扰刻暴剥截黎元为百姓所疾山崩石裂托祥进言四条二十石选补不平苟阿所爱蔽贤宠顽五条二千石子弟怙恃荣势请托所监六条二千石违公下比阿附豪强通行货赂割损正令也】秩六百石员十三人成帝绥和元年更名牧秩二千石哀帝建平二年复为刺史元寿二年复为牧【百官表】

郡守

郡守秦官掌治其郡秩二千石有丞边郡又有长史掌兵马秩皆六百石景帝中二年更名太守【百官表】

郡掾

别驾【黄霸传别驾主簿车缁油屏泥於轼前】

主簿【朱博传】

书佐【朱博传又王尊补书佐注云律太守书佐十人】

功曹【鲍宣为都尉太守功曹朱博为亭长迁为功曹】

议曹【扶风谒请原涉为议曹】

贼曹掾【薛宣传贼曹掾张扶通典云主刑罚】

决曹掾【薛宣传决曹掾王立又路温舒补决曹史汉旧仪云决曹主罪法事】

贼捕掾【张敞传贼捕掾絮舜师古曰主捕掾】

五官掾【王尊传五官掾张辅】

门下掾【朱博传门下掾韞遂】

门下督【萧章为京兆尹门下督】

郡掾祭酒【鲍宣传薛方尝为郡掾祭酒】

郡文学【梅福为郡文学】

郡文学史【郑崇为郡文学史】

郡文学卒史【史记匡衡补平原文学卒史】

学经师【平纪元始三年立学官郡国立学置经师一人】

宗师【平纪元始五年郡国置宗师】

舍人【高纪南阳太守舍人】

史【陈遵与张竦俱为京兆史注云律太守都尉史各一人】

从史【陈遵为河南太守遣从史西】

诸曹史【朱博传】

右曹掾史【朱博传】

太守卒史【张敞尹翁归并补太守卒史又儒林传比百石以下补太守卒史】

五经百石卒史【儒林传元帝好儒郡国置五经百石卒史】

直符史【王尊传】

狱史【丙吉为鲁狱史】

狱小史【尹翁归为狱小史】

小史【谷永少为长安小史翟方进给事太守府为小史】

督邮【田延年徙卒史尹翁归补督邮又孙宝补侯文东部督邮】

督邮掾【冯野王传督邮掾赵都】

督邮书掾【朱博出为督邮书掾所部职办】

都史【武纪二千石遣都史如淳曰律说都史今督邮是也闲惠晓事即为文无害都史】

少府【文翁减省少府用度师古曰少府郡掌财物之府以供太守者也】

守属【王尊补守属】

给事太守府【咸宣以佐史给事河东守张汤给事内守为甯成掾】

司空【陈咸为南阳太守犯法者以律程作司空师古曰司空主作役官】

都尉秦官掌佐守典武职甲卒秩比二千石有丞秩皆六百石景帝中二年更名都尉【百官表】

关都尉秦官农都尉属国都尉皆武帝初置【百官表】受降都尉【田广明传】

宜禾都尉【地理志炖煌郡】

护漕都尉【朱博徙为并州刺史护漕都尉】

尉史【田广明传尉史苏昌汉律近塞置都百里一人士史尉史各二人】

京兆【华阴京辅都尉治】冯翊【高陵左辅都尉治】扶风【郿右辅都尉治】
大原【广武都尉治】

东郡【东阿都尉治】陈留【外黄都尉治】

汝南【女陰都尉治】 南阳【邓都尉治】

南郡【夷陵都尉治】 九江【历阳都尉治】

清河【贝丘都尉治】 钜鹿【下曲阳都尉治】

魏【魏都尉治】 涿【安平都尉治】

常山【南行唐都尉治】 勃海【高城都尉治】

平原【乐陵都尉治】 千乘【蓼城都尉治】

济南【於陵都尉治】 秦山【卢都尉治】

琅邪【姑幕都尉治】 东海【费都尉治】

山阳【单父都尉治】 沛【蕲都尉治】

临淮【盱眙都尉治】 丹阳【歙都尉治】

会稽【钱塘西部都尉治

回浦南部都尉治杨雄赋东南一尉孟康曰会稽东郡都尉治】 豫章【新淦都尉治】

汉中【褒中都尉治】

广汉【緄竹都尉治 陰平道北部都尉治】 犍为【汉阳都尉治】

越嶲【定□都尉治】

牂牁【夜郎都尉治进桑南部都尉治】 金城【孝宣神爵二年置金城属国以处降羌

赵充国传充国西至西部都尉府孟康曰在金城】 张掖【曰勒都尉治

居延都尉治番和农都尉治】

天水【勇士属国都尉治满福源道骑都尉治】

安定【参?主骑都尉治三水属国都尉治】 陇西【临洮南部都尉治】 酒泉【会水北部都尉治偃陵障又东部都尉治东部障乾齐西部都尉治西部障】 炖煌【炖煌中部都尉治部广侯官广至宜禾都尉治昆仑障】

【龙勒有阳关玉门关皆都尉治】

北地【富平北部都尉治神泉障浑怀都尉治塞外浑怀障】

上郡【匈奴都尉治塞外匈奴障 高望北部都尉治龟兹北部都尉治 望松北部都尉治

鲁山北部都尉治 虎猛西部都尉治班况部参皆尝为上河农都尉师古曰上河地名又曰上河在西河富平於此为农都尉】

朔方【西部都尉治窳浑 广牧东部都尉治渠搜中部都尉治】

五原【东部都尉治稭阳 蒲泽属国都尉治成宜中部都尉治原高 西部都尉治田辟】

云中【陶林东部都尉治 北舆中部都尉治真陵西部都尉治】定襄【武进西部都尉治武臯中部都尉武要东部都尉治】

鴈门【沃阳西部都尉治平城东部都尉治】

上谷【宁西部都尉治女祁东部都尉治】代郡【高柳西部都尉治 马城东部都尉治且如东部都尉治】渔阳【要阳都尉治】 右北平【薺都尉治】

辽西【柳城东部都尉治交梨东部都尉治】

乐浪【昭明南部都尉治】辽东【无虑西部都尉治 武次东部都尉治侯成中部都尉治】郁林【领方都尉治】 交趾【麤泠都尉治】

合浦【朱卢都尉治】 九真【无切都尉治】

郡国均输盐铁官

武帝元封元年因桑弘羊请置大农部丞数十人分部主郡国各往往置均输盐铁官郡不出铁者置小铁官【邓展曰铸旧铁】使属所在县【食货志】

元帝初元五年罢盐铁官永光三年复【本纪】

千乘郡 河东【黄霸补河东均输官】

已上并有均输官

河东【安邑】 大原【晋阳】

南郡【巫】 钜鹿【堂阳】

勃海【章武】 千乘

琅邪【海曲 计斤长广】 会稽【海盐】

犍为【南安】 蜀【临邛】

益州【连然】 巴【朐忍】

安定【三水】 北地【弋居】

上郡【独乐】 西河【富昌】

朔方【沃塿】 五原【城宜】

鴈门【楼烦 沃阳有长丞】 渔阳【泉州】

陇西 辽西【海阳】

辽东【平郭】 南海【番禺】

苍梧【高安】 东平

北海【都昌 壽光】 东莱【曲城 韜 东年 杨昌 当利】

已上并有盐官

京兆【郑】 右冯翊【夏阳】

右扶风【雍漆】 弘农【宜阳 黽池】

河东【安邑 绛 安民 平阳】 大原【大陵】

河内【隆虑】 河南

颍川【阳城】 汝南【西平】

南阳【宛】 庐江【皖】

山阳 沛【沛】

魏【武安】 常山【都乡】

千乘【郡千乘】 济南【东平陵历城】

泰山【嬴】 齐【临淄】

东莱【东羊】 东海【下邳朐】

临淮【盐渎堂邑】 桂阳

汉中【沔阳】 犍为【武阳南安】

蜀【临邛】 琅邪

渔阳【渔阳】 右北平【夕阳】

辽东【平郭】 陇西

胶东【郁秩】 鲁

楚【彭城】 广陵

中山【北平】 东平

城阳【莒】 涿

已上并有铁官【并地理志】

列郡别置官

齐三服官【贡禹传贡禹上疏曰故时齐二服官输物不过十笥方今齐三服官作工各数十人一岁费数钜万】

元帝初元五年罢齐三服官【本纪】

哀帝即位诏齐三服官诸官织绮绣难成害女红之物皆止作无输【本纪】

陈留【襄邑】 齐【临淄】

已上并有服官

河南【郡】 南阳【宛】

济南【东平陵】 泰山【郡 奉高】

颍川【郡】 河内【怀】

蜀【成都】 广汉【郡 雒】

已上并有工官

雒阳武库令【魏相传车千秋子为雒阳武库令】

京兆船司空【地理志师古曰本主船之官遂以为县】

大原郡橐马官【地理志初名家马官後改曰橐马橐音动】

辽东郡襄平县牧师官【百官志】

上郡库令【成纪上郡库令良注云汉官北边郡库官兵器所藏故置令】

南郡发弩官【地理志师古曰主教放弩】

南郡编县云梦官

江夏郡西陵县云梦官

庐江郡楼船官

九江郡陂官

九江郡湖官

丹阳郡铜官

桂阳郡金官

蜀郡严道县水官

巴郡朐忍县橘官

巴郡鱼复县橘官

南海郡圃羞官

南海郡中宿县汪浦官

交趾郡羸楼县羞官【并地理志】

北假田官【元纪晋灼曰北假地名】

县令长

县令长皆秦官掌治其县万户以上为令秩千石至六百石减万户为长秩五百石至三百石皆有丞尉秩四百石至二百石是为长吏百石以下有斗食佐史之秩是为少史大率十里一亭亭有长十亭一乡乡有三老有秩嗇夫游徼三老掌教化嗇夫职听讼收赋税游徼循禁贼盗县大率方百里其民稠则减稀则扩乡亭亦如之皆秦制也【百官表】

掾史

县掾【郭解传杨李生子为县掾】

门下掾【原涉传王游公为茂陵门下掾】

户曹掾史【尹赏为长安令部户曹掾史】

县史【卫青以县史给事侯家】

令史【项羽传陈婴故东阳令史】

狱史【于公为县狱史】

狱小史【路温舒为狱小史】

小史【田广明传圜小史】

外史【平帝元始元年置外史闾师秩六百石】

闾师【见上】

校经师【平帝元始三年立学官县道邑侯国曰校校置经师一人乡曰庠聚曰序庠序置孝经师一人】功曹【朱博给事县为亭长稍迁功曹】

乡史【尹赏部乡史亭长里正父老五人】

里正【见上】

里监门【酈食其为里监门】

求盗【高纪应劭曰旧时亭有两卒一为亭父掌开闭扫除一为求盗掌逐捕盗贼】

西汉会要卷三十三

<史部,政书类,通制之属,西汉会要>

卷三十四

钦定四库全书

西汉会要卷三十四

宋 徐天麟 撰

职官四【封建】

封功臣

汉兴自秦二世元年之秋楚陈之岁初以沛公总帅?俊三年然後西灭秦立汉王之号五年东克项羽即皇帝位八载而天下迺平始论功而定封讫十二年侯者百四十有三人时大城名都民人散亡户口可得而数裁什二三是以大侯不过万家小者五六百户封爵之誓曰使黄河如带泰山若厉国以永存爰及苗裔於是申以丹书之信重以白马之盟又作十八侯之位次【孟康曰惟作元功萧曹等十八人位次耳高后乃诏作位次下竟师古曰谓萧何曹参张敖周勃樊哙酈商奚?夏侯婴灌婴傅寛靳歙王陵陈武王吸薛欧周昌丁复虫逵从第一至十八也】高后二年复诏丞相陈平尽差列侯之功录第下竟藏诸宗庙副在有司始未尝不欲固根本而枝叶稍落也故逮文景四五世间流民既归户口亦息列侯大者至三四万户小国自倍富厚如之子孙骄逸忘其先祖之艰难多?法禁陨命亡国或云子孙讫於孝武後元之年靡有子遗耗矣罔亦少密焉故孝宣皇帝愍而録之乃开庙臧览旧籍诏令有司求其子孙咸出庸保之中并受复除或加以金帛用章中兴之德降及孝成复加恤问稍益衰微不絶如綫善乎杜业之纳说也曰昔唐以万国致时雍之政虞夏以之多羣后飨共己之治汤法三圣殷氏太平周封八百重译来贺是以内恕之君乐继絶世隆名之主安立亡国至於不及下车德念深矣成王察牧野之克顾羣后之勤知其恩结於民心功光於王府也故追述先父之志録遗老之策高其位大其?爰敬飭尽命赐备厚大孝之隆於是至至其没也世主叹其功无民而不思所息之树且犹不伐况其庙乎是以燕齐之祀与周并传子继弟及历载不堕岂无刑辟繇祖之竭力故支庶赖焉迹汉功臣亦皆割符世爵受山河之誓存以着其号亡以显其魂赏亦不细矣百余年间而袭封者尽或絶失姓或乏无主朽骨孤於墓苗裔流於道生为愍隶死为转屍以往况今甚可悲伤圣朝怜悯诏求其後四方忻忻靡不归心出入数年而不省察恐议者不思大义设言虚亡则厚德掩息遘東布章非所以视化劝後也三人为衆虽难尽继宜从尤功於是成帝复绍萧何哀平之世增修曹参周勃之属得其宜矣以缀续前记究其本末并序位次尽於孝文以昭元功之侯籍【功臣表】

高帝与功臣剖符作誓丹书铁契金匱石室臧之宗庙列侯毕已受封奏位次皆曰平阳侯曹参功最多宜第一然上心欲何为第一鄂千秋曰萧何当第一参次之上迺令何第一【萧何传】

十二年诏曰吾立为天子帝有天下十二年於今矣与天下之豪士共定天下同安辑之其有功者上致之王次为列侯下乃食邑而重臣之亲或为列侯皆令自置吏得赋歛女子公主为列侯食邑者皆佩之印赐大第室吏二千石徙之长安受小第室入蜀汉定三秦者皆世世复吾於天下功臣可谓亡负矣云云【本纪】

高后二年诏曰高皇帝匡饬天下诸有功者皆受分地为列侯朕思念至於久远而功名不着亡尊大谊施後世今欲差次列侯功定朝位臧於高庙世世勿絶嗣子各袭其功位其与列侯议定奏之丞相臣平等言谨与绛侯臣勃曲周侯臣商颍阴侯臣婴安国侯臣陵等议列侯幸得赐餐钱奉邑陛下加惠功次定朝位请臧高庙奏可【本纪】

封外戚

高后欲立诸吕为王问王陵陵曰高皇帝刑白马而盟曰非刘氏而王者天下共击之今王吕氏非约也太后不说问左丞相平及绛侯周勃等皆曰高帝定天下王子弟今太后称制欲王昆弟诸吕无所不可太后喜罢朝陵责平勃曰始与高帝啖血而盟诸君不在邪今高帝崩太后女主欲王吕氏诸君纵欲阿意背约何面目见高帝於地下乎平曰於面折廷争臣不如君全社稷安刘氏後君亦不如臣陵无以应之【王陵传】

周亚夫为丞相窦太后曰皇后兄王信可侯也上曰始南皮及章武先帝不侯【师古曰南皮窦彭祖太后弟长君之子章武太后母弟广国】及臣即位廼侯之信未得封也窦太后曰人生各以时行耳窦长君在时不得侯死後廼其子彭祖顾得侯吾甚恨之帝趣侯信也上曰请得与丞相计之亚夫曰高帝约非刘氏不得王非有功不得侯不如约天下共击之今信虽皇后兄无功侯之非约也上默然而阻【周亚夫传】汉兴外戚与定天下侯者二人故誓曰非刘氏不王若有亡功非上所置而侯者天下共诛之是以高后欲王诸吕王陵廷争孝景将侯王氏修侯犯色卒至废黜是後薄昭窦婴上官卫霍之侯以功受爵其余后父春秋褒纪之义帝舅缘大雅申伯之意寢广博矣【十王侯事】成帝河平二年六月悉封诸舅王谭为平阿侯商为成都侯立为红阳侯根为曲阳侯逢时为高平侯五人同日封故世谓之五侯太后母李氏更嫁为河内苟宾妻生子参欲以田蚡为比而封之上曰封田氏非正也以参为侍中水衡都尉【元后传】

哀帝欲封祖母傅太后从弟商郑崇谏曰孝成皇帝封亲舅五侯天为赤黄昼昏日中有黑气今祖母从昆弟二人已侯孔乡侯皇后父高武侯以三公封尚有因缘今无故欲复封商坏乱制度逆天人心非傅氏之福也臣闻师曰逆阳者厥极弱逆阴者厥极凶短折犯人者有乱亡之患犯神者有疾夭之祸故周公着戒曰惟王不知艰难惟耽乐是从时亦罔有克寿故衰世之君夭折蚤没此皆犯阴之害也臣愿以身命当国咎崇因持诏书案起傅太后大怒曰何有为天子乃反为一臣所颺制邪上遂下诏曰朕幼而孤皇太太后躬自养育免於襁褓教道以礼至於成人惠泽茂焉欲报之德嗇天罔极前追号皇太太后父为崇祖侯惟念德报未殊朕甚恋焉侍中光禄大夫商皇太太后父同产子小自保太恩义最亲其封商为汝昌侯为崇祖侯後更号崇祖侯为汝昌哀侯【郑崇传】

封丞相

元朔中公孙弘代薛泽为丞相先是汉常以列侯为丞相惟弘无爵上於是下诏曰朕嘉先圣之道开广门路宣招四方之士盖古者任贤而序位量能以授官劳大者厥禄厚德盛者获爵尊故武功以显重而文德以行褒其以高成之平津乡户六百五十封丞相弘为平津侯其後以为故事至丞相封自弘始也【本传】

孝武元功宿将略尽会上亦兴文学进拔幽隐公孙弘自海濒而登宰相於是宠以列侯之爵自是之後宰相毕侯矣【恩泽侯表】

朱博为丞相封阳乡侯食邑二千户上书曰故事封丞相不满千户而臣过制愿还千户【本传】

平当为御史大夫至丞相以冬月赐爵关内侯【本传汉仪注御史大夫为丞相更春廼封李奇曰?冬月非封侯时】

遣列侯就国

文帝二年十月诏曰朕闻古者诸侯建国千余各守其地以时入贡民不劳苦上下驩欣靡有违德今列侯多居长安邑远吏卒给输费苦而列侯亦无繇教训其民其令列侯之国为吏及诏所止者遣太子【本纪下同】

三年十一月诏曰前日诏遣列侯之国辞未行丞相朕之所重其为朕率列侯之国遂免丞相勃遣就国景帝後二年十月省彻侯之国【晋灼曰文帝遣列侯之国今省之】

继絶

高帝五年下令曰楚地已定义帝亡後欲存恤楚衆以定其主齐王信习知楚风俗更立为楚王【本纪】

孝文元年更封萧延为酈侯【功臣表】

孝景二年封故相国萧何孙系为列侯【本纪】

中元元年封故御史大夫周苛周昌孙子为列侯【本纪】 孝武元光三年封高祖功臣五人後为列侯【本纪】

元狩三年封故相国萧何曾孙庆为列侯【本纪】

孝宣地节二年诏大司马大将军博陆侯功德茂盛朕甚嘉之复其後世畴其爵邑世世母有所与功如萧相国【本纪】

地节四年封故鄼侯萧何曾孙建世为侯【本纪】

元康元年复高皇帝功臣绛侯周勃等百三十六人家子孙令奉祭祀世世勿絶其母嗣者复其次【本纪】

功臣子孙讫於孝武後元之年靡有子遗耗矣故孝宣皇帝愍而録之乃开庙藏览旧籍诏令有司求其子孙咸出庸保之中并受复除或加以金帛用章中兴之德降及孝成复加恤问稍益衰微不絶如綫杜业纳说曰内恕之君乐继絶世隆名之主安立亡国迹汉功臣亦皆割符世爵受山河之誓存以着其号亡以显其魂赏亦不细矣百余年间而袭封者尽或絶失姓或乏无主朽骨孤於墓苗裔流於道生为愍隶死为转屍以往况今甚可悲伤圣朝怜悯诏求其後四方忻忻靡不归心出入数年而不省察恐议者不思大义设言虚亡则厚德掩息遯束布章非所以视化劝後也三人为衆虽难尽继宜从尤功於是成帝复绍萧何哀平之世增修曹参周勃之属得其宜矣【功臣表】

元康四年赐故右扶风尹翁归子黄金百斤以奉其祭祀又赐功臣适後黄金人二十斤【本纪】

成帝元延元年封萧相国後喜为鄼侯【本纪】

孝平元始二年封故大司马博陆侯霍光从父昆弟曾孙阳宣平侯张敖玄孙庆忌周勃玄孙共【按本传乃孙之子恭】舞阳侯樊哙玄孙之子章皆为列侯复爵赐故曲周侯酈商等後玄孙酈明友等百一十三人爵关内侯食邑各有差【本纪】

元始中太皇太后诏赐公孙弘後子孙之次当为後者爵关内侯召诣公车上名尚书朕亲临拜焉

王四夷君长

高帝五年诏曰故粤王亡诸世奉粤祀秦侵夺其地使其社稷不得血食诸侯伐秦亡诸身帅闽中兵以佐灭秦项羽废而弗立今以为闽粤王王闽中地勿使失职【本纪】

十一年五月诏曰粤人之俗好相攻击前时秦徙中县之民南方三郡使与百粤杂处会天下诛秦南海尉佗居南方长治之甚有文理中县人以故不耗减粤人相攻击之俗益止俱赖其力今立佗为南粤王使陆贾即授玺绶佗稽首称臣【本纪】

十二年诏曰南武侯织亦粤之世也立以为南海王【本纪】孝惠三年举高帝时粤功曰闽

君摇功多其民便附廼立摇为东海王都东甌世号曰东甌王【闽粤传】

武帝建元四年南粤王胡遣太子婴齐入宿卫元鼎四年上书请比内诸侯三岁一朝除边关於是天子许之赐其丞相吕嘉银印及中尉大傅印余得自置【本传】建元六年闽粤王郢攻南越越人杀郢降天子曰郢等首恶独无诸孙繇君丑不与谋廼使郎中将立丑为粤繇王奉闽粤祭祀【本传】

孝昭始元六年诏曰钩町王母波率其君长人民击反者斩首捕虏有功其立母波为钩町王【本纪】

匈奴故印文曰匈奴单于玺【本传王莽更曰新匈奴单于章】

西南夷君长以百八【越本种百数】独夜郎滇受王印【本传】傅介子斩楼兰王驰传诣阙廼立王弟尉屠耆为王更名其国为鄯善为刻印章赐以宫女为夫人【西域传】关都尉文忠攻罽宾杀其王立阴末赴为罽宾王【同上】西域凡国五十自译长城长君监吏大禄百长千长都尉且渠当户将相至侯王皆佩汉印绶凡三百七十六人【本传】

侯降虏

昔书称蛮夷帅服诗云徐方既徠春秋列潞子之爵许其慕诸夏也汉兴至於孝文时廼有弓高襄城之封虽自外徠本功臣後故自孝景始欲侯降者丞相周亚夫守约而争帝黜其议初开赏之科云云【功臣表下】

匈奴王徐卢等五人降汉【师古曰功臣表云睢徐卢】上欲侯之以劝後亚夫曰彼背其主降陛下陛下侯之即何以责人臣不守节者乎上曰丞相议不可用廼悉封徐卢等为列侯【周亚夫传】

封方士

栾大见武帝言黄金可成而河决可塞不死之药可得僊人可致也上廼拜大为五利将军诏以二千户印得天士将军地士将军大通将军诏以二千户封地士将军大为乐通侯赐列侯甲第【郊祀志】

妇人爵邑

高帝封兄伯妻为陰安侯

高后二年封萧何夫人为酈侯【萧何传】

樊哙妻吕?为临光侯

列侯太夫人夫人【文纪七年如淳曰列侯之妻称夫人列侯死子复为列侯廼称太夫人子不为列侯不得称也】

孝文十二年赐诸侯王女邑各二千户【本纪】

武帝尊王皇后母臧儿为平原君【外戚传】

王皇后母前夫金氏女封修成君赐汤沐邑【同上】

宣帝地节四年赐外祖母号为博平君以博平蠡吾两县户万一千为汤沐邑【王夫人传】

金当上南大行为太夫人【文颖曰南当母名也上名状於大行】

王莽母赐号曰功显君【王莽传】

平帝赐三妹谒臣号修义君哉皮为承礼君鬲子为尊德君食邑各二千户【卫姬传按本纪云赐帝女弟四人号皆为君今传云三姊与纪不同当考】

王莽白尊太后姊妹君侠为广恩君君力为广惠君君弟为广施君皆食汤沐邑【元后传】

封建杂錄

列侯所食县曰国【百官表】

高帝十二年诏列侯皆令自致吏得赋歛女子公主为列侯食邑者佩之印赐大第室【本纪】

列侯赐餐钱奉邑【吕后纪应劭云诸侯四时皆得赐餐钱】

秦汉之制列侯封君食租衣税率户二百千户之君则二十万朝覲聘享出其中【货殖传】

孝武元鼎五年九月列侯坐献黄金酎祭宗庙不如法夺爵者百六人【纪汉仪注云诸侯岁以户口酎黄金於高庙】

孝宣地节四年襄阳侯圣坐酎金斤八两少四两免【表】五凤四年朝侯固城坐酎金少四两免

杨邱侯坐出国界耐为司寇【列侯坐罪夺爵者多矣略举数条以为例】终陵侯华禄坐出国界耐为司寇【表】

祚阳侯仁坐擅兴繇赋削爵一级【此类甚多皆不具载】

孝景中二年令列侯初封及之国大鸿胪奏策列侯薨大行奏諡诔策遣大中大夫吊祠视丧事因立嗣其薨葬国得发民挽丧穿复土治坟亡过三百人毕事【本纪】平当为御史大夫至丞相以冬月赐爵关内侯【本传李奇曰以冬月非封侯时且先赐爵关内侯也】

西汉会要卷三十四

卷三十五

钦定四库全书

西汉会要卷三十五

宋 徐天麟 撰

职官五

加官

侍中左右曹诸吏散骑中常侍皆加官所加或列侯将军卿大夫将都尉尚书大医大官令至郎中亡员多至数十人侍中中常侍得入禁中诸曹受尚书事诸吏得举法散骑骑并乘輿车给事中亦加官所加或大夫博士议郎掌顾问应对位次中常侍中黄门有给事黄门位从将大夫皆秦制【百官表】

西域都护加官【见上卷本条】

爵

爵一级曰公士二上造三簪袅四不更五大夫六官大夫七公大夫八公乘九五大夫十左庶长十一右庶长十二左更十三中更十四右更十五少上造十六大上造十七驷车庶长十八大庶长十九关内侯二十彻侯皆秦制以赏功劳彻侯金印紫绶避武帝讳曰通侯或曰列侯改所食国令长名相又有家丞门大夫庶子【百官表】

高帝五年诏曰军吏卒会赦其七大夫?上【师古曰七大夫公大夫也】皆令食邑非七大夫已下皆复其身及户勿事【本纪】又曰七大夫公乘?上皆高爵也爵或人君上所尊礼异日秦民爵公大夫以上令丞与亢礼今吾於爵非轻也且法?有功劳行田宅其令诸吏善遇高爵称吾意且廉问有不如吾诏者?重论之

八年令爵非公乘?上毋得冠刘氏冠

孝惠即位爵五大夫?上有罪当监械者皆颂系上造?上当刑及当为城旦?者皆耐为鬼薪白粲【并本纪】武帝时民多买复及五大夫千夫於是除五大夫千夫为吏【食货志】

旧爵

上闻【古爵吕氏春秋曰天子赏魏文侯以上闻晋灼曰名通於天子也】

樊哙自公大夫赐上闻爵

执帛【郑氏曰楚爵也张晏曰孤卿也】

夏侯婴赐爵七大夫赐爵五大夫赐爵执帛

曹参自五大夫封执帛号建成君

执珪【如淳曰吕氏春秋得五员者位执珪古爵名也张晏曰侯伯执珪以侯位比之】

夏侯婴赐爵执帛赐爵执珪赐爵封

曹参封执帛迁为执珪封建成侯

卿

樊哙赐爵五大夫赐爵卿

博宽赐爵卿

封君【赐重封】

叔孙通号稷嗣君

娄敬号曰奉春君

侯公平国君

曹参自五大夫封执帛号建成君

樊哙赐爵封号贤成君破南阳赐重封

博宽赐爵卿封号共德君

孔霸以帝师赐爵号褒成君

武功爵

武帝元朔六年诏曰日者大将军巡朔方征匈奴斩首虏万八千级诸禁锢及有过者咸蒙厚

赏得免减罪今大将军仍复克获斩首虏万九千级受爵赏而欲移卖者无所流貶其议为令有司奏请置武功赏官以?战士【纪】

武功爵【臣瓚曰茂陵中书有武功爵一级曰造士二级曰闲舆卫三级曰良士四级曰元戎士五级曰官首六级曰秉铎七级曰千夫八级曰乐卿九级曰执戎十级曰政戾庶长十一级曰军卫此武帝所制以?军功师古曰此下云级十七万凡直三十余万金今瓚所引茂陵中书止於十一级则计数不足与本文乖矣或者茂陵书说之不尽也】级十七万凡直三十余万金诸买武功爵官首者试补吏先除千夫如五大夫其有罪又减二等爵得至乐卿?显军功军功多用超等大者封侯卿大夫小者郎【食货志】

赐爵

立汉社稷

高帝二年令民立汉社稷施恩德赐民爵【本纪】

即位

孝惠即位赐民爵一级中郎郎中满六岁爵三级四岁二级外郎满六岁二级中郎不满一岁一级官官尚食比郎中太子御骖乘赐爵五大夫舍人满五岁二级【本纪】

立皇太子

孝文元年建太子因赐天下民当为父後者爵一级【本纪】

王皇子

孝景三年立皇子为王赐民爵一级【本纪】

皇太子冠

孝景後三年皇太子冠赐民为父後者爵一级【本纪】

改元

孝景中元年赦天下赐民爵一级【本纪】

後元年赦天下赐民爵一级中二千石诸侯相爵右庶长【本纪】

征伐

高帝五年诏曰军吏卒会赦其亡罪而亡爵及不满大夫者皆赐爵为大夫故大夫以上赐爵各一级其七大夫以上皆令食邑【本纪】

力役

孝惠五年长安城成赐民爵户一级【本纪】

募民徙塞

晁错言守边备塞事曰募输奴婢欲?拜爵者不足廼募民之欲往者皆赐高爵复其家郡县之民得买其爵?增至卿上从其言募民徙塞下【食货志】

郊祀

孝武元鼎四年行幸雍祠五畤赐民爵一级女子百户牛酒【本纪】

祥瑞

孝宣本始元年凤皇集胶东千乘赐吏二千石诸侯相下至中都官官吏六百石爵各有差自左更至五大夫赐天下人爵一级孝者二级【本纪】

帝加元服

孝昭元凤四年帝加元服赐中二千石?下及天下民爵【本纪】

尊庙号

孝宣本始二年尊孝武庙为世宗庙巡狩所幸之郡国皆立庙赐民爵一级【本纪】

褒吏治

孝宣神爵四年颍川太守黄霸?治行赐爵及颍川吏民有行义者爵人二级力田一级正妇顺女帛【本纪】

灾异

孝元永光二年诏阴阳不调三光晦昧其大赦天下赐民爵一级吏六百石?上爵五大夫勤事

吏各三级【本纪】

匈奴朝

孝成河平四年匈奴来朝赦天下徒赐孝弟力田爵二级【本纪】

赐民爵【瓚曰民赐爵有罪得以减也】

赐民爵户一级【师古曰家长受也】

赐天下民当为父後者爵一级【师古曰虽非己生正嫡但为後者即得赐爵】赐民长子爵一级【元光元年】

孝惠六年令民得卖爵【本纪】

孝文後六年夏旱令民得卖爵【本纪】

鬻爵

孝惠元年民有罪得买爵三十级以免死罪【应劭曰一级直钱二千凡为六万见本纪】

晁错说上曰今募天下入粟县官得?拜爵得以除罪入粟受爵至五大夫?上廼复一人耳於是文帝从错之言令民入粟边六百石爵上造稍增至四千石为五大夫万二千石为大庶长各以多少级数为差【食货志】又言募民徙塞事募不足募输奴婢欲以拜爵者上从其言【本传】

景帝上郡?西旱复修卖爵令而裁其贾?招民【食货志】武帝时兵革数动民多买复及五大夫千夫调发之士益鲜於是除五大夫千夫为吏【同上】

孝成鸿嘉三年令民得买爵贾级千钱【本纪】

永始二年诏曰关东比岁不登吏民以义收食贫民入谷物助县官赈赡者已赐直其百万?上加赐爵右更欲为吏补三百石其吏也迁二等三十万?上赐爵五大夫吏亦迁二等民补郎【本纪】

西汉会要卷三十五

卷三十六

钦定四库全书

西汉会要卷三十六

宋 徐天麟 撰

职官六

特进

王谭位特进领城门兵【外戚传按汉杂事诸侯功德优盛朝廷所敬异者赐位特进位莽三公上秩】

王商位特进领城门兵置幕府得举吏如将军

傅喜位特进奉朝请

薛宣加?特进位次师安昌侯给事中视尚书事张禹以列侯朝朔望位特进见礼如丞相置从事史五人【并本传】

领尚书事

霍光霍山以大将军领尚书事

张安世以车骑将军领尚书事又以卫将军领尚书事师丹以左将军领尚书事

萧望之以前将军领尚书事

王凤大司马领尚书事

郑寛中以光禄大夫领尚书事【张山拊传】

孔光光禄勳领尚书事

张禹光禄大夫领尚书事

霍山奉车都尉领尚书事【并本传】

周堪光禄大夫领尚书事【刘向传】

车骑将军王音内领尚书外典兵马【毋将隆传】

史高以外属为大司马车骑将军领尚书事【匡衡传】

平尚书事

于定国光禄大夫平尚书事

张敬中大夫平尚书事

领他官

桑弘羊为治粟都尉领大农【食货志】

东邪咸阳孔仅为大农丞领盐铁事【食货志】

霍山奉车都尉侍中领三辅胡越骑【本传】

孔光为帝太傅领宿卫【本传】

王谭王商位特进领城门兵【元后传】

金涉为侍中骑都尉领三辅胡越骑【本传】

锺元为尚书令领廷尉【何并传】

刘向以故九卿召拜为郎中领护三辅都水【本传】

息夫躬以左曹光禄大夫使持节领护三辅都水【本传】 冯参为谏大夫领护左冯翊都水【本传】

刘向为光禄大夫领校中五经秘书

刘歆河平中受诏与父向领校秘书【本传】

兼官

张安世车骑将军光禄勳又迁右将军光禄勳

宣帝徙度辽将军未央卫尉范明友为光禄勳

宣帝拜萧望之为前将军光禄勳

赵充国权为後将军兼水衡都尉征匈奴还为後将军少府

王莽为右将军卫尉

右将军典属国常惠冯奉世

王尊转守槐里兼行美阳令事【并本传】

行【官阙则卑者摄为之曰行】

张汤韩安国并?御史大夫行丞相事

平阳侯曹窋行御史大夫事【吕后本纪八年刘攽刊误曰校表及张苍传高后四年窋为御史大夫诛诸吕後免则非行也疑此纪误】

太仆臣贺行御史大夫事【三王世家】

行太常事大中大夫刘歆【孝平王后传】

汾阳侯靳石为太常行太仆事

韩延年为太常行大行令事【功臣表】

行大鸿胪事少府乐成

太子少传臣安行宗正事

少府忠行廷尉事

王温舒为右辅行中尉

留侯张良行太子少傅事

黄霸廷尉监行丞相长史事

盖宽饶迁谏大夫行郎中户将事

王尊守京辅都尉行京兆尹事

刘德宗正行京兆尹事

翟义南阳都尉行太守事

王尊转守槐里兼行美阳令事【本传】

守【如淳曰诸官初加皆试守一岁延为真食全奉】

朱云以六百石秩守御史大夫

光禄大夫刘辟疆守长乐卫尉

守少府萧望之

萧育泰山太守入守大鸿胪

执金吾任宏守大鸿胪【哀纪】

御史臣光守尚书令【三王世家】

赵广汉京辅都尉守京兆尹

龚胜光禄大夫守右扶风

王欣为右辅都尉守右扶风武帝出驻车拜欣为真薛宣入守左冯翊满岁称职为真

朱博?高第入守左冯翊满岁为真【并本传】

守丞相长史边通【张汤传】

守军正丞胡建

守廷史路温舒

张敞守大原太守

王尊守京辅都尉【并本传】

茂陵守令尹公【原涉传】

华阴守丞嘉【朱云传】

假【假摄也】

汉二年拜曹参为假右丞相入屯兵关中【本传】

假稻田使者燕仓

赵充国以假司马从贰师将军【本传】

军候假丞杜勲【陈汤传】

宿卫

汉二年六月汉王还栎阳令诸侯子在关中者皆集栎阳为卫【高纪】

高帝崩陈平畏谗固请之得宿卫【陈平传】

高后二年齐哀王遣弟章入宿卫於汉封朱虚侯四年封章弟兴居为东牟侯皆宿卫长安

文帝入未央宫有谒者十人列戟卫端门【周勃传】

武帝时董仲舒对策曰使诸列侯郡守二千石各择其吏民之贤者岁贡各二人以给宿卫【本传】

终军曰得列宿卫食禄五年【本传】

王臧上言宿卫累迁一岁至郎中令【本传】

张安世辅政宿卫十有三年封为富平侯【本传】

昭帝时燕王旦上书愿归符玺入宿卫

宣帝地节二年诏曰博陆侯宿卫武帝三十余年阳城侯刘德亲亲行谨厚以德得官宿卫者二十余年魏相奏张安世子延寿重厚可以为光禄勳领宿卫臣杨惲与孙会宗书曰幸赖先人余业得备宿卫

冯参为黄门郎给事中宿卫十余年

孔光为帝太傅位四辅给事中领宿卫

成帝诏曰车骑将军王音宿卫忠正勤劳王家

元后益封孔光诏曰博陆侯光宿卫四世世为傅相光禄勳丰宿卫三世奉车都尉甄邯宿卫勤劳建议定策

待诏

尚方待诏【郊祀志】

待诏金马门【公孙弘刘向冯商张子乔华龙柳宫】

待诏公车【东方朔朱买臣谷永】

待诏承明之庭【扬?】

待诏殿中【韩生以易召待诏殿中】

待诏五柞宫【执金吾广意】

待诏丞相府【刘德】

待诏官者庐【东方朔苏武刘向翼奉】

待诏黄门【李寻梁邱贺】

武帝诏求能为韩诗者召蔡义待诏

伍宏?豎待诏

吾邱寿王?善格五待诏

宣帝诏见王褒以为待诏【何武传】

魏相奏言知音善鼓雅琴者赵定龚德皆召见待诏本草待诏【郊祀志】

成帝时言祭祀方术者皆得待诏【郊祀志】

上计

孝武元封五年三月至泰山增封因朝诸侯王列侯受郡国计【本纪师古曰若今之诸州计帐也】

太初元年春受计於甘泉【纪下同】

天汉三年三月行幸泰山修封祀明堂因受计

太始四年三月行幸泰山因受计

孝宣黄龙元年诏曰上计簿具文而已务为欺谩以避其课御史察计簿非实者按之使真伪相乱【本纪臣天麟谨按通典云汉制郡守岁尽遣上计掾史各一人条上郡内衆事谓之计簿】

严助愿奉三年计最【本传如淳曰旧法当使丞奉计今助自愿入奉也】

京房为魏郡太守自请岁竟乘传奏事天子许焉【传】张苍为计相一月更以列侯为主计四岁萧何为相国令苍以列侯居相府领郡国上计者【本传】

司隶校尉奏丞相衡位三公领计簿而颍地盗上【本传】郝贤坐为上谷太守入弋财物计谩免【表】

西汉会要卷三十六

卷三十七

钦定四库全书

西汉会要卷三十七

宋 徐天麟 撰

职官七

秩禄

万石【谷月三百五十斛】

太师 太傅 太保

丞相 太尉 御史大夫前後左右将军【并表下同】

中二千石【师古曰中二千石实得二千石也中之言满也月得百八十斛是为一岁凡得二千一百六十石言二千石者举成数耳】

太常 光禄勳 卫尉

太仆 廷尉 大鸿胪

宗正 大司农 少府

执金吾

真二千石【臣天麟谨按外戚传容华秩视真二千石在中二千石之下二千石之上师古曰真二千石月得百五十斛一岁凡得千八百石又按如淳注汲黯传亦云诸侯相秩真二千石月得百五十斛臣瓚注詹事引茂陵中书秩真二千石而百官表廼亡此秩欠考东京则有此秩矣】

二千石【师古曰谷月百二十斛一岁凡得一千四百四十石】

太子太傅【荀悦汉纪自太子太傅至扶风比二千石】

太子少傅詹事【茂陵中书秩真二千石】将作少府 大长秋

长乐少府【建平四年四大后各置少府皆中二千石】 长信少府

典属国 水衡都尉 京兆尹

左冯翊 右扶风【以上并表後汉志云三辅皆秩中二千石】 京辅都尉 左辅都尉
右辅都尉【以上元帝增秩】

司隶校尉【荀悦纪校尉并比二千石】 城门校尉 中垒校尉 屯骑校尉
步兵校尉 越骑校尉 长水校尉 胡骑校尉 射声校尉 虎贲校尉 诸侯相【初金印吴楚反後
改银印初真二千石在郡守上】 郡太守【增秩者为中二千石元帝建昭二年益三河大郡
大

守秩】 长信中太仆【以上并表】 诸侯太傅 诸侯御史大夫【後汉志汉初傅相御史大夫
及诸卿皆秩二千石】

诸侯中尉【哀帝曰傅相中尉皆国二千石】 中少府【师丹传】

左曹 右曹 大郡都尉【元帝纪】 州牧【朱博传秩真二千石】
长陵令【吕后六年秩长陵令二千石】

大内【史记孝景本纪】

比二千石【谷月百斛】

丞相司直 护军都尉 光禄大夫【亡印绶增秩者为中二千石】 五官中郎将
左中郎将 右中郎将 虎贲中郎将 监羽林中郎将 西域都护 奉车都尉 驸马都尉

骑都尉 郡都尉【以上并表】

千石【谷月九十斛】

丞相长史 大司马长史 御史中丞

将军长史 太常丞 光禄丞

卫尉丞【六典注比千石】 太仆丞 大鸿胪丞

宗正丞 大司农丞 少府丞

执金吾 廷尉正 廷尉左监

廷尉右监【荀悦汉纪正监秩比千石】 诸侯郎中令诸侯仆【武帝损郎中令秩千石仆秩亦千石後汉志仆比三千石】 万户县令【侯国相以上表】

比千石【谷月八十斛】

大中大夫 郎中车将 郎中户将郎中骑将 谒者仆射 期门仆射

八百石【成帝阳朔二年除吏八百石秩李奇曰除八百就六百】

比八百石

谏大夫【表】

六百石

将作少府丞 詹事丞 水衡都尉丞廷尉左平 廷尉右平 京兆丞

左冯翊丞 右扶风丞 京辅都尉丞右辅都尉丞 左辅都尉丞 郡长史

州刺史 郡太守丞 郡都尉丞万户县令【侯国相以上表】 朔方刺史
太子门大夫太子庶子【以上表注】 太常掌故【晁错传】 武骑常侍【司马相如

传】 公车司马令【汉官仪】 大厩令【後汉志本注旧

有六厩皆六百石令】 未央令 家马令

车府令 路轹令 骑马令

式道左候 式道右候 式道中候

廩犧令 外史 闾师【以上孝平纪】

比六百石

博士 议郎

左中郎 右中郎 五官郎中戊巳校尉 太子洗马 谒者

五百石【成帝阳朔二年除吏五百石秩李奇曰除五百就四百】

县长【侯国相】

四百石【谷月五十斛】

县丞 县尉

比四百石【谷月四十五斛】

五官侍郎 左侍郎 右侍郎

三百石【谷月四十斛】

次县长【侯国相】

比三百石

五官郎 左郎中 右郎中

二百石【谷月三十斛】

左冯翊卒史【黄霸传】 县丞 县尉

比二百石【谷月二十七斛】

百石【谷月十六斛又律百石奉月六百】

御史属【匡衡传】 左右内史卒史 郡国五经卒史 大行卒史【以上儒林传】 长安游徼
长安狱史【以上赵广汉传】

比百石

斗食【师古曰斗食者言一岁不满百石日食一斗二升】

大司农属

佐史【汉官名秩爵云谷月八斛】

增秩

汲黯以诸侯相秩居淮阳

诏增符玺郎秩二等【霍光传】

宣帝时二千石有治理效辄?玺书勉励增秩赐金【循吏传如淳曰太守虽号二千石有千石八百石居者功德茂异乃得满秩】

王成为胶东相治甚有声宣帝最先褒之下诏曰胶东相成治有异等其秩成中二千石赐爵关内侯

颍川太守黄霸秩以八百石居以治行褒扬秩中二千石

召信臣为南阳太守为百姓兴利又为河南太守治行第一数增秩赐金

周堪召拜光禄大夫秩中二千石【此类甚多举一为例】

小黄令焦延寿举最当迁三老官属上书借留有诏许增秩留【京房传】

冯野王为大鸿胪王舅不宜备九卿以秩为上郡太守班伯迁水衡都尉秩中二千石

萧咸为弘农河东太守所居有政迹数增秩赐金萧由迁江夏太守平江贼成重等有功增秩

陈立为巴郡太守秩中二千石居【西南夷传】

平帝元始元年赐吏在位二百石以上壹切满秩如真

益吏禄

孝惠即位诏曰吏所以治民也能尽其治则民赖之故重其禄所以为民也【纪下同】

孝宣神爵三年诏曰吏不廉平则治道衰令小吏皆勤事而奉禄薄欲其毋侵渔百姓难矣其益吏百石以下奉十五【韦昭曰若食一斛则益五斗】

孝成绥和元年益大司马大司空奉如丞相

班序

太师位在太傅上太保次太傅太傅位在三公上武帝?卫青为大将军位在诸公上

汉兴置大将军骠骑将军位次丞相

旧列侯奉朝请者位次三公

元寿二年赐大司马位在司徒上

御史大夫位上卿

前後左右将军位上卿

詹事位在长秋上

中太仆位在正卿太仆上

给事中位次侍中中常侍【并表】

故事司隶校尉位在司直下其有所会居二千石前【翟方进传】

诸侯羣臣朝十月仪先平明谒者治礼引?次入殿门传曰趋殿下郎中侠陛陛数百人功臣列侯诸将军军吏?次陈西方东乡文官丞相以下陈东方西乡大行设九宾胪句传於是皇帝辇出房引诸侯王?下至吏六百石?次奉贺【叔孙通传】

诸侯王 相国 太师

太傅 太保 丞相

大司马 御史大夫 大将军

列将军兼官 特进 列将军

列侯奉朝请 太常 光禄勳

卫尉 太仆 廷尉

宗正 大司农 大鸿胥

少府 长信少府 中少府

执金吾 太子太傅 水衡都尉

京兆尹 左冯翊 右扶风

典属国 将作少府 就国侯

颍川三河太守 齐楚等相 东海等太守高密等侯 太子少府 太子詹事

关内侯 丞相司直【与州郡叙则居刺史守相上】

司隶校尉【与州郡叙则居刺史守相上】 城门校尉

八校尉 搜粟都尉 光禄大夫【非中二千石者叙在三辅都尉下】

御史中丞【与刺史守相叙则居其上】

丞相长史 三辅都尉 五官左右中郎将羽林中郎将 护军都尉 奉车都尉【秩光禄大夫者

在关内侯下】 驸马都尉 骑都尉

尚书令 西域都护 大中大夫

尚书仆射 尚书 诸侯太傅

十三州刺史【与守相叙则居其上】 朔方刺史

郡都尉 关都尉 农都尉

属国都尉 西域副都尉 郎中车将

郎中户骑二将 诸侯中尉 诸侯内史

谏大夫 太子家令 博士

九卿列卿丞 谒者仆射 公车司马令将军长史 廷尉正监 长安令

千石令 黄门侍郎 尚书丞郎

议郎 五官左右中郎 从事中郎

太史令 廷尉平 三辅丞

六百石令 五百石长 郡司马长史

五官左右侍郎 太守丞 都尉丞

三百石长 侍御史 太子门大夫 五官左右郎中 太子庶子 中庶子

太子舍人 太子洗马 羽林郎

蛮夷叙位

孝宣甘露三年匈奴呼韩邪单于款五原塞愿奉国珍朝三年正月诏公卿议其仪丞相霸御史大夫定国议曰圣王之制施德行礼先京师而後诸夏先诸夏而後边方诗云率礼不越遂视既发相土烈烈海外有截陛下圣德充塞天地光被四表匈奴单于乡风慕义举国同心奉珍朝贺自古未之有也单于非正朔所加王者所客也礼仪宜如诸侯王称臣昧死再拜位次诸侯王下太子太傅萧望之以为单于非正朔所加故称敌国宜待以不臣之礼位在诸侯王上殊域稽首称藩中国逊而不臣此则羁縻之谊谦亨之福也书曰戎狄荒服言其来服荒忽亡常如使匈奴後嗣卒有鸟窜鼠伏阙於朝享不为畔臣信义行乎蛮貉福祚流於亡穷万世之长策也天子采之下诏曰盖闻五帝三王教化所不施不及以政今匈奴单于称北蕃朝正朔朕之不逮德不能弘覆其以客礼待之令单于位在诸侯王上赞謁称臣而不名【宣纪及萧望之传】

西汉会要卷三十七

卷三十八

钦定四库全书

西汉会要卷三十八

宋 徐天麟 撰

职官八

使外国

孝武建元中月氏怨匈奴汉廼募能使者张骞以郎应募使月氏【张骞传】

元封五年诏令州郡察吏民有茂材异等可使絶国者【本纪】

天汉元年遣苏武以中郎将使持节送匈奴使留在汉者武与副中郎将张胜及假吏募士斥侯百余人俱【苏武传】

叩阼愿为内臣妾孝武廼拜司马相如为中郎将建节往使副使者王然于壶充国吕越人驰四乘之传以赂西南夷至蜀太守下郊迎县令负弩矢先驱【司马相如传】天子闻张骞之言欲从蜀求大夏道廼令因蜀犍为发间使四道并出出駟出犂出徙【音斯】叩出僊【张骞传师古曰间使者求间隙而行又蒯通传注间使谓使人伺间隙而单行】

孝昭始元六年移中监苏武前使匈奴留十九岁廼还奉使全节武为典属国【本纪】

宣帝时光禄大夫义渠安国使行诸羌【赵充国传】

元康元年上令羣臣举可使西域者前将军韩增举上党冯奉世以卫候使持节送大宛诸国客【冯奉世传】

元帝初元四年卫司马谷吉使匈奴不还【本纪】

建昭三年使护西域骑都尉甘延寿副校尉陈汤矫发戊巳校尉屯田吏士及西域胡兵攻郅支单于斩其首传诣京师【本纪】

萧育迁谒者使匈奴副校尉【师古曰时校尉为使於匈奴而育为之副故授副校尉】後复为中郎将使匈奴【萧望之传】

萧咸为中郎将使匈奴萧由迁谒者使匈奴副校尉金参使匈奴匈奴中郎将【师古曰?其出使匈奴故拜为匈奴中郎将】

行水灾流民

孝武元狩三年遣谒者劝有水灾郡种宿麦举吏民能假贷贫民者?名闻【本纪】

元鼎二年九月诏方今水潦移於江南方下巴蜀之粟致之江陵遣博士中等分循行谕告所抵毋令重困吏民有赈救饥民免其戾者具举以闻【本纪】

元鼎中博士徐偃使行风俗偃矫制使胶东鲁国鼓铸盐铁中军奏偃矫制颺行非奉使体【终军传】

孝昭始元二年三月遣使者赈贷贫民毋种食者【本纪】孝宣本始四年正月诏今岁不登已遣使者赈贷困乏【本纪】

孝成建始三年九月诏廼者郡国被水灾流杀人民遣谏大夫林等循行天下【本纪】

河平四年三月遣光禄大夫博士嘉等十一人行举濒河之郡水所损伤困乏不能自存者财赈贷避水它郡国在所冗食之举淳厚有行能直言之士【本纪】

平当行流民幽州奉使十一人者为最【本传】

阳朔二年秋关东大水流民欲入关者勿苛留遣谏大夫博士分行视九月奉者不称【本纪】

鸿嘉四年正月诏水旱为灾关东流冗者衆已遣使者循行郡国被菑害什四?上民赀不满三万勿出租赋逋贷未入皆勿收流民欲入关辄籍内【本纪】

孝哀初即位诏廼者河南颍川郡水出流杀人民坏庐舍已遣光禄大夫循行举籍赐死者棺钱人三千【本纪】

举贤观风

孝武元狩六年遣博士大等六人分循行天下存问鰥寡废疾亡?自振业者贷与之谕三老孝弟?为民师举独行之君子召诣行在所士有特招使者之任也详问隐处亡位及冤失职奸猾为害野荒治苛者举奏郡国有所?为使者上丞相御史?闻【本纪下同】

孝昭始元元年遣故廷尉王平等五人持节行郡国举贤良问民所疾苦冤失职者

孝宣元康四年遣大中大夫强等十二人循行天下存问鰥寡览观风俗察吏治得失举茂材异伦之士本始二年遣使者持节诏郡国二千石谨牧养民而风德化

孝元初元元年诏方田作时朕惧蒸庶之失业临遣光禄大夫褒等十二人循行天下存问耆老鰥寡孤独困乏失职之民延登贤俊招显侧陋因览风俗之化建昭四年临遣谏大夫博士赏等二十一人循行天下存问耆老鰥寡孤独困乏失职之人举茂材特立之士孝成永始三年正月日有蚀之诏临遣大中大夫嘉等循行天下存问耆老民所疾苦其与部刺史举淳朴谦逊有行义者各一人

孝平元始四年遣大仆王恽等八人置副假节分行天下览观风俗

举冤狱

治狱使者内者令郭穰【宣纪】

孝宣五凤四年四月日有蚀之诏?前使使者问民所疾苦复遣丞相御史掾二十四人循行天下举冤狱察擅为苛禁深刻不改者【本纪】

孝成鸿嘉元年诏曰方生长时临遣谏大夫理等举三辅三河弘农冤狱【本纪】

成帝初即位孔光为博士数使録冤狱行风俗赈赡流民奉使称旨【本传】

杂遣使

吴楚反以袁盎为大常奉宗庙使吴王吴王弟子德侯为宗正辅亲戚使【吴王濞传】

宣帝时蔡祭以好农使劝郡国至大官【食货志】

稻田使者燕仓

地节中光禄大夫郭昌使行河【沟洫志】

李寻以骑都尉使护河堤【李寻传】

成帝时河决馆陶河堤使者王延世使塞【沟洫志】

鸿嘉四年河堤都尉许商与丞相许孙禁行图视方略【沟洫志】

冯野王?故二千石使行河堤【冯野王】

平当?经明禹贡使行河为骑都尉领河堤【平当传】河平三年谒者陈农使使求遗书於天下

孝平元始元年遣谏大夫行三辅举籍吏民?元寿二年仓卒时横歛者偿其直

元始二年使谒者大司马掾四十四人持节行边兵元始二年郡国大旱蝗遣使者捕蝗【并本纪】

奉使矫制上

武帝即位汲黯为谒者东粤相攻上使黯往视之至吴而还报曰粤人相攻固其俗不足以辱天子使者河内失火烧千余家上使黯往视之还报曰家人失火屋比延烧不足忧臣过河内贫人伤水旱万余家或父子相食臣谨以便宜持节发河内仓粟以赈贫民请归节伏矫制辜上贤而释之【本传】

元鼎中博士徐偃使行风俗偃矫制使胶东鲁国鼓铸盐铁还奏事徙为大常丞御史大夫张汤劾偃矫制大害法至死偃以为春秋之义大夫出疆有可以安社稷存万民颺之可也汤以致其法不能诎其义有诏下终军问状军诘偃曰古者诸侯国异俗分百里不通时有聘会之事安危之執呼吸成变故有不受辞造命颺已之宜今天下为一万里同风故春秋王者无外偃巡封域之中称以出疆何也且盐铁郡有余臧正二国废不鼓不足以利害而以安社稷存万民为辞何也又诘偃胶东南近琅邪北接北海鲁国西枕泰山东有东海受其盐铁偃度四郡口数田地率其用器食盐不足以并给二郡邪将執宜有余而吏不能也何以言之偃矫制而鼓铸者欲及春耕种贍民器也今鲁国之鼓当先具其备至秋乃能举火此言与实反者非与偃以前三奏无诏不惟所为不许而直矫作威福以从民望干名采誉此明圣所必加诛也枉尺直寻孟子称其不可今所犯罪重所就者小偃自予必死为之邪将幸诛不加而欲以采名也偃穷诎服罪当死军奏偃矫制颺行非奉使体请下御史召偃即罪奏可上善其诘有诏示御史大夫【终军传】

浩侯王恢坐使酒泉矫制害当【功臣表】

宣帝元康元年上令羣臣举可使西域者前将军韩增举上党冯奉世以卫候使持节送大宛诸国客至伊修城会故莎车王弟呼屠证与旁国共杀其王万年及汉使者奚充国自立为王时匈奴又发兵攻车师成不能下而去莎车遣使扬言北道诸国已属匈奴矣於是攻劫南道与?盟畔汉从鄯善以西皆絶不通都护郑吉校尉司马意皆在北道诸国间奉世与其副严昌计以为不亟击之则莎车日强其执难制必危西域遂以节谕告诸国王因发其兵南北道合万五千人进击莎车攻拔其城莎车王自杀传其首诣长安更立它昆弟子为莎车王诸国悉平威振西域奉世乃罢兵以闻帝召见韩增曰贺将军所举得其人奉世遂西至大宛大宛闻其斩莎车王敬之异於它使得其名马象龙而还上甚说议封奉世丞相将军皆以为可独少府萧望之以为奉世奉使有指而擅矫制违命发诸国兵虽有功效不可以为後法即封奉世

开後奉使者利以奉世为比争逐发兵要功万里之外为国家生事於夷狄渐不可长奉世不宜受封上善望之议以奉世为光禄大夫【冯奉世传】

西汉会要卷三十八

卷三十九

钦定四库全书

西汉会要卷三十九

宋 徐天麟 撰

职官九

奉使矫制下

元帝建昭三年使西域都护骑都尉甘延寿副校尉陈汤共诛斩匈奴郅支单于於康居始郅支单于困辱使者上书骄慢汤为人沈勇有太虑多策谋喜奇功每过城邑山川常登望既领外国与延寿谋曰边方畏服大种其天性也西域本属匈奴今郅支单于威名远闻侵陵乌孙大宛常为康居画计欲降服之如得此二国北击伊列西取安息南排月氏山离乌弋数年之间城郭诸国危矣且其人剽悍好战伐数取胜久蓄之必为西域患郅支单于虽所在絶远蛮夷无金城强弩之守如发屯田吏士毆从乌孙衆兵直指其城下彼亡则无所之守则不足自保千载之功可一朝而定也延寿亦以为然欲奏请之陈汤曰国家与公卿议大策非凡所见事必不从延寿犹与不听会其久病汤独矫制发城郭诸国兵车师戊巳校尉屯田吏士延寿闻之惊起欲止焉汤怒按剑叱延寿曰大衆已集会竖子欲阻衆邪延寿遂从之部勒行陈益置扬威白虎合骑之校汉兵胡兵合四万余人延寿汤上疏自劾奏矫制陈言兵状遂斩单于首既至论功石显匡衡以为延寿汤擅兴师矫制幸得不诛如复加爵土则後奉使者争欲乘危傲幸生事於蛮夷为国招难渐不可开元帝内嘉延寿汤功而重违衡显之议议久不决故宗正刘向上疏曰郅支单于囚杀使者吏士以百数事暴扬外国伤威毁重羣臣皆闵焉陛下赫然欲诛之意未尝有忘西域都护延寿校尉副汤承圣指倚神灵總百蛮之君城郭之兵出百死入絶域遂蹈康居屠五重城搴歙侯之旗斩郅支之首垂旌万里之外扬威昆山之西扫谷吉之耻立昭明之功万国慴伏莫不惧震呼韩邪单于见郅支已诛且喜且惧乡风驰义稽首来宾愿守北藩累世称臣立千载之功建万世之安羣臣之勲莫大焉昔周大夫方叔吉甫为宣王诛玁狁而百蛮从其诗曰嘽嘽焞焞如霆如雷显允方叔征伐玁狁蛮荆来威易曰有嘉折首获匪其丑言美诛首恶之人而诸不顺者皆来从也今延寿汤所诛震虽易之折首诗之雷霆不能及也论大功者不録小过举大美者不疵细瑕司马法曰军赏不踰月欲民速得为善之利也盖急武功重用人也吉甫之归周厚赐之其诗曰吉甫宴喜既多受祉来归自镐我行永久千里之镐犹以为远况万里之外其勤至矣延寿汤既未获受祉之报反屈捐命之功久挫於刀笔之前非所以劝有功励戎士也昔齐桓前有尊周之功後有?项之罪君子以功覆过而为之讳行事贰师将军李广利捐五万之师糜亿万之费经四年之劳而仅获骏马三十匹虽斩宛王母鼓之首犹不足以复费其私罪恶甚多孝武以为万里征伐不録其过遂封拜两侯三卿二千石百有余人今康居国强於大宛郅支之号重於宛王杀使者罪甚於留马而延寿汤不烦汉士不费什粮比於贰师功德百之且常惠随欲击之乌孙郑吉迎自来之日

逐犹皆裂土受爵故言威武勤劳则大於方叔吉甫列功覆过则优於齐威貳师近事之功则高於安远长罗而大功未着小恶数布臣窃痛之宜以时解县通籍除过勿治尊?爵位以劝有功於是天子下诏曰匈奴郅支单于背畔礼义留杀汉使者吏士甚逆道理朕岂忘之哉所以优游而不征者重动师衆劳将率故隐忍而未有云也今延寿汤睹便宜乘时利结城郭诸国擅兴师矫制而征之赖天地宗庙之灵诛讨郅支单于斩获其首及阼氏贵人名王以下千数虽踰义干法内不烦一夫之役不开府库之藏因敌之粮以贍军用立功万里之外威震百蛮名显四海为国除残兵革之原息边竟得以安然犹不免死亡之患罪当於在奉宪朕甚闵之其赦延寿汤罪勿治诏公卿议焉议者以为宜如军法捕斩单于令匡衡石显以为郅支本亡逃失国窃号絶域非真单于元帝取安远侯郑吉故事封千户衡显复争廼封延壽为义成侯赐汤爵关内侯食邑各三百户加赐黄金百斤告上帝宗庙大赦天下拜延寿为长水校尉汤为射声校尉【陈汤传】

矫节【伪节附】

周勃欲入北军襄平侯纪通尚符节乃令持节矫内勃北军【吕后纪】

少帝令谒者持节劳刘章章欲夺节谒者不肯章乃与载因节信驰斩长乐卫尉吕更始还入北军【同上】

汲黯以便宜持节发河内仓粟以赈贫民请归节伏矫制罪上贤而释之【本传】

戾太子使舍人无且持节夜入未央宫【戾太子传】

征和三年卫太子擅发兵卢贺坐受太子节掠死【功臣表】太子召监北军使者任安发北军兵安受节已闭军门不肯应太子太子败安坐受太子节怀二心要斩【刘屈氂传】

考课

公卿课羣吏

宣帝始亲政事自丞相?下各奉职奏事?传奏其言考试功能侍中尚书功劳当迁及有异善厚加赏赐【本纪】

丙吉曰岁竟丞相课其殿最奏行赏罚【丙吉传】

地节四年诏令郡国岁上系囚?掠笞若瘦死者所坐名县爵里丞相御史课殿最?闻【本纪】

黄龙元年诏曰上计簿具文而已务为欺谩?避其课三公不?为意朕将何任御史察计簿疑

非实者按之使真伪毋相乱【本纪】

孝元使尚书选第中二千石而大鸿胪冯野玉行能第一【本纪】

陈成为御史中丞總领州郡奏事课第诸刺史【本传】班况为河农都尉大司农奏课连最【叙传】

谷永荐薛宣疏曰宣考绩功课简在两府不敢过称【薛宣传】

光禄第郎从官

孝元永光元年诏丞相御史举质朴淳厚谦逊有行者光禄岁以此科第郎从官【本纪】

光禄勳举何武四行【本传】

博士选三科

成帝时博士选三科高第为尚书次为刺史其不通政事?久次补诸侯大傅【孔光传】

孔光?高第为尚书【同上】

州郡课

河南守吴公治平为天下第一召入为廷尉【贾传】儿寛为左内史有军发臣负租课殿当免民恐失之输租不絶课更以最【本传】

刺史以六条问事【百官公卿表】

故事选郡国守相高第为中二千石【朱博传】

宣帝厉精为治二千石有治理効辄以玺书勉厉公卿阙则选诸所表?次用之【循吏传】

宣帝?贤良高第扬州刺史黄霸为颍川太守秩比二千石居官户口岁增治为天下第一召守京兆尹秩二千石坐发民治驰道不先?闻又发骑士诣北军马不适士効乏军兴连贬秩有诏归颍川太守官?八百石居郡中愈治下诏称扬赐爵关内侯黄金百斤秩中二千石【黄霸传】

朱邑北海太守?治行第一入为大司农【朱邑传】尹翁归为扶风盗贼课常为三辅最【尹翁归传】

韩延壽为东郡太守断狱大减为天下最【韩延壽传】河南太守召信臣治行常为第一荆州刺史奏信臣为百姓兴利赐黄金四十斤【召信臣传】

何武为清河太守坐郡中被灾害什四免【何武传】天水太守陈立劝民耕农为下最

陈万年广陵太守高第入为右扶风【陈万年传】

郑昌迁淮阳相以高第入为右扶风【郑弘传】

郡县课

秋冬课吏【尹翁归传】

卜式为成皋令将漕最拜齐太傅【卜式传】

义纵补上党郡中令县亡逋事举第一迁为长陵及长安令【义纵传】

赵广汉为翟阳令?治行尤异迁京辅都尉【赵广汉传】张敞拜胶东相上名尚书调补县令者数十人【张敞传】尹赏?三辅高第选守长安令【尹赏传】

何显家有市籍租常不入县数负其课【何武传】

焦延壽为小黄令臣候司先知奸邪盗贼不得发举最当先【京房传】

朱博栌阳令徙云阳平陵三县?高第入为长安令【朱博传】萧育为茂陵令会课育第六而漆令郭舜殿见责问育为之请扶风怒曰君课第六裁自脱何暇欲为左右言及罢出传召茂陵令诣後曹当?职事对【萧育传】

功次

周仁为太子舍人积功迁至大中大夫【周仁传】

卫綰为郎功次迁中郎将【卫綰传】

石奋积功劳孝文时官至大中大夫【石奋传】

赵禹?刀笔吏积劳为御史【赵禹传】

儿寬为掌故功次补廷尉文学卒史【儿寬传】

田广明?郎为天水司马功次迁河南都尉【田广明传】王欣?郡县吏积功稍迁被阳令【王欣传】

冯奉世为郎昭帝时?功次补武安长【冯奉世传】

冯野王为太子中庶子?功次补武阳长【冯野王传】冯遂为美阳令功次迁长乐屯卫司马【冯遂传】

冯谭?孝廉为郎功次补天水司马

薛恭本郡孝者恭次稍迁

平当少为大行治礼丞功次补大鸿胪文学【平当传】

元帝数召见京房对曰古帝王以功举贤则万化成瑞应着末世以毁誉取人故业功废而致灾异宜令百官各试其功灾异可息诏使房作其事房奏考功课吏法上令公卿朝臣与房会议温室皆以房言烦碎令上下相司不可许上意乡之时部刺史奏事京师上召见诸刺史令房晓以课事刺史复以为不可行惟御史大夫郑弘光禄大夫周堪初言不可後善之上令房上弟子晓知考功课吏事者欲试用之房上中郎任良姚平愿以为刺史试考功法臣得通籍殿中为奏事以防雍塞石显五鹿充宗皆疾房欲远之建言宜试以房为郡守元帝於是以前房为魏郡太守秩八百石居得以考功法治郡房自请愿无属刺史得除用它郡人自第吏千石已下岁竟乘传奏事天子许焉房自知数以论议为大臣所非内与石显五鹿充宗有隙不欲远离左右及为太守忧惧以建昭二年二月朔拜上封事曰辛酉已来蒙气衰去大阳精明臣独欣然以为陛下有所定也然少阴倍力而乘消息臣疑陛下虽行此道犹不得如意臣窃悼惧守阳平侯凤欲见未得至己卯臣拜为太守此言上虽明下犹胜之效也臣出之後恐必为用事所蔽身死而功不成故愿岁尽乘传奏事蒙哀见许迺辛巳蒙气复乘卦大阳侵色此上大夫覆阳而上意疑也己卯庚辰之间必有欲隔絶臣令不得乘传奏事者房未发上令阳平侯凤承制诏房止无乘传奏事房意愈恐去至新丰因邮上封事房去月余竟下狱【京房传】

官称

大府【杜周传师古曰大府丞相御史之府也张汤传又注云大府丞相府也二说不同】

二府【刘向传如淳曰府丞相御史也】

两府【杜周传如淳曰丞相御史府也】

四府【赵充国传四府辛武贤小弟汤】

五府【赵充国传五府复举辛汤段会宗传五府举会宗】

从官【元纪令从官给事官司马中者师古曰从官亲近天子常侍从者皆是也】

中都官【百官表司隶校尉侍御从中都官师古曰中都官京师诸官府也】

中朝【刘辅传孟康曰中朝内朝也大司马左右前後将军侍中常侍散骑诸吏为中朝丞相以下至六百石为外朝也】

外官【终军传师古曰谓非侍卫之臣】

左官【诸侯王表作左官之律应劭曰又道上古今舍天子而仕诸侯故谓之左官也】

郡将【严延年传延年新将师古曰谓郡守为郡将者以其兼领武事也】

郡主吏【晁错传师古曰郡守也】

府官【贡禹传师古曰谓太守之府】

西汉会要卷三十九

卷四十

钦定四库全书

西汉会要卷四十

宋 徐天麟 撰

职官十

集议上

议立君

高后四年诏曰皇帝疾久不已不可属天下其议代之羣臣顿首奉诏【本纪】

汉大臣使人迎代王郎中令张武等议皆曰愿称疾无往中尉宋昌进曰大王勿疑也【文纪按张武宋昌皆代邸官故与此议】

代王入代邸羣臣上议曰丞相臣平大尉臣勃大将军臣武御史大夫臣苍宗正臣郢朱虚侯臣章东牟侯臣兴居典客臣揭再拜言云云臣谨请阴安侯顷王后【兄仲妻也】琅琊王泽列侯吏二千石议大王高皇帝子宜为嗣【文纪】

元平元年昭帝崩亡嗣羣臣议所立咸持广陵王郎有上书言王不可以承宗庙霍光承皇太后诏召昌邑王既至即位行淫乱光遂召丞相御史将军列侯中二千石大夫博士会议未央宫羣臣皆惊愕失色田延年曰今日之议不得旋踵於是议者皆叩头曰唯将军令光与羣臣连名奏王尚书令读奏曰丞相臣敞等云云臣敞等谨与博士臣霸臣隗舍臣德臣虞舍臣射臣苍等议当废太后诏归贺昌邑光坐庭中会丞相以下定议所立广陵王已前不用及燕刺王谋反其子不在议中近亲唯有皇曾孙光遂与丞相上奏皇太后诏曰可【霍光传】

议储嗣

文帝元年有司请蚤建太子诏曰其安之有司固请更议不宜上乃许之【本纪】

成帝召丞相翟方进御史大夫孔光右将军廉褒後将军朱博皆引入禁中议中山定陶王谁宜为嗣者方进王根以为定陶王宜为嗣褒博皆如方进根议光独以为中山王宜为嗣上以礼兄弟不相入庙遂立定陶王为太子【孔光传】

议宗庙

高后七年诏曰昭灵夫人太上皇妃也武哀侯宣夫人高帝兄姊也号諡不称其议尊号丞相臣平等请尊昭灵夫人曰昭灵后武哀侯曰武哀王宣夫人曰昭哀后【高后纪】

孝景元年诏曰其为孝文皇帝庙为昭德之舞以明休德其与丞相列侯中二千石礼官具礼仪奏丞相臣嘉等谨议世功莫大於高皇帝德莫盛於孝文皇帝高帝庙宜为帝者太祖之庙孝文皇帝庙宜为帝者太宗之庙制曰可【景纪】

宣帝即位诏丞相御史曰孝武庙乐未称其与列侯二千石博士议於是羣臣大议庭中皆曰宜如诏书长信少府夏侯胜独曰不宜立庙乐公卿共难胜曰此诏书也胜曰诏书不可用也於是丞相义御史大夫广明劾奏胜非议诏书毁先帝不道下狱有司遂请尊孝武帝为世宗庙奏盛德文始五行之舞【夏侯胜传】本始元年诏曰故皇太子在湖未有号諡岁时祠其议諡置园邑【本纪】

元帝时贡禹奏言古者天子七庙今孝惠孝景庙皆亲尽宜毁及郡国庙不应古礼天子是其议元光四年下诏先议罢郡国庙其与将军列侯中二千石二千石诸大夫博士议郎议丞相元成御史大夫郑弘太子太傅严彭祖少府欧阳地余谏大夫尹更始等七十人皆曰宗庙在郡国宜亡修臣请勿复修奏可因罢郡国庙後月余复下诏曰祖宗之庙不敢自黷其与将军列侯中二千石二千石诸大夫博士议元成等四十四人奏议?为高帝宜为帝者太祖之庙世世不毁承後属尽者宜毁今宗庙异处昭穆不序宜入就太祖庙而序昭穆如礼大司马车骑将军许嘉等二十九人?为孝文宜为帝者太宗之庙廷尉忠?为孝武宜为世宗之庙谏大夫尹更始等十八人?为皇考庙非正礼宜毁於是上重其事依违者一年下诏曰云云其正礼仪元成等奏曰祖宗之庙世世不毁继祖以下五世而迭毁云云奏可後岁余元成薨匡衡为丞相上诏问衡议欲复之衡深言不可久之遂尽复所罢寝庙园皆修祀如故哀帝即位丞相光太尉武奏言迭毁之次当?时定臣请与羣臣杂议奏可於是光禄勳彭宣詹事满昌博士左咸等五十三人皆以为继祖宗?下五世而迭毁孝武皇帝亲尽宜毁太仆王舜中垒校尉刘歆议?七庙言之孝武皇帝未宜毁上览其议而从之制曰太仆王舜中垒校尉歆议可至平帝元始中大司马王莽奏皇考庙本不当立又南陵云陵园陵名未正谨与大司徒晏等百四十七人议请皇考庙毁勿修罢南陵云陵为县奏可【韦玄成传】

议郊祀

孝文十五年黄龙见於成纪上乃下诏议郊祀【本纪】元狩二年天子郊雍议曰今上帝朕亲郊而后土母祀则礼不答也有司与太史公祠官宽舒等议云云於是天子遂东立后土祠如宽舒等议【郊祀志】

李延年以好音见上善之下公卿议曰民间祠有鼓舞乐今郊祀而无乐岂称乎公卿曰云云【同上】

成帝初即位丞相衡御史大夫谭奏言甘泉泰畤河东后土之祠宜可徙置长安愿与羣臣议

定奏可大司马车骑将军许嘉等八人?为宜如故右将军王商博士师丹议郎翟方进等五十人?为宜徙於是衡譚奏议曰今议者五十八人其五十言当徙八人以为不宜宜於长安定南北郊天子从之【同上】

平帝元始五年大司马王莽奏臣谨与太师孔光长乐少府平晏大司农左咸中垒校尉刘歆大中大夫朱阳博士薛顺议郎国由等六十七人议皆曰宜如建始时丞相衡等议复长安南北郊奏可後莽又奏言臣谨与太师光大司徒宫羲和歆等八十九人议皆曰宜令墜祗称皇墜后祗兆曰广時奏可【同上】

议典礼

文帝十五年使博士诸生刺六经中作王制谋议巡守封禪事【郊祀志】

武帝建元元年议立明堂【本纪又见申公传】

元朔元年诏曰朕深诏执事兴廉举孝今或至闔郡而不荐一人其与中二千石礼官博士议不举者罪【本纪】

五年诏太常其议与博士弟子员丞相弘谨与太常臧博士平等议曰云云【儒林传序】

元鼎四年六月汾阴得宝鼎迎至长安公卿大夫皆议尊宝鼎天子曰鼎曷为出哉有司皆言鼎宜视宗祢庙藏於帝庭以合明应制曰可【郊祀志】

自得宝鼎上与公卿诸生议封禪封禪用希旷絶莫知其仪体而羣儒采封禪尚书周官王制之望祀射牛事齐人丁公年九十余对曰云云羣臣既已不能辨明封禪事上为封祠器以示羣儒於是尽罢羣儒弗用【同上】

帝议欲放古巡守封禪之事诸儒对者五十余人未能有所定上乃自制仪颇采儒术以文之焉褚大与儿寛议封禪於上前大不能及【儿寛传】

元封七年大中大夫公孙卿壶遂大史令司马迁等言历纪废坏宜改正朔上乃诏御史大夫寛曰与博士共议今宜何以为正朔服色何上寛与博士赐等议皆曰云云遂诏卿遂等与侍郎尊大典星射姓等议造汉历【律历志】

宣帝时美阳得鼎献之下有司议多?为宜荐见在宗庙如元鼎时故事张敞上议曰今此鼎细小不宜荐见於宗庙制曰京兆尹议是【郊祀志】

石渠论五经同异【见图书条】

司隶校尉涓𡇗奏言丞相请遣掾史以宰士督察天子奉使命大夫甚悖逆顺之理愿下中朝特进列侯将军?正国法度议者以为丞相掾不宜移书督趣司隶【翟方进传】

哀帝即位有诏问丞相大司空定陶共王太后宜何居礼光议以为定陶太后宜改筑宫大司空何武曰可居北宫上从武言【孔光传】

傅太后欲与成帝母俱称尊号羣下多顺指言宜立尊号唯师丹与孔光持不可上重违大臣又内迫傅太后依违者连岁【同上】

议封建

汉五年诏诸侯王视有功者立?为燕王荆王臣信等十人皆曰太尉卢绾功最多请立以为燕王【本纪下同】六年诏齐其复?为诸侯及择寛惠修洁者王齐荆地韩王信奏请云云

十一年诏王相国通侯吏二千石择可立为代王者燕王绾相国何等三十三人皆曰子常请立?为代王

诏择可以为梁王淮阳王者燕王绾相国何等请立子恢为梁王子友为淮阳王

诏王相国择可立为淮阳王者羣臣请立子长为王十二年诏朕欲复立吴王其议可者长沙王臣等言沛侯濞请立为吴王

诏诸侯王议可立为燕王者长沙王臣等请立子建为燕王

武帝元狩六年大司马臣去病请定皇子位制曰下御史丞相臣青翟御史大夫臣阳太常臣充大行令臣息太子少傅臣安行宗正事谨与二千石臣贺等议制曰更议丞相御史谨与列侯臣婴齐中二千石臣贺谏大夫博士臣安等议制曰云云丞相臣青翟御史大夫臣汤昧死言臣青翟等与列侯二千石谏大夫博士臣庆等议奏留中不下臣青翟等窃与列侯臣壽成等二十七人议制曰立皇子闲为齐王旦为燕王胥为广陵王【三王世家】

昌邑王贺薨豫章太守廖奏言宜以礼絶贺以奉天意愿下有司议议皆?为不宜为立嗣【昌邑王传】

议功赏

汉五年列侯毕已受封奏位次皆曰平阳侯曹参功最多宜第一关内侯鄂千秋时为谒者进曰羣臣议皆误萧何当第一曹参次之上曰善乃令何第一萧何功虽高待鄂君乃得明于是因鄂千秋故所食关内侯邑二千户封为安平侯【萧何传】

高后二年诏曰欲差次列侯功?定朝位其与列侯议定奏之丞相臣平言谨与绛侯臣勃曲周侯臣商颍阴侯臣婴安国侯臣陵等议云云奏可【本纪】

冯奉世击莎车王自杀上甚说下议封奉世丞相将军皆曰奉世功效尤着宜加爵土之赏少府萧望之独以奉世不宜受封上善望之议【冯奉世传】

甘延壽陈汤斩郅支单于既至论功石显匡衡以为延壽汤擅兴师矫制为国招难渐不可开元帝内嘉延壽汤功而重违衡显之议议久不决故宗正刘向上疏曰宜尊宠爵位以劝有功於是天子下诏曰其赦延壽汤罪勿治诏公卿议封焉议者以为宜如军法捕斩单于令匡衡石显以为郅支本非真单于元帝取郑吉故事封千户衡显复争廼封延壽为义成侯赐汤爵关内侯【陈汤传】

成帝既罢昌陵以淳于长首建忠策下公卿议封长平当以长虽有善言不应封爵之科当坐前议不正左迁钜鹿太守後遂封长【平当传】

西汉会要卷四十

卷四十一

钦定四库全书

西汉会要卷四十一

宋 徐天麟 撰

职官十一

集议下

议民政

文帝元年三月诏曰方春和时吾百姓鰥寡孤独穷困之人或阽於死亡其议所以振贷之【本纪】

後元年诏曰间者数年岁比不登其与列侯吏二千石博士议之有可以佐百姓者无有所隐【同上】

武帝时公孙弘奏言禁民亡得挟弓弩便上下其议吾邱壽王对曰大不便书奏上以难丞相弘弘诎服焉【吾邱壽王传】

元鼎六年上曰今内史稻田租挈重不与郡同其议减令吏民勉农尽地利平繇行水勿使失时【沟洫志】昭帝始元六年二月诏有司问郡国所举贤良文学民所疾苦议罢盐铁榷酤【纪详见盐铁条】

元帝时贡禹言宜罢采珠玉金银铸钱之官毋复以为币除其贩卖租铢之律租税皆以布帛及谷议者以为交易待钱布帛不可尺寸分裂禹议亦寝【食货志下】禹以为宜令民七岁去齿乃出口钱年二十乃算天子下其议令民产子七岁乃出口钱自此始【传】成帝建始三年京师民言大水至召公卿议大将军凤以为云云羣臣皆从凤议左将军王商独曰必讹言也上乃止【王商传】

有上书言古者以龟贝为货今以钱易之民以故贫宜可改币上以问师丹丹对言可改章下有司议皆以为行钱以来久难卒变易【师丹传】

议法制

孝文二年诏丞相太尉御史令犯法者已论而使无罪之父母妻子同产坐之朕甚弗取其议

丞相周勃陈平奏臣之愚计以为如其故便文帝复曰云云朕未见其便宜熟计之平勃乃曰臣等谨奉诏【刑法志】十三年制诏御史其除肉刑丞相张苍御史大夫冯敬言臣谨议云云臣昧死请制曰可【刑法志】

景帝元年诏吏所受监临以饮食免重受财物贱买贵卖论轻廷尉与丞相更议着令廷尉信谨与丞相议曰云云【本纪】

宣帝时京兆尹张敞上书愿令诸有罪皆得以货入谷八郡赎罪事下有司萧望之与少府李疆议云云於是天子复下其议两府丞相御史以难问敞敞曰云云疆复对曰不便遂不施敞议【望之传】

哀帝即位诏曰诸侯王列侯公主吏二千石及豪富民多蓄奴婢田宅亡限其议限制【本纪】

议同姓

淮南王长谋反召至长安丞相臣苍典客臣敬行御史大夫事宗正臣逸廷尉臣贺备盗贼中尉臣福昧死言长当弃市制曰朕不忍加法於王其与列侯二千石议臣苍臣敬臣逸臣福臣贺昧死言臣谨与列侯吏二千石臣婴等四十三人议宜论如法

元朔中肥如令郢人昆弟上书具言燕王定国事下公卿议皆曰当诛上许之【燕王泽传】

淮南王安反衡山王赐淮南王弟当坐收有司请逮捕衡山王上曰诸侯各以其国为本不当相坐与诸侯王列侯议赵王彭祖列侯让等四十三人皆曰云云胶西王端议曰云云丞相弘廷尉汤?闻【本传】

议大臣

始元四年桑弘羊子廷亡过父故吏侯史吴会赦吴得自出系狱廷尉少府杂治及事丞相车千秋召中二千石博士会公车门议问吴法明日千秋封上衆议大将军光以千秋擅召中二千石以下遂下少府廷尉狱

萧望之劾奏韩延寿上僭不道又自陈前为延寿所奏今复举延寿罪衆庶皆以臣怀不正之心侵冤延寿愿下丞相中二千石博士议其罪事下公卿皆以延寿前既无状後复诬愬典法大臣欲以解罪狡猾无道竟坐弃市【延寿传】

定陵侯淳于长坐大逆诛长小妻迺始等六人皆以长事未发觉时弃去或更嫁及长事发丞相方进大司空武议迺始等於法无以解请论孔光议以为不当坐有诏光议是【孔光传】

哀帝初薛宣子况赅客杨明杀申咸事下有司御史中丞衆等奏况明皆弃市廷尉以为皆全为城旦上以问公卿议臣丞相光大司空丹以中丞议是自将军以下至博士议郎皆是廷尉【薛宣传】

哀帝时丞相王嘉上书荐故廷尉梁相等尚书劾奏嘉言事恣意迷国罔上不道下将军中朝者议左将军公孙禄司隶鲍宣光禄大夫孔光等十四人皆以为嘉应迷国不道法光禄大夫诸吏给事中龚胜独书议曰嘉迷国不疑今举相等过微薄日暮议者罢明旦复会左将军禄问胜君议亡所据今奏当上宜何从胜曰将军以胜议不可者通劾之遂可光奏光等请诏嘉诣狱制曰骠骑将军御史大夫中二千石二千石博士议郎卫尉云等五十人以为如光等言可许议郎龚等以为宜夺爵土免为庶人永信少有猛等十人以为大臣括髮关械裸躬就笞非所以重国褒宗庙也有诏假谒者节召丞相诣廷尉诏狱【龚胜王嘉传】

傅太后怨傅喜使孔乡侯晏风丞相令奏免喜侯朱博受诏与御史大夫赵玄议元博奏请免为庶人上疑博玄承指诏左将军彭宣与中朝者杂问宣等劾奏博宰相玄上卿晏以外亲不忠不道臣请诏谒者召博玄晏诣廷尉诏狱制曰将军中二千石二千石诸大夫博士议郎议右将军蟜望等四十四人以为如宣等言可许諫大夫龚胜等十四人以为晏宜与博元同罪罪皆不道上减玄死罪三等削晏户四分之一假谒者节召丞相诣廷尉诏狱【博传】

议边事

孝文即位将军陈武议曰南粤朝鲜宜用征伐孝文曰朕能任衣冠念不到此且无议军【律书】

四年单于遗汉书书至汉议击与和亲孰便公卿皆曰和亲甚便汉许之【匈奴传】

景帝时匈奴徐奴等五人降汉上欲侯之周亚夫曰云云上曰丞相议不可用【本传详见处降条】

武帝时匈奴求和亲羣臣议上前博士狄山曰和亲便上问御史大夫张汤汤曰此愚儒亡知【张汤传】元光二年初匈奴来请和亲上下其议大行王恢议曰不如勿许御史大夫韩安国曰不如和亲羣臣议多附安国於是上许和亲明年马邑豪聂一言匈奴可诱以利致之上召问公卿大行王恢对曰击之便御史大夫安国曰勿击便恢曰不然击之便安国曰不然勿击便恢曰不然击之便安国曰不然勿击便恢曰不然云云上曰善迺从恢议【韩安国传】

中大夫主父偃盛言朔方地肥饶外阻河内省转输减?广中国灭胡之本也上览其说下公卿议皆言不便公孙弘曰云云朱买臣难诎弘遂置朔方本偃计也【主父偃传】

乌孙使使献马愿得尚汉公主为昆弟天子问羣臣议计【西域传】

太初元年李广利诣宛取马二岁人少不足?拔宛其夏汉亡浞野之兵於匈奴公卿议者皆愿罢宛【李广利传】

帝末年悔征伐之事迺下诏曰迺者以缚马书徧视丞相御史二千石诸大夫郎为文学者乃至郡属国都尉成忠赵破奴等皆以虏自缚其马不祥甚哉或以为欲以见强【西域传】

神爵元年赵充国击羌虏欲以威信招降?开及刼掠者解散虏谋徼极迺击之辛武贤奏言云云天子下其书充国令与校尉以下吏士知羌事者博议充国及长史董通年以为此殆空言非至计也天子下其书公卿议者咸以为不先破?开则先零未可图也上乃拜武贤为破羌将军赐玺书嘉纳其册以书敕责充国【赵充国传】

充国上屯田奏奏每上辄下公卿议臣初是充国计者什三中什五最後什八有诏诘前言不便者皆顿首服丞相魏相曰後将军数画军册其言常是臣任其计必可用也【赵充国传】

甘露二年匈奴欵塞诏有司议咸曰礼仪宜如诸侯王称臣昧死再拜位次诸侯王诏曰其以客礼待之位诸侯王上【宣纪】

匈奴来朝诏公卿议其仪丞相霸御史大夫定国议曰其礼仪宜如诸侯王位次其下萧望之以为位在诸侯王上天子采之【萧望之传】

初元元年珠崖反【本纪作三年】上与有司议大发军待诏贾捐之建议以为不当击上使侍中王商诘问捐之捐之对奏上以问丞相御史御史大夫陈万年以为当击丞相于定国以为捐之议是上迺从之【贾捐之传】甘延寿陈汤上疏斩郅支首及名王以下宜梟头藁街事下有司丞相匡衡御史大夫繁延寿以为宜勿梟车骑将军许嘉右将军王商?为宜梟有诏将军议是【陈汤传】

永光二年陇西羌反诏召丞相韦玄成御史大夫郑弘大司马车骑将军王接左将军许嘉右将军冯奉世入议【冯奉世传】

呼韩邪单于上书愿保塞请罢边备塞吏卒天子令下有司议议者皆以为便郎中侯应习边事以为不可许上问状应对奏天子有诏勿议罢边事【匈奴传】河平元年匈奴使者伊邪莫衍言欲降下公卿议议者或言宜如故事受其降光禄大夫谷永议郎杜钦以为不如勿受对奏天子从之【同上】

成帝时单于当来朝遣使言病愿朝明年息夫躬上奏以为疑有他变书奏上引见躬召公卿将军大夫议左将军公孙禄以为躬欲逆诈不可许躬掎禄曰云云臣与禄异议未可同日语也上曰善乃罢羣臣独与躬议【息夫躬传】

建平四年单于上书愿朝五年上以问公卿公卿以为可且勿许单于使辞去未发黄门郎杨

雄上书諫天子寤焉召还使者更报单于书而许之【匈奴传】

杂錄

元封四年关东流民二百万口无名数者四十万公卿欲议请徙流民於边以?之上以为石庆老谨不能与其议乃赐丞相告归而案御史大夫以下议为请者【万石君传】

成帝封淳于长平当坐前议不正左迁钜鹿太守【见上议功赏条】

孔光为御史大夫以议不中意左迁廷尉【本传】

哀帝时马宫与丞相御史杂议帝祖母傅太后諡及元始中王莽发傅太后陵从归定陶以民礼葬之追诛前议者【马宫传】

董仲舒在家朝廷如有大议使使及廷尉张汤就其家而问之【董仲舒传】

赵充国罢就第朝廷每有四夷大议常与参兵谋问筹策焉【本传】

张禹家居以特进为天子师国家有大政必与定议【本传】

西汉会要卷四十一

卷四十二

钦定四库全书

西汉会要卷四十二

宋 徐天麟 撰

职官十二

告宁

告归【高纪高祖尝告归之田李斐曰休谒之名吉日告凶日宁孟康曰古者名吏休假曰告汉律吏二千石有予告有赐告予告者在官有功最法所当得也赐告者病满三月当免天子优赐其告使得带绶印将官属归家治病至成帝时郡国二千石赐告不得归家至和帝时予赐皆絶师古曰告者请谒之言谓请休耳或谓之谢谢亦告也】

五日休吏【薛宣传师古曰冬夏之日至不省官事故休吏】

五日洗沐【郑庄】

郎官五日【阙 石庆传】

汲黯为主爵都尉多病病且满三月上常赐告者数最後严助为请告【汲黯传】

故事公卿病辄赐告谷永为大司农病三月有司奏请免独即时免【谷永传】

琅邪大守冯野王病满三月赐告与妻子归杜陵就医药御史中丞劾奏野王赐告养病而私自便持虎符出界归家奉诏不敬杜钦曰窃见令曰吏二千石告过长安谒不分别予赐今有司?为予告得归赐告不得归是一律两科失省刑之意夫三最予告令也病满三月赐告诏恩也今告则得诏恩则不得失轻重之差又二千石病赐告得归有故事不得去郡亡着令即以二千石守千里之地任兵马之重不宜去郡将以制刑为後法者则野王之辜在未制令之前也不听竟免野王郡国二千石病赐告不得归家自此始【本传】

郎官故事令郎出钱市财用给文书廼得出名曰山郎【张晏曰山财用之所出故取名焉】移病尽一日辄偿一沐或至岁余不得沐其豪富郎日出游戏或行钱得善部【师古曰郎官之职各有所部】杨惲为中郎将罢山郎移长度大司农?给财用其?病休谒洗沐皆以法令从事【杨惲传】

孝哀初即位令博士弟子父母死予宁三年【本纪】

奉朝请【朝朔望】

时会朝请【宣纪如淳曰春曰朝秋曰请】

丞相张禹逊位?特进奉朝请

传喜位特进奉朝请

冯参以列侯奉朝请

杜缓前免太常?列侯奉朝请

关内侯萧望之给事中朝朔望坐次将军

万石君奋归老於家?岁时为朝臣

苏武以着节老臣令朝朔望【并本传】

久任

孝文时吏居官者或长子孙?官为氏仓氏库氏则仓库吏之後也其二千石长吏亦安官乐职然後上下相望莫有苟且之意【王嘉传】

武帝即位岁为吏者长子孙居官者?为姓号【平準书】孝宣地节二年上始亲政事侍中尚书功劳当迁及有异善至于子孙终不改易【本纪】

宣帝以为太守吏民之本也数变易则下不安民知其将久不可欺罔廼服从其教化

黄霸曰数易长吏送故迎新之费及奸吏缘絶簿书盗财物公私耗费甚多皆当出於民【黄霸传】

丞相

萧何曹参公孙贺并十三年

张苍孝文四年十二月相後元二年八月免凡十五年

陈平孝惠元年相孝文二年薨凡十二年

石庆孝武元鼎五年相大初二年薨凡十年

于定国魏相并九年

光禄勳

徐自为二十六年

王恬启二十五年 张武二十三年

周仁十三年 于永十六年

太仆

夏侯婴自高帝为沛公时常奉车至孝文八年薨

廷尉

于定国十八年

大鸿臚

商邱成十二年

大司农

高帝元年执盾襄为治粟内史至孝景後二年大农令惠凡六十五年【恐表有阙文】

中尉

张欧九年

御史中丞

咸宣为御史及中丞者几二十岁

郎

张释之为骑郎十年不得调

杨雄为郎给事黄门三世不徙官

尚书

故事尚书?久转迁【孔光传】

大乐

乐家有制氏目雅乐声律世世在大乐官

刺史

故事刺史居部九岁举为守相

郡守

黄霸为颍川八年

张敞为京兆九岁

恩赐

带剑履上殿入朝不趋

高帝五年奏位次令萧何第一赐带剑履上殿入朝不趋

奏事不名入殿不趋

高帝褒赏元功相国萧何邑户既倍又蒙殊礼奏事不名入殿不趋

入殿门不趋杀人不死

高帝欲自击陈豨周緤泣谏上?为爱我赐入殿门不趋杀人不死

几杖不朝

吴王濞称疾不朝京师及後使人为秋请上赐吴王几杖者不朝

孝武元朔二年赐淮南王菑川王几杖毋朝【师古曰安忘皆武帝诸父列也】

天子旌旗

梁孝王武得赐天子旌旗从千乘万骑出称警入言？

江都易王非以军功赐天子旌旗

祭酒

吴王濞赐号为刘氏祭酒

宣帝以苏武着节老臣号为祭酒

外繇

卜式持钱二千万与河内太守？给徙民上廼赐式外繇四百人

安车驷马

薛广德为御史大夫乞骸骨安车驷马黄金六十斤罢

杜延年为御史大夫乞骸骨赐安车驷马

永始中左将军史丹乞骸骨赐安车驷马归第大司空彭宣乞骸骨王莽恨宣求退故不赐安车驷马

武库兵

母将隆曰汉家边吏职在距寇亦赐武库兵皆任其事然後蒙之

车屏官属

宣帝？贤良高第扬州刺史黄霸为颍川太守赐车盖特高一丈别驾主簿车缁油屏泥於轼前

金【常赐也今但举其略】

赐张良金百鎰【本传服？曰二十四曰鎰师古曰秦以鎰名金若汉之论斤也】 赐将军四斤金【惠纪晋灼曰凡言黄金真金也不言黄谓钱也食货志黄金一斤直钱万师古曰诸赐言

黄金者皆与之金不言黄者一金与万钱也】

宣帝时郡国有理効辄增秩赐金

常赐

养牛 上尊酒

甲第 奴婢

钱 缾帛

东园秘器 冢地

致仕

万石君奋?上大夫禄归老於家?岁时为朝臣周仁病免?二千石禄归老

张欧以上大夫禄归老於家

韦贤七十余为相地节三年?老病乞骸骨赐黄金百斤罢归赐第一区丞相致仕自贤始

薛广德为御史大夫乞骸骨赐安车驷马黄金六十斤罢

杜延年为御史大夫乞骸骨天子优之使光禄大夫持节赐延年黄金百斤牛酒加致医药延年遂称病笃赐安车驷马罢就第

疏广疏受父子并为师傅俱上疏乞骸骨上?其年皆老许之加赐黄金二十斤皇太子赠?五十斤公卿大夫故人邑子设祖道供张东都门外送者车数百两孝平元始元年令天下吏比二千石?上年老致仕者三分故禄终其身

龚胜邴汉俱乞骸骨惟元始二年六月庚寅光禄大夫大中大夫耆艾二人?老病罢太皇太后使谒者仆射策诏之曰盖闻古者有司年至则致事所?恭逊而不尽其力也今大夫年至矣朕愍?官职之事烦大夫其上子若孙若同产同产子一人大夫其修身守道?终高年赐帛及行道舍宿岁时羊酒衣衾皆如韩福故事所上子男皆除为郎 【并本传】

图功臣

孝宣甘露三年单于始入朝帝思股肱之美迺图画其人於麒麟阁法其形貌书其官爵姓名

唯霍光不名凡十一人【苏武传】

大将马将军博陆侯姓霍氏

卫将军富平侯张安世

车骑将军龙额侯韩增

後将军营平侯赵充国

丞相高平侯魏相

丞相博阳侯丙吉

宗正阳城侯刘德

御史大夫建平侯杜延年

少府梁邱贺

太子太傅萧望之

典属国苏武

初赵充国?功德与霍光等列画未央宫成帝时西羌有警上思将帅之臣追美充国廼召黄门郎杨雄即充国图画而颂之【赵充国传】

孝平元始四年诏书祀百辟卿士有益於民者蜀郡以文翁九江?召父应诏书【循吏传】

西汉会要卷四十二

卷四十三

钦定四库全书

西汉会要卷四十三

宋 徐天麟 撰

职官十三

改官名

秦兼天下立百官之职汉因循而不革明简易随时宜也其後稍有所改【表】

孝景中六年更命廷尉为大理将作少府为将作大匠主爵中尉为都尉长信詹事为长信少府将行为大长秋大行为行人奉常为太常典客为大行治粟内史为大农以大内为二千石置左右内官属大内【史记本纪】孝武太初元年定官名【本纪】

初汉兴袭秦官置丞相御史大夫太尉至武帝罢太尉始置大司马以冠将军之号非有印绶官属也及成帝时何武为九卿建言古者民朴事约国之辅佐必得贤圣然犹则天三光备三公官各有分职今末俗文弊政事烦多宰相之才不能及古而丞相独兼三公之事所以久废而不治也宜建三公官定卿大夫之任分职授政以考功效其後上以问师安昌侯张禹禹以为然时曲阳侯王根为大司马骠骑将军而何武为御史大夫於是上赐曲阳侯根大司马印绶置官属罢骠骑将军官以御史大夫何武为大司空封列侯皆增奉如丞相以备三公官焉议者多以为古今异制汉自天子之号下至佐史皆不同於古而独改三公职事难分明无益於治乱是时御史府吏舍百余区井水皆竭又其府中列栢树尝有野鸟数千栖宿其上晨去暮来号曰朝夕鸟去不来者数月长老异之後二岁余朱博为大司空奏言帝王之道不必相袭各繇时务高皇帝以圣德受命建立鸿业置御史大夫位次丞相典正法度以职相参总领百官上下相监临历载二百年天下安宁今更为大司空与丞相同位未获嘉佑故事选郡国守相高第为中二千石选中二千石为御史大夫任职者为丞相位次有序所以尊圣德重国相也今中二千石未更御史大夫而为丞相权轻非所以重国政也臣愚以为大司空官可罢复置御史大夫遵奉旧制臣愿尽力以御史大夫为百僚率哀帝从之廼更拜博为御史大夫会大司马喜免以阳安侯丁明为大司马卫将军置官属大司马冠号如故事後四岁哀帝遂改丞相为大司徒复置大司空大司马焉【朱博传】

哀帝元寿二年五月正三公官分职大司马卫将军董贤为大司马丞相孔光为大司徒御史大夫彭宣为大司空正司直司隶造司寇职事未定帝崩【本纪】

初何武为大司空又与丞相方进共奏言古选诸侯贤者以为州伯书曰咨十有二牧所以广

聪明烛幽隐也今部刺史居牧伯之位秉一州之统选第大吏所荐位高至九卿所恶立退任重职大春秋之义用贵治贱不以卑临尊刺史位下大夫而临二千石轻重不相準失位次之序臣请罢刺史更置州牧以应古制奏可及博奏复御史大夫官又奏言汉家至德溥大宇内万里立置郡县部刺史奉使典州督察郡国吏民安宁故事居部九岁举为守相其有异材功效着者辄登擢秩卑而赏厚咸劝功乐进前丞相方进奏罢刺史更置州牧秩真二千石位次九卿九卿阙以高第补其中材则苟自守而已恐功效陵夷奸轨不禁臣请罢州牧置刺史如故奏可【朱博传】

孝平元始五年更公卿大夫八十一元士官位名次及十二州名分界郡国所属罢置改易天下多事吏不能纪【本纪】

省官

汉吏员自丞相至佐史凡十三万二百八十五人【表】孝文後六年大旱蝗损郎吏员

孝武损郎员【三王世家】

孝昭元平元年诏曰者省用罢不急官【本纪】

戒敕官吏

孝文十二年诏曰吾诏书数下岁劝民种植而功未兴是吏奉吾诏不勤而劝民不明也且吾农民甚苦而吏莫之省将何以劝焉【纪下同】

孝景後二年诏曰今岁或不登民食颇寡其咎安在或许伪为吏吏以货赂为市渔夺百姓侵牟万民县丞长吏也奸法与盗盗甚无谓也其令二千石各修其职不事官职耗乱者丞相以闻请其罪

孝武元狩六年诏曰夫仁行而从善义立则俗易意奉宪者所以导之未明与将百姓所安殊路而矫?吏因乘執?侵蒸庶邪今遣博士大等六人循行天下存问鰥寡孤独及冤失职奸?为害野荒治苛者举奏孝宣地节四年诏曰朕惟百姓失职不贍吏或营私烦扰不顾厥咎又曰令甲死者不可生刑者不可息此先帝之所重而吏未称今系者或以掠辜若饥寒瘦死狱中何用心逆人道也朕甚痛之其令郡国岁上系囚以掠笞若瘦死者所坐名县爵里丞相御史课殿最以闻元康二年正月诏曰今吏修身奉法未有能称朕意者朕甚愍焉其赦天下与士大夫厉精更始

五月诏曰狱者万民之命所以禁暴止邪养育羣生也能使生者不怨死者不恨则可谓文吏矣今则不然用法或持巧心析律二端深浅不平增辞饰非以成其罪奏不如实上亦亡繇知此朕之不明吏之不称四方黎民将何仰哉二千石各察官属勿用此人吏务平法或擅兴繇

役饰厨传称过使客越职踰法?取名誉譬犹践薄冰以待白日岂不殆哉

黄龙元年诏曰上古之治君臣同心举措曲直各得其所朕数诏公卿务行宽大顺民所疾苦今吏或以不禁奸邪为宽大纵释有罪为不苛或以酷恶为贤皆失其中奉诏宣化如此岂不缪哉方今天下少事繇役减省兵革不动而民多贫盗贼不止其咎安在上计簿具文而已务为欺谩以避其课三公不以为意朕将何任诸请诏省卒徒自给者皆止御史察计簿疑非实者按之使真伪无相乱

孝成建始元年诏曰羣公孜孜率先百僚辅朕不逮崇宽大长和睦凡事恕已毋行苛刻

孝哀元壽元年诏曰朕获保宗庙不明不敏夙夜忧劳未遑宁息惟阴阳不调元元不赡未睹厥咎屡敕公卿庶几有望至今有司执法未得其中或上暴虐假势获名温良寛柔?於亡灭是故残贼弥长和睦日衰百姓愁怨靡所措躬廼正月朔日有蚀之厥咎不远在余一人公卿大夫其各悉心勉帅百寮崇任仁人黜远残贼期於安民陈朕之过失无有所讳

戒贪吏

文帝十三年定律曰吏坐受赇枉法守县官财物而即盗之已论命复有答罪者皆弃市【刑法志】

景帝元年诏曰吏受所监临以饮食免重受财物贱买贵卖论轻廷尉与丞相更议着令廷尉信谨与丞相议曰吏及诸有秩受其官属所监所治所行所将其与饮食计偿费勿论它物若买故贱卖故贵皆坐赃为盗没入赃县官吏迁徙免受其故官属所将监治送财物夺爵为士伍免之无爵罚金二斤令没入所受有能捕告畀其所受赃【纪】

後二年诏曰吏以货赂为市渔夺百姓侵牟万民县丞长吏也奸法与盗盗其无谓也其令二千石各修其职不事官职耗乱者丞相以闻请其罪【纪】

三年诏吏发民若取庸采黄金珠玉者坐赃为盗二千石听者与同罪【纪】

策免大臣

宣帝五凤二年策御史大夫萧望之曰有司奏君责使者礼过丞相亡礼廉声不闻敖慢不逊亡以扶政帅先百寮君不深思?于兹?朕不忍致君于理使光禄勳恠策诏左迁君为太子太傅授印其上故印使者便道之官君其秉道明孝正直是与帅意亡讐靡有後言【本传】成帝河平四年左将军史丹等奏王商位三公爵列侯亲受诏策为天下师不遵法度以翼国家而回辟下媚以进其私执左道以乱政为臣不忠罔上不道甫刑之辟皆为上戮罪名明白臣请诏谒者召商诣若卢诏狱上素重商知正言多险制曰勿治凤固争之於是制诏御史盖丞相以德辅翼国家典领百僚协和万国为职任莫重焉今乐昌侯商为丞相出入五年未闻忠

言嘉谋而有不忠执左道之辜?于大辟前商女弟内行不修奴贼杀人疑商教使为商重臣故抑而不穷今或言商不以自悔而反怨怼朕甚伤之惟商与先帝有外亲未忍致于理其赦商罪使者收丞相印绶【本传】

永始二年册丞相薛宣曰君为丞相出入六年忠孝之行率先百僚朕无闻焉朕既不明变异数见岁比不登仓廩空虚百姓饥馑流离道路疾疫死者以万数人至相食盗贼并兴羣职旷废是朕之不德而股肱不良也邇者广汉羣盗横恣残贼吏民朕惻然伤之教以问君君对辄不如其实西州鬲絶几不为郡三辅赋歛无度酷吏并缘为奸侵扰百姓诏君案验复无欲得事实之意九卿以下咸承风旨同时?于谩欺之罪咎繇君焉有司法君领职解嫚开谩欺之路伤薄风化无以帅示四方不忍致君于理其上丞相高阳侯印绶罢归【本传】永始三年赐左将军史丹策曰左将军寝病不衰愿归治疾朕愍以官职之事久?将军使射不瘳使光禄勳赐将军黄金五十斤安车驷马其上将军印绶宜专精神务近医药以补不衰【本传】

绥和二年赐丞相翟方进册曰皇帝问丞相君有孔子之虑孟贲之勇朕嘉与君同心一意庶几有成上君登位于今十年灾害并臻民被饥馑加以?疫溺死关门牡开失国守备盗贼党辈吏民残贼毆杀良民断狱岁岁多前上书言事交错道路怀奸朋党相为隐蔽皆亡忠虑羣下匈匈更相嫉妬其咎安在观君之治无欲辅朕富民便安元元之念间者郡国谷虽颇熟百姓不足者尚衆前去城郭未能尽还夙夜未尝忘焉朕惟往时之用与今一也百僚用度各有数君不量多少一听羣下言用度不足奏请一切增赋税城郭坏及园田过更算马牛羊增益盐铁变更无常朕既不明随奉许可後议者以为不便制诏下君君云卖酒醪後诗止未尽月复奏议今卖酒醪朕诚怪君何持容容之计无忠固意将何以辅朕帅道羣下而欲久蒙显尊之位岂不难哉传曰高而不危所以长守贵也欲退君位尚未忍君其熟念详计塞絶奸原忧国如家务便百姓以辅朕朕既已改君其自思强食谨职使尚书令赐君上尊酒十石养牛一君审处焉【本传】

哀帝建平元年策免大司空师丹曰夫三公者朕之腹心也辅善相过正率百僚和合天下者也朕既不明委政於公间者阴阳不调寒暑失常变异屡臻山崩地震河决泉涌流杀人民百姓流连无何归心司空之职尤废焉君在位出入三年未闻忠言嘉谋而反有朋党相进不公之名乃者以挺力田议改币章示君君内为朕建可改不疑以君之言博考朝臣君乃希衆雷同外以为不便令观听者归非於朕朕隐忍不宣为君受愆朕疾夫比周之徒虚伪坏化浸以成俗故屡以书飭君庶几君省过求已而反不受退有後言及君奏封事传於道路布闻朝市言事者以为大臣不忠辜?重辟获虚采名谤讥匈匈流於四方腹心如此谓疏者何殆谬於二人同心之利焉将何以率示羣下附亲远方朕惟君位尊任重虑不周密怀谗迷国进退违命反覆异言甚为君耻之非所以共承天地永保国家之意以君尝托传位未忍考于理已诏有司赦君勿治其上大司空高乐侯印绶罢归【本传】

建平二年策大司马傅喜曰君辅政出入三年未有昭然正朕不逮而本朝大臣遂其奸心咎由君焉其上大司马印绶就第【本传】

策免丞相孔光曰丞相者朕之股肱所与共承宗庙统理海内辅朕之不逮以治天下也朕既不明灾异重仍日月无光山崩河决五星失行是章朕之不德而股肱之不良也君前为御史大夫辅翼先帝出入八年卒无忠言嘉谋今相朕出入三年忧国之风复无闻焉阴阳错缪岁比不登天下空虚百姓饥馑父子分散流离道路以十万数而百官羣职旷废奸宄放纵盗贼并起或攻官寺杀长吏数以问君君无怵惕忧惧之意对无能为是羣卿大夫咸愴哉莫以为意咎由君焉君秉社稷之重总百僚之任上无以正朕之阙下不能绥安百姓书不云乎母旷庶官天工人其代之於虐君其上丞相博山侯印绶罢归【本传】

策左将军彭宣曰有司数奏言诸侯国人不得宿卫将军不宜典兵马处大位朕惟将军任汉将之重而子又前取淮阳王女婚姻不絶非国之制使光禄大夫曼赐将军黄金五十斤安车驷马其上左将军印绶以关内侯归家【本传】

策免大司空何武曰君举措烦苛不合衆心孝声不闻恶名流行无以率示四方其上大司空印绶罢归就国【本传】

建平三年诏御史大夫王崇曰朕以君有累世之美故踰列次在位以来忠诚正国未闻所繇反怀诈谖之辞欲以攀救旧姻之家大逆之辜举措专恣不遵法度亡以示百僚左迁为大司农【王吉传】

哀帝元壽二年册免大司马丁明曰前东平王云贪欲上位祠祭祝诅云后舅伍宏以鑿待诏与校秘书郎杨雄结谋反逆祸甚迫切赖宗庙神灵董贤等以闻咸伏其辜将军从弟侍中奉车都尉吴族父左曹屯骑校尉宣皆知宏及栩丹诸侯王后亲而宣除用丹为御属吴与宏交通厚善数称荐宏宏以附吴得兴其恶心因鑿技进几危社稷朕以恭皇后故不忍有云将军位尊任重既不能明威立义折消未萌又不深疾云宏之恶而怀非君上阿为宣吴反痛恨云等扬言为羣下所冤又亲见言伍宏善医死可惜也贤等获封极幸嫉妬忠良非毁有功於戏伤哉盖君亲无将将而诛之是以季友鸩叔牙春秋贤之赵盾不讨贼谓之弑君朕闵将军?于重刑故以书飭将军遂非不改复与丞相嘉相比今嘉有依得以罔上有司致法将军请狱治朕惟噬肤之恩未忍其上骠骑将军印绶罢归就第

哀帝崩王莽使谒者以大后诏即阙下册董贤曰间者以来阴阳不调菑害并臻元元蒙辜夫三公鼎足之辅也高安侯贤未更事理为大司马不合衆心非所以折冲绥远也其收大司马印绶罢归第

哀帝崩彭宣上书愿上大司空长平侯印绶乞骸骨归乡里俟寘沟壑莽白太后策宣曰惟君视事日寡功德未効迫於老眊昏乱非所以辅国家绥海内也使光禄勳丰册诏君其上大司空印绶使就国【彭宣传】

元始中莽以太皇太后诏赐太师大司徒马宫策曰太师大司徒扶德侯上书言前以光禄勳议故定陶共王母諡曰妇人以夫爵尊为号諡宜曰孝元傳皇后称渭陵东园臣知妾不得体

君卑不得敌尊而希指雷同诡经辟说以感误上为臣不忠当伏斧钺之诛幸蒙洒心自新又令得保首领伏自惟念入称四辅出备三公爵为列侯诚无颜复望阙廷无心复居官府无宜复食国邑愿上大师大司徒扶德侯印绶避贤者路下君章有司皆以为四辅之职为国维纲三公之任鼎足承君不有鲜明固守无以居位如君言至诚可听惟君之恶在洒心前不敢文过朕甚多之不夺君之爵邑以着自古皆有死之义其上大师大司徒印绶使者以侯就第【马宫传】

西汉会要卷四十三

卷四十四

钦定四库全书

西汉会要卷四十四

宋 徐天麟 撰

选举上

贤良方正

孝文二年诏曰迺十一月晦日有食之二三执政举贤良方正能直言极谏者以正朕之不逮【本纪下同】

十五年诏诸侯王公卿郡守举贤良能直言极谏者上亲策之传纳以言

孝武建元元年诏丞相御史列侯中二千石二千石诸侯相举贤良方正直言极谏之士

元光元年五月诏贤良曰贤良明於古今帝王之体受策察问咸以书对朕亲览焉於是董仲舒公孙弘等出焉

五年复召贤良文学【公孙弘传】

孝昭始元元年闰月遣故廷尉持节行郡国举贤良五年六月诏令三辅太常举贤良各二人

孝宣本始四年四月郡国地震诏令三辅太常内郡国举贤良方正各一人

地节三年诏令内郡国举贤良方正可亲民者

十月诏曰迺者九月地震朕甚惧焉有能箴朕过失及贤良方正直言极谏之士?正朕之不逮毋讳有司神爵四年四月令内郡国举贤良可亲民者各一人孝元初元二年三月诏曰迺二月戊午地震於陇西郡丞相御史中二千石举茂材异等直言极谏之士永光二年三月日有食之诏令内郡国举贤良方正各一人

孝成建始二年二月诏三辅内郡举贤良方正各一人建始三年十二月日蚀地震诏丞相御史与将军列侯中二千石及内郡国举贤良方正能直言极谏之士诣公车朕将览焉

上尽召直言之士诣白虎殿对策

元延元年七月诏曰廼者日蚀星陨今孛星见东井公卿大夫博士议郎?经对与内郡国举方正能直言极谏者各一人【师古曰令公卿与内郡国共举】

孝哀元壽元年正月日有蚀之诏公卿大夫其与将军列侯中二千石举贤良方正能直言者各一人

杂録

武帝初即位轅固复以贤良召固老罢归之

武帝即位招贤良文学之士是时公孙弘年六十?贤良召为博士使匈奴还报不合意上怒以为不能弘乃移病免归元光五年复召贤良菑川国复推上弘弘谢曰前已尝西用不能罢愿更选国人固推弘弘至太常对策时对者百余人太常奏弘第居下策奏天子擢弘对为第一【本传】

武帝举方正贤良文学材力之士待以不次之位【东方朔传】建元元年丞相绾奏所举贤良或治申商韩非苏秦张仪之言乱国政请皆罢奏可【武帝纪】

孝元举茂材富平侯张勃举陈汤汤待迁父死不犇丧司隶奏汤亡循行勃选举故不以实坐削户二百会薨因赐諡曰繆侯汤下狱论【陈汤传】

何武为京兆尹坐举方正所举者召见盘辟雅拜武坐左迁楚内史【本传】

博士弟子

武帝元朔五年为博士官置弟子五十人复其身太常择民年十八?上仪状端正者补博士弟子郡国县道邑有好文学敬长上肃政教顺乡里出入不悖所闻令相长丞上属所二千石二千石谨察可者常与计偕诣太常得受业如弟子一岁皆辄课能通一蓊?上补文学掌故缺其高第可?为郎中太常籍奏即有秀才异等辄?名闻其不事学若下材及不能通一蓊辄罢之而请诸能称者?治礼掌故?文学礼义为官迁留滞请选择其秩比二百石?上及吏百石通一艺以上补左右内史大行卒史比百石已下补郡太守卒史皆各二人边郡一人先用诵多者不足廼择掌故补中二千石属文学掌故补郡属备员请着功令它如律令制曰可【儒林传】

张汤请博士弟子理尚书春秋补廷尉史

平帝时王莽增元士之子得受业如弟子勿以为员岁课甲科四十人为郎中乙科二十人为太子舍人两科四十人为文学掌故

儿寛?郡国选诣博士受业孔安国

文翁选郡县小吏十余人遣诣京师受业博士

终军选为博士弟子至府受遣

萧望之?令诣太常业

唐生褚生应博士弟子选诣博士

武帝时伏湛?父任为博士弟子

山阳侯张当居坐为太常择博士弟子故不以实为城旦

试学童

汉兴萧何草律曰大史试学童能讽书九千字以上廼得为史又以六体试之课最者以为尚书御史史书令史吏民上书字或不正辄举劾【藝文志】

射策

武帝立五经博士开弟子员设科射策劝以官禄【儒林传赞师古曰射策者谓为问难疑义书之於策量其大小置为甲乙之科列而置之不使彰显有故射者随其所取而释之以知优劣射之言投射也】

何武王嘉马宫翟方进皆以射策甲科为郎

房凤以射策乙科为太史掌故

匡衡射策甲科以不应令除为太常掌故调补平原文学【本传】

儿寛诣博士受业以射策为掌故以功次补廷尉文学卒史【各本传】

明经

龚遂以明经为官

袁良举明经为太子舍人

孔安国贡禹夏侯胜张禹并以明经为博士

眭弘翟方进以明经为议郎

召信臣以明经甲科为郎

明法

郑崇父宾以明律令为御史

薛宣以明习文法诏补御史中丞

治剧

何并陈遵皆举能治剧为令

尹赏举能治剧徙频阳令

原涉举能治剧为谷口令

异科

元封五年名臣文武欲尽诏令州郡察吏民有茂材异等可为将相及使絶国者

孝昭始元五年诏举国文学高第各一人

元凤元年赐郡国所选有行义者涿郡韩福等五人帛人五十匹遣归

孝宣本始元年地震诏内郡国举文学高第各一人地节三年诏令郡国举孝弟有行义闻於乡里者各一人

元康元年诏博举吏民厥身修正通文学明於先王之术宣究其意者各二人中二千石各一人

元康四年诏遣大中大夫循行天下举茂材异伦之士孝元初元三年诏丞相御史举天下明阴阳灾异者各三人

永光元年诏丞相御史举质朴淳厚谦逊有行者建昭四年临遣谏大夫博士循行天下举茂材特立之士

孝成河平四年三月日有蚀之遣光禄大夫博士行举濒河之郡举淳厚有行能直言之士

阳朔二年奉使者不称诏丞相御史其与中二千石二千石杂举可充博士位者使卓然可观

鸿嘉二年诏举淳厚有行义能直言者冀闻切言嘉谋正朕之不逮

永始二年正月日有蚀之临遣大中大夫循行天下与部刺史举淳朴辞逊有行义者各一人

元延元年诏曰廼者日蚀星陨北边二十二郡举勇猛知兵法者各一人

哀帝初平当奏宜博求能浚川疏河者下丞相孔光大司空何武奏请部刺史三辅三河弘农太守举吏民能者莫有应书【沟洫志】

建平元年诏曰其与大司马列侯将军中二千石州牧守相举孝弟淳厚能直言通政事延于侧陋可亲民者各一人

建平四年诏将军中二千石举明兵法有大虑者元壽元年下诏曰天下虽安忘战必危将军与中二千石举明习兵法有大虑者各一人将军二人诣公车【息夫躬传】

哀帝时有诏举太常【何武传】

哀帝崩太后诏有司举可为大司马者【何武传】

孝平元始元年五月日有蚀之诏公卿将军中二千石举淳厚能直言者各一人

元始二年秋举勇武有节明兵法郡一人诣公车冬中二千石举治狱平岁一人

元始五年召天下通知逸经古记天文历算钟律小学史篇方术本草及?五经论语孝经尔雅教授者在所为驾一封轺传遣京师至者数千人【并本纪】

聘召名士

高帝十一年二月诏曰贤士大夫有肯从我游者吾能尊显之其有意称明德者必身劝为之驾遣诣相国府书行义年有而弗言觉免年老癯病勿遣【本纪】

武帝即位枚乘年老廼以安车蒲轮召乘【本传】

建元元年遣使者束帛加璧安车以蒲裹轮驾驷召鲁申公弟子二人乘轺传从【以纪传修】

孝武元封五年召吏民有明当世之务习先圣之术者县次续食令与计偕【师古曰令所召之人与上计者偕来而县次给之食】

元狩六年诏遣博士分循行天下举独行之君子召诣行在所士有特招使者之任也详问隐处亡位者举奏【本纪】

夏侯胜善说礼服召为博士

疏广明春秋家居教授召为博士

昭帝时涿郡韩福德行召至京师赐策书束帛遣归诏曰朕闵劳以官职之事其务修孝弟以教乡里行道舍传舍县次具酒肉食从者及马长吏以时存问常以岁八月赐羊一头酒二斛不幸死赐覆衾一祠以中牢【两龚传】

翼奉元帝初即位诸儒荐之召待诏官者庐

贡禹以明经洁行着闻召为博士曰陛下过意召臣臣卖田百亩以供车马

孝哀召龚胜为谏大夫胜荐龚舍甯壽侯嘉有诏皆召胜曰窃见国家聘鬻巫常为驾聘贤者宜驾上曰大夫乘私车来耶胜曰唯唯有诏为驾

孝平元始五年诏【见上异科条】

西汉会要卷四十四

卷四十五

钦定四库全书

西汉会要卷四十五

宋 徐天麟 撰

选举下

举廉【孝廉附】

孝文十二年诏曰孝悌天下之大顺也力田为生之本也廉吏民之表也朕甚嘉此二三大夫之行今万家之县云亡应令岂实人情是吏举贤之道未备也其遣谒者劳赐孝者帛人五匹悌者力田二匹廉吏二百石?上率百石者三匹【师古曰自二百石?上每石加三匹也】

孝景後二年诏曰其唯廉士寡欲易足今訾算十?上廼得官廉士算不必衆有市籍不得官亡訾又不得官朕甚愍之訾算四得官亡令廉士久失职贪夫长利孝武元光元年冬初令郡国举孝廉各一人【并本纪】董仲舒曰臣愚以为使诸列侯郡守二千石各择其吏民之贤者岁贡各二人故州郡举茂材孝廉皆自仲舒发之【本传】

元朔元年冬诏曰朕深诏执事兴廉举孝今或至闾郡而不荐一人其与中二千石礼官博士议不举者罪有司奏议曰不举孝不奉诏当以不敬论不察廉不胜任也当免奏可【本纪】

孝宣黄龙元年诏曰举廉吏诚欲得其真也吏六百石位大夫有罪先请秩禄上通足?効其贤材自今?来毋得举【韦昭曰吏六百石不得复举为廉吏】

孝平元始元年令宗室其为吏举廉佐史补四百石赵广汉为平準令察廉为阳翟令

朱博以太常掾察廉补安陵丞

萧望之察廉为大行治礼丞

薛宣?大司农斗食属察廉补不其丞

光禄勳于永除王嘉为掾察廉为南陵丞复察廉为长陵尉

张敞补太守卒史察廉为甘泉仓长

黄霸察补河东均输长复察廉为河南太守丞

尹赏?郡吏察廉为楼烦长

王吉?郡吏举孝廉为郎

池阳令举廉吏狱掾王立

京房?孝廉为郎

师丹孟喜并举孝廉为郎

刘辅举孝廉为襄贲令

平当察廉为顺阳长

孝弟力田

孝惠四年正月举民孝弟力田者复其身【本纪下同】

高后元年二月初置孝弟力田二千石者一人

孝文十二年三月诏以户口率置三老孝弟力田常员令各率其意以导民

任子

父任【汉仪注吏二千石?上视事满三岁得任同产若子一人为郎】

苏武以父任为郎

刘向以父任为辇郎

孔光子男放为侍郎

董恭为御史任贤为太子舍人

萧育以父任为太子庶人

史丹九男皆以丹任为侍中

汲黯以父任为太子洗马

伏湛以父任为博士弟子

史丹冯野王皆以父任为太子中庶子

杜延年以三公子补军司空

辛庆忌以父任为右校丞

虎贲诸郎皆父死子代

兄任

霍去病任光为郎

杨惲以忠任为郎

爰盎兄𡗗任盎为郎中

族父任

成帝时侯霸以族父任为太子舍人

宗家任

赵兼淮南王舅子由以宗家任为郎

致仕

元始二年遣龚胜邴汉策曰其上子若孙若同产同产子一人所上子男皆除为郎

董仲舒曰夫长吏多出於郎中中郎吏二千石子弟未必贤也

宣帝时王吉上疏曰舜汤不用三公九卿之世而举皐陶伊尹不仁者远今使俗吏得任子弟率多骄骜不通古今至於积功治人亡益於民此伐檀所为作也宜明选求贤除任子之令【王吉传】

哀帝初即位除任子令【本纪】

赀

张释之以赀为骑郎【本传汉注赀五百万得为常侍郎】

孝景後二年诏曰今赀算十?上廼得宦廉士算不必衆有市籍不得宦亡赀又不得宦朕甚愍之赀算四得宦【本纪】

司马相如?赀为郎【本传】

董仲舒曰选郎吏又?富赀未必贤也【本传】

鬻官

武帝即位干戈日滋财赂衰耗而不赡入物者补官选举陵迟廉耻相冒兴利之臣自此始也其後府库益虚廼募民能入奴婢得以终身复为郎增秩及入羊为郎始於此其後四年【元朔五年】置赏官命曰武功爵大者封侯卿大夫小者郎吏道杂而多端则官职耗废【元狩四年】除故盐铁官家富者为吏吏道益杂不选而多贾人矣【元鼎二年】始令吏得入谷补官郎至六百【师古曰交更选高官郎又就增其秩至六百石】所忠言【元鼎三年】世家子弟富人或鬪鸡走狗马弋猎博戏乱齐民廼召诸犯令相引数千人命曰株送徒入财者得补郎郎选衰矣弘羊又请令吏得入粟补官【平準书】黄霸以待诏入钱赏官补侍郎谒者坐罪免後复入谷沈黎郡补左冯翊二百石卒史冯翊以霸入财为官不补右职

方技

卫绾以戏车为郎事文帝

邓通以濯船为黄门郎

周仁以鑿见景帝为太子时为舍人

吾邱壽王年少以善格五召待诏

荀彘以御见侍中

武帝时虞初以方士侍祠

东郭先生以方士待诏公车

武帝即位博开藝能之路悉延百端之学通一技之士咸得自効絶伦超奇者为右亡所阿私

【龟策传】

丞相魏相奏言知音善鼓雅琴者赵定龚德皆召见待诏

伍宏以鑿待诏

成帝时言祭祀方术者皆得待诏【郊祀志】

本草待诏【郊祀志师古曰以方药本草而待诏】

郡吏

赵禹以佐史补中都官用廉为令史

咸宣以佐史给事河东守

魏相为郡卒史举贤良

王吉以郡吏举孝廉为郎

尹齐以刀笔吏稍迁至御史

朱邑少时为舒桐乡啬夫迁补太守卒史

鲍宣为县乡啬夫补束州丞

张敞以乡有补太守卒史察廉为甘泉仓长

尹赏以郡吏察廉为楼烦长

焦延寿为郡吏察廉为小黄令

赵广汉为郡吏州从事举茂材

陈万年为郡吏察举至县令

龚胜为郡吏楚王聘为常侍

王欣以郡县吏积功稍迁被阳令

丙吉为鲁狱吏积功劳稍迁廷尉右监

王尊为狱小吏给事太守府补书佐

尹翁归为狱小吏除补卒史

于定国为郡决曹补廷尉

上书

武帝初即位诏天下举方正贤良文学材力之士待以不次之位四方士多上书言得失自衒鬻者?千数其不足采者辄报闻罢【东方朔传】

东方朔初入长安至公车上书凡用三千奏牍公车令两人共持举其书仅能胜之人主从上方读之止辄乙其处读之二月迺尽诏拜?为郎【史记】朔上书曰可以为天子大臣文辞不逊高自称誉上伟之令待诏公车【汉书】

朱买臣随上计吏诣阙上书书久不报待诏公车主父偃元光元年上书阙下朝奏暮召入见是时徐乐严安亦俱上书言世务书奏上召见三人谓曰公等安在何相见之晚也迺拜偃乐安皆为郎中

终军至长安上书言事武帝异其文拜为谒者给事中枚臯上书北阙自陈枚乘之子上得之大喜召入见待诏

宣帝初即位思进贤良多上书言便宜辄下萧望之问状高者请丞相御史次者中二千石试事满岁以状闻下者报闻或罢归田里【望之传】

元帝初即位贾捐之上疏言得失召待诏金马门哀帝初即位息夫躬上书召待诏

从军

周勃材官引强【师古曰强其两反服?曰引强弓弩官也】

申屠嘉以材官蹶张迁为队率【师古曰弩以足蹶者如蹶张】

汉兴六郡良家子选给羽林期门【师古曰六郡谓陇西天水安定北地上郡西河也】?材力为官名将多出焉【地理志】

公孙贺北地人少为骑士从军

李广陇西人?良家子从军

赵充国陇西人?六郡良家子善骑射补羽林

傅介子北地人?从军为官

甘延壽北地人?良家子善骑射为羽林

冯奉世上党人?良家子选为郎

张次公以勇悍从军【义纵传】

常惠应募随苏武使匈奴

郑吉以卒伍从军

傅介子斩楼兰王土刺王者皆补侍郎

军功多用超等大者封侯卿大夫小者郎【食货志】

选举杂錄

孝惠高后时市井子孙不得仕官为吏【景纪诏】

有市籍不得宦无赀又不得宦

入财为官不补右职【黄霸】

宗室不宜典三河【刘向】

王国人不得宿卫【龚胜彭宣】

王舅不宜备九卿【冯野王冯立冯彦】

弟犯法不得宿卫【萧望之】

贾人不得为吏【哀帝诏】

执金吾韩立御史大夫张谭并坐选举不实免

丞相张苍任人为中候大为奸利上以为责

张勃举陈汤司隶奏汤亡循行勃选举故不以实削户二百

何武所举方正盘辟雅拜坐左迁楚内史

山阳侯张当居坐为太常择博士弟子故不以实全为城旦【表】

元始二年大理复坐除吏不次免

河平四年宗正刘顺坐使合阳侯举子免

建平二年邛成侯王勲坐选举不以实骂廷史大不敬免

元延元年诏举方正直言之士红阳侯立举陈咸对策拜为光禄大夫给事中丞相方进奏咸不当蒙方正并劾立选举故不?实有诏免咸勿劾立

严延年察狱史廉有臧不入身延年选举不实贬秩司隶奏杜业为大常选举不实业坐免官

平帝初即位诏曰选举者其历职更事有名之士则以为难保废而弗举甚谬於赦小过举贤材之义诸有臧及内恶未发而荐举者皆勿案验令士厉精乡进不?小疵妨大才

西汉会要卷四十五

卷四十六

钦定四库全书

西汉会要卷四十六

宋 徐天麟 撰

民政一

户口

自高祖迄於孝平民户千二百二十三万三千六十二口五千九百五十九万四千九百七十八汉极盛矣【地理志师古曰汉之户口当元始二年最为殷盛故志举之以为数】

京兆尹【元始二年户十九万五千七百有二口六十八万二千四百六十八】左冯翊【户二十三万五千一百一口九十一万七千八百二十二】右扶风【户二十一万六千三百七十七口八十三万六千七十】弘农郡【户十一万八千九十一口四十七万五千九百五十四】河东郡【户二十三万六千八百九十六口九十六万二千九百一十二】太原郡【户十六万九千八百六十三口六十八万四千八百八十八】上党郡【户七万三千七百九十八口三十三万七千七百六十六】河内郡【户二十四万一千二百四十六口百六万七千九十七】河南郡【户二十七万六千四百四十四口一百七十四万二千七百七十九】东郡【户四十万一千二百九十七口百六十五万九千二十八】陈留郡【户二十九万六千二百八十四口一百五十万九千五十】颍川郡【户四十三万二千四百九十一口二百二十一万九百七十三】汝南郡【户四十六万一千五百八十七口二百五十九万六千一百四十八】南阳郡【户三十五万九千一百一十六口一百九十四万二千五十一】南郡【户十二万五千五百七十九口七十一万八千五百四十】江夏郡【户五万六千八百四十四口二十一万九千二百一十八】庐江郡【户十二万四千三百八十三口四十五万七千三百三十三】九江郡【户十五万五十二口七十八万五百二十五】山阳郡【户十七万二千八百四十七口八十万一千二百八十八】济阴郡【户二十九万二千五口百三十八万六千二百七十八】沛郡【户四十万九千七十九口二百三万四百八十】魏郡【户二十一万二千八百四十九口九十万九千六百五十五】钜鹿郡【户十五万五千九百五十一口八十二万七千一百七十七】常山郡【户十四万一千七百四十一口六十七万七千九百五十六】清河郡【户二十万一千七百七十四口八十七万五千四百二十三】涿郡【户十九万五千六百七口七十八万二千七百六十四】勃海郡【户二十五万六千三百七十七口九十万五千一百一十九】平原郡【户十五万四千三百八十七口六十六万四千五百四十三】千乘郡【户十一万六千七百二十七口四十九万七千二百二十】济南郡【户十四万七千六百十一口六十四万二千八百八十四】泰山郡【户十七万二千八十六口七十二万六千六百四】齐郡【户十五万四千八百二十六口五十五万四千四百四十四】北海郡

【户十二万七千口五十九万三千百五十九】东莱郡【户十万三千二百九十二口五十五万二千六百九十三】琅邪郡【户二十二万八千九百六十口一百七万九千一百】东海郡【户三十五万八千四百一十四口百五十五万九千三百五十七】临淮郡【户二十六万八千二百八十三口百二十三万七千七百六十四】会稽郡【户二十二万三千三十八口百三万二千六百四】丹阳郡【户十万七千五百四十一口四十万五千一百七十一】豫章郡【户六万七千四百六十二口三十五万一千九百六十五】桂阳郡【户二万八千一百一十九口十五万六千四百八十八】武陵郡【户三万四千一百七十七口十八万五千七百五十八】零陵郡【户二万一千九十二口十三万九千三百七十八】汉中郡【户十万一千五百七十口三十万六千一百一十四】广汉郡【户十六万七千四百九十九口六十六万二千二百四十九】蜀郡【户二十六万八千二百七十九口百二十四万五千九百二十九】犍为郡【户十万九千四百一十九口四十八万九千四百八十六】越巂郡【户六万一千二百八口四十万八千四百五】益州郡【户八万一千九百四十六口五十八万四千六百六十三】牂柯郡【户二万四千二百一十九口十五万三千三百六十】巴郡【户十五万八千六百四十三口七十万八千一百四十八】武都郡【户五万一千二百七十六口二十三万五千五百六十】陇西郡【户五万三千九百六十四口二十三万六千八百二十四】金城郡【户三万八千四百七十口十四万九千六百四十八】天水郡【户六万三百七十口二十六万一千三百四十八】武威郡【户万七千五百八十一口七万六千四百一十九】张掖郡【户二万四千三百五十二口八万八千七百三十一】酒泉郡【户万八千一百三十七口七万六千七百二十六】炖煌郡【户万一千二百口三万八千三百三十五】安定郡【户四万二千七百二十五口十四万三千二百九十四】北地郡【户六万四千四百六十一口二十一万六千八百八十八】上郡【户十万三千六百八十三口六十万六千六百五十八】西河郡【户十三万六千三百九十口六十九万八千八百三十六】朔方郡【户三万四千三百三十八口十三万六千六百二十八】五原郡【户三万九千三百二十二口二十三万一千三百二十八】云中郡【户三万八千三百三口十七万三千二百七十】定襄郡【户三万八千五百五十九口十六万三千一百四十四】鴈门郡【户七万三千一百三十八口二十九万三千四百五十四】代郡【户五万六千七百七十一口二十七万八千七百五十四】上谷郡【户三万六千八口十一万七千七百六十二】渔阳郡【户六万八千八百二口二十六万四千一百一十六】右北平郡【户六万六千六百八十九口三十二万七千八百八十】辽西郡【户七万二千六百五十四口三十五万二千三百二十五】辽东郡【户五万五千九百七十二口二十七万二千五百三十九】玄菟郡【户四万五千六口二十二万一千八百四十五】乐浪郡【户六万二千八百十二口四十万六千七百四十八】南海郡【户万九千六百一十三口九万四千二百五十三】鬱林郡【户万二千四百一十五口七万一千一百六十二】苍梧郡【户二万四千三百七十九口十四万六千一百六十】交趾郡【户九万二千四百四十口七十四万六千二百三十七】合浦郡【户万五千三百九十八口七万八千九百八十】九真郡【户三万五千七百四十三口十六万六千一十三】日南郡【户万五千四百六十口六万九千四百八十五】赵国【户八万四千二百二口三十四万九千九百五十二】广平国【户二万七千九百八十四口十九万八千五百五十八】真定国【户三万七千一百二十六口十七万八千六百一十六】中山国【户十六万八千七百七十三口六十六万八千八十】信都国【户六万五千五百五十六口三十万四

千三百八十四】河间国【户四万五千四十三口十八万七千六百六十三】广阳国【户二万七千四百口七万六千五百五十八】淄川国【户五万二千八百九十口二十二万七千三十一】胶东国【户七万二千二百二十二万三千三百三十一】高密国【户四万五千三百一十一口十九万二千五百三十六】城阳国【户五万六千六百四十二口二十万五千七百八十四】淮阳国【户十三万五千五百四十四口九十八万一千四百廿三】梁国【户三万八千七百九口十万六千七百五十二】东平国【户十三万一千七百五十三口六十万七千九百七十六】鲁国【户十一万八千四十五口六十万七千三百八十一】楚国【户十一万四千七百三十八口四十九万七千八百四】泗水国【户二万五千二十五口十一万九千一百十四】广陵国【户三万六千七百七十三口十四万七千二百二十二】六安国【户三万八千三百四十五口十七万八千六百一十六】长沙国【户四万三千四百七十口二十三万五千八百二十五】

汉兴大城名都民人散亡户口可得而数裁什二三及至文景四五世间流民既归户口亦息【高惠文功臣表】

孝文即位趋劝农桑减省租赋蓄积岁增户口?息【刑法志】

文景务在养民【武帝赞】

孝昭承奢侈余弊师旅之後海内虚耗户口减半霍光知时务之要轻徭薄赋与民休息至元始元凤之间匈奴和亲百姓充实【昭帝赞】

王成为胶东相劳来不怠流民自占八万余口赐爵关内侯秩中二千石後或言成伪自增加以蒙显赏【本传】黄霸为颍川守户口岁增治为天下第一【本传】

召信臣为南阳守百姓归之户口增倍【本传】

哀平之世百姓货富虽不及文景然天下户口最盛【食货志上】

风俗

凡民函五常之性而其刚柔缓急音声不同系水土之风气故谓之风好恶取舍动静亡常随君上之情欲故谓之俗孔子曰移风易俗莫善於乐言圣王在上统理人伦必移其本而易其末此混同天下一之虚中和然後王教成也汉承百王之末国土变改人民迁徙成帝时刘向略言其地分丞相张禹使属颍川朱赣条其风俗犹未宣究故辑而论之终其本末着於篇

秦地於天官东井舆?之分楚也其界自弘农故关以西京兆扶风冯翊北地上郡西河安定天水陇西南有巴蜀广汉犍为武都西有金城武威张掖酒泉炖煌又西南有牂柯越嶲益州皆宜属焉汉兴立都长安徙齐诸田楚昭屈景及诸功臣家於长陵後世世徙吏二千石高訾富

人及豪杰兼并之家於诸陵盖亦以强干弱支非独为奉山园也是故五方杂处风俗不纯其世家则好礼文富人则商贾为利豪杰则游侠通奸濒南山近夏阳多阻险轻薄易为盗贼常为天下剧又郡国辐辏浮食者多民去本就末列侯贵人车服僭上衆庶放效差相及嫁娶尤崇侈靡送死过度天水陇西山多材木民以板为室屋及安定北地上郡西河皆迫近戎狄修习战备高上气力以射猎为先汉兴六郡良家子选给羽林期门以材力为官名将多出焉故此数郡民俗质木不耻寇盗自武威以西本匈奴昆邪王休屠地武帝时攘之初置四郡以通西域隔絶南羌匈奴其民或以关东下贫或以报怨过当或以諄逆无道家属徙焉习俗颇殊地广民稀水中宜畜牧故凉州之畜为天下饶保边塞二千石治之咸以兵马为务酒礼之会上下通焉吏民相亲是以前其俗风雨时节谷黍常贱少盗贼有和气之应贤於内郡此政寛厚吏不苛刻之所致也巴蜀广汉本南夷秦并以为郡土地肥美有江水沃野山林竹木疏食果实之饶南贾滇僊僊西近印茆茆马旄牛民食稻鱼亡凶年忧俗不愁苦而轻易淫佚柔弱褊厄景武间文翁为蜀守教民读书法令未能笃信道德反以好文刺讥贵慕权勢及司马相如游宦京师诸侯以文辞显於世郷党慕循其迹後有王褒严遵杨雄之徒文章冠天下繇文翁倡其教相如为之师故孔子曰有教无类武都地杂氐羌及犍为牂柯越嶲皆西南外夷武帝初开置民俗略与巴蜀同而武都近天水俗颇似焉故秦地天下三分之一而人衆不过什三然量其富居什六秦幽吴札观乐为之歌秦曰此之谓夏声夫能夏则大大之至也其周之旧乎自井十度至柳三度谓之鹑首之次秦之分也【自魏地至具地并见地理志不详録】

西汉会要卷四十六

<史部,政书类,通制之属,西汉会要>

卷四十七

钦定四库全书

西汉会要卷四十七

宋 徐天麟 撰

民政二

傅籍

景帝二年令天下男子年二十始傅【本纪师古曰傅着也言着名籍给公家徭役臣天麟按高纪发关中老弱未傅者悉诣军如淳曰律年二十三传之畴官高不满六尺二寸以下为疲癃汉仪注民年二十三为正一岁为卫士一岁为材官骑士习射御驰战陈年五十六乃免为庶民就田里则知汉初民在官三十有三年也今景帝更为异制令男子年二十始传则在官三十有六年矣】

更役

秦用商鞅之法月为更卒已复为正一岁屯戍一岁力役三十倍於古【师古曰更卒谓给郡县一月而更者正卒谓给中都官者也率计今人一岁之中屯戍及力役之事三十倍多於古也更音工衡反】汉兴循而未改【食货志董仲舒疏】更赋【昭纪如淳曰更有三品有卒更有践更有过更古者正卒无常人皆当迭为之一月一更是为卒更也贫者欲得雇更钱者次直者出钱雇之月二千是谓践更也天下人皆直戍边三日亦名为更律所谓繇戍也虽丞相子亦在戍边之调不可人人自行三日戍又行者当自戍三日不可往便还因便住一岁一更诸不行者出钱三百入官官以给戍者是为过更律就卒践更者居也居更县中五月乃更也後从尉律卒践更一月休十一月也食货志曰月为更卒已复为正一岁屯戍一岁力役三十倍於古此汉初因秦法而行之也後遂改易有繇乃戍边一岁耳】

文帝偃武行文丁男三年而一事【贾捐之传如淳曰常赋岁一事时天下民多故三岁而一事】

吴以铜盐故百姓无赋卒践更辄予平贾【吴王濞传】

汉氏常有更赋罢癃咸出【食货志王莽下令云云晋灼曰虽老病皆复出口算】昭帝元凤四年诏三年以前通更赋未入者皆勿收【纪】

乡役

十里一亭亭有长十亭一乡乡有三老有秩嗇夫游徼三老掌教化嗇夫职听讼收赋税游徼禁循盗贼县大率方百里其民稠则减稀则旷乡亭亦如之皆秦制也【百官表汉官仪曰游徼亭长皆习设备五兵弓弩戟循刀劔甲铠鼓吏赤幘行滕带劔佩刀持楯被甲设矛戟习射十里一亭亭长亭候五里一邮邮间相去二里半司奸盗亭长持二尺板以劾贼索绳以收执贼】

泛役【着外繇附】

惠帝三年发长安六百里内男女十四万六千人城长安三十日罢五年复发长安六百里内男女十四万五千人城长安三十日罢【并纪】

武帝元狩三年发谪吏穿昆明池【师古曰吏有罪者罚而役之】成帝河平元年卒治河者为着外繇六月【沟洫志师古曰以卒治河有劳虽役日近皆得比繇戍六月也着谓着于簿籍】

後二岁河复决作治六月乃成治河卒非受平贾者为着外繇六月【沟洫志平贾谓顾也其受平贾者不在着外繇之数】

哀帝建平二年葬帝太后定陶发陈留济陰近郡国五万人穿复土【纪按汉世力役非一姑举此数条以见役法之例】

杂录

文帝时晁错说上曰今农夫五口之家其服役者不下二人其能耕者不过百亩百亩之收不过百石春耕夏耘秋获冬藏伐薪樵治官府给繇役春不得避风尘夏不得避暑热秋不得避陰雨冬不得避寒冻四时之间亡日休息又私自送往迎来吊死问疾养孤长幼在其中勤苦如此【食货志上】

西边北边之郡虽有长爵不轻得复五尺以上不得休息【贾谊传】

信武侯靳歙坐事国人过律免【功臣表师古曰事谓役使之也】

复除

从军

汉二年蜀汉民给军事劳苦复勿税租二岁关中卒从军者复家一岁【高纪下同】

五年诏诸侯子在关中者复之十二岁其归者半之军吏卒赐爵非七大夫已下皆复其身及

户勿事八年令吏卒从军至平城及守城邑者皆复终身勿事

十一年诸县坚守不降反寇者复租三岁

六月令士卒从入蜀汉关中皆复终身

十二年诏吏二千石入蜀汉定三秦者皆世世复

丰沛

高祖十一年四月令丰人徙关中者皆复终身十二年以沛为汤沐邑复其民世世无有所与沛父儿请复丰乃比并复丰比沛【并本纪】

民产子

高祖七年民产子复勿事二岁【本纪】

三老

汉二年置乡三老择乡三老为县三老复勿繇戍【本纪】

孝弟力田

惠帝四年举民孝弟力田者复其身

武帝元朔元年诏曰朕旅耆老复孝敬【本纪】

高年

文帝礼高年九十者一子不事八十者二算不事【贾谊传】

武帝建元元年民年八十复二算九十复甲卒【本纪】四月诏民年九十?上已有受鬻法为复子若孙令得身率妻妾遂其供养之事【本纪】

边郡

晁错说文帝募民守塞皆赐高爵复其家【食货志】西边北边之郡虽有长爵不轻得复【贾谊传】

旧都

文帝三年幸太原复晋阳中都民三岁租【本纪】

守冢

高祖十二年诏兴秦始皇帝守冢二十家楚魏齐各十家赵及魏公子亡忘各五家令视其冢复无与他事【本纪】

给祠

武帝登礼中岳以山下户凡三百封密高为之奉邑独给祠复无有所与【郊祀志】

宗室

文帝四年复诸刘有属籍者家无所与【纪】

功臣後

宣帝地节二年诏曰傳陆侯功德茂盛复其後世畴其爵邑世世无有所与【纪】

元康元年复高皇帝功臣绛侯周勃等百三十六人家子孙令奉祭祀世世勿絶其母嗣者复其次【同上】

博士弟子

武帝为博士官置弟子五十人复其身【儒林传序】

通经

元帝好儒能通一经者复数年以用度不足更为设员千人【同上】

车骑马

晁错疏曰令民有车骑马一匹者复卒三人【食货志】

入奴婢

武帝府库并虚廼募民能入奴婢者得以终身复【食货志】

买复

晁错疏曰令民入粟至五大夫乃复一人耳【食货志】桑弘羊请令民入粟甘泉各有差以复终身【食货志】武帝兵革数动民多买复及五大夫千夫调发之士益鲜【同上】

元帝永光三年用度不足民多复除无以给中外徭役【纪】

流民

宣帝地节三年诏流民还归者且勿算事【纪】

本始三年大旱三辅民就贱者且毋收事【纪】

执丧

宣帝地节四年诏诸有大父母父母丧者勿繇事使得收斂送终尽其子道【纪】

宫人

景帝遗诏出宫人归其家复终身【纪】

节妇

平帝复节妇乡一人

西汉会要卷四十七

卷四十八

钦定四库全书

西汉会要卷四十八

宋 徐天麟 撰

民政三

置三老【赐帛附】

高祖二年举民年五十以上有修行能帅衆为善置以为三老乡一人择乡三老一人为县三老与县令丞尉事相教复勿繇戍以十月赐酒肉【本纪】

文帝十二年诏以户口率置三老常员【本纪】

十里一亭十亭一乡乡有三老掌教化【百官表】

武帝元狩六年遗谒者循行天下谕三老孝弟以为民师【本纪】

贾山曰天子之尊尊养三老於大学执爵而馈执爵而酢祝在前祝鲠在後公卿奉杖大夫进履【贾山传】新城三老董公遮说汉王曰项羽无道放弑其主天下之贼也夫仁不以勇义不以力三军之衆为之素服以告之诸侯为此东伐此三王之举也汉王曰善非夫子无所闻於是汉王为义帝发丧兵皆缟素【高纪】

武帝遣司马相如谕告巴蜀责三老以不教诲之过【相如传】

戾太子发兵诛江充长安中扰乱言太子反上怒甚壶关三老茂上书窃以为亡邪心书奏天子感悟【太子传】王尊为京兆尹坐免湖三老公乘兴等上书讼尊治京兆功效日着书奏天子复以尊为徐州刺史【尊传】

王尊为东郡太守河水盛溢尊躬率吏民投沈白马请以身填金堤水波稍却白马三老奏其状制诏秩尊中二千石【同上】

黄霸守颍川吏民兴於行谊赐三老爵及帛【黄霸传】韩延寿守冯翊有昆弟讼田延寿曰咎在冯翊移病不听事令丞嗇夫三老亦自系待罪【延寿传】

赐三老帛

高祖以十月赐酒肉【见上】

文帝十二年遣谒者劳赐三老帛人五匹【本纪下同】

武帝元狩元年遣谒者赐县三老帛人五匹乡三老人三匹

宣帝元康元年加赐三老帛

四年加赐三老帛人二匹

甘露三年凤皇集新蔡赐新蔡三老帛有差

元帝初元元年赐三老帛人五匹

五年赐三老帛人五匹

元光二年赐三老帛

建昭五年赐三老帛

成帝建始元年赐三老钱帛

绥和元年赐三老帛

平帝元始三年赐三老帛

尊高年

文帝元年诏曰老者非帛不煖非肉不饱今岁首不时使人存问长老又无布帛酒肉之赐将何以佐天下子孙孝养其亲今闻吏稟当受鬻者或以陈粟【师古曰稟给也鬻淖糜也给米使为糜鬻也以文帝诏文考之则受鬻之法其来必久】岂称养老之意哉具为令有司请令县道年八十以上赐米人月一石肉二十斤酒五斗其九十以上又赐帛人二匹絮三斤赐勿及当稟鬻米者长吏阅视丞若尉致不满九十嗇夫令史致二千石遣都吏循行不称者督之刑者及有罪耐以上不用此令【本纪】

文帝礼高年九十者一子不事八十者二算不事【贾山传师古曰一子不事蠲其赋役二算不事免二口之算赋也】

武帝建元元年民年八十复二算九十复甲卒

四月诏民年九十已上已有受鬻法为复子若孙令得身帅妻妾遂其供养之事

武帝元狩元年诏曰朕哀夫老眊孤寡鰥独或匱於衣食甚怜愍焉其遣谒者巡行天下存问致赐有冤失职使者?闻

元帝初元元年遣使存问耆老

建昭四年临遣諫大夫博士赏等二十一人循行天下存问耆老

成帝永始三年临遣大中大夫嘉等存问耆老【并本纪】

赐高年帛

武帝元狩二年遣谒者赐年九十已上帛人二匹絮三斤八十已上米人三石

元封元年加年七十以上帛人二匹

二年赐高年米人四石

宣帝地节三年加赐高年帛

元康二年赐高年帛

三年赐高年帛

神爵元年赐高年帛

四年赐高年帛

五凤三年加赐高年帛

甘露二年赐高年帛

元帝初元四年赐高年帛

永光元年赐高年帛

成帝鸿嘉元年加赐高年帛

永始四年賜高年帛【并本紀】

賜孝弟力田錢帛【賜爵】

孝文十二年遣謁者勞賜孝者帛人五匹悌者力田二匹【紀下同】

後七年遣詔賜孝弟力田金錢帛各有數

武帝元狩元年賜孝者帛人五匹弟者力田人三匹宣帝元康元年加賜孝弟力田帛

四年加賜孝弟力田帛人二匹

甘露二年鳳皇集賜新蔡孝弟力田帛

元帝初元元年賜孝者帛五匹弟者力田三疋

五年賜孝者帛人五匹弟者力田三疋

永光二年賜孝弟力田帛

建昭五年賜孝弟力田帛

成帝建始元年賜孝弟力田錢帛有差

綏和元年賜孝弟力田帛

哀帝即位賜孝弟力田帛

宣帝神爵四年黃霸治行尤異潁川孝弟力田皆以差賜爵【黃霸傳按紀云一級】

成帝建始三年賜孝弟力田爵二級

河平四年賜孝弟力田爵二級【并本紀】

恤鰥寡孤獨

文帝一三年賜天下孤獨布帛絮【按賈山傳云出帛十萬疋以振貧民】武帝元狩元年遣謁者存問致賜鰥寡孤獨帛人三匹絮三斤縣鄉即賜毋贅聚

六年遣博士六人分巡行天下存问鰥寡废疾无以自业者贷与之

元封元年加孤寡帛人二疋

二年赐孤寡米四石

五年赐鰥寡孤独帛贫穷者粟

六年赐天下贫民布帛人一匹

太始三年赐鰥寡孤独帛人一匹

宣帝即位赐金钱鰥寡孤独各有差

地节三年诏曰鰥寡孤独高年贫困之民朕所怜也前下诏假公田贷种食其加赐鰥寡孤独高年帛二千石严教吏谨视遇毋令失职

元康元年加赐鰥寡孤独帛

二年赐鰥寡孤独帛

三年赐鰥寡孤独帛

四年正月遣太中大夫强等十二人巡行天下存问鰥寡

三月加赐帛鰥寡孤独各一疋

神爵元年赐鰥寡孤独帛

四年赐鰥寡孤独帛

五凤三年加赐鰥寡孤独帛

甘露二年赐鰥寡孤独帛

三年凤皇集赐新蔡鰥寡孤独帛

元帝初元元年临遣光禄大夫褒等十二人循行天下存问耆老鰥寡孤独困乏失职之民

五年賜鰥寡孤独帛二疋

永光元年賜鰥寡孤独帛

二年賜鰥寡孤独帛

建昭四年臨遣諫大夫博士賞等二十一人巡行天下存問耆長鰥寡孤独困乏失職之人

成帝建始元年賜鰥寡孤独錢帛各有差

鴻嘉元年賜鰥寡孤独帛

永始四年賜云陽鰥寡孤独帛

平帝元始四年賜鰥寡孤独帛【并本紀】

恤流民

漢二年關中大飢米斛萬錢人相食令民就食蜀漢【高紀】五年諸民略在楚者皆歸之民前或相聚保山澤不書名數今天下已定令各歸其縣復故爵田宅吏以文法教訓辨告勿笞辱【同上】

漢興大城名都民人散亡逮文景四五世間流民既歸戶口亦息【功臣表】

景帝即位議民欲徙寬大地者听之【本紀】

武帝元狩四年山東被水災民多飢乏天子遣使振貧民尚不能救及徙民於關西以及充朔方以南新秦中七十余萬口【本紀凡七十二萬五千口】衣食皆仰給于縣官數歲貸與產業使者分部護冠蓋相望費以億計【食貨志】

元鼎六年山東被河災及歲不發令飢民得就食江淮間欲留留處使者冠蓋屬於道護之下巴蜀粟以振焉【同上】

元封四年關東流民二百万口无名数者四十万公卿议欲请徙流民於边以适之石庆上书愿归丞相印上报曰惟吏多私需求无已去者便居者扰故为流民法以禁重赋君不绳责长吏而请以兴徙四十万口荡摇百姓孤儿幼年未滿十岁无罪而坐率朕失望焉【石庆传】宣帝本始三年大旱三辅民就贱者且毋收事【本紀】地节三年流民还归者假公田贷种食且勿算事【本紀】胶东相王成劳来不怠流民自占八万余口賜爵关内侯秩中二千石【本傳】

成帝河平元年流民入函谷关【天文志】

四年遣博士嘉等举行濒河之郡避水它郡国者在所冗食之谨遇以文理毋令失职【本纪】

阳朔二年秋关东大水流民欲入函谷天井壶口五阮关者勿苛留遣谏大夫博士分行视【本纪】

鸿嘉四年流民欲入关辄籍纳所之郡国谨遇以理【本纪】平帝元始二年郡国大旱蝗青州尤甚民流亡罢安定呼池苑以为安民县起官寺市里募徙贫民县次给食至徙所赐田宅什器假与犁牛种食又起五里於长安城中宅二百区以居贫民【本纪】

西汉会要卷四十八

卷四十九

钦定四库全书

西汉会要卷四十九

宋 徐天麟 撰

民收四

徙豪族

高帝罢平城使娄敬往结和亲敬从匈奴来因言匈奴河南白羊楼烦王去长安迎者七百里轻骑一日一夕可至秦中新破少民地肥饶可益实夫诸侯初起时非齐诸田楚招屈景莫与今陛下虽都关中实少人北近外寇东有六国强族一日有变陛下亦未得安枕而卧也臣愿陛下徙齐诸田楚昭屈景燕赵韩魏後及豪杰名家且实关中无事可以备胡诸侯有变亦足率以东伐此强本弱末之术也上曰善乃使刘敬徙所言关中十余万口【本传】

高祖九年十一月徙齐楚大族昭氏屈氏景氏怀氏田氏五姓关中与利田宅【本纪】

十一年令丰人徙关中者皆复终身【纪时太上皇思欲归丰高祖乃更筑城寺市里如丰县号曰新丰徙民以充实之】

汉兴立都长安徙齐诸田楚昭屈景及诸功臣家於长陵後世世徙吏二千石高訾富人家豪杰并兼之家於诸陵盖以强干弱支非独为奉山园也是故五方杂厝风俗不纯其世家则好礼文富人商贾则为利豪杰则游侠通奸【地理志】

孝武建元三年赐徙茂陵者户钱二十万田二顷【纪】主父偃说上曰天下豪杰兼并之家乱衆民皆可徙茂陵内实京师外销奸猾上从之【本传】

元朔二年徙郡国豪杰及訾三百万以上于茂陵太始元年徙郡国吏民豪杰于茂陵云陵【师古曰时未有云陵当言云阳】

孝昭始元三年募民徙云陵赐钱田宅【纪下同】

孝宣本始元年募郡国吏民訾百万以上徙平陵【纪】二年以水衡钱为平陵民起田宅

元康元年徙丞相列侯吏二千石訾百万以上者杜陵孝元永光四年上为初陵诏勿置县邑使天下安土乐业亡有动摇之心

孝成鸿嘉二年徙郡国豪杰訾百万以上五千户于昌陵永始元年罢昌陵及故陵勿徙民

哀帝建平元年为初陵勿徙郡国民

长陵【车千秋施讐】 安陵【袁盎 冯唐籍孺 闵孺】

阳陵【周仁 田延年】 茂陵【张敞祖父 杜邳祖父董仲舒 郭解

杜周 原涉祖父】 云陵【黄霸】

平陵【郑崇祖父 平当祖父 何并祖父朱云 魏相 韦贤】

杜陵【杜延年 尹翁归 张敞 韩延寿冯奉世 王商 史丹 田何萧望之 韦玄成黄霸
张安世】 昌陵【辛庆忌班况】

奴婢

高祖令民得卖子【食货志】

五年诏曰民以饥饿自卖为人奴婢者皆免为庶人也【本纪】

文帝务劝农桑帅以俭节未有并兼之害故不为民田及奴婢为限【食货志师丹疏】

贾谊曰今岁恶不入请卖爵子【食货志注云卖爵级又卖子也】

晁错劝文帝募民徙塞下募民以丁奴婢赎罪及输奴婢欲以拜爵者【晁错传】

文帝时女子缁紫愿没入为官婢以赎父罪【刑法志】後四年免官奴婢为庶人【本纪】

武帝建元元年赦吴楚七国帑输在官者【纪应劭曰吴楚七国反时其首事者妻子没入为官奴婢武帝哀焉皆赦遣之也】

董仲舒说武帝曰宜去奴婢除专杀之威【食货志服虔曰不得专杀奴婢也】

其後府库并虚乃募民能入奴婢得?终身复为郎增秩【同上】

及杨可告缗徧天下乃分遣御史廷尉正监分曹往往即治郡国缗钱得民财物以亿计奴婢以千万数其没入奴婢分诸苑养狗马禽兽及与诸官官益杂置多徙奴婢衆而下河漕度四百万石及官自粿乃足【同上】杜延年坐官奴婢乏衣食免官

元帝时贡禹言官奴婢十余万游戏亡事税良民以给之宜免为庶人【贡禹传】

成帝永始四年诏曰公卿列侯亲属近臣多蓄奴婢被服绮縠其伸饬有司以渐禁之【本纪】

哀帝即位诏曰诸侯王列侯公主吏二千石及豪富民多蓄奴婢田宅亡限其议限列有司条奏诸侯王奴婢二百人列侯公主百人关内侯吏民三十人年六十以上十岁以下不在数中诸名田蓄奴婢过品者皆没入县官官奴婢年五十以上免为庶人【本纪】

平帝元始三年王莽奏吏民奴婢田宅之品【本纪】

杂录

文帝时贾谊上疏曰今民卖僮者为之绣衣丝履偏诸缘纳之闲中是古天子后服所以庙而不宴者也而庶人得以衣婢妾天子之后以缘其领庶人?妾以缘其履此臣所谓舛也【贾谊传】

卓王孙僮客八百人程郑亦数百人【司马相如传】

苍头庐儿皆用致富非天意也【鲍宣传孟康曰黎民黔首黎黔皆黑也下民陰类故以黑为号汉名奴为苍头非纯黑以别於良人也诸给殿中者所居为庐苍头侍从因呼为庐儿臣瓚曰汉仪注官奴给书计从侍中已下为苍头青幘】

家僮【卫青传】 臧获婢妾【司马迁传】

僮使【王莽传】 奴客【尹翁归传】

僮骑【张敞传又何并传作童骑】 傅婢【王吉传】

私奴以千数【王商传】 僮手指千【指千则人百巴寡妇清传】 白衣【两龚传注白衣给官府趋走贱人】 父御婢【夏侯婴传】

庸保杂作【司马相如传】 骑奴【何并传】

治豪猾

济南瞿氏【瞿音闲】宗人三百余家豪猾二千石莫能制於是景帝拜郅都为济南守至则诛瞿氏首恶余皆股栗居岁余郡中不拾遗旁十余郡守畏都如大府【郅都传】义纵为河内都尉至则族灭其豪穰氏之属河内道不拾遗【义纵传】

王温舒由广平都尉迁河内太守素居广平时皆知河内豪奸之家及往以九月至令郡具私马五十匹为驿自河内至长安部吏如居广平时方略捕郡中豪猾相连坐千余家上书请大者至族小者乃死家尽没入臧奏请不过二日得可事论报至流血十余里河内皆怪其奏以为神速尽十二月郡中无犬吠之盗其颇不得失之旁郡追求会春温舒顿足叹曰嗟乎令冬月益展一月足吾事矣【王温舒传】

赵广汉守京兆尹新丰杜建为京兆掾建素豪侠宾客为奸利广汉闻之先风告建不改於是收案致法中贵人豪长者为请无不至终无所听宗族宾客谋欲篡取广汉尽知其计议主名起居使使告曰若计如此且并灭家令数吏将建弃市莫敢近者京师称之【本传】

广汉迁颍川太守郡太守原褚宗族横恣宾客犯为盗贼前二千石莫能禽制广汉既至数月诛原褚首恶郡中震栗先是颍川豪杰大姓相与为婚姻吏俗朋党广汉患之厉使其中可用者受记出有案问既得罪名行法罚之广汉故漏泄其语令相怨咎又教吏为觚箠及得投书削其主名而托以为豪杰大姓子弟所言其後强宗大族家家结为仇讎奸党散落风俗大改吏民相告计广汉得以为耳目盗贼以故不发又辄得一切治理威名流闻【本传】

尹翁归拜东海太守东海大豪郯许仲孙为奸猾乱吏治郡中苦之二千石欲捕者辄以力势变诈自解终莫能制翁归至论弃仲孙市一郡怖栗莫犯禁东海大治【本传】

王尊为安定太守出教告属县曰太守视事一月矣五官掾张辅怀虎狼之心贪污不轨一郡之钱尽入辅家然适足以葬矣今将辅送狱直符史诣合下从太守受其事丞戒之戒之相随入狱及辅系狱数日死尽得其狡猾不道百万奸臧威震郡中盗贼分散入傍郡界【本传】严延年为涿郡太守时郡比得不能太守涿人毕野白等由是废乱大姓西高氏东高氏自郡吏以下皆畏避之莫敢与语咸曰宁负二千石无负豪大家宾客放为盗贼发辄入高氏吏不敢追浸日多道路张弓拔刃然後敢行其乱如此延年至遣掾蠡吾赵绣按高氏得其死罪绣见延年新将心内惧即为两劾欲先白其轻者观延年意怒乃出其重劾延年已知其如此矣赵掾至果白其轻者延年索怀中得重劾即收送狱夜入晨将至市论杀之先所按者死吏皆股弁更遣吏分考两高穷竟其奸诛杀各数十人郡中震恐道不拾遗【本传】永始元延年间上怠於政贵戚骄恣红阳长仲兄弟交通轻侠臧匿亡命而北地大豪浩商等报怨杀义渠长妻子六人往来长安中丞相御史遣掾求逐党与诏书召捕久之乃得长安中奸猾浸多闾里少年羣辈杀吏受口报仇相与探赍为弹得赤丸者斫武吏得黑者斫文吏白者主治丧城中薄暮尘起剽劫行者死伤横道枹鼓不絶尹赏以三辅高第选守长安令得壹切便宜从事赏至修治长安狱穿地深各数丈致令辟为郭以大石覆其口名为虎穴乃部户曹掾史与乡吏亭长里正父老伍人杂举长安中轻薄少年恶子无市籍商贩作务而鲜衣凶服被铠扞持刀兵者悉籍记之得记数百人赏一朝会长安吏车数百两分行收捕皆劾以为通行饮食羣盗赏亲阅见十置一其余尽以次内虎穴中百人为辈覆以大石数日一发视皆相枕藉死使輿出瘞寺门桓东揭着其姓名百日後乃令死者家各自发取其尸亲属号哭道路皆歔歔长安中歌之曰安所求子死桓东少年场生时谅不谨枯骨後何葬赏所置皆其魁宿或故吏善家子失计随轻黠愿自改者财数十百人皆贯其罪诡令立功以自赎尽力有效者因亲用

之为爪牙追捕甚精甘耆奸恶甚於凡吏赏视事数月盜賊止郡国亡命散走各归其处不敢
闕长安江湖中多盜賊以赏为江夏太守捕格江賊及所誅吏民甚多坐殘賊免南山羣盜起
以赏为右輔都尉迁执金吾督大奸猾三輔吏民甚畏之【尹赏传】

西汉会要卷四十九

卷五十

钦定四库全书

西汉会要卷五十

宋 徐天麟 撰

食货一

垦田数

汉提封田一万万四千五百一十三万六千四百五顷其一万万二百五十二万八千八百八十九顷邑居道路山川林泽羣不可垦其三千二百二十九万九百四十七顷可垦不垦定垦田八百二十七万五百三十六顷汉极盛矣【地理】

限民名田

董仲舒说武帝曰秦用商鞅之法改帝王之制除井田民得卖买富者田连阡陌贫者亡立锥之地小民安得不困汉兴循而未改古井田法虽难卒行宜少近古限民名田以澹不足【师古曰名田占田也各为立限不使富者过制则贫弱之家可足也】塞兼并之路然後可善治也【食货志】

元光中令贾人有市籍及家属皆无得名田以便农敢犯令没入田货【食货志】

哀帝即位师丹建言古之圣王莫不设井田然後治乃可平文帝务劝农桑帅以节俭未有并兼之害故不为民田及奴婢为限今豪富吏民訾数钜万而贫者俞困宜略为限天子下其议丞相孔光大司空何武奏请诸侯王列侯皆得名田国中列侯在长安公主名田县道及关内侯吏民名田皆毋过三十顷贾人皆不得名田为吏犯者以律论名田过品皆没入官时田宅奴婢贾为减贱丁传用事董贤隆贵皆不便也诏书且须後遂寝不行【食货志】

代田

武帝末年以赵过为搜粟都尉过能为代田一晦三耨岁代处故曰代田古法也后稷始耨田以二耜为耦【师古曰并两耜而耕】广尺深尺曰耨长终晦一晦三耨一夫三百耨而播种於耨中苗生叶以上稍耨陇草因隤其土以附苗根故其诗曰或芸或苳黍稷穰穰芸除草也苳附根也言苗稍壮每耨辄附根比盛暑隤尽而根深能风与旱【能读曰耐】故穰穰而盛也其耕耘下种田器皆有便巧率十二夫为田一井一屋故晦五顷【邓展曰九夫为井三夫为屋夫百亩於古为十二顷古者百步为晦汉二百四十步为晦古千二百晦则得今五顷】

用耦犁二牛三人一岁之收常过缦田晦一斛以上【缦田谓不为畦者也】善者倍之过使教田太常三辅【太常主诸陵有民故亦有田种】大农置工巧奴与从事为作田器二千石遣令长三老力田及里父老善田者受田器学耕种养苗状民或苦少牛亡以趋泽故平都令光教过以人挽犁过奏光以为丞教民相与庸挽犁【言换功共作也】率多人者田日三十晦少者十三晦以故田多垦辟过试以离宫卒田其宫墺地课得谷皆多其旁田晦一斛以上令命家田三辅公田【韦昭曰命家谓受爵命一爵为公士以上令得田公田优之也】又教边郡及居延城是後边城河东弘农三辅太常民皆便代田用力少而得谷多【食货志】

假民公田【省苑囿】

汉二年故秦苑囿园池令民得田之【纪下同】

武帝建元元年罢苑马以赐贫民【师古曰养马之苑禁百姓刍牧今罢之】昭帝元凤三年罢中牟苑赋贫民

宣帝地节元年假郡国贫民田

三年诏池籞未御幸者假与贫民又令流民还归者假公田贷种食

元帝初元元年以三辅太常郡国公田及苑可省者振业贫民江海陂湖园池属少府者以假贫民勿租赋六月省苑马以振困乏

二年诏罢水衡禁囿宜春下苑少府炊飞外池严籞池田假与贫民

永光元年令民各务农亩无田者假之

哀帝建平元年太皇太后诏外家王氏田非冢茔皆以赋贫民

劝农桑

汉兴诸侯并起民失作业而大饥馑凡米石五千人相食死者过半高祖乃令民得卖子就食蜀汉天下既定轻田租什五而税一量吏禄度官用以赋於民【食货志】惠帝即位减田租复十五税一【邓展曰汉初十五税一中间废今复之也见本纪】

四年举民孝弟力田者复其身【本纪】

高后元年置孝弟力田二千石者一人【本纪】

文帝时民近战国背本趋末贾谊说上曰一夫不耕或受之饥今背本而趋末生之者甚少而

靡之者甚多天下财产何得不蹙今殴民而归之农皆着於本使天下各食其力末伎游食之民转而缘南亩则蓄积足而人乐其所矣上感谊言躬耕以劝百姓【全文见食货志】

二年正月诏曰夫农天下之本也其开籍田朕亲率耕以给宗庙粢盛【本纪】

九月诏曰农天下之本也民所恃以生也而民或不务本而事末故生不遂朕忧其然故今兹亲率羣臣农以劝之其赐天下民今年田租之半【本纪】

晁错说上曰今海内为一而蓄积未及者何也地有遗利民有余力生谷之土未尽垦游食之民未尽归农也今农夫五口之家其服役者不下二人其能耕者不过百亩百亩之收不过百石春耕夏耘秋获冬藏伐薪樵治官府给繇役春不得避风尘夏不得避暑热秋不得避陰雨冬不得避寒冻四时之间亡日休息又私自送往迎来吊死问疾养孤长幼在其中勤苦如此尚复被水旱之灾急政暴虐赋歛不时朝令而暮改当具有者半贾而卖亡者取倍称之息於是卖田宅鬻子孙以偿责者矣而商贾大者积贮倍息小者坐列贩卖操其奇赢日游都市乘上之急所卖必倍故其男不耕耘女不蚕织衣必文采食必粱肉亡农夫之若有仟佰之得因其富厚交通王侯力过吏势以利相倾千里游敖冠盖相望乘坚策肥履丝曳縞此商人所以兼并农人农人所以流亡者也今法律贱商人商人已富贵矣尊农夫农夫已贫贱矣故俗之所贵主之所贱也吏之所卑法之所尊也上下相反好恶乖迕而欲国富法立不可得也方今之务莫若使民务农而已矣欲民务农在於贵粟贵粟之道在於使民以粟为赏罚今募天下入粟县官得以拜爵得以除罪如此富人有爵农民有钱粟有所渫夫能入粟以受爵皆有余者也取於有余以供上用则贫民之赋可损所谓所有余补不足令出而民利者也【食货志】

十二年诏曰道民之路在於务本朕亲率天下农十年于今而野不加辟岁一不登民有饥色吾诏书数下岁劝民种植而功未兴是吏奉吾诏不勤而劝民不明也其赐农民今年租税之半又曰力田为生之本也其以户口率置孝弟力田常员令各率其意以道民焉【本纪】十三年二月诏曰朕亲率天下农耕以供粢盛皇后亲桑以奉祭服其具礼仪【本纪】

六月诏曰农天下之本务莫大焉今厘身从事而有租税之赋其於劝农之道未备其除田之租税【本纪】

景帝後二年四月诏曰雕文刻镂伤农事者也锦绣纂组害女红者也农事伤则饥之本也女红害则寒之原也夫饥寒并至而能亡为非者寡矣朕亲耕后亲桑以奉宗庙粢盛祭服为天下先不受献减大官省繇赋欲天下务农蚕素有蓄积以备灾害【本纪】

三年春诏曰农天下之本也黄金珠玉饥不可食寒不可衣以为币用不识其终始闲岁或不登意为末者衆农民寡也其令郡国务劝农桑益种植可得衣食物【本纪】孝景娄敕有司以农为务【食货志】

武帝之初国家亡事非遇水旱则民人给家足都鄙廩庾尽满太仓之粟陈陈相因充溢露积於外腐败而不可食是後外事四夷内兴功利役费并兴而民去本董仲舒说上曰春秋他谷不书至於麦禾不成则书之令关中之俗不好种麦愿诏大司农使关中民益种宿麦毋令後时【食货志】

亲耕籍田以为农先【董仲舒传】

元狩三年遣谒者劝有水灾郡种宿麦【本纪】

征和四年上耕于钜定【本纪】

仲舒又言古井田法虽难卒行宜少近古限民名田以澹不足塞并兼之路薄赋歛省繇便以寬民力然後可善治也帝末年悔征伐之事乃封丞相为富民侯下诏曰方今之务在於力农以赵过为搜粟都尉过能为代田用力少而得谷多【食货志】

昭帝始元年二月上耕于鉤盾弄田【本纪】

六年正月耕于上林【本纪】

元平元年诏曰天下以农桑为本日者省用罢不急官省外繇耕桑者益衆而百姓未能家给其减口赋钱【本纪】昭帝时流民稍还田野益辟颇有蓄积【食货志】

宣帝即位用更多选贤良百姓安土岁数丰穰谷石至五钱农人少利大司农耿壽昌请置常平仓以谷贱时增其价而籴以利农谷贵时减贾而粜民便之【食货志】蔡癸以好农使劝郡国至大官【同上】

元帝建昭五年三月诏曰方春农桑与百姓戮力自尽之时也故是月劳农劝民无使後时今不良之吏覆按小罪逮召证案与不急之事以妨百姓使失一时之作忘岁终之功公卿其明察申敕之【本纪】

成帝阳朔四年诏曰夫洪范八政以食为首斯诚家给刑错之本也先帝劬农簿其租税宠其强力令与孝弟同科间者民弥惰怠乡本者少将何以矫之方东作时令其二千石勉劝农桑出入阡陌致劳来之【本纪】

平帝元始元年置大司农部丞十三人部一州劝农桑【本纪】

龚遂为渤海太守见齐俗奢侈好末伎不田作乃劝民务农桑令口种一本榆百本?五十本葱一畦韭家二母彘五鸡使民卖劔买牛卖刀买犊郡中皆有蓄积吏民富实【本传】

召信臣等南阳躬劝耕农出入阡陌时行视郡中水泉开通沟渎起水门提阨凡数十处灌溉至三万顷为民作均水约束刻石立田畔郡中莫不耕稼力田户口增倍【本传】

西汉会要卷五十

卷五十一

钦定四库全书

西汉会要卷五十一

宋 徐天麟 撰

食货二

水利

魏文侯时史起为邺令引漳水溉邺以富魏之河内民歌之曰邺有贤令兮为史公决漳水兮灌邺旁终古舄鹵兮生稻粱【沟洫志下同】

韩使水工郑国间说秦令凿泾水自中山西邸瓠口为渠并北山东注洛三百余里注填阡之水溉舄鹵之地四万余顷收皆晦一锺於是关中为沃野无凶年名曰郑国渠【右二渠虽非汉所开而汉实赖之故沟洫志叙述为详】

武帝时郑当时为大司农言异时关东漕粟从渭上度六月罢而渭水道九百余里时有难处引渭穿渠起长安旁南山下至河三百余里径易漕度可令三月罢而渠下民田万余顷又可得溉此损漕省卒而益肥关中之地上以为然令水工徐伯表发卒数万人穿漕渠三岁而通以漕大便利其後漕稍多而渠下之民颇得以溉矣

元鼎六年儿寛为左内史请凿六辅渠益溉郑国旁高邛之田廼减御史稻田租令平繇行水毋使失时太始二年赵中大夫白公复奏穿渠引渠水首起谷口尾入栢阳注渭中袤二百里溉田四千五百余顷名曰白渠民得其饶歌之【云云】

杂录

水衡都尉【张晏曰掌都水】属官有水司空都水长丞【百官表】武帝时河东守番系言穿渠引汾溉皮氏汾陰下引河溉汾陰蒲坂下上以为然发卒数万人作渠田不利废【沟洫志下同】

其後有人上书欲通褒斜道及漕上令拜汤子邛发数万人作褒斜道道果便近而水多湍石不可漕

其後严熊言临晋民愿穿洛以溉重泉以东万余顷故恶地於是发卒万人穿渠引洛水至商顔下凿井深者四十余丈井下相通行水穿得龙首故名龙首渠作之十余岁渠颇通犹未得

其饶

刘向以故九卿召拜为中郎领护三辅都水【本传】

息夫躬言秦开郑国渠以富国强兵今为京师土地肥饶可度地埶水泉广溉灌之利哀帝使躬持节领护三辅都水躬立表欲穿长安城引漕注太仓下以省转输议不可成乃止【本传】

召信臣守南阳时行视郡中水泉开通沟渎起水门提阨凡数十处以广灌溉岁增加多至三万顷信臣为民作均水约束刻石立於田畔以防分争

田租

秦田租口赋盐铁之利二十倍於古或耕豪民之田见税十五【言贫人无田而耕垦豪富家田十分之中以五输田主也】汉兴循而未改【食货志董仲舒疏】

汉兴天下既定高帝约法省禁轻田租什五而税一量吏禄度官用以赋於民【食货志】

惠帝即位减田税复什五税一【纪邓展曰汉初什五税一中闲废今复之】文帝十三年诏除田之租税【本纪】

孝景二年令民半出田租三十而税一也【食货志按本纪书於元年】武帝元鼎六年上曰左右内史地名山川原甚衆细民未知其利今内史稻田租挈重【挈苦计反收田租之约令也】不与郡同【郡谓四方诸郡】其议减令史民勉尽地利平繇行水勿使失时【沟洫志】

昭帝始元六年令民得以律占租【本纪注云武帝时赋歛繁多律外而取今始复书旧占章瞻反】

王莽下令曰汉氏减轻田租三十而税一常有更赋疲癯咸出厥名三十实什税五【食货志】

荀悦论曰古者什一而税以为天下之中正也令汉氏或百一而税可谓鲜矣然豪强富人占田逾侈输其赋大半官收百之一税民输大半之赋官家之惠优於三代豪强之暴酷於亡秦氏上惠不通威福分於豪强也文帝不正其本而务除租税适足以资豪强耳

赐民租赋

文帝二年赐天下民今年田租之半

十二年诏赐农民今年租税之半

武帝元封四年祠后土赐三县及杨氏无出今年租赋五年修封禅所幸县无出今年租赋

天汉三年修封泰山行所过无出田租

昭帝始元二年诏毋令民出今年田租

宣帝本始元年凤凰集胶东千乘租税勿收

三年郡国伤旱甚者毋出租税

四年诏被地震坏败甚者勿收租税

元康二年令郡国被灾甚者毋收今年租税

神爵元年幸甘泉所过毋出田租

甘露三年凤凰集新祭毋出今年田租

元帝初元元年令郡国被灾害甚者毋出租赋

二年郡国被地动灾甚者毋出租赋

永光元年幸甘泉行所过毋出租赋

成帝建始元年郡国被灾害什四以上毋收田租鸿嘉四年郡国被灾害什四以上民费不满三万勿出租赋

永始四年幸甘泉河东所过无出田租

哀帝即位令水所伤县邑及他郡国灾害什四以上民费不满十万皆无出今年租赋

平帝元始二年天下民费不满二万及被灾之郡不满十万勿租税【并本纪】

算赋

汉四年初为算赋【高纪如淳曰汉仪注民年十五以上至五十六出赋钱人百二十为一等为治库兵车马】

孝惠六年女子年十五以上至三十不嫁五算【惠纪注云汉律人出一算贾人与奴婢倍算】

文帝民赋四十【贾捐之传常赋百二十时天下民多故出赋四十】

武帝下诏曰前有司奏欲益民赋三十助边用是重困老弱孤独也【本纪又萧望之传张敞曰先帝征行三十余年百姓犹不加赋】

武帝建元元年诏民年八十复二算【本纪复二口之算也】

元封元年行所巡至县无出今年算【本纪】

宣帝地节三年流民还归者且勿算事【本纪】

宣帝甘露元年减民算三十【本纪一算减钱三十也】

元帝时贡禹请民年二十乃算【本纪】

成帝建始二年减天下赋钱算四十【本纪注云本算百二十今减四十为八十】

口赋

昭帝元凤四年诏毋收四年五年口赋【昭纪如淳曰汉仪注民年七岁至十四出口赋钱人二十三二十钱以食天子其三钱者武帝加口钱以补车骑马】

元平元年诏减口赋钱有司奏请减什三上许之【同上】宣帝五凤三年减天下口钱【本纪】

元帝时贡禹以为古民亡赋算口钱起武帝征伐四夷重赋於民产子三岁则口出钱故民重困至於生子辄杀宜令儿七岁去齿乃出口钱年二十乃算天子下其议令民产子七岁乃出口钱自此始【贡禹传】

更赋

汉氏常有更赋疲癯咸出【食货志】

昭帝始元四年诏三年以前逋更赋未入皆勿收【本纪如淳曰更有三品有卒更有践更有过更古者正卒无常皆当人迭为之一月一更是为卒更也贫者欲得顾更钱次直者出钱顾之月二千是为践更也天下人皆直戍边三日不可人人自行三日戍谓不行者出钱三百入

官官以给戍者是为遇更也】

户赋

秦汉之制列侯封君食租税岁率户二百千户之君则二十万朝覲聘享出其中【货殖传】

军赋

惠帝即位令吏六百石以上父母妻子与同居及故吏尝佩将军都尉印将兵及佩二千石官印者家难给军赋他无有所与【本纪】

西汉会要卷五十一

卷五十二

钦定四库全书

西汉会要卷五十二

宋 徐天麟 撰

食货三

算訾

訾算【景纪後二年服?注云訾万钱算百二十七】

算车船

武帝元光六年初算商车【本纪注云始税商贾车船令出算】

时公卿言异时算轺车有差请算如故非吏比者三老北边骑士轺车一算【师古曰比例也身非为吏之例非为三老非为北边骑士而有轺车皆令出一算】商贾人船车二算船五丈以上一算匿不自占占不悉戍边一岁有能告者以其半畀之【食货志】

算缗钱

武帝元狩四年初算缗钱【本纪李斐曰一贯千钱出算二十也师古曰谓有储积钱者计其缗而税之】

公卿言异时算轺车贾人缗钱有差请算如故诸贾人未作赏贷卖买居邑积诸物及商以取利者虽无市籍各以其物自占率缗钱二千而一算【瓚曰此缗钱为是储缗钱也故随其用所施施於利重者其算亦多】诸作有租及铸【如淳曰以手力所作而卖之】率缗钱四千而一算匿不自占占不悉戍边一岁没入缗钱有能告者以其半畀之【食货志】

元鼎三年十一月令民告缗者以其半与之【本纪】

天子既下缗钱令而尊卜式百姓终莫分财佐县官於是告缗钱纵矣【故令相告言也】杨可告缗徧天下中家以上大氏皆遇告杜周治之狱少反者乃分遣御史廷尉正监分曹往往即治郡国缗钱得民财物以亿计奴以千万数田大县数百顷小县百余顷宅亦如之於是商贾中家以上大氏破民媮甘食好衣不事蓄臧之业而县官以盐铁缗钱之故用少饶矣【食货志】

杨可方受告缗义纵以为此乱民部吏捕其为可使者天子闻使杜式治以为废格沮事业纵市【史记义纵传】元鼎四年令民得蓄边县官假马母三岁而归及息什一以除告缗用充入新秦中【食货志师古曰官得母马之息以给用度故除告缗之令也】

租六蓄

武帝租及六蓄【西域传赞】

昭帝元凤二年令郡国无斂今年马口钱【本纪文颖曰往时有马口出斂钱今省如淳曰所请租及六蓄也】

翟方进请算马牛羊【张晏曰马牛羊头数出税算千输二十也】

杂税

武帝太初四年徙弘农都尉治武关税出入者以给关吏卒食【本纪】

军市租【冯唐传魏尚为云中守军市租尽以给士卒】

市籍租【何武传】

橐租【贡禹传】

海租【食货志耿寿昌白增海租三倍】

海税【平纪注云海丞主海税】

给献费

高帝十一年诏曰欲省赋甚今献未有呈吏或多赋以为献而诸侯王尤多民疾之令诸侯王通侯常以十月朝献及郡各以其口数率人岁六十三钱以给献费【本纪】

以粟当赋

昭帝元凤二年令三辅太常郡得以菽粟当赋【纪师古曰诸侯应出赋算租税者皆听以菽粟当钱物也】

六年诏谷贱伤农今三辅太常谷贱其令以菽粟当今年赋【本纪】

募民入粟

晁错说文帝曰方今之务莫若使民务农欲民务农在於贵粟贵粟之道在於以粟为赏罚今募天下入粟县官得以拜爵得以除罪如此则富人有爵农民有钱粟有所渫夫能入粟以受爵者皆有余者也取於有余以供上用则贫民之赋可损所谓损有余补不足令出而民利者也粟者王者大用政之本务令民入粟受爵至五大夫乃复一人耳此其与骑马之功相去远矣爵者上之所擅出於口而亡穷粟者民之所种生於地而不乏夫得高爵与免罪人之所甚欲也天下使人入粟於边以受爵免罪不过三岁塞下之粟必多矣於是文帝从错之言令民入粟边六百石爵上造稍增至四千石为五大夫万二千石为大庶长各以多少级数为差错复奏言陛下幸使天下入粟塞下以拜爵甚大惠也窃恐塞卒之食不足用大渫天下粟边食足以支五岁可令入粟郡县矣足支一年以上可时赦勿收农民租时有军役若遭水旱民不困乏天下安宁岁熟且美则民大富乐矣上复从其言乃下诏赐民十二年租税之半明年遂除民田之租税【食货志】

武帝通西南夷道悉巴蜀租赋不足以供之乃募豪民田南夷入粟县官而内受钱於都内【同上】

榷酤

文帝後三年诏曰以口量地其於古犹有余而食之甚不足者其咎安在无乃为酒醪以靡谷者多与【本纪】景帝中三年夏旱禁酤酒【本纪】

後元年夏民得酤酒【本纪】

武帝天汉三年初榷酒酤【本纪韦昭曰以木渡水曰榷谓禁民酤酿独官开置如道路设木为榷独取利也师古曰榷者独步桥今略约是】

昭帝始元六年二月诏有司问郡国所举贤良文学民所疾苦议罢盐铁榷酤秋七月罢榷酤官卖酒升四钱【本纪按食货志云弘羊与丞相千秋共奏罢酒酤】

盐铁

秦田租口赋盐铁之利二十倍於古汉兴循而未改【食货志】

孝惠高后时吴有豫章铜山即招致天下亡命盗铸钱东煮海水为盐以故无赋国用饶足【吴王濞传】

班固赞曰吴王擅山之利能薄歛以使其衆逆乱之萌自其子兴古者诸侯不过百里山海不以封盖防此矣

文帝後六年?山泽【本纪】

董仲舒说武帝曰宜少近古盐铁皆归於民然後可善治也【食货志】

元狩中兵连不解县官大空富商大贾冶铸?盐财或累万金而不佐公家之急於是以东郭咸阳孔仅为大农丞领盐铁事【已上元狩四年事】五年大农上盐铁丞孔仅咸阳言山海天地之藏宜属少府陛下弗私以属大农佐赋愿募民自给费因官器作?盐官与牢盆【苏林曰牢价直也今世人言顾手牢如淳曰牢廩食也古者名廩为牢盆煮盐盆也师古曰牢苏说是】浮食奇民欲擅斡山海之货以致富美役利细民其沮事之议不可胜听敢私铸铁器煮盐者鈇左趾没入其器物郡不出铁者置小铁官【铸故铁】使属在所县使仅咸阳乘传举行天下盐铁作官府除故盐铁家富者为吏吏益多贾人矣孔仅使天下铸作器三年中拜为大农列於九卿而县官以盐铁缗钱之故用少饶矣【少史作益】益广开置左右辅初大农干盐铁官布多置水衡欲以主盐铁及杨可告缗上林财物衆乃令水衡主上林上林既充满益广云云元鼎六年拜卜式为御史大夫式既在位见郡国多不便县官作盐铁器苦恶【盐味苦器脆恶】贾贵或强令民买之乃因孔仅言事上不说汉连出兵三岁费仰大农以均输调盐铁助赋故能澹之【食货志】

元鼎中博士徐偃使行风俗偃矫制使胶东鲁国鼓铸铁盐还奏事徙为太常丞御史大夫张汤劾偃矫制大害法至死偃以为春秋之义大夫出疆有可以安社稷存万民颺之可也汤以致其法不能诎其义有诏下终军问状军诘偃曰古者诸侯国异俗分百里不通时有聘会之事安危之執呼吸成变故有不受辞造命颺已之宜今天下为一万里同风故春秋王者无外偃巡封域之中称以出疆何也且盐铁郡有余臧正二国废不鼓不足以利害而以安社稷存万民为辞何也又诘偃胶东南近琅邪北接北海鲁国西枕泰山东有东海受其盐铁偃度四郡口数田地率其用器食盐不足以并给二郡邪将執宜有余而吏不能也何以言之偃矫制而鼓铸者欲及春耕种贍民器也今鲁国之鼓当先具其备至秋乃能举火此言与实反者非偃已前三奏无诏不惟所为不许而直矫作威福以从民望干名采誉此明圣所必加诛也枉尺直寻孟子称其不可令所犯罪重所就者小偃自予必死而为之邪将幸诛不加欲以采名也偃穷诎服罪当死军奏偃矫制颺行非奉使体请下御史召偃即罪奏可上善其诘有诏示御史大夫【终军传】

元封元年桑弘羊为治粟都尉领大农尽民仅干天下盐铁乃请置大农部丞数十人分部主郡国各往往置均输盐铁官【食货志】

昭帝即位六年诏郡国举贤良文学之士问以民所疾苦教化之要皆对愿罢盐铁酒榷均输官毋与天下争利示以俭节弘羊难以为国家大业所以制四夷安边足用之本不可废也【食货志】

所谓盐铁议者起始元中召文学贤良问以治乱皆对愿罢郡国盐铁酒榷均输毋与天下争利御史大夫弘羊以为此乃所以安边竟制域外国家大业不可废也当时相诘难颇有其议

文至宣帝时汝南桓宽次公推衍盐铁之议增广条目极其论难着数万言亦欲以究治乱成一家之法焉其辞曰观公卿贤良文学之议异乎吾所闻闻汝南朱生言当此之时英俊并进贤良茂陵唐生文学鲁国万生之徒六十有余人咸聚阙庭抒六艺之风陈治平之原知者赞其虑仁者明其施勇者见其断辨者骋其辞断断焉行行焉虽未详备斯可略观矣山中刘子推言王道矫当世反诸正彬彬然弘博君子也九江祝生奋史鱼之节发愤懑讥公卿介然直而不挠可谓不畏强圉矣桑大夫据当世合时变上權利之略虽非正法鉅儒宿学不能自解博物通达之士也然摄公卿之柄不师古始放於末利处非其位行非其道果隕其性以及厥宗车丞相履伊吕之列当轴处中括囊不言容身而去彼哉彼哉若夫丞相御史两府之士不能正议以辅宰相成同类长同行阿意苟合以说其上斗筭之徒何足选也【车千秋赞】

宣帝地节四年诏盐民食之而贾咸贵其减天下盐贾【本纪】

元帝元初五年罢盐铁官【本纪】

永光二年复盐铁官【纪按食货志云元帝罢盐铁官三年而复之】

成帝绥和二年赐翟方进册曰百僚用度各有数君增益盐铁更变无常朕既不明随奏许可云云方进自杀【翟方进传】

倚顿用盐铁起

甘郾郭纵以铸冶成业与王者埒富

蜀卓氏用铁冶富

程郑亦冶铸贾豨结民富埒卓氏擅盐井之利期年所得自倍遂殖其货

宛孔氏用铁冶为业大鼓铸家致数千金

丙氏以铁冶起富至钜万【并货殖传】

西汉会要卷五十二

卷五十三

钦定四库全书

西汉会要卷五十三

宋 徐天麟 撰

食货四

钱币

秦兼天下币为二等黄金以溢名为上币铜钱质如周钱文曰半两重如其文而珠玉龟贝银锡之属为器饰宝藏不为币然各随时而轻重无常汉兴以为秦钱重难用更令民铸荚钱黄金一斤而不轨逐利之民蓄积赢余以稽市物痛腾跃米石至万钱匹马至百金【食货志】高后二年行八铢钱【本纪应劭曰本秦钱质如周钱文曰半两重如其文汉铸荚钱惠民患其轻重至此复行八铢钱】

六年行五分钱【本纪即谓荚钱】

文帝五年四月为钱益多而轻更铸四铢钱其文为半两【本纪食货志】

武帝建元元年行三铢钱【本纪坏四铢造比也重如其文】

五年罢二铢钱行半两钱【本纪】

自孝文更造四铢钱至元狩四年四十余年从建元以来用少县官往往即多铜山而铸钱民益盗铸不可胜数钱益多而轻物益少而贵有司言曰今半两钱法重四铢而奸或盗摩钱质而取鋊【鋊铜屑也】钱益轻薄而物贵则远方用币烦费不省乃令县官销半两钱更铸三铢钱重如其文其明年有司言三铢钱轻轻钱易作奸诈乃更请郡国铸五铢周郭其质令不得磨钱取鋊【食货志按本纪元狩五年罢半两钱行五铢钱今以食货志考之乃罢三铢非罢半两通鉴考异亦云纪误】元鼎二年郡国铸钱民多奸铸钱多轻而公卿请令京师铸钱赤仄【应劭曰所谓子绀钱也如淳曰以赤铜为其郭】一当五赋官用非赤仄不得行其後二岁赤仄钱贱民巧法用之不便又废於是悉禁郡国毋铸钱专令上林三官铸钱既多而令天下非三官钱不得行诸郡国前所铸钱皆废销之输入其铜三官而民之铸钱益少计其费不能相当唯真工大奸乃盗为之【同上】

自孝武元狩五年三官初铸五铢钱至平帝元始中成钱二百八十亿万余云【同上】

宣元成哀平五世亡所变改【同上】

王莽居摄变汉制以周钱有子母相权於是更造大钱径寸二分重十二铢文曰大钱五十又造契刀错刀契刀其环如大钱身形如刀长二寸文曰契刀五百错刀以黄金错其文曰一刀直五千与五铢钱凡四品并行【此以後乃莽即真後事不复录】

杂录

元帝时贡禹言古者不以金钱为币专意於农故一夫不耕必有受其饥者今汉家铸钱及诸铁官皆置吏卒徒攻山取铜钱一岁功十万人已上中农食七人是七十万人常受其饥也凿地数百丈销陰气之精地臧空虚不能含气出云斩伐林木亡有时禁水旱之灾未必不繇此也自五铢钱起已来七十余年民坐盗铸钱被刑者衆富人积钱满室犹亡厌足民心动摇商贾求利东西南北各用智巧好衣美食岁有十二之利而不出租税农夫父子暴露中野不避寒暑梓中杷土手足胼胝已奉谷租又出橐税乡部私求不可胜供故民弃本逐末耕者不能半贫民虽赐之由犹贱卖以贾穷则起为盗贼何者末利深而惑於钱也是以奸邪不可禁其原皆起於钱也疾其末者絶其本宜罢采珠玉金银铸钱之官亡复以为币市井勿得贩卖除其租铢之律租税禄赐皆以布帛及谷使百姓壹归於农复古道便议者以为交易待钱布帛不可尺寸分裂禹议亦寢【贡禹传及食货志】

有上书言古者以龟贝为货今以钱易之民以故贫宜可改币上以问师丹丹对言可改章下有司议皆以为行钱以来久难卒变易丹老人忘其前语後从公卿议【师丹传】

钱禁

孝文五年除盗铸钱令使民放铸贾谊諫曰法使天下公得顾租铸铜锡为钱敢杂以鉛铁为它巧者其罪黥然铸钱之情非穀杂为巧者不可得赢而穀之甚微为利甚厚夫事有召祸而法有起奸今令细民人操造币之執各隐屏而铸作因欲禁其厚利微奸虽黥罪日报其執不止乃者民人抵罪多者一县百数及吏之所疑榜笞奔走者甚衆夫设法以诱民使入?阱孰积於此曩禁铸钱死罪积下今公铸钱黥罪积下为法若此上何赖焉又民用钱郡县不同或用轻钱百加若干或用重钱平称不受法钱不立吏急而壹之虐则大为烦苛而力不能胜纵而弗呵虐则市肆异用钱文大乱苟非其术何乡而可哉今农事弃捐而采铜者日蕃释其耒耨冶熔炊炭奸钱日多五谷不为多善人怵而为奸邪愿民?而之刑戮刑戮将甚不详奈何而忽国知患此吏议必曰禁之禁之不得其术其伤必大令禁铸钱则钱必重重则其利深盗铸如云而起弃市之罪又不足以禁矣奸数不胜而法禁数溃铜使之然也故铜布於天下其为祸博矣今博祸可除而七福可致也何谓七福上收铜勿令布则民不铸钱黥罪不积一矣伪钱不蕃民不相疑二矣采铜铸作者及於耕田三矣铜毕归上上挟铜积以御轻重钱轻则?术歛之重则?术散之货物必平四矣?作兵器?假贵臣多少有制用别贵贱五矣?临万货?调盈虚?收奇羨则官富实而末民困六矣制吾弃财?与匈奴逐争其民则敌必怀七矣故善为天下者因祸而为福转败而为功今久退七福而行博祸臣诚伤之上不听是时吴?诸侯即山铸钱富

埽天子後卒叛逆邓通大夫也?铸钱财过王者故吴邓钱布天下【食货志下】

文帝除盗铸钱令贾山上书諫以为变先帝法非是章下诘责对以为钱者亡无器也而可以易富贵富贵者人主之操柄也令民为之是与入主共操柄不可长也其後复禁铸钱【贾山传】

景帝立人有告邓通盗出徼外铸钱下吏验问颇有遂竟案尽没入之【本传】

中六年定铸钱伪黄金弃市律【本纪】

武帝元狩中盗铸诸金钱罪皆死而民之犯者不可胜数【食货志】

自造白金五铢钱後五岁而赦吏民坐盗铸金钱死者数十万人其不自发觉相杀者不可胜计赦自出者百余万人然不能半自出天下大氏无虑皆铸金钱矣【同上】其後上林三官铸钱既多而令天下非三官钱毋得行而民之盗铸钱者益少其费不能相当惟真工大奸乃盗为之【食货志】

白金皮币

武帝元狩中县官大空而富商贾或滞财役贫转穀百数冶铸鬻盐财或累万金而不佐公家之急黎民重困於是天子与公卿议更造钱币以澹用是时禁苑有白鹿而少府多银锡有司言曰古者皮币诸侯以聘享金有三等黄金上白金为中赤金为下今半两钱法重四铢而奸或盗摩钱质而取铅钱益轻薄而物贵则远方用币烦费不省乃以白鹿皮方尺缘以绩为皮币【按本纪元狩四年造白金及皮币】直四十万王侯宗室朝覲享必以皮币荐璧然後得行又造银锡白金以为天用莫如龙地用莫如马人用莫如龟故曰金三品其一曰重八两圜之其文龙名白撰直三千二曰以重差小方之其文马直五百三曰复小橢之其文龟直三百其後官铸赤仄白金稍贱民弗宝用县官以令禁之无益岁余终废不行【食货志】

元鼎二年罢白金【武纪】

西汉会要卷五十三

卷五十四

钦定四库全书

西汉会要卷五十四

宋 徐天麟 撰

食货五

大司农钱【都内钱附】

武帝之初七十年间国家亡事都内之钱贯朽而不可校太仓之粟红腐而不可食【按百官表大司农属官有都内令丞】

山海天地之藏宜属少府陛下勿私以属大农佐赋【食货志】

帝比岁击胡大司农陈臧钱经用既竭不足以奉战士乃令民得买爵赎罪置武功爵【同上】

孝武之世开玉门通西域师旅之费不可胜计至於用度不足乃榷酒酤筦盐铁铸白金造皮币算至车船租及六畜【西域传赞】

元帝温恭少欲都内钱四十万万【王嘉传】

汉武库兵器缮治造作皆度大司农钱大司农钱自乘輿不以给共养共养劳赐一出少府【母将隆传】

少府禁钱

汉兴山川园池市肆租税之入自天子以至封君汤沐邑皆各为私奉养不领於天子之经费【食货志】

山海天地之藏宜属少府【食货志按百官表少府掌山海池泽之税以给共养】共养劳赐一出少府【母将隆传】

武帝出禁钱以振元元【食货志】

西羌之役大农钱尽乃以少府禁钱续之【贾捐之传】

元帝温恭少欲少府钱十八万万【王嘉传】

水衡钱

初大农榦盐铁官布多故置水衡欲以主盐铁及杨可告缗上林财物衆乃令水衡主上林【食货志】

宣帝本始二年以水衡钱为平陵民起第宅【纪应劭曰水衡与少府皆天子私藏耳县官工作当仰给司农今出水衡钱言宣帝更为异政也】

元帝温恭少欲水衡钱二十五万万【王嘉传】

均输平準

大农属司官有均输平準令丞【百官表孟康曰均输谓诸当有所输於官者皆令输其地土所绕平其所在时价官更於它处卖之输者既便而官有利也】

元狩中桑弘羊为大司农中丞管诸会计事稍稍置均输以通货物汉连出兵三岁费皆仰大农大农以均输调盐铁助赋故能澹之【食货志】

元封元年弘羊以诸官各自市相争物以故腾跃而天下赋输或不价其僦费乃请置大农部丞数十人分部主郡国各往往置均输盐铁官【初弘羊为大农丞固已稍稍置均输矣今既领大农故遍行其法於郡国也】令远方各以其物如异时商贾所转贩者为赋而相灌输置平準于京师都受天下委输【均输在郡国各转於京师者也平準在京师总受天下之转输者也】召工官治车诸侯皆仰给大农大农请官尽笼天下之货物贵则卖之贱则买之如此富商大贾亡所牟大利则反本而万物不得腾跃故抑天下之物名曰平準天子以为然而许之一岁之中诸均输帛五百万疋民不益赋而天下用饶【上】昭帝即位六年诏郡国举贤良文学之士问以民所疾苦皆对愿罢盐铁酒榷均输官毋与天下争利弘羊难以为此国家大业安边足用之本不可废也【食货志按桓宽盐铁论大夫曰往者郡国诸侯各以其物贡输往来烦杂物多苦恶或不偿其费故郡置输官以相给运而便远之贡故曰均输开委府于京师方以笼货物贱则贾贵则卖是以县官不失实商贾无所利故曰平準準则民不失业均输则民不劬劳故平準均输所以平万物而便百姓也文学曰古之赋税於民也因其所工不求所拙农人纳其获女人效其织今释其所有责其所无百姓贱卖货物以便上求间者郡国或令民作絮史留难与之为市吏之所入非独齐陶之缣蜀汉之布也皆民间之所为耳行奸卖平农民重苦必苦女工茧税未见输之均也县官猥发阖门擅市即万物并收并取则物腾跃跃则商贾利自市则吏容奸豪吏富商积货储物以待其急轻贾奸吏收以取贵未见準之平也盖古之均输所以齐劳逸而便贡输非以为利而贾万物也云云】

漕运

汉二年筑甬道属河取敖仓粟

萧何留收巴蜀使给军食何转漕关中给食不乏【本传】汉初转漕关东粟以给中都官岁不过数十万石【食货志】刘敬说高帝都关中张良曰关中阻三面而固守独以一面东制诸侯诸侯安定河渭漕挽天下西给京师诸侯有变顺流而下足以委输刘敬说是也【良传】

武帝元光六年郑当时为大司农言异时漕关东粟从渭上度六月罢而渭水道九百余里时有难处引渭穿渠起长安旁南山下至河三百余里径易漕度可令三月罢得以损漕省卒上以为然令齐人水工徐伯表发卒数万人穿漕渠三岁而通以漕大便利其後漕稍多而渠下之民颇得以溉矣【沟洫志按武纪元光六年穿漕渠通渭】

後河东守番系言漕从山东西岁百余万石更底柱之难败亡其多而烦费穿渠引汾溉皮氏汾陰下引河溉汾陰蒲坂下度可得五千顷故尽河堧弃地民茭收其中耳今溉田之度可得谷二百万石以上谷从渭上与关中无异而底柱之东可毋复漕上以为然发卒数万人作渠田数岁河移徙渠不利田者不能偿种其後人有上书欲通褒斜道及漕事下御史大夫张汤汤问之言抵蜀从故道多阪回远令穿褒斜道少阪近四百里而褒水通沔斜水通渭皆可以行船漕漕从南阳上沔入褒褒絕水至斜间百余里以车转从斜下渭如此汉中谷可致而山东从沔无限便於底柱之漕且褒斜村木竹箭之饶擬於巴蜀上以为然拜汤子卬为汉中守发数万人作褒斜道五百余里道便近而水多湍石不可漕【沟洫志】

卫青数以数万骑出击匈奴遂取河南地筑朔方时又通西南夷道作者数万人千里负担饷率十余锺致一石又兴十余万人筑卫朔方转漕甚远自山东咸被其劳【食货志】

武帝作柏梁台宫室之修繇此日丽徒奴婢衆而下河漕度四百万石及官自粢乃足【上】

元封元年桑弘羊又请令民入粟补吏赎罪他郡各输急处而诸农各致粟山东漕益岁六百万石一岁之中太仓甘泉仓满边余谷【上】

昭帝元凤二年诏曰前年减漕三百万石【纪】

三年诏曰民被水灾颇匱於食其止四年毋漕【上】宣帝即位岁数丰穰耿壽昌言故事岁漕关东粟四百万斛以给京师用卒六万人宜粢三辅弘农河东上党太原郡谷足供京师可省关东漕卒过半漕事果便【食货志】

仓庾

太仓【百官表司农属官有大仓令丞三辅黄图云大仓萧何造在长安城外东南】

武帝之初国家亡事太仓之粟红腐而不可食【食货志】长安仓【宣帝纪本始四年丞相以下上书入?输长安仓三辅黄图云细柳仓嘉仓在长安西渭水北古徼西有细柳仓城东有嘉仓】

甘泉仓【张敞为甘泉仓长】

河南郡荥阳有敖仓【地理志音义云敖本地名临河有大仓】

河东郡根仓湿仓【地理志】

河内仓【汲黯矫制发河内仓粟以赈贫民】

郡国诸仓【百官表司农属官有郡国诸仓长丞】

常平仓

宣帝即位谷【石】至五钱农民少利时大司农中丞耿寿昌奏言故事岁漕关东粟四百万斛以给京师用卒六万人宜糴三辅弘农河东上党太原郡谷足供京师可以省关东漕卒过半萧望之奏寿昌未足供上不听事果便寿昌遂白令边郡皆筑仓以谷贱时增其价而糴以利农贵时减其价而糴名曰常平仓民便之【食货志按宣纪五凤四年?常平仓】

赵充国曰金城湟中谷斛入钱吾谓耿中丞糴三百万斛羌人不敢动矣中丞请糴百万斛乃得四十万斛耳失此二策羌人故敢为逆【充国传】

元帝即位天下大水在位诸儒多言盐铁及常平仓可罢毋与民争利上从其议罢之【食货志按纪初元五年罢常平仓】

西汉会要卷五十四

<史部,政书类,通制之属,西汉会要>

卷五十五

钦定四库全书

西汉会要卷五十五

宋 徐天麟 撰

食货六

荒政

汉兴诸侯并起民失作业而大饥馑凡米石五千人相食死者过半高祖乃令民得卖子就食蜀汉【食货志】汉二年关中大饥米斛万钱人相食令民就食蜀汉【纪】文帝後元年诏曰闲者数年比不登又有水旱疾疫之灾朕甚忧之愚而不明未达其咎意者朕之政有所失而行有过与乃天道有不顺地利或不得人事多失和鬼神废不享与何以致此将百官之奉养或废无用之事或多与何其民食之寡乏也夫度田非益寡而计民未加益以口量地其於古犹有余而食之甚不足其咎安在无乃百姓之从事於末以害农者蕃为酒醪以靡谷者多六畜之食焉者衆欬细大之义吾未能得其中其与丞相列侯吏二千石博士议之有可以佐百姓者率意远思无有所隐【本纪】

六年大旱蝗令诸侯无入贡施山泽减诸服御损郎吏员发仓庾以赈贫民得卖爵【纪】

岁恶不入请卖爵子【如淳曰卖爵级又卖子也见食货志贾谊疏】

景帝元年正月诏曰闲者岁比不登民多乏食天絶天年朕甚痛之郡国或硤陬无所农桑????蓄或地饶广荐草莽水泉利而不得徙其议民欲徙寛大地者听之【纪】中三年夏旱禁酤酒【纪】

上郡以西旱复修卖爵令而裁其贾以招民及徙复作得输粟於县官以除罪【食货志】

後二年令内郡不得食马粟没入县官【食读曰飮】徙隶衣七纁布【索隐曰盖合七升布】止马舂【正义曰马碾磑之比也先时用马今止之】为岁不登禁天下食不造岁【史记本纪正义曰造至也禁天下费米谷恐食不至岁造七到反】三年诏曰闲岁不登意为末者衆农民寡也其令郡国务劝农桑益种植可得衣食物吏发民若取庸采黄金珠玉者坐贓为盗二千石听者与同罪【纪】

武帝即位河内失火上使汲黯往视之还报曰臣过河内河内贫人伤水旱万余家或父子相食臣谨以便宜持节发河内仓粟以赈贫民请归节伏矫制罪上贤而释之【传】

元狩三年劝有水灾郡种宿麦举吏民能假贷贫民者以名闻【纪】

四年山东被水灾民多饥乏於是天子遣使虚郡国仓廩以振贫民犹不足又募豪富人相假贷尚不能赅乃徙贫民於关以西及充朔方以南新秦中七十余万口衣食皆仰给於县官数岁贷与产业使者分部护冠盖相望费以亿计【食货志】

元鼎二年诏曰水潦移於江南迫隆冬至朕惧其饥寒不活江南之地火耕水耨方下巴蜀粟致之江陵遣博士中等分循行告谕所抵无令重困吏民有振赅饥民免其乏者具举以闻【纪】

山东被河灾及岁不登数年人或相食方二三千里天子怜之令饥民得流就食江淮间欲留处使者冠盖相属於道护之下巴蜀粟以振焉【食货志】

昭帝始元二年八月诏曰往年灾害多今年蚕麦伤所振贷种食勿收责毋令民出今年田租【纪】

宣帝本始三年大旱郡国伤旱甚者民毋出租赋三辅民就贱者且毋收事尽四年【纪】

四年正月诏曰今岁不登已遣使者振贷困乏其令大官损膳省宰乐府减乐人使归农业丞相以下至都官今丞上书入谷输长安仓助贷贫民民以车船载谷入关者得毋用传【上】

元帝初元元年诏曰关东今年谷不登民多困乏其令郡国被灾害甚者毋出租赋江海陂湖园池属少府者以假贫民勿租赋九月关东郡国十一大水饥或人相食转旁郡钱谷以相救令诸宫馆希御幸者勿缮治大仆减谷食马水衡省肉食兽【纪】

二年六月关东饥齐地人相食秋七月诏曰岁比灾害民有菜色惨怛於心已诏吏虚仓廩开府库振救赐寒者衣公卿其悉意陈朕过靡有所讳【上】

三年夏大旱罢甘泉建章宫卫令就农百官各省费【上】五年诏曰乃者关东连遭灾害其令大官毋日杀所具各减半乘舆秣马毋乏正事而已罢角抵上林宫馆希御幸者齐三服官北假田官盐铁官常平仓【上】

永光二年诏曰间者连年不收四方咸困元元之民劳於耕耘又亡成功困於饥馑亡以相救朕为民父母德不能覆而有其刑甚自伤焉其赦天下【纪】

成帝永始二年诏曰岁比不登吏民以义收食贫民入谷物助县官振赡者已赐直其百万以上加赐爵右更欲为吏补三百石其吏也迁二等三十万以上赐爵五大夫吏亦迁二等民补郎十万以上家无出租赋三岁万钱以上一年【纪】

哀帝即位诏曰乃者河南颍川郡水出流杀人民败坏庐舍已遣光禄大夫循行举籍赐死者棺钱人三千其令水所伤县邑及他郡国灾害什四以上民费不满十万皆无出今年租赋【纪】

平帝元始二年郡国大旱蝗青州尤甚民流亡安汉公四辅三公卿大夫吏民为百姓困乏献其田宅者二百三十人以口赋贫民遣使者捕蝗民捕蝗诣吏以石受钱天下民费不满二万及被灾之郡不满十万勿租税民疾疫者舍空邸第为置医药赐死者一家六尸以上葬钱五千四尸以上三千二尸以上二千罢安定呼池苑以为安民县起官寺市里募徙贫民县次给食至徙所赐田宅什器假与犁牛种食又起五里於长安城中宅二百区以居贫民【本纪】

振贷【振赅附】

文帝元年诏曰方春和时草木羣生之物皆有以自乐而吾百姓鰥寡孤独穷困之人或阨於死亡而莫之省忧为民父母将何如其议所以振贷之【纪】

文帝出帛十余万匹以振贫民【贾山传】

後六年大旱蝗发仓庾以振贫民【食货志】

武帝元狩三年有水灾郡举吏民能假贷贫民者以名闻【本纪】

四年山东被水灾民多饥乏於是天子遣使虚郡国仓廩以振贫犹不足又募豪富人相假贷尚不能相救廼徙贫民於关以西及充朔方以南新秦中七十余万口衣食皆仰给於县官数岁贷与产业使者分部护冠盖相望费以亿计於是公卿言郡国颇被灾害贫民无产业者募徙广饶之地陛下损膳省用出禁钱以振元元寬贷而民不齐出南亩【食货志】

元鼎二年诏曰水潦移於江南吏民有振赅饥民免其乏者具举以闻【本纪】

是时山东被河灾及岁不登数年人或相食方二千里天子怜之令饥民得流就食江淮间欲留留处使者冠盖相属於道护之下巴蜀粟以振焉【食货志】

河内伤水旱汲黯矫制发河内仓粟以振贫民【汲黯传】昭帝始元元年遣使者振贷贫民无种食者【本纪】

元凤三年诏曰乃者民被水灾朕虚仓廩使使者以振困乏【本纪】

宣帝本始四年诏曰今岁不登已遣使者振贷困乏使农移就业丞相以下至都官令丞上书入谷输长安仓助贷贫民以车船载谷入关者得毋用传【本纪】

地节三年诏曰前下诏假公田贷种食【本纪】

元帝初元元年以三辅太常郡国公田及苑可省者振业贫民赀不满千钱者赋贷种食临遣光禄大夫褒等十二人循行天下存问耆老鰥寡孤独困乏失职之民又令郡国被灾害甚者毋出今年租赋海江陂湖园池属少府者以假贫民勿租赋六月以民疾疫省苑马以振困乏九月关东郡国十一大水饥或人相食转旁郡钱谷以相救【本纪又食货志云天下大水关东十一郡尤甚减关中卒五百人转谷振贷困乏】二年诏以水衡禁囿宜春下苑少府炊飞外池严籞池田假与贫民六月关东饥齐地人相食秋七月诏曰岁比灾害民有菜色已诏吏虚仓廩开府库振赅赐寒者衣【本纪】

永光元年赦天下令各务农亩无田者皆假之贷种食如贫民【本纪】

成帝河平四年遣光禄大夫博士嘉等十一人行举濒河之郡水所损伤困乏不能自存者赀振贷其为水所流压死不能自葬令郡国给槥槨葬埋已葬者与钱人二千避水它郡国在所冗食之谨遇以文理无令失职鸿嘉四年勃海清河河溢被灾者振贷之【本纪】

永始二年诏曰关东比岁不登吏民以议收食贫民入谷物助县官振赡者已赐直其百万以上加赐爵右更欲为吏补三百石其吏也迁二等三十万以上赐爵五大夫吏亦迁二等民补郎十万以上家无出租赋三岁万钱以上一年【本纪】

哀帝即位河南颍川郡水灾赐死者钱三千【本纪】

释逋贷

文帝二年民贷种食未入入未备者皆赦之

武帝元朔元年诸逋贷在孝景後三年以前皆勿听治昭帝始元二年诏所振贷种食勿收责

元凤三年诏三年以前所振贷非丞相御史所请边郡受牛者勿收责

宣帝元康元年所振贷勿收

神爵元年所振贷物勿收

元帝永光四年所贷贫民勿收责

成帝建始三年诸逋租赋所振贷勿收

河平四年诸逋租赋所振贷勿收

鴻嘉元年逋貸未入者勿收

四年逋貸未入皆勿收

永始二年所振貸貧民勿收【并本紀】

西漢會要卷五十五

卷五十六

钦定四库全书

西汉会要卷五十六

宋 徐天麟 撰

兵一

南北军

京师有南北军之屯【刑法志】

高祖崩吕太后发丧哭而泣不下张辟疆谓丞相陈平曰太后畏君等今请拜吕台吕产为将将兵居南北军如此则太后心安丞相如辟疆计请之太后说太后病困以赵王禄为上将军居北军梁王产为相国居南军戒产禄曰我即崩必据兵卫宫慎毋送丧为人所制太后崩禄产颺兵秉政因谋作乱太尉勃令郾寄给禄曰何不速归将军印以兵属太尉禄然其计诸吕老人或以为不便计犹豫太尉勃欲入北军不得入襄平侯纪通尚符节乃令持节矫内勃北军勃复令说禄禄遂?兵授太尉勃勃遂将北军然尚有南军勃令平阳侯告卫尉毋内相国产殿门产不知禄已去北军入未央宫欲为乱殿门弗内朱虚侯章击产杀之还入北军复报大尉勃云云【见吕后纪及外戚传臣天麟按唐李揆云汉以南北军相制故周勃以北军安刘氏】文帝入未央宫夜拜宋昌为卫将军领南北军【纪】中垒校尉掌北军垒门内【百官表】

章交公车人满北军【刘向传如淳曰汉仪注中垒校尉主北军垒门内尉一人主上书者狱上章於公车有不如法者以付北军尉北军尉以法治之】

军正丞【胡建传师古曰南北军各有军正正又置丞】

武帝使任安护北军【史记】

戾太子召监北军使者任安发北军兵安受节已闭军门不肯应太子【刘屈氂传】

北军钱官【史记任安答辱北军钱官小吏】

江充为直指绣衣使者督三辅盗贼禁察踰侈贵戚近臣多奢僭充皆举劾奏请没入车马令身待北军击匈奴奏可充即移书光禄勳中黄门逮名近臣侍中诸当诣北车者移易门卫禁止无令得出入宫殿於是贵戚子弟惶恐皆见上叩头求哀愿得入钱赎罪上许之令各以秩

次输钱北军凡数千万【江充传】

公孙敬声坐擅用北军钱千五百万下狱【表】

大司马霍光薨发材官轻车北军五校士军陈至茂陵以送其葬【本传】

张安世为卫将军两宫卫尉城门北军兵属焉【本传】黄霸为京兆尹发骑士诣北军【本传】

胡建守军正丞监军御史穿北军垒垣以为贾区建斩之上奏以闻

卫将军军

高帝五年王恬启以卫将军击陈豨【功臣表按蔡质汉仪云汉兴置卫将军典京师兵卫边方屯警】

文帝拜宋昌为卫将军领南北军【见南北军条】

二年罢卫将军军【本纪】

三年发中尉材官属卫将军军长安【本纪】

车骑将军屯兵

孝宣地节三年罢车骑将军屯兵【本纪臣天麟按蔡质汉仪云汉兴置车骑将军卫将军左右前後将军典京师兵卫边方屯警】

右将军屯兵

孝宣地节三年罢右将军屯兵【本纪】

期门羽林

光禄勳属官期门羽林皆属焉【期门羽林皆宿卫官故属南军】期门掌执兵送从【服虔曰与期门下以微行後遂以名官东方朔传云微行常用饮酎已八九月中与侍中常侍武骑及待诏陇西北地良家子能骑射者期诸殿门故有期门之号自此始】武帝建元三年初置北郎无员多至千人有仆射秩比千石平帝元始元年更名虎贲郎置中郎将秩比二千石羽林掌送从【师古曰羽林亦宿卫之官言其如羽之疾如林之多】次期门【蔡质汉仪曰羽林府次虎贲府】武帝太初元年初置名曰建章营骑後更名羽林骑又取从军死事之子孙养

羽林号曰羽林孤儿【宣纪注云少壮令从军】羽林有令丞宣帝令中郎将骑都尉监羽林秩比二千石【百官表】

汉兴六郡良家子选给期门羽林材力为官名将多出焉【地理志师古曰六郡谓陇西天水安定北地上郡西河如淳曰医巫商贾不得与也】

羽林黄头郎【枚乘传苏林曰羽林黄头郎习水战者也】

甘延壽以良家子善骑射为羽林投石拔距絶於等伦尝超踰羽林亭楼由是迁为郎试弁为期门【本传】

霍光都肄郎羽林【霍光传】

都郎羽林【燕刺王传】

卫士

卫尉掌宫门屯卫兵属官有卫士旅贲令丞又诸屯卫侯司马二十二官皆属焉【百官表】

武帝建元元年诏卫士转置送迎常二万人其省万人【本纪】

宣帝即位长乐宫初置屯卫【本纪】

元康元年各置建章宫卫【本纪】

元帝初元三年罢甘泉建章宫卫【本纪】

执楯执戟武士骑【惠帝纪】

诸庙寝园祭祀用卫士四万五千一百二十九人【韦玄成传】正月行幸曲台临飧卫士【王尊传】

盖寬饶为卫司马及岁尽交代上临飧罢卫卒卫卒数千人愿复留共更一年【盖寬饶传】

中尉兵

中尉掌徼循京师武帝更名执金吾左右京辅都尉尉丞卒皆属焉【百官表】

文帝拜冯唐为车骑都尉主中尉及郡国车士【本传】武帝元鼎六年发中尉卒击吕嘉【

本纪】

城门兵

城门校尉掌京师城门屯兵有司马【百官表师古曰八屯各有司马】十二城门侯【百官表师古曰门各有侯萧望之为小苑东门侯是也】

武帝征和二年以太子在外置屯兵长安诸城门【刘屈氂传】张安世为卫将军城门北军兵属焉【本传】

孔光为太师领城门兵【孔光传】

成都侯王商以特进领城门兵置幕府得举吏如将军【元后传】

红阳侯王立位特进领城门兵【元后传】

平阿侯王谭位特进领城门兵【杜邳传又元后传】

司隶校尉

司隶校尉武帝征和四年初置持节从中都官徒千二百人捕巫蛊督大奸猾後罢其兵【百官表】

七校

武帝平百粤内增七校【刑法志晋灼曰百官表中垒屯骑步兵越骑长水胡骑射声虎贲凡八校尉胡骑不常置故此言七也】

羽林射士

少府属官有左戈令掌戈射武帝更名为羽林【百官表服虔曰周时渡江越人在船下负船将覆之羽林入水杀之汉因以材力名官】

宣帝神爵元年发羽林射士诣金城【纪】

元帝永光二年发迹射羽林射者击羌【冯奉世传】

辑濯士

水衡属官有辑濯令丞【百官表如淳曰船官也】

戾太子矫制发辑濯士以予大鸿胪商丘成【刘屈氂传】

胡越骑

越骑校尉掌越骑【越人内附以为骑也】胡骑校尉掌池阳胡骑不常置【百官表按胡越骑皆已在八校之数自昭宣以后或以他官兼领故别见此一条】

自昭帝时霍山以奉车都尉领胡越兵【霍光传】

元帝永光二年发三辅河东弘农越骑击羌【冯奉世传】成帝时金涉为侍中骑都尉领三辅胡辅骑【本传师古曰胡越骑之在三辅者若长水长扬宣曲之属是也】

羌骑

宣帝神爵元年发羌骑诣金城【本纪】

元帝永光二年发呼速索噶种击羌【冯奉世传】

材官【以下系郡国兵】

汉兴踵秦而置材官於郡国【刑法志按汉官仪云高祖命天下选能引阙蹶张材力武猛者以为轻车骑士材官楼船常以秋後讲肄各有员数平地用轻车山阻用材官水泉用楼船】高帝十一年发巴蜀材官卫军霸上【本纪】

惠帝七年发车骑材官诣荥阳【本纪】

文帝三年发中尉材官属卫将军军长安【本纪】

晁错上言兵事曰平地通道则以轻车材官制之【本传】爰盎以材官蹶张迁为队帅【本传】

景帝後二年发车骑材官屯鴈门【纪】

武帝元光二年大中大夫李息为材官将军击匈奴【本纪】王恢击匈奴伏兵车骑材官三十余万匿马邑旁谷中【韩安国传】

宣帝神爵元年发三河颍川沛郡淮阳汝南材官诣金城【本纪】

大司马霍光薨发材官轻车北军五校士军陈至茂陵以送其葬【本传】

轻车

惠帝七年发车骑诣荥阳【纪】

冯唐拜车骑都尉主中尉及郡国车士【本传】

晁错上言兵事曰平地通道则以轻车材官制之【本传】宣帝本始二年调关东轻车锐卒救乌孙【纪】

发材官轻车送霍光葬【见上材官条】

骑士

高后五年发河车上党骑屯北地【纪】

武帝征和元年发三辅骑士大搜上林【本纪】

宣帝神爵元年发金城陇西天水安定北地上郡骑士击羌【赵充国传】

黄霸守京兆尹发骑士诣北军

楼船

外有楼船【刑法志又汉官仪见上林官条法】

枚乘说吴王曰汉知吴有吞天下之心也遣羽林黄头循江而下袭大王之都【枚乘传苏林曰羽林黄头郎习水战者也】

邓通以濯船为黄头郎【本传师古曰濯船能持濯行船也土胜水其色黄故刺船之郎皆着黄帽因号曰黄头郎也濯读曰擢音直孝反】

吴王伐江陵之木以为船【伍被传】

伍被为淮南王画计曰有寻阳之船【伍被传】

闽越王入燔寻阳楼船【严助传师古曰汉有楼船贮在寻阳也】

武帝建元三年严助浮海救东瓯【助传】

粤欲与汉用船战逐乃大修昆明池列馆环之治楼船高十余丈旗帜加其上甚壮元鼎五年南越反因南方楼船士二十余万人击之【食货志】

元鼎五年南越王相吕嘉反遣伏波将军路博德出桂阳下湟水楼船将军杨仆出豫章下真水归义越侯严为戈船将军出零陵下离水甲为下濑将军下苍梧皆将军入江淮?南楼船十万人越驰义侯遗别将邑罪罪人发夜郎兵下牂柯江咸会番禺【本纪】

卜式愿与博昌习船者击吕嘉【本传】

武帝欲伐南越淮南王安谏曰越处溪谷之间篁竹之中习於水鬪便於用舟地深昧而多水险今发兵挖舟而入水水道上下击石死伤者必衆矣前时南海王反陛下先臣使将军间忌击之会天暑多雨楼船卒水居击擢未战而疾死者过半云云【严助传】

元鼎六年东越王反攻杀汉将吏遣横海将军韩说中尉王温舒出会稽楼船将军杨仆出豫章击之又遣浮沮将军公孙贺出九原匈河将军赵破奴出令居【本纪】东粤数反拜买臣为会稽太守诏到郡治楼船备粮食水战具【朱买臣传】

元封二年遣楼船将军杨仆从齐浮渤海击朝鲜【朝鲜传】

属国骑

武帝遣赵破奴将属国骑及郡兵数万以击胡【张骞传】太初元年以李广利为贰师将军发属国六千骑期至贰师取善马

屯田卒

武帝元鼎五年初置张掖酒泉郡而土郡朔方西河河西开田官斥塞卒六十万人戍田之【食货志】

孝武征殊方开西域自炖煌西至盐津往往起亭而轮台渠犁皆有田卒数百人置使者校尉领护以给使外国者【西域传】

宣帝地节二年遣侍郎郑吉校尉司马喜将免刑罪人田渠犁积谷欲以攻车师至秋後收吉喜发城郭诸国兵万余人自与所将田士千五百人共击车师【西域传】赵充国至金城愿罢骑兵留?刑应募及淮阳汝南步兵与吏士私从者合凡万二百八十一人分屯要害处至春月草生发郡骑及属国胡骑伉健各千倅马十二就草为田者游兵以充入金城郡【本传详见屯田条】

元帝建昭三年甘延壽陈汤矫制发城郭诸国兵车师戊己校尉屯田吏士诛斩郅支单于

西汉会要卷五十六

卷五十七

钦定四库全书

西汉会要卷五十七

宋 徐天麟 撰

兵二

教阅

武帝太初二年令天下腰五日【本纪如淳曰立秋緇腰伏俨曰腰音刘刘杀也师古曰续汉书作緇刘腰刘义名通耳汉仪注云立秋之日斩牲於郊东门外以荐陵庙武官肄兵习战阵之仪斩牲之礼名曰緇刘兵官皆肄孙吴六十四阵名曰乘之】

霍光都肄郎羽林【霍光传】

都郎羽林【燕刺王传师古曰谓大会试之】

九月都试【翟方进传如淳曰太守都尉令长相丞会都试课殿最也】

韩延寿为东郡太守都试骑士治饰兵车画龙虎朱爵延寿黄袍方领驾四马傅总建幢檠植羽葆鼓车歌车功曹引车皆驾四马载檠戟五骑为伍分左右部军假司马千人持幢旁毂歌者先居射室望见延寿车噉咷楚歌延寿坐射室骑吏持戟夹陛列立骑士从者带弓鞬罗後令骑士兵车四面营陈被甲鞬鞞居马上抱弩负籥又使骑士戏车弄马盗骖及治饰车甲三百万以上於是萧望之劾延寿上僭不道坐弃市【韩延寿传】

繇戍

秦用商鞅之法月为更卒已复为正一岁屯戍一岁力役三十倍於古汉兴循而未改【食货志又昭纪如淳注云天下人皆直戍边三日亦名为更律所谓繇戍也虽丞相子亦在戍边之调不可人人自行三日戍又行者当自戍三日不可往便还因便住一岁一更诸不行者出钱三百入官官以给戍者是为过更也汉初因秦法而行之後遂改易有谪乃戍边一岁耳】

高后五年初令戍卒岁更【本纪】

远方之卒守塞一岁而更【晁错传】

文帝減外繇【贾山传】

十三年除戍卒令【史记大事记】

景帝後二年省繇贼【本纪】

武帝賜卜式外繇四百人【卜式传苏林曰外繇谓戍边也一人出三百钱谓之过更式岁省十二万钱也一说在繇役之外得复除四百人也师古曰一说是也】

元狩三年減陇西北地上郡戍卒半【本纪】

天汉元年发谪戍屯五原【本纪】

昭帝元平元年減外繇【本纪】

宣帝五凤四年以边塞亡寇減戍卒什二【本纪】

淮南之地县属於汉其吏民往来长安者自悉而补中道衣敝钱用诸费称此【贾谊传】

盖寛饶身为司隶子弟常步行戍边【本传】

调发【羽檄 虎符】

高祖曰吾以羽檄召天下兵【本纪师古曰檄者以木简为书长尺二寸用呼召也其有急事则加以鸟羽插之示疾速也】

文帝二年初与郡国守相为铜虎符【史记本纪汉书无国相二字】齐王欲发兵诛诸吕魏勃曰王欲发兵非有汉虎符验也

御史中丞劾冯野王持虎符出界归家遂免【传】

淮南王盜舄虎符【贾捐之传】

武帝建元三年东甌告急上曰吾新即位不欲出虎符召兵郡国乃遣严助以节发会稽兵会稽守欲距法不为发助乃斩一司马谕指意遂发兵【严助传】

戾太子以节发兵【武纪征和二年】

七国败弓高侯诰胶西王卬曰未有诏虎符擅发兵王其自图之卬遂自杀【吴王濞传】

公孙戎奴为上党太守发兵不以闻免【功臣表】

段会宗为西域都护以擅发戊己校尉之兵乏兴有诏赎论【本传】

黎扶为东海太守坐擅发卒为卫当斩【功臣表】

选募【勇敢 犇命伉健 募士】

武帝天汉四年发勇敢士出朔方【纪】

赵王彭祖愿从国中勇敢击匈奴【景十三王传】

李陵将勇敢五千人教射酒泉张掖以备胡【本传】

昭帝始元元年募吏民及发犍为蜀郡犇命击益州【本纪注云常兵不足故权选取精勇闻命犇走故谓之犇命】

灌夫伐吴王募军中壮士所善愿从者数十人【灌夫传】宣帝本始二年选郡国吏三百石伉健习射者皆从军【本纪】

神爵元年发应募诣金城【本纪】

赵充国愿罢骑兵留?刑应募【本纪】

元帝永光二年发募士万人击西羌

平帝元始二年募汝南南阳勇敢吏士三百人谕说江湖贼【本纪】

发谪徒【七科谪 恶少年亡命?刑】

高帝十一年征英布赦天下死罪令从军【本纪】

惠帝三年发诸侯王徒隶二万人城长安【本纪】

武帝元狩三年发谪吏穿昆明池【本纪师古曰吏有罪者罚而役之】元鼎五年吕嘉反遣路博德皆将罪人驰义越侯遣别将巴蜀罪人咸会番禺【本纪】

元封二年四月募天下死罪击朝鲜六月遣杨仆荀彘将应募罪人击朝鲜【本纪】

六年赦京师亡命令从军【本纪】

太初元年以李广利为贰师将军发郡国恶少年数万人期至贰师取善马【李广利传】

太初元年发天下谪民西征大宛【本纪】

天汉元年发谪戍屯五原【本纪】

四年发天下七科谪出朔方【本纪张晏曰吏有罪一亡命二赘壻三贾人四故有市籍五父母有市籍六大父母有市籍七凡七科也】

昭帝元凤元年武都氐人反发三辅太常徒皆免刑击之【本纪】

五年发三辅及郡国恶少年吏有告劾亡者屯辽东【本纪】六年募郡国徒筑辽东玄菟城【本纪】

宣帝神爵元年发三辅中都官徒?刑诣金城【本纪】

行伍部校

什伍俱前【晁错传师古曰五人为伍二伍为什】

李广击胡行无部曲行阵【本传注引续汉书百官志云将军领军皆有部曲大将军营五部校一人部下有曲曲有军侯一人】

冯唐曰士卒皆家人子起田中从军安知尺籍伍符【冯唐传李奇曰尺籍所以书军令伍符五五相保之符信也】

韩延寿都试骑士五骑为伍【本传】

什器【平帝纪天下吏舍亡得置什器师古曰军法五人为五十人为什则共其器物故通谓生生之其为何器亦犹今之从军作役者十人为火共蓄调度也】

传校【卫青传传校获王师古曰校者营垒之称故谓军之一部为一校】

益置扬威白虎合骑之校【陈汤传师古曰一校则别为一部故军称校也】诸校【韩信传师古曰诸校诸部也犹今言诸营】

校司马【南粤传校司马苏弘】

部勒行阵【陈汤传】

王尊坐擅离部曲会赦免【本传】

壁垒

中垒校尉掌北军垒门内【百官表】

文帝劳军细柳先驱至不得入先驱曰天子且至军门都尉曰军中闻将军之令不闻天子之诏有顷上至又不得入於是上使使持节诏将军曰吾欲劳军亚夫乃传言开壁门【周亚夫传】

李陵军居两山间以大车为营【本传】

胡建守军正丞时监军御史为奸穿北军垒垣以为贾区建斩之遂上奏曰黄帝李法曰壁垒已定穿窬不繇路是谓奸人奸人者杀臣谨以斩昧死以闻【胡建】

京师兵器

萧何治未央宫立武库【高纪按三辅黄图武库在未央宫萧何造以藏兵器】中尉属官有武库令丞少府属官有若卢考工室令丞【百官表注云若卢主藏兵器考工主作器械】

工官【地理志河南南阳济南泰山颍川河内蜀广汉等郡皆有工官臣天麟按工官虽在外郡而所作器械实输京师故武帝边兵不足乃发武库工官兵以澹之也】

武库精兵所聚故以丞相子为令【魏相传】

武帝征伐边兵不足乃发武库工官兵以澹之【食货志】戾太子矫制发武库兵【刘屈氂传】

成帝发武库兵前後十辈送董贤及乳母王阿舍母将隆奏言武库兵器天下公用国家武备缮治造作皆度大司农钱汉家边吏职在距寇亦赐武库兵皆任其事然後蒙之臣请收还武库【母将隆传】

羽林孤儿教以五兵【师古曰五兵谓弓矢戣矛戈戟也】

郡国兵器

高帝八年令贾人毋得操兵乘骑马【本传】

晁错说文帝募民徙塞下曰以便为之高城深堑具蔺石布渠答【晁错传如淳曰蔺石城上雷石也苏林曰渠答铁蒺藜也】

武帝征伐边兵不足乃发武库工官兵以澹之【食货志】武帝时公孙弘奏言民不得挟弓弩吾丘寿王对不便上以难弘弘诎服焉【吾丘寿王传】

昭帝始元五年罢天下马弩关【本纪注云汉法弩十石以上不得出关】江都王建闻淮南衡山阴谋恐一日发为所并遂作兵器铸将军都尉印遣人通越【江都易王传】

胶东康王闻淮南王谋反私作兵车镞矢战守之备【景十三王传】

成帝阳朔三年颍川铁官徒申屠圣等杀长吏盗库兵【本纪】

鸿嘉三年广汉男子郑躬等攻官寺篡囚徒盗库兵【本纪】永始三年山阳铁官徒苏令等反盗库兵【本纪】

燕王旦反诈言受武帝诏得领库兵饬武备【武五子传】平帝元始三年阳陵任横等盗库兵攻官寺【本纪】

上郡库令【成帝纪建始元年注云比边郡库官之兵器所藏故置令】

南郡发弩官主教放弩【地理志】

杂录

文帝时晁错言兵事曰臣闻用兵临战合刃之急者三一日得地形二曰卒服习三曰器用利兵法曰丈五之沟渐车之水山林积石经川丘阜草木所在此步兵之地也车骑二不当一土山丘陵曼衍相属平原广野此车骑之地步兵十不当一平陵相远川谷居间仰高临下此弓弩之地也短兵百不当一两陈相近平地浅中可前可後此长戟之地也劔楯三不当一萑苇竹萧草木蒙茏支叶茂接此矛鋌之地也长戟二不当一曲道相伏险阨相薄此劔楯之地也弓弩三不当一士不选练卒不服习起居不精动静不集趋利弗及避难不毕前击後解与金鼓之音相失此不习勒卒之过也百不当十兵不完利与空手同甲不坚密与袒裼同弩不可以及远与短兵同射不能中与亡矢同中不能入与亡镞同此将不省兵之祸也五不当一故兵法曰器械不利以其卒予敌也卒不可用以其将予敌也将不知兵以其主予敌也君不择将以其国予敌也四者兵之至要也臣又闻小大异形强弱异势险易异备夫卑身以事强小国之形也合小以攻大敌国之形也以蛮夷攻蛮夷中国之形也今匈奴地形技艺与中国异上下山阪出入溪涧中国之马弗与也险道倾仄且驰且射中国之骑弗与也风雨罢劳饥渴不困中国之人弗与也此匈奴之长技也若夫平原易地轻车突骑则匈奴之衆易挠乱也劲弩长戟射疏及远则匈奴之弓弗能格也坚甲利刃长短相杂游弩往来什伍俱前则匈奴之

兵弗能当也材官驍发矢道同的则匈奴之革笥木荐弗能支也下马地鬪劒戟相接去就相薄则匈奴之足弗能给也此中国之长技也以此观之匈奴之长技三中国之长技五陛下又兴数十万之衆以诛数万之匈奴衆寡之计以一击十之术也虽然兵凶器战危事也以大为小以强为弱在俛仰之间耳夫以人之死争胜跌而不振则悔之亡及也帝王之道出於万全今降胡义渠蛮夷之属来归谊者其衆数千饮食长技与匈奴同可赐之坚甲絮衣劲弓利矢益以边郡之良骑令明将能知其习俗和辑其心者以陛下之明约将之即有险阻以此当之平地通道则以轻车材官制之两军相为表里各用其长技衡加之以衆此万全之术也【晁错传】 藿石【晁错传具藿石如淳曰城上雷石也】

渠答【晁错传布渠答苏林曰渠答铁蒺藜也】

游弩【晁错传游弩往来】

大黄【李广传以大黄射其裨将服?曰黄肩弩也】

连【李陵传发连弩射单于】

刁斗【李广传孟康曰以铜作鐃受一斗画炊飮夜击持行名曰刁斗】

垒石【李陵传师古曰垒音卢对反】

西汉会要卷五十七

卷五十八

钦定四库全书

西汉会要卷五十八

宋 徐天麟 撰

兵三

兵占

汉中四星曰天驷旁一星曰王梁王梁策马车骑满野【天文志】

岁星所在国不可伐可以伐人【天文志】

见欃云如牛枪云如马枪欃梈彗异状其殃一也必有破国【天文志】

日方南太白居其南日方北太白居其北为羸用兵进吉退凶【天文志】

武帝建元六年八月长星出于东方长终天三十日去占曰是为蚩尤旗见则王者征伐四方其後兵诛絶域连数十年元狩四年长星又出西北是时征伐尤甚【五行】上既悔远伐征乃下诏曰曩者朕之不明以军侯弘上书言匈奴缚马前後足置城下驰言秦人我勾若马又汉使者久留不还故兴师遣贰师将军欲以为使者威重也古者卿大夫与谋参以蓍龟不吉不行乃者以缚马书徧视丞相御史二千石诸大夫郎为文学者乃至郡属国都尉成忠赵破奴等皆以虏自缚其马不祥甚哉或以为欲以见强夫不足者视人有余易之卦得大过爻在九五匈奴困败公车方士太史治星望气及太卜龟蓍皆以为吉匈奴必破时不可再得也又曰北伐行将於鹑山必克卦诸将贰师最吉故朕亲发贰师下鹑山诏之必毋深入今计谋卦兆皆反缪重合侯得虏侯者言闻汉军当来匈奴使巫埋羊牛所出诸道及水上以诅军单于遗天子马裘裳使巫祝之缚马者诅军事也又卜汉军一将不吉【西域传】

兵阴阳者顺时而发随斗击因五胜假鬼神而为助者也【艺文志】

宣帝以书敕赵充国曰今五星出东方中国大利蛮夷大败太白出高用兵深入敢战者吉弗敢战者凶将军急装因天时诛不义万下必全勿复有疑【赵充国传】

成帝鸿嘉三年天水冀南山石鸣声隆隆如雷有顷止闻平襄二百四十里埤鸡皆鸣石长丈三尺广厚略等旁着岸脇去地二百余丈民俗名曰石鼓石鼓鸣有兵【五行志】

军功

高祖五年克项羽五月兵皆罢归军吏卒会赦其亡罪而亡爵及不满大夫者皆赐爵为大夫故大夫以上赐爵各一级其士大夫以上皆令食邑非七大夫以上皆复其身及户勿事

六年始剖符封功臣【封功臣见职官门】

武帝元朔六年六月诏曰日者大将军巡朔方征匈奴斩首虏万八千级诸禁锢及有过者咸蒙厚赏得免减罪今大将军仍复克获斩首万虏九千级受爵赏而欲移卖者无所流耻其议为令有司奏请置武功赏官?宠战士【本纪】

武功爵【臣瓚曰茂陵中书有武功爵一级曰造士二级曰闲与卫三级曰良士四级曰元戎士五级曰官首六级曰秉铎七级曰千夫八级曰乐卿九级曰执戎十级曰政戾庶长十一级曰军卫此武帝所制以宠军功师古曰此下云级十七万凡直三十余万金今瓚所引茂陵中书止於十一级则数不足与本文乖矣或者茂陵书说之不尽也】级十七万凡直三十余万金诸买武功爵官首者试补吏先除千夫如五大夫其有罪又减二等爵得至乐卿?显军功军功多用超等大者封侯卿大夫小者郎【食货志】

李蔡击右贤王有功中率为乐安侯诸将多中首虏率为侯者【李广传】

李广出右北平为匈奴所围军几没罢归广军自当已赏

霍去病斩捕首虏过当封侯【师古曰军失亡者少而匈奴杀获数多故曰过当也】冯奉世使大宛以便宜发兵诛莎车王萧望之以奉世奉使有指春秋之义亡遂事汉家之法有矫制虽有功效不可为後世法故不得侯【师古曰汉家之法擅矫命虽有功劳不如赏也】贰师既伐大宛军官吏为九卿三人诸侯相郡守二千石百余人千石以下千余人奋行者官过其望以适过行者皆黜其劳士率赐直四万钱【李广利传】

左将军荀彘击朝鲜坐争功弃市【武纪】

魏尚为云中守上功莫府首虏差六级下吏削其爵罚作之【冯唐传】

军法

韩信申军法【高纪】

汉兴张良韩信序次兵法凡百八十二家删取要周定着三十五家诸吕用事而盗取之武帝时军正杨仆摺摭遗逸纪奏兵录犹未能备至于孝武命任宏论次兵书为四种兵权谋十三家兵形势十一家阴阳十六家兵技巧十三家凡兵书五十三家七百九十篇图四十三卷【

艺文志】

高后七年朱虚侯章入侍燕饮太后令章为酒吏章自请以军法行酒诸吕有一人醉亡酒章追斩之太后业已许其军法无以罪也【齐悼惠王传】

綉衣御史暴胜之持斧逐捕盗贼以军兴从事诛二千石以下【隽不疑传臣天麟按汉法吏六百石以上有罪皆先请见於宣帝末年之诏至於军兴从事则虽二千石以下亦得诛决於外暴胜之是也至其後刘屈氂斩欲司直亦以军兴法行之而胜之乃争以为不可故被譴而自杀】

唐蒙通夜郎用军兴法诛其渠率【司马相如传】

广汉郡盗贼羣起成帝拜赵护为广汉太守以军法从事【薛宣传】

胡建守军正丞时监军御史为奸穿北军垒垣以为贾区建欲诛之乃约其走卒曰我欲与公有所诛吾言取之则取斩之则斩於是当选士马日监御史与护军诸校列坐堂皇上建从走卒趋至堂皇下拜谒因上堂皇走卒皆上建指监御史曰取彼走卒前曳下堂皇建曰斩之遂斩御史护军诸校皆愕惊不知所以建亦已有成奏在其怀中遂上奏曰臣闻军法立武以威衆诛恶以禁邪今监御史公穿军垣以求贾利私买卖以与士市不立刚毅之心勇猛之节亡以师先士大夫尤失理不公用文吏议不至重法黄帝李法曰壁垒已定穿窬不繇路是谓奸人奸人者杀臣谨按军法曰正亡属将军将军有罪已闻二千石以下行法焉丞於用法疑执事不谕上臣谨以斩昧死以闻制曰司马法曰国容不入军军容不入国何文吏也三王或誓於军中欲民先成其虑也或誓於军门之外欲民先意以待事也或将交刃而誓致民志也建又何疑焉【胡建传】

金布令甲曰边郡数被兵离饥寒夭絶天年父子相失令天下共给其费【萧望之传】

弃军逃亡

多卯将兵追反虏擅弃兵还赎罪免【功臣表】

景帝三年诏今漚等已灭吏民当坐漚等及逋逃亡军者皆赦之【本纪】

苏贤为骑士屯霸上不诣屯所乏军兴【赵广汉传】

畏懦後期

博望侯张骞坐以将军击匈奴畏懦当斩赎罪免【表按本传云坐後期】

天汉三年匈奴入鴈门太守坐畏懦弃市【武纪如淳曰军法行逗留畏懦者要斩】

将梁侯杨仆坐为将军击朝鲜畏懦入竹二万个赎完为城旦【功臣表武帝责仆书曰失期内顾以道恶为解】

公孙敖以将军出北地後骠骑失期当斩赎为庶人【按霍去病传云坐行留不与骠骑将军会】

王恢主击匈奴輜重单于还去廷尉当恢逗挠当斩【韩安国传】

死亡过多

公孙敖为骑将军出代亡卒七千人当斩赎为庶人後死亡士卒多下吏当斩【本传】

李广击匈奴坐亡失多当斩

杨仆击朝鲜坐亡失多免为庶民

苏建为前将军与翕侯赵信俱败独身来归当斩

虏获不实

魏尚为云中守上功幕府差首虏六级下吏削其爵罚作之【冯唐传】

高不识坐击匈奴增首不以实当斩【表】

车顺坐击匈奴盗虏获自杀【车千秋传】

临蔡侯孙襄坐击番禺夺人虏获免【表】

武帝责杨仆书曰前破番禺捕降者以为虏掘死人以为获是一过【传】

澧清侯参坐匿朝鲜已虏下狱【表】

争功

左将军荀彘击朝鲜坐争功弃市【表】

乱屯兵

中郎将卬入至赵充国幕府司马中乱屯兵下吏自杀【赵充国传】

迷失道

卫青击匈奴徙李广与右将军赵食其合军出东道惑失道後大将军广自杀右将军下吏当死赎为庶人【本传】

乏军兴

赵广汉坐擅斥除骑士乏军兴【本传】

苏贤为骑士屯霸上不诣屯所乏军兴【赵广汉传】

黄霸守京兆尹发骑士诣北军调马不适士劾乏

军兴连贬秩【本传】

段会宗擅发戍己校尉兵乏兴有诏赎论【本传】

韩延年行大行令事擅留外国书一月乏兴入谷全为城旦【功臣表】

擅兴

侯李壽为卫尉居守擅出长安界诛【表】

公孙贺子敬声擅用北军钱千九百万下狱【公孙贺传】燕王旦上书言霍光擅益幕府校尉疑有非常王尊坐擅离部曲免【本传】

西汉会要卷五十八

卷五十九

钦定四库全书

西汉会要卷五十九

宋 徐天麟 撰

兵四

屯田

文帝时晁错言远方之卒守塞一岁而更不知胡人之能不如选常居者家室田作且以备之以便为之高城深堑中周虎落【虎落者以竹箴相连遮落者也】先为室屋具田器乃募罪人及免徒复作令居之不足募民之欲往者赐高爵复其家予冬夏衣廩能自给而止上从其言募民实塞下【晁错传】

武帝元鼎五年初置张掖酒泉郡而上郡朔方西河河西开田官斥塞卒六十万人戍田之中国缮道馈粮远者三千近者千余里皆仰给大农【食货志】

孝武征四夷开西域自炖煌西至盐津往往起亭而轮台渠犂皆有田卒数百人置使者校尉领护以给使外国者【西域传】

武帝初通西域置校尉屯田渠犂是时军旅连出海内虚耗上既悔远征伐桑弘羊与丞相御史奏言轮台以东捷支渠犂皆故国地广饶水草有溉田五千顷以上处温和田美可益通沟渠种五谷与中国同时孰可遣屯田卒诣故轮台以东置校尉三人分护各举图地形通利沟渠务使以时益种五谷张掖酒泉遣骑假司马为斥侯属校尉事有便宜因骑置以闻田一岁有积谷募民壮健有累重敢徙者诣田所就蓄积为本业益垦溉田稍筑列亭连城而西以威西国辅乌孙为便上乃下诏深陈既往之悔曰前有司奏欲益民赋以助边用今又请遣卒田轮台轮台西於车师千余里今诸远田轮台欲起亭隧是扰天下非所以优民也朕不忍闻【西域传】

武帝通西南夷道作者数万人悉巴蜀租赋不足?更之乃募豪民田南夷入粟县官而内受钱於都内【食货志】昭帝始元二年冬发习战射士诣朔方调故将吏屯田张掖郡【纪】

昭帝用桑弘羊前议以杆弥太子赖丹为校尉将军田轮台轮台与渠犂地皆相连也【西域传】

元凤四年鄯善王请曰国中有伊循城其地肥美欲汉遣一将屯田积谷令臣得以依其威重

於是汉遣大司马一人吏士四十人田伊循以镇抚之後更置都尉伊循官置始此矣【西域传】

宣帝地节二年遣侍郎郑吉校尉司马憙将免刑罪人田渠犂积谷欲以攻车师至秋後收谷吉喜发城郭诸国兵万余人自与所将田士千五百人共击车师食尽吉等且罢兵归渠犂田收毕复发兵攻车师王於石城王奔乌孙吉至酒泉有诏还田渠犂及车师益积谷以安西国侵匈奴於是吉使吏卒三百人别田车师匈奴遣骑来击汉田卒少不能当吉上书愿益田卒公卿议以为道远烦费可且罢车师田者【西域传】

宣帝时匈奴益弱不得近西域於是徙屯田於北胥鞬披莎车之地【披分也】屯田校尉始属都护【上】

宣帝神爵元年先零畔逆他种刼略背叛赵充国至金城计欲以威信招降罢骑兵屯田以待其敝上奏曰臣闻兵者所以明德除害也故举得於外则福生於内不可不谨臣所将吏士马牛食月用粮谷十九万九千六百三十斛盐千六百九十三斛茭藁二十五万二百八十六石难久不解繇役不息又恐它夷卒有不虞之变相因并起为明主忧诚非素定庙胜之册且羌虏易以计破难用兵碎故也臣愚以为击之不便计度临羌东至浩亶羌虏故田及公田民所未垦可二千顷以上其间邮亭多坏败者臣前部士入山伐材木大小六万余枚皆在水次愿罢骑兵留弛刑应募及淮阳汝南步兵与吏士私从者合凡万二百八十一人用谷月二万七千三百六十三斛盐三百八斛分屯要害处冰解漕下缮乡亭浚沟渠治湟陜以西道桥七十所令可至鲜水左右田事出赋人二十晦至四月草生发郡骑及属国胡骑伉健各千倅马什二就草为田者游兵以充入金城郡益积蓄省大费今大司农所转谷至者足支万人一岁食谨上田处及器用簿唯陛下裁许上报曰皇帝问後将军言欲罢骑兵万人留田即如将军之计虏当何时伏诛兵当何时得决孰计其便复奏充国上状曰臣闻帝王之兵以全取胜是以贵谋而贱战战而百胜非善之善者也故先为不可胜以待敌之可胜蛮夷习俗虽殊於礼义之国然其欲避害就利爱亲戚畏死亡一也今虏亡其美地荐草愁於寄托远遯骨肉心离人有畔志而明主般师罢兵万人留田顺天时因地利以待可胜之虏虽未即伏辜兵决可朞月而望羌虏瓦解前後降者万七百余及受言去者凡七十辈此坐支解羌虏之具也臣谨条不出兵留田便宜十二事步兵九校吏士万人留屯以为武备因田致谷威德并行一也又因排折羌虏令不得归肥饶之坠贫破其衆以成羌虏相畔之渐二也居民得并田作不失农业三也军马一月之食度支田士一岁罢骑兵以省大费四也至春省甲士卒循河湟漕谷至临羌以眎羌虏扬威武传世折冲之具五也以闲暇时下所伐材缮治邮亭充入金城六也兵出乘危徼幸不出令反畔之虏窜於风寒之地离霜露疾疫?懂之患坐得必胜之道七也亡经阻远追死伤之害八也内不损威武之重外不令虏得乘间之势九也又亡惊动河南大开小开使生它变之忧十也治湟陜中道桥令可至鲜水以制西域信威千里从材席上过师十一也大费既省繇役豫息以戒不虞十二也留屯田得十二便出兵失十二利臣充国材下犬马齿衰不识长册唯明诏博详公卿议臣采择上复赐报曰皇帝问後将军言十二便闻之虏虽未伏诛兵决可期月而望者谓今冬邪谓何时也将军独不计虏闻兵颇罢且丁壮相聚攻扰田者及道上屯兵复杀略人民将何以止之又大开小开前言曰我告汉军先零所在兵不往击

久留得亡效五年时不分别人而并击我其意常恐今兵不出得亡变生与先零为一将军孰计复奏充国奏曰臣闻兵以计为本故多算胜少算先零羌精兵今余不过七八千人失地远客分散饥冻?开莫须又颇暴略其羸弱蓄产畔还者不絶皆闻天子明令相捕斩之赏臣愚以为虏破坏可日月冀远在来春秋曰兵决可期月而望窃见北边自炖煌至辽东万一千五百余里乘塞列隧有吏卒数千人虏数大衆攻之而不能害今留步士万人屯田地势平易多高山远望之便部曲相保为塹垒木樵校联不絶便兵弩飭鬪具?火幸通势及并力以逸待劳兵之利者也臣愚以为屯田内有亡费之利外有守御之备骑兵虽罢虏见万人留田为必禽之具其土崩归德宜不久矣从今尽三月虏马羸瘦必不敢捐其妻子於它种中远涉河山而来为寇又见屯田之士精兵万人终不敢复将其累重还归故地是臣之愚计所以度虏且必瓦解其处不战而自破之册也至於虏小寇盗时杀人民其原未可卒禁臣闻战不必胜不苟接刃攻不必取不苟劳衆诚令兵出虽不能灭先零直能令虏絶不为小寇则出兵可也即今同是而释坐胜之道从乘危之势往终不见利空内自罢敝贬重而自损非所以视蛮夷也又大兵一出还不可复留湟中亦未可空如是繇役复发也且匈奴不可不备乌桓不可不忧今久转运烦费倾我不虞之用以贍一隅臣愚以为不便校尉临衆幸得承威德奉厚币拊循衆羌输以明诏宜皆乡风虽其前辞尝曰得亡效五年宜亡它心不足以故出兵臣窃自惟念奉诏出塞引军远击穷天子之精兵散车甲於山野虽亡尺寸之功媮得避嫌之便而亡後咎余责此人臣不忠之利非明主社稷之福也臣幸得奋精兵计不义久留天诛罪当万死陛下寛仁未忍加诛令臣数得孰计愚臣伏计孰甚不敢避斧钺之诛昧死陈愚唯陛下省察充国奏每上辄下公卿议臣初是充国计者什三中什五最後什八有诏诰前言不便者皆顿首服丞相魏相曰臣愚不习兵事利害後将军数画军册其言常是臣任其计可必用也上於是报充国曰皇帝问後将军上书言羌虏可胜之道今听将军计上留屯田及当罢者人马数将军强食谨兵事自爱上以破羌强弩将军数言当击又用充国屯田处离散恐虏犯之於是两从其计诏两将军与中郎将卬出击强弩出降四千余人破羌斩首二千级中郎将卬斩首降者亦二千余级而充国所降复得五千余人诏罢兵独充国留屯田明年五月充国奏言羌本可五万人军凡斩首七千六百级降者三万一千二百人溺河湟饥饿死者五六千人定计遗脱与煎巩黄羝俱亡者不过四千人羌靡忘等自诡必得请罢屯兵奏可充国振旅而还【赵充国传】

元帝时冯奉世击西羌羌破罢吏士颇留屯田备要害处【传】

元帝时复置戊己校尉屯田车师前王庭【西域传】

杂录

越人欲为变必先田余于界中积食粮乃入【严助传】屯田校尉武帝置宣帝时始属都护【西域传】

戊己校尉元帝初元元年置【百官表】

武帝时扬可告缗徧天下得民财物以亿计田大县数百顷小县百余顷水衡少府大仆大农各置农官往往即郡县比没入田田之【食货志下】

元帝初元三年诏曰珠崖背叛议者之言狐疑辟难则守屯田通于时变则忧万民夫万民饥饿之与远蛮之不讨危孰大焉其罢珠崖郡【贾捐之传】

马政

太仆掌舆马【百官表详见舆服门廐马条】

汉兴天子不能具□驷而将相或乘牛车【食货志注云无□色之驷谓四马杂色】

汉初铸荚钱马至匹百金【食货志】

晁错说文帝曰今令民有车骑马一匹者复卒三人【食货志】文帝十二年诏太仆见马遗财足余皆以给传置【本纪】景帝中四年御史大夫卫綰奏禁马高五尺九寸以上齿未平不得出关【本纪服?曰马十岁齿下平】

景帝始造苑马以广用【食货志臣天麟按大仆属官有边郡六牧师苑令师古曰汉官仪云牧师诸苑三十六所分置北边西边养马三十万头】

中六年匈奴入鴈门至武泉入上郡取苑马【本纪】

武帝之初七十年间国家亡事衆庶街巷有马阡陌之间成羣乘牝牡者摈而不得会聚【食货志】

建元元年罢苑马以赐贫民【本纪师古曰养马之苑禁百姓刍牧今罢之】卫青比岁击胡汉军士马死者十余万【食货志】

天子为伐胡故盛养马马之往来食长安者数万匹卒掌者关中不足乃调旁近郡【食货志】

元狩四年大将军骠骑大出击胡军马死者十余万匹【食货志】

两将军之出塞塞阅官马及私马凡十四万匹而後入塞者不满三万匹【霍去病传】

自卫青围单于後以汉马少故久不伐胡【本传】

元狩五年天下马少平牡马匹二十万【本纪如淳曰贵平牡马贾欲使人竞畜马】

兵革数动民多买复於是除千夫五大夫为吏不欲者出马【食货志】

元鼎四年令民得蓄边县官假马母三岁而归及息什一【食货志李奇曰边有官马今令民能蓄官母马者满三岁归之十母马还官一驹此为息什一也】五年车骑马乏县官钱少买马难得乃着令令封君以下至三百石吏以上差出牡马天下亭亭有蓄字马岁课息【食货志】

太初二年籍吏民马补车骑马【本纪】

上既悔远征伐乃下诏曰当今务在修马复令以补缺毋乏武备而已【臣天麟按晁错疏民有车骑马一匹者复卒三人即马复令也】郡国二千石各上进蓄马方略补边状与计对【西域传】

昭帝始元四年诏往时令民共出马其止勿出诸给中都官者且减之【本纪】

五年罢天下亭马母及马弩关【本纪应劭曰武帝令天下诸亭养马母令罢之孟康曰旧马高五尺六寸齿未平弩十石以上皆不得出关今不禁也】

元凤二年诏颇省乘舆马及远马以补边郡三辅传马其令郡国无斂今年马口钱【本纪】

元帝初元元年省苑马以振困乏九月诏大仆减谷食马【本纪】

杂录

黄霸守京兆尹发骑士诣北军马不适士劾乏兴连贬秩【本传马少事多不相补满也】

召延坐不出持马要斩【文帝功臣表】

任当千以卖马一匹贾钱十五万过平臧五百以上免【上】

太原郡家有马官【地理志注云汉有家马廄一廄万匹时以边表有事故分来此】大宛国多善马马汗血言其先天马子也张骞始为武帝言之上遣使者持千金及金马以请宛善马宛王以汉絶远大兵不能至爱其宝马不肯与汉使妄言宛遂攻杀汉使取其财物於是天子遣贰师将军李广利将兵前後十万余人伐宛连四年宛人斩其王毋寡首献马三千匹汉军乃还【西域传】

赵充国奏倅马什二【师古曰倅副也千骑则与副马二百匹】

金日殄输黄门养马牵马过殿下马又肥好上异而问之拜为马监【本传】

备边

汉二年兴关中卒乘边塞【本纪】

五年齐右丞相傅宽徙为代相国将屯二岁为丞相将屯【本传师古曰时代常有屯兵以备边寇宽为代相兼将此屯兵也】

陈豨为代相监边【韩信传】

豨以赵相国将监赵代边兵边兵皆属焉【卢绾传】

上破豨还诏曰代地居常山之北与夷狄边赵乃从山南有之远数有胡寇难以为国颇取山南太原之地益属代代之云中以西为云中郡则代受边寇益少矣【本纪】文帝后六年以中大夫令免为车骑将军屯飞狐故楚相苏意为将军屯句注将军张武屯北地河内太守周亚夫为将军次细柳宗正刘礼为将军次霸上祝兹侯徐厉为将军次棘门以备胡【本纪】

武帝元光元年十一月卫尉李广为骁骑将军屯云中中尉程不识为车骑将军屯鴈门六月罢【本纪】

六月匈奴盗边遣将军韩安国屯渔阳【纪】

安国为材官将军屯渔阳请且罢屯月余匈奴大入徙益屯罢东屯右北平安国既斥疏将屯又亡失多甚自愧乃益东徙【本传】

元封四年匈奴寇边遣拔胡将军郭昌屯朔方【本纪】太初三年使光禄徐自为出五原塞数百里远者千里筑城障列亭至卢朐而使游击将军韩说长平侯卫伉屯其旁使强弩都尉路博德筑居延泽上其秋匈奴大入云中定襄五原朔方行坏光禄所筑亭障【匈奴传】昭帝即位匈奴朔方杀略吏民发军屯西河左将入军筑行北边【本纪】

始元二年冬发习射战士诣朔方调故吏将屯田张掖郡【本纪】

元凤五年发三辅及郡国恶少年更有告劾亡者屯辽东【本纪】

宣帝本始中匈奴常数十万余骑南并塞欲入为寇遣赵充国将四万骑屯缘边九郡【充国传师古曰五原朔方云中代郡鴈门定襄北平上谷渔阳也四万骑分屯之充国总统领之】

北边自炖煌至辽东万一千五百余里乘塞列隧有吏卒数千人【赵充国传】

地节三年诏曰朕既不德不能附远是以边境屯戍未息今复饬兵重屯久劳百姓非所以绥

天下也其罢车骑将军右将军屯兵【本纪】

五凤四年以边塞亡寇减成卒什二【本纪】

平帝元始二年九月使谒者大司马掾四十四人持节行边兵【本纪】

杂录

晁错说文帝曰远方之卒守塞一岁而更不知胡人之能不如选常居者家室田作且以备之先为室屋具田器乃募罪人及免徒复作令居之不足募以丁奴婢赎罪及输奴婢欲以拜爵者不足乃募民之欲往者皆赐高爵复其家予冬夏衣廩能自给而止郡县之民得买其爵以自增至卿其亡夫若妻者县官买予之胡人入驱而能止其所驱者以其半予之县官为赎上从其言募民徙塞下错复言古之徙远方也相其阴阳之和尝其水泉之味审其土地之宜先为筑室家有一堂二内门户之闭置器物焉为置鬻巫以救疾病此所以使民乐其处而有长居之心也又闻古之制边县也使五家为伍伍有长十长一里里有假士四里一连连有假五百十连一邑邑有假侯皆择其邑之贤材有护习地形知民心者居则习民於射法出则教民於应敌劝以厚赏威以重罚则前死不旋踵矣【晁错传】

武帝元朔二年募民徙朔方十万口【本纪】

元狩五年徙天下奸猾吏民於边【本纪】

元鼎六年置张掖炖煌郡徙民以实之【本纪】

平帝元始二年募民徙云安县县次给食至徙所赐田宅什器假与犁牛种食【本纪】

晁错说文帝曰欲民务农在於贵粟贵粟之道在於以粟为赏罚今使天下人入粟於边以受爵免罪不过三岁塞下之粟必多矣於是帝从错之言募民入粟边二千石爵上造稍增至四千石为五大夫万二千石为大庶长各以多少级数为差【食货志】

武帝通西南夷道远巴蜀租赋不足以供之乃募豪民田南夷入粟县官而内受钱於都内【食货志】

宣帝即位谷至石五钱耿壽昌白令边郡皆筑仓以五谷贱时增其价以籴以利农谷贵时减其价而糴名曰常平仓民便之【食货志】

赵充国曰金城湟中谷斛八钱吾谓耿中丞籴三百万斛羌人不敢动矣耿中丞请籴百万斛乃得四十万斛耳失此二策羌人故敢为逆【赵充国传】

元帝初元五老罢常平仓【本纪】

西边北边之郡虽有长爵不轻得复五尺以上不轻得息斥候望烽燧不得卧将吏被介胄而睡【贾谊传文颖曰边方备胡寇作高土橰上作桔槔桔槔头兜零以薪草置其中常低之有寇即火燃举之以相告曰烽又多积薪寇至即然之以望其烟曰燧师古曰画则燔燧夜则举烽】

边郡之士闻举燧燔皆摄弓而驰荷兵而走【司马相如传孟康曰如覆米县着契臯头有寇则举之燧积薪有寇则燔然之也】

金布令甲曰边郡数被兵离饥寒夭绝天年父子相失令天下共给其费【萧望之传】

边郡发奔命书持赤白囊【丙吉传】

边郡有长史掌兵马【百官表】

大守卒史边郡一人【儒林传】

汉家边吏职在距寇亦赐武库兵皆任其事然後蒙之【毋将隆传】

武帝征伐边兵不足乃发武库工官兵器以贍之【食货志】

西汉会要卷五十九

卷六十

钦定四库全书

西汉会要卷六十

宋 徐天麟 撰

兵五

处降

典属国掌蛮夷降者武帝元狩三年昆邪王降复增属国置都尉丞侯千人属官九译令成帝河平元年省并大鸿胪【百官表】

文帝时弓高侯韩馥当以匈奴相国降侯【功臣表】

襄城侯韩婴以匈奴相国降侯【功臣表】

景帝时匈奴徐卢等五人降汉上欲侯之以劝後周亚夫曰彼背其主降陛下陛下侯之即何以责人臣不守节者乎上曰丞相议不可用乃悉封徐卢等为列侯【周亚夫传】

武帝元狩二年【表作三年】匈奴昆邪王杀休屠王并将其属合四万余人来降置五属国以处之【纪凡言增属国者皆增属国都尉也】

安定【三水】 天水【勇士】

上郡【龟兹】 西河【美稷】

五原 已上并属国都尉治【地理志】 宣帝神爵二年置金城属国以处降羌【本纪】

五凤三年置西河北地属国以处匈奴降者【本纪】

诸从蛮夷来归谊及以亡名数自占者内史县令主【淮南厉王传】

越骑校尉掌越骑【百官表如淳曰越人内附以为骑也】

长水校尉掌长水宣曲胡骑【长水胡名也宣曲观名胡骑之屯於宣曲者】 胡骑校尉掌池阳胡骑【师古曰胡骑之屯於池阳者也】

武帝遣赵破奴将属国骑及郡兵数万以击胡【张骞传】太初元年以李广利为贰师将军发属国六十骑期至贰师取善马

宣帝神爵元年发胡越骑羌骑诣金城【本纪臣天麟按羌骑亦以羌人内附者为之】

杜侯复陆支以匈奴归义因孰王从骠骑将军击左王以少破多捕虏三千一百侯三百户【表】

衆利侯伊即轩以匈奴归义楼剽王从骠骑将军击左王手劒合侯千一百户【表】

捕盜

武帝时杜周任用是时郡守尉诸侯相二千石欲为治者大抵尽效王温舒等而吏民益轻犯法盜賊滋起南阳有梅免百政楚有段中杜少齐有徐勃燕赵之间有坚卢范主之属大羣至数千人擅自号攻城邑取库兵释死罪缚辱郡守都尉杀二千石为檄告县趋具食小羣以百数掠卤乡里者不可称数於是上始使御史中丞丞相长史使督之犹弗能禁乃使光禄大夫范昆诸部都尉乃故九乡张德等衣绣衣持节虎符发兵以兴击斩首大部或至万余级及以法诛通行飲食坐相连郡甚者数千人数岁乃颇得其渠率散卒失亡复聚党阻山川往往而羣无可奈何於是作沈命法曰羣盜起不发觉发觉而弗捕满品者二千石以下至小吏主者皆死其後小吏畏诛虽有盜弗敢发恐不能得坐课累府府亦使不言故盜賊寢多上下相为匿以避文法焉【咸宣传】

江充为置指绣衣使者督三辅盜賊【本传】

天汉元年正月闭城门大搜【本纪】

二年大搜【索奸人也】泰山琅邪羣盜徐勃等阻山攻城道路不通遣直指使者暴胜之等衣绣衣杖斧分部逐捕刺史郡守以下皆伏诛十一月诏关都尉曰今豪杰多远交东方羣盜其谨察出入者【本纪】

征和元年发三辅骑士大搜上林闭长安城门索十一日乃解【本纪】

宣帝即位久之渤海左右郡岁饥盜賊并起二千石不能禽制上选能治者丞相御史举龚遂可用上以为渤海太守时遂年七十余召见形貌短小宣帝望见不副所闻心内轻焉谓遂曰渤海废乱朕甚忧之君欲何以息其盜賊以称朕意遂对曰海濒避远不沾圣化其民困於饥寒而吏不恤故使陛下赤子盜弄陛下之兵於潢池中耳今欲使臣胜之邪将安之也上闻遂对甚说答曰选用贤良固欲安之也遂曰臣闻治乱民犹治乱绳不可急也唯缓之然後可治臣愿丞相御史且无拘臣以文法得一切便宜从事上许焉加赐黄金赠遣乘传至渤海界郡闻新太守至发兵以迎遂皆遣还移书勅属县悉罢逐捕盜賊吏诸持鉏钩田器者皆为良民

吏母得问持兵者乃为盗贼遂单车独行至府郡中翕然盗贼亦皆罢渤海又多刼掠相随闻遂教令即时解散弃其兵弩而持钩鉏盗贼於是悉平民安土乐业【龚遂传】

尹翁归守右扶风选用廉平疾奸吏以为右职奸邪罪名亦县县有名籍盗贼发其比伍中翁归辄召其县长吏晓告以奸黠主名教使用类推迹盗贼所过抵类常如翁归言无有遗脱缓於小弱急於豪强豪强有论罪输掌蓄官使所莖责以员程不得取代不中程辄答督极者至以?自刳而死京师畏其威严扶风大治盗贼课常为三辅最【尹翁归传】

宣帝时勃海胶东盗贼并起张敞上书自请治之曰山阳郡户九万三千口五十万以上讵计盗贼未得者七十七人它课诸事亦略如此臣敞愚弩既无以佐思虑久处闲郡身逸乐而忘国事非忠孝之节也伏闻胶东勃海左右郡岁数不登盗贼并起至攻官寺篡囚徒搜市朝刼列侯吏失纲纪奸轨不禁臣敞不敢爱身避死唯明诏之所处愿尽力摧剉其暴虐存抚其孤弱事即有业所至郡条奏其所由废及所以兴之状书奏天子召敞拜胶东相赐黄金三十斤敞辞之官自请治剧郡非赏罚无以劝善惩恶吏追捕有功效者愿得壹切比三辅尤异天子许之敞到胶东明设赏开羣盗令相捕斩除罪吏追捕有功上名尚书调补县令者数十人由是盗贼解散传相捕斩吏民歛然国中遂平【张敞传】张敞守京兆尹长安市偷盗尤多百贾苦之上以问敞敞以为可禁敞既视事求问长安父老偷盗酋长数人居皆温厚出从童骑闾里以为长者敞皆召见责问因贯其罪把其宿负令致诸偷以自赎偷长曰令一旦召诣府恐诸偷惊骇愿壹切受署敞皆以为吏遣归休置酒小偷悉来贺且饮醉偷长以赭污其衣裾吏坐里闾阅出者污赭辄收缚之一日捕得数百人穷治所犯或一人百余发尽行法罚由是枹鼓稀鸣市无偷盗【张敞传】敞拜冀州刺史既到部而广川王国羣辈不道贼连发不得敞以耳目发起贼主名区处诛其渠帅广川王姬昆弟及王同族宗室刘调等通行为之囊橐吏逐捕穷窘踪迹皆入王宫敞自将郡国吏车数百两围守王宫搜索调等果得之殿屋重轳中敞傅吏皆捕格断头县其头王宫门外因劾奏广川王天子不忍致法削其户敞居部岁余冀州盗贼禁止【张敞传】

建平侯杜缓为太常坐盗贼多免【百官志】

王尊以病免会南山羣盗髡宗等数百人为吏民害拜故弘农太守傅刚为校尉将迹射士千人逐捕岁余不能禽或说大将军凤贼数百人在穀下发军击之不能得难以视四夷独选贤京兆尹乃可於是凤荐尊徵为谏大夫守京辅都尉行京兆尹事旬月间盗贼清【本传】成帝河平中单于来朝上使班伯持节迎於塞下会定襄大姓石季羣辈报怨杀追捕吏伯上状因自请愿试守期月上遣侍中中郎将王舜驰传代伯护单于并奉玺书印绶即拜伯为定襄太守定襄闻伯素贵年少自请治剧畏其下车作威吏民竦息伯至请问耆老父祖故人有旧恩者迎延满堂日为供具执子孙礼部中益弛诸所宾礼皆名豪怀恩醉酒共谏伯宜颇掇录盗贼具言本谋亡匿处伯曰是所望於父师矣乃召属县长吏选精进掾史分部收捕及它隐伏旬日尽得郡中震肃咸称神明【叙传】

阳朔三年颍川铁官申屠圣等百八十人杀长吏盗库兵自称将军经历九郡遣丞相长史御

史中丞逐捕以军兴从事皆伏辜【本传】

鸿嘉三年广汉男子郑躬等六十余人攻官寺篡囚徒盗库兵自称山君四年党与浸广犯历四县衆且万人拜河东都尉赵护为广汉太守发郡中及蜀郡合五万人击之或相捕斩除罪旬月平迁护为执金吾赐黄金百斤【本纪】

鸿嘉中广汉羣盗起选孙宝为益州刺史广汉太守扈商者大司马车骑将军王音姊子软弱不任职宝到部亲入山谷谕告羣盗非本造意渠率皆得悔过自出遣归田里自劾矫制奏商为乱首春秋之义诛首恶而已商亦奏宝所纵或有渠率当坐者商下狱宝坐失死罪免益州吏民多陈宝功效言为车骑将军所排上复拜宝为冀州刺史【孙宝传】

永始二年丞相薛宣坐西州盗贼羣辈免【恩泽侯表】

永始三年十一月尉氏男子樊并等十三人谋反杀陈留太守刼略吏民自称将军徒李谭等五人共格杀并等皆封为列侯【本纪】

永始三年十二月山阳铁官徒苏令等二百二十八人攻杀长吏盗库兵自称将军经历郡国十九杀东郡太守汝南都尉遣丞相长史御史中丞持节督趣逐捕汝南太守严欣捕斩令等迁欣为大司农赐黄金百斤【本纪】平帝元始二年遣执金吾侯陈茂假以征鼓募汝南南阳勇敢吏士三百人谕说江湖贼成重等二百余人皆自出送家在所收事重徙云阳赐公田宅【本纪】

三年阳陵任横等自称将军盗库兵攻官寺出囚徒大司徒掾督逐皆伏辜【本纪】

西汉会要卷六十

卷六十一

钦定四库全书

西汉会要卷六十一

宋 徐天麟 撰

刑法一

刑制

夷三族【高纪如淳曰父族母族妻族也】

要斩【张延年自称卫太子诬罔要斩】

磔【景纯谓张其尸】

弃市【师古曰取刑人於市与衆弃之】

腐刑【如淳曰宫刑也丈夫割势不能生子如腐木不生实又云诸服宫刑者下蚕室】

髡钳【高纪钳以铁束颈也】

完【孟康曰不加肉刑髡 也】

城旦舂【惠纪应劭曰城旦者旦起行治城舂者妇人不与外繇但舂作米皆四岁刑也】

鬼薪白粲【惠纪应劭曰取薪给宗庙为鬼薪坐择米使正白为白粲皆三岁刑也】

耐【字通作髡高纪注云罪不至于髡全其耐鬣惠纪注云一岁为罚作二岁以上者为耐】

罚作【一岁刑见上】

盗械【惠纪凡以罪着械者皆称焉】

颂系【惠纪颂容也言见宽容但处曹吏舍不入狴牢】

答【景帝定令当答者答臀如淳曰先时答背也】

箠【长五尺其本大一寸其竹也末薄半寸皆平其节】

汉兴之初虽有约法三章网漏吞舟之鱼其大辟尚有夷三族之令令曰当三族者皆先黥劓斩左右止笞杀之梟其首殖其骨肉於市其诽谤詈诅者又先断舌故谓之具五刑彭越韩信之属皆受此诛至高后元年乃除三族罪妖言令【刑法志】

文帝除宫刑【景帝元年诏臣天麟按文帝既除宫刑矣景帝中四年赦徒作阳陵者死罪欲腐者许之至武帝时李延年司马迁张安世兄贺皆坐腐刑则是宫刑虽除不久即复用也】

文帝十三年齐大仓令淳于公有罪当刑诏狱逮系长安淳于公无男有五女当行会逮骂其女曰生子不生男缓急非有益也其少女缇萦自伤悲泣乃随其父至长安上书曰妾父为吏齐中皆称其廉平今坐法当刑妾伤夫死者不可复生刑者不可复属虽後欲改过自新其道亡繇也妾愿没入为官婢以赎父刑罪使得自新书奏天子天子怜悲其意遂下令曰制诏御史盖闻有虞氏之时画衣冠异章服以为戮而民弗犯何治之至也今法有肉刑三而奸不止其咎安在乃朕德之薄而教不明与吾甚自愧故夫训道不纯而愚民?焉诗曰恺弟君子民之父母今人有过教未施而刑已加焉或欲刑为善而道亡繇至朕甚怜之夫刑至断支体刻肌肤终身不息何其刑之痛而不德也岂称为民父母之意哉其除肉刑有以易之及令罪人各以轻重不亡逃有年而免具为令丞相张苍御史大夫冯敬奏言肉刑所以禁奸所由来者久矣陛下明诏怜万民之一有过被刑者终身不息及罪人欲改行为善而道亡繇至於盛德臣等所不及也臣谨议请定律曰诸当完者完为城旦舂当黥者髡钳为城旦舂当劓者笞三百当斩左止者五百当斩右止及杀人先自告及吏坐受赇枉法守县官财物而即盗之已论命复有笞罪者皆弃市罪人狱已决完为城旦舂满三岁为鬼薪白粲鬼薪白粲一岁为隶臣妾隶臣妾一岁免为庶人隶臣妾满二岁为司寇司寇一岁及作如司寇二岁皆免为庶人其亡逃及有罪耐以上不用此令前令之刑城旦舂岁而非禁锢者如完为城旦舂岁数以免臣昧死请制曰可是後外有轻刑之名内实杀人斩右止者又当死斩左止者笞五百当劓者笞三百率多死景帝元年下诏曰加笞与重罪无异幸而不死不可为人其定律笞五百曰三百笞三百曰二百犹尚不全至中六年又下诏曰加笞者或至死而笞未毕朕甚怜之其减笞三百曰二百笞二百曰一百又曰笞者所以教之也其定箠令丞相刘舍御史大夫卫綰请笞者箠长五尺其本大一寸其竹也末薄半寸皆平其节当笞者笞臀毋得更人毕一罪乃更人自是笞者得全然酷吏犹以为威死刑既重而生刑又经民易犯之【刑法志】

孝景中元年改磔曰弃市勿复磔【纪】

律令

高祖初入关召诸县豪杰谓曰父老苦秦苛法久矣诽谤者族偶语者弃市吾当王关中与父老约法三章耳余悉除去秦法【纪】

高祖约法三章曰杀人者死伤人及盗抵罪蠲削烦苛兆民大悦其後四夷未附兵革未息三

章之法不足以御奸於是相国萧何攬摭秦法取其宜於时者作律九章【刑法志按晋书刑法志云萧何定律益事律兴廐户三篇合为九篇】

孝惠四年省法令妨吏民者除挟书律【纪】

高后元诏孝惠欲除三族妖言令今除之【纪】

孝文二年【纪作元年】又诏丞相太尉御史法者治之正所以禁暴而卫善人也今犯法者已论而使无罪之父母妻子同产坐之及收朕甚弗取其议左右丞相周勃陈平奏言父母妻子同产相坐及收所以累其心使重犯法也收之之道所由来久矣臣之愚计以为如其故便文帝复曰朕闻之法正则民慤罪当则民从且夫牧民而道之以善者吏也既不能道又以不正之法罪之是法反害於民为暴者也朕未见其便宜熟计之平勃乃曰陛下幸加大惠於天下使有罪不收无罪不相坐甚盛德臣等所不及也臣等谨奉诏尽除收律相坐法其後新垣平谋为逆复行三族之诛【刑法志】

晁错为内史法令多所更定错所更定三十章【晁错传】孝景中六年定铸钱伪黄金弃市律【本纪】

孝武即位外事四夷之功内盛耳目之好徵发烦数百姓贫耗穷民犯法酷吏击断奸轨不胜於是招进张汤赵禹之属条定法令作见知故纵监临部主之法缓深故之罪急纵出之诛其後奸骹巧法转相比况禁网寢密律令凡三百五十九章大辟四百九条千八百八十二事死罪决事比万三千四百七十二事文书盈於几阁典者不能徧睹是以郡国承用者駁或罪同而论异奸吏因缘为市所欲活则传生议所欲?则予死比议者咸冤伤之【刑法志】

自公孙弘以春秋之义绳臣下张汤以峻文决理於是见知之法生而废格沮诽穷治之狱用矣汤奏当异九卿见令不便不入言而腹诽论死自是後有腹非之法比【食货志】

武帝作沈命法【沈匿也敢蔽匿盗贼者没其命也】曰羣盗起不发发觉而弗捕满品者二千石以下至小吏主者皆死【咸宣传】孝宣本始四年诏郡国律令有可蠲除以安百姓条奏【本纪】

地节四年诏曰父子之亲夫妇之道天性也虽有祸患犹蒙死而存之诚爱结於心仁厚之至也自今子首匿父母妻匿夫孙匿大父母皆勿坐其父母匿子夫匿妻大父母匿孙罪殊死皆上请廷尉以闻【本纪】

时涿郡太守郑昌上疏言圣王置谏争之臣者非以崇德防逸豫之生也立法明刑者非以为治救衰乱之起也今明主躬垂明听虽不置廷平狱将自正若开後嗣不若删定律令律令一定愚民知所避奸吏无所弄矣今不正其本而置廷平以理其末也政衰听怠则廷平将招权而为乱首矣宣帝未及修正至元帝初立廼下诏曰夫法令者所以抑暴扶弱欲其难犯而易

避也今律令烦多而不约自典令文者不能分明而欲罗元元之不逮斯岂刑中之意哉其议律令可蠲除轻减者条奏【刑法志】

元帝初元五年省刑罚七十余事除光禄大夫以下至郎中保父母同产之令【本纪】

成帝河平中复下诏曰甫刑云五刑之属三千大辟之罚属二百今大辟之刑千有余条律令烦多百有余万言奇请它比日以益滋自明习者不知所由欲以晓谕衆庶不亦难乎於以罗元元之民天絶亡辜岂不哀哉其与中二千石二千石博士及明习律令者议减死刑及可蠲除省约者令较然易知条奏书不云乎惟刑之恤哉其审核之务準古法朕将尽心覽焉有司无仲山父将明之材不能因时广宣主恩建立明制为一代之法而徒钩摭微细毛举数事以塞诏而已【刑法志】

西汉会要卷六十一

卷六十二

钦定四库全书

西汉会要卷六十二

宋 徐天麟 撰

刑法二

疑讞

高皇帝七年制诏御史狱之疑者吏或不能决有罪者久而不论无罪者久系不决自今以来县道官狱疑者各讞所属二千石官二千石官以其罪名当报之所不能决者皆移廷尉廷尉亦当报之廷尉所不能具谨具为奏传所当比律令以闻上恩如此吏犹不能奉宣故孝景中五年复下诏曰诸狱疑虽文致於法而於人心不厌者辄讞之其後狱吏复避微文遂其愚心至後元年又下诏曰狱重事也人有愚智官有上下狱疑者讞有令讞者已报讞而後不当讞者不为失自此之後狱刑益详近於五听三宥之意【刑法志】

议贵

高帝七年令郎中有?耐以上请之【本纪】

孝惠初即位爵五大夫吏六百石以上及宦皇帝而知名者有?当盗械者皆颂系上造以上及内外公孙耳孙有?当刑及当为城旦舂者皆耐为鬼薪白粲【本纪】孝文时贾谊上疏曰古者廉耻节礼以治君子故有赐死而无戮辱是以黥劓之罪不及大夫今自王侯三公之贵皆天子所改容而礼之也而今与衆庶同黥劓髡笞僇弃市之法被戮辱者不太迫乎夫尝已在贵?之位今而有过废之可也退之可也赐之死可也灭之可也若夫束缚之系縲之输之司寇编之徒官司寇小吏詈骂而榜笞之殆非所以令衆庶见也是时丞相周勃免就国人有告勃谋反逮系长安狱治卒无事故谊以此讥上上深纳其言养臣下有节是後大臣有罪皆自杀不受刑至武帝时稍复入狱自甯成始【贾谊传】昭平君狱系内官以公主子廷尉上请【东方朔传】

吏二千石有?先请【刘屈氂传】

宣帝黄龙元年诏曰吏六百石位大夫有?先请【本纪】成帝怒丞相王嘉孔光等请谒者召嘉诣廷尉诏狱永信少府猛等十人以为圣王断狱必先原心定罪探意立情故死者不抱恨而入地生者不衔怨而受罪明主躬圣德重大臣刑辟广延有司议欲使海内咸服嘉罪名虽应法圣王之於大臣在舆为下御坐则起疾病视之无数死则临吊之废宗庙之祭进之以礼

退之以义谏之以行案嘉本以相等为罪罪恶虽着大臣括发关械裸躬就笞非所以重国褒宗庙也今春月寒气错缪霜露数降宜示天下以宽和臣等不知大义惟陛下察焉有诏假谒者节召丞相诣廷尉诏狱【王嘉传】

平帝元始元年令公列侯嗣子有?耐以上先请【本纪】元始四年敕百僚妇女非身犯法诏所名捕它皆亡得系【本纪】

矜老弱

孝惠即位诏民年七十以上若不满十岁有罪当刑者皆完之【本纪】

孝景後三年下诏曰高年老长人所尊敬也鰥寡不属逮者人所哀怜也其着令年八十以上八岁以下及孕者未乳师朱儒当鞠系者颂系之至孝宣元康四年又下诏曰朕念夫耆老之人发齿堕落血气既衰亦无暴逆之心今或罹於文法执於囹圄不得终其年命朕甚怜之自今以来诸年八十非诬告杀伤人它皆勿坐至成帝鸿嘉元年定令年未满七岁贼鬪杀人及犯殊死者上请廷尉以闻得减死合於三赦幼弱老耄之人此皆法令稍定近古而便民者也【刑法志】

赎罪

惠帝元年民有罪得买爵三十级以免死罪【本纪应劭曰级直钱二千凡为六万】

晁错说文帝曰欲民务农在於贵粟贵粟之道在於以粟为赏罚今募天下入粟县官得以拜爵除罪不过三岁塞下之粟必多【食货志】

孝景时上郡以西旱复修卖爵令而裁其贾以招民及徒复作得输粟於县官以除罪【食货志】

武帝天汉四年令死罪入赎钱五十万减死一等【本纪】太始二年募死罪入赎钱五十万减死一等【本纪】

宣帝时西羌反汉遣後将军征之京兆尹张敞上书言国兵在外军以夏发陇西以北安定以西吏民并给转输田事颇废素无余积虽羌虏以破来春民食必乏穷僻之处买亡所得县官谷度不足以赈之愿令诸有?非盗受财杀人及犯法不得赦者皆得以差入谷此八郡赎罪务益致谷以预备百姓之急事下有司左冯翊萧望之与少府李强议以为民函陰阳之气有好义欲利之心在教化之所助尧在上不能去民欲利之心而能令其欲利不胜其好义也虽桀在上不能去民好义之心而能令其好义不胜其欲利也故尧桀之分在於义利而已道民不可不谨也今欲令民量粟以赎罪如此则富者得生贫者独死是贫富异刑而法不一也人情贫穷父兄囚执闻出财得以生活为人子弟者将不顾死亡之患败乱之行以赴财利求救亲

戚一人得生十人以丧如此伯夷之行坏公绰之名灭政教壹倾虽有周召之佐恐不能复古者臧於民不足则取有余则予诗曰爰及矜人哀此鰥寡上惠下也又曰雨我公田遂及我私下急上也今有西边之役民失作业虽户赋口歛以贍其困乏古之通义百姓莫以为非以死救生恐未可也陛下布德施教教化既成尧舜亡以加也今议开利路以伤既成之化臣窃痛之於是天子复下其议两府丞相御史以难问张敞敞曰少府左冯翊所言常人之所守耳昔先帝征四夷兵行三十余年百姓犹不加赋而军用给今羌虏一隅小夷跳梁於山谷间汉但令?人出财减?以诛之其名贤於烦扰良民横兴赋歛也又诸盗及杀人犯不道者百姓所疾苦也皆不得赎首匿见知纵所不当得为之属议者或颇言其法可蠲除今因此令赎其便甚明何化之所乱甫刑之法小过赦薄罪赎有金选之品所从来久矣何贼之所生敞备布衣二十余年尝闻罪人赎矣未闻盗贼起也窃怜凉州被寇方秋饶时民尚有饥乏病死於道路况至来春将大困乎不早虑所以振救之策而引常经以难恐後为重责常人可与守经未可与权也敞幸得备列卿以辅两府为职不敢不尽愚望之强复对曰先帝圣德贤良在位作宪垂法为无穷之规永惟边竟之不贍故金布令甲曰边郡数被兵离饥寒天絶天年父子相失令天下共给其费固为军旅卒暴之事也闻天汉四年常使罪人入五十万钱减死罪一等豪强吏民请夺假貲至为盗贼以赎其罪其後奸邪横暴羣盗并起至攻城邑杀郡守充满山谷吏不能禁明诏遣绣衣使者以兴兵击之诛者过半然後衰止愚以为此使死罪赎之败也故曰不便时丞相魏相御史大夫丙吉亦以为羌虏且破转输略足相给遂不施敞议【萧望之传】

元帝时贡禹上疏言孝文皇帝时贵廉洁贱贪污贾人赘壅及吏坐臧者皆禁锢不得为吏赏善罚恶不阿亲戚罪白者伏其诛疑者以与民亡赎罪之法故令行禁止海内大化天下断狱四百与刑错亡异武帝始临天下尊贤用士辟地广境数十里自见功大威行遂从耆欲用度不足乃行一切之变使犯法者赎罪入谷者补吏是以天下奢侈官乱民贫盗贼并起亡命者衆郡国恐伏其诛则择便巧史书习於计簿能欺上府者以为右职奸轨不胜则取勇猛能操切百姓者以苛暴威服下者使居大位故亡义而有财者显於世欺谩而善书者尊於朝諄逆而勇猛者贵於官故俗皆曰何以孝弟为财多而光荣何以礼义为史书而仕宦何以谨慎为勇猛而临官故黥劓而髡钳者犹复攘臂为政於世行虽犬彘家富執足目指气使是为贤耳故谓居官而置富者为雄桀处奸而得利者为壮士兄劝其弟父勉其子俗之坏败乃至於是察其所以然者皆以犯法得赎罪求士不得真贤相守崇财利诛不行之所致也今欲兴至治致太平宜除赎罪之法【贡禹传】

恤刑

文帝赦罪人怜其亡髮赐之巾怜其衣赭书其背父子兄弟相见也而赐之衣平狱缓刑天下莫不说喜【贾山传】武帝元朔六年遣博士循行天下治苛者举奏【本纪】宣帝即位廷尉史路温舒上疏言臣闻秦有十失其一尚存治狱之吏是也方今天下赖陛下恩厚亡金革之危饥寒之患父子夫妻戮力安家然太平未治者狱乱之也夫狱者天下之大命也死者不可复生?者不可复属书曰与其杀不辜宁失不经今治狱吏则不然上下相殴以刻为明深者获公明平者多後患故治狱之吏皆欲人死非憎人也自安之道在人之死是以死人之血流

离於市被刑之徒比肩而立大辟之计岁以万计此仁圣之所以伤也太平之未洽凡以此也夫人情安则乐生痛则思死捶楚之下何求而不得故囚人不胜痛则饰辞以视之吏治者利其然则指道以明之上奏畏郤则鍛链而周内之盖奏当之成虽咎繇听之犹以为死有余辜何则成链者衆文致之罪明也是以狱吏专为深刻残贼而亡极媮为一切不顾国患此世之大贼也故俗语曰画地为狱议不入刻木为吏期不违此为疾吏之风悲痛之辞也故天下之患莫深於狱败法乱正离亲塞道莫甚乎治狱之吏此所谓一尚存者也上深愍焉廼下诏曰间者吏用法巧文寢深是胜之不德也夫决狱不当使有罪兴邪不辜蒙戮父子悲恨朕甚伤之今遣廷史与郡鞠狱任轻禄薄其为置廷平秩六百石员四人其务平之以称朕意於是选于定国为廷尉求明察寛恕黄霸等以为廷平季秋後请谏时上常幸宣室斋居而决事狱刑号为平矣【路温舒传及刑法志】地节四年诏曰令甲死者不可生刑者不可息今系者或以掠辜若饥寒瘐死狱中朕甚痛之其令郡国岁上系囚以掠笞若瘐死者所坐名县爵里丞相御史课殿最以闻【本纪】

元康二年诏曰狱者万民之命所以禁暴止邪养育羣生也能使生者不怨死者不恨可谓文吏矣今则不然用法或持巧心析律贰端深浅不平增辞饰非以成其罪奏不如实上亦亡繇知此朕之不明吏之不称四方黎民将何仰哉二千石各察官属勿用此人吏务平法【本纪】

五凤四年诏曰以前使使者问民所疾苦复遣丞相御史掾二十四人循行天下举冤狱察擅为苛禁深刻不改者【本纪】

黄龙元年诏曰朕数申诏公卿大夫务行寛大今吏或以不禁奸邪为寛大纵释有罪为不苛或以酷恶为贤皆失其中御史察计簿疑非实者按之【本纪】

成帝鸿嘉元年二月诏曰方春生长时临遣谏大夫理等举三辅三河弘农冤狱【本纪】

四年诏曰数敕有司务行寛大而禁苛暴讫今不改一人有辜举宗拘系朕甚痛焉已遣使者循行郡国务有以全活之【本纪】

哀帝元寿元年诏曰今有司执法未得其中或上暴虐假势获名其勉率百僚专任仁人黜远残贼期於安民【本纪】

女刑

城旦舂【惠帝纪应劭曰妇人不与外徭但舂作米皆四岁刑】

女徒复作【宣纪李奇曰罪轻男子守边女子软弱不任守复令作於官亦一岁故谓之复作徒也孟康曰复谓弛刑徒也有赦令诏书去其钳赭衣更犯事不从徒加与民为例故当复为官作满其本罪年月日律名为复作也】

平帝元始元年天下女徒已论归家顾山钱月三百【本纪师古曰谓女徒论罪已定并放归家不亲役之但令一月出钱三百以顾人也为此恩者以行太皇太后之德施惠政於妇人如淳曰令甲女犯罪当於山伐木听使入钱顾功直故谓之顾山】

西汉会要卷六十二

卷六十三

钦定四库全书

西汉会要卷六十三

宋 徐天麟 撰

刑法三

大赦

高帝二年正月赦罪人【本纪下同】

六月立太子赦罪人

五年正月兵事毕赦天下殊死以下

六月都长安大赦天下

六年以豪杰未习法令故犯法其赦天下

九年正月丙寅前有罪殊死以下皆赦之

十一年正月立代王大赦天下

七月征英布赦天下死罪以下令从军

十二年帝崩发丧大赦天下

右高帝在位十二年凡九赦

惠帝四年皇帝冠赦天下

右惠帝在位七年惟此一赦

吕太后临朝称制大赦天下 六年赦天下

八年遗诏大赦天下

右吕后临朝八年凡三赦

文帝初即位赦天下 七年赦天下

十五年郊见五帝赦天下 後四年日食赦天下右文帝在位二十三年凡四赦

景帝元年赦天下 四年赦天下

中元年赦天下 五年赦天下

後元年赦天下

右景帝在位十六年凡五赦

武帝建元元年赦天下 元光元年赦天下

四年地震赦天下 元朔元年赦天下与民更始

三年赦天下 六年赦天下

元狩元年赦天下 三年赦天下

元鼎元年赦天下 五年赦天下

元封二年甘泉产芝赦天下 五年修封禅赦天下

天汉元年赦天下 三年修封禅赦天下

太始元年赦天下 四年修封还赦天下

征和三年赦天下 後元元年郊泰畤赦天下右武帝在位五十五年凡十八赦

昭帝始即位赦天下 始元元年赦天下

四年立皇后赦天下 元凤元年赦天下

二年赦天下 四年赦天下

六年赦天下

右昭帝在位十三年凡七赦

宣帝即位大赦天下 本始元年凤凰集赦天下

四年立皇后赦天下 地节二年凤凰集赦天下三年立皇太子赦天下

元康二年赦天下与士大夫厉精更始

神爵二年凤凰甘露降集赦天下

四年嘉瑞并见赦天下

五凤三年屡蒙嘉瑞赦殊死以下

甘露二年赦天下

右宣帝在位二十五年凡十赦

元帝初元元年大赦天下 二年地动赦天下

三年白鹤馆灾赦天下 永光元年赦天下

二年二月大赦天下 六月赦天下

四年赦天下 建昭二年赦天下

四年斩郅支赦天下 五年赦天下

右元帝在位十五年凡十赦

成帝即位大赦天下 建始元年火灾大赦天下

河平元年赦天下 阳朔二年大赦天下

四年赦天下 鸿嘉三年赦天下永始四年郊泰畤大赦天下
元延元年赦天下绥和元年大赦天下

右成帝在位二十六年凡九赦

哀帝即位大赦天下 建平元年赦天下二年六月改元大赦天下
元寿元年大赦天下右哀帝在位六年凡四赦

平帝即位大赦天下 元始元年日食大赦天下三年立皇后大赦天下
五年帝崩大赦天下右平帝在位五年凡四赦

赦徒

文帝二年民谪作县官及贷种食未入入未备者皆赦之

景帝中四年赦徒作阳陵者死罪欲腐者许之

武帝元封元年封泰山赦所过徒

宣帝元康元年凤凰集赦天下徒

五凤元年赦徒作杜陵者

元帝初元四年祠后土赦汾阳徒

永光元年幸甘泉赦云阳徒

成帝建始二年祀南郊赦奉郡县及中都官耐罪徒

三年赦天下徒 四年单于朝赦天下徒

阳朔元年赦天下徒 鸿嘉元年幸初陵赦作徒哀帝建平二年赦天下徒

平帝元始元年赦天下徒 二年赦天下徒

别赦

汉五年遣使者赦田横

八年吏有罪未发觉者赦之

十年太上皇崩葬万年赦栢阳囚死罪以下【瓚曰万年陵有栢阳县界】

十二年系卢绾与绾居来归者赦之

惠帝六年八月赦降【司马氏大事记】

文帝三年七月诏济北吏民兵未至先自定及以军城邑降者皆赦之复官爵与王兴居去来者亦赦之八月赦诸与兴居反者

景帝三年赦襄平侯及妻子当坐者六月诏吴王濞已灭吏民当坐濞等及逋逃亡军者皆赦之

武帝建元元年赦吴楚七国帑输在官者

六年赦鴈门代郡军吏不循法者

元封四年祭后土赦汾陰夏阳中都死以下

益州昆明反赦京师亡命令从军

太初二年用事介山祭后土赦汾陰安邑殊死以下昭帝元凤元年赦燕王太子建公主子文信及宗室子与燕王上官桀等谋反父母同产当坐者皆免为庶人其更为桀等所诬误未发觉在吏者除其罪

宣帝地节四年诸为霍氏所诬误未发觉者皆赦之元康二年诸触讳在令前者赦之【并本纪】

赦宥杂錄

元帝时匡衡上疏曰陛下躬圣德开太平之路闵愚吏民触法抵禁比年大赦使百姓得改行自新天下幸甚臣窃见大赦之後奸邪不为衰止今日大赦明日犯法相随入狱此殆导之未得其务也盖保民者陈之以德义示之以好恶观其失而制其宜故动之而和绥之而安今天下俗贪财贱义好声色上侈靡廉耻之节薄淫僻之意纵纲纪失序疏者踰内亲戚之恩薄婚姻之党隆苟合傲幸以身设利不改其原虽岁赦之刑犹难使错而不用也【本传】

成帝初即位王尊劾奏丞相衡御史大夫谭知中书谒者令显等专权擅執皆不道在赦令前赦後衡谭举奏显云云天子下御史问状劾奏尊妄诋欺非谤赦前事有诏左迁【王尊传】

哀帝即位令有司无得举赦前往事【纪】

平帝即位诏曰夫赦令者将与天下更始诚欲令百姓改行洁己全其性命也往者有司多举奏赦前事累增罪过诛亡辜殆非重信慎刑洒心自新之意也自今以来有司无得陈赦前事置奏上有不如诏书为亏恩以不道论定着令布告天下使明知之【纪】

狱

中都官狱【宣纪臣天麟按後汉百官志云孝武以下置中都官狱二十六所各令长名】廷尉诏狱【周勃诣廷尉诏狱】

上林诏狱【成纪罢上林诏狱师古曰汉旧仪云上林诏狱主治苑中禽兽宫馆事】

郡邸狱【宣纪曾孙坐收郡邸狱注云汉旧仪郡邸狱治天下郡国上计者】

掖庭秘狱【刘辅系掖庭秘狱三辅黄图云武帝改永巷为掖庭置狱焉】

共工狱【刘辅传徒系共工狱注考工也】 若卢诏狱【王商诣若卢诏狱】

都船狱【王嘉致都船狱】 都司空狱【窦婴劾系都司空狱又伍被传为左右都司空诏狱书】 居室【灌夫传劾夫系居室注云後改为保宫】 保宫【李陵母系保宫】

内官【东方朔传昭平君狱系内官】 请室【爰盎传绛侯反系请室注狱也】

导官【张汤传廷尉谒君弟系导官】

暴室【宣纪注云暴室宫人狱】 水司空【伍被传注云上林有水司空主囚徒官】

断狱数

文帝即位刑罚大省断狱数百有刑错之风【志】

武帝时天下断狱万数【贾捐之传又食货志云断狱岁以万千数】

元康中魏相上书案今年计子弟杀父兄妻杀夫者凡二百二十二人【传】

自昭宣元成哀平六世之间断狱殊死率岁千余口而一人耐罪上至右止三倍有余【志】

西汉会要卷六十三

卷六十四

钦定四库全书

西汉会要卷六十四

宋 徐天麟 撰

方域一

都邑

高帝五年西都洛阳斋戍卒娄敬求见说上曰陛下都洛阳岂欲与周室比隆哉上曰然娄敬曰陛下取天下与周异周之先自后稷封郤积德彞善十有余世至於太王王季文王武王而诸侯自归之遂灭殷为天子及成王即位周公相焉乃营洛邑以为此天下之中也诸侯四方纳贡职道里均矣有德则易以王无德则易以亡故周之盛时天下和洽诸侯四夷莫不宾服効其贡职及其衰也天下莫朝周不能制也非惟其德薄也形势弱也今陛下起丰沛卷蜀汉定三秦与项羽战荥阳成臯之间大战七十小战四十使天下之民肝脑涂地父子暴骨中野不可胜数哭泣之声未絶伤夷者未起而欲比隆於康成之时臣窃以为不侔也且夫秦地被山带河四塞以为固卒然有急百万之衆可立具也因秦之故资甚美膏腴之地此所谓天府者也陛下入关而都之山东虽乱秦之故地可全而有也夫与人鬪不搯其吭拊其背未能全其胜也今陛下案秦之故地此亦搯天下之吭而附其背也帝问羣臣羣臣皆山东人争言周王数百年秦二世即位洛阳东有成臯西有殽崤倍河乡雒其固亦足恃也上问张良良曰雒阳虽有此固其中小不过数百里田地薄四面受敌此非用武之地关中左殽函右陇蜀沃野千里南有巴蜀之饶北有胡宛之利阻三面而固守独以一面东制诸侯诸侯安定河渭漕挽天下西给京师诸侯有变顺流而下足以委输此所谓金城千里天府之国娄敬说是也上即日车驾西都长安拜娄敬为郎中号曰奉春君赐姓刘氏【娄敬张良传】

元帝时翼奉上疏曰臣闻昔盘庚改邑以兴殷道圣人美之臣愿陛下徙都於成周左据成臯右阻崤池前乡崧高後介大河建荥阳扶河东南北千里以为关而入敖仓地方百里者八九足以自娱东厌诸侯之权西远羌胡之难陛下共已亡为按成周之君兼盘庚之德万岁之後长为高宗汉家郊兆寢庙祭祀之礼多不应古臣奉诚难亶居而改作故愿陛下迁都正本衆制皆定臣愿陛下因天变而徙都所谓与天下更始者也书奏天子异其意答曰问奉今园庙有七云东徙状何如奉对曰昔成王徙洛盘庚迁殷其所避就皆陛下所明知也非有圣明不能一变天下之道唯陛下裁赦【翼奉传】

郡国沿革

本秦京师为内史分天下作三十六郡汉兴以其郡太大稍复开置又立诸侯王国武帝开广

三边故自高祖增二十六文景各六武帝二十八昭帝一讫於孝平凡郡国一百三县邑千三百一十四道三十二【邑有蛮夷曰道】侯国二百四十一地东西九千三百二里南北万三千三百六十八里【地理志】

武帝元封五年初置刺史部十三州【纪】

京兆尹【故秦内史汉元年项羽立司马欣为塞王为塞国三年欣降汉为渭南郡九年罢复为内史武帝建元六年分为右内史太初元年更为京兆尹】左冯翊【故秦内史高帝元年属塞国二年更名河上郡九年罢复为内史武帝建元六年分为左内史太初元年更名左冯翊】右扶风【故秦内史汉元年项羽立章邯为雍王为雍国二年汉王并三秦以雍置中地郡九年罢复为内史武帝建元六年分为右内史太初元年更名右扶风已上为三辅】弘农郡【右函谷关秦人恃之以为险固武帝元鼎四年徙函谷关於新安而以故关置弘农郡】河东郡【汉初属魏高帝二年韩信等虏魏王豹定魏地置河东郡】河内郡【高帝元年立司马卬为殷王为殷国二年卬降汉为河内郡】河南郡【本周王城秦为三川郡项羽立瑕丘申阳为河南王高帝取之置河南郡】

右司隶校尉领郡七

颍川郡【秦置高帝封韩王信为韩国六年徙国人於太原复为颍川郡】汝南郡【高帝置】沛郡【故秦泗水郡高帝更名】梁国【故秦碭郡高祖五年封彭越为梁国十一年反诛立子恢为梁王罢东郡颇益梁高后七年恢徙王赵以梁封吕产文帝二年封怀王楫】鲁国【故秦薛郡高后元年封张敖子偃为鲁国孝景二年封共王余】

右豫州刺史领郡国五

魏郡【高帝置】钜鹿郡【战国赵地秦始皇二十五年灭赵置钜鹿郡汉因之】常山郡【汉元年项羽分赵立张耳为常山王四年耳为赵王更属赵八年国除置常山郡】清河郡【高帝置景帝中三年立子乘为清河国武帝建元五年国除复为郡】广平国【战国属赵秦属邯鄲郡汉为广平国武帝征和二年为平干国宣帝五凤二年国废复为广平国】真定国【武帝元鼎四年置】中山国【高帝置中山郡景帝封中山靖王胜更为国】信都国【景帝二年立子彭祖为广川国五年国除为信都郡中二年封惠王越复为广川国宣帝甘露三年为信都国】河间国【故赵文帝二年封河间王辟疆始置国十五年国除为郡景帝二年封献王德复为国】赵国【高帝四年封张耳为赵王八年国除九年封子如意又封幽王灰高后封共王恢文帝元年封幽王子遂景帝三年国除为邯鄲郡五年封赵敬肃王彭祖复为国】

右冀州刺史领郡国十

东郡【秦置汉十一年罢东郡颇益梁後复为郡】陈留郡【汉初属河南郡武帝置陈留郡

】山阳郡【汉初属梁国景帝中六年分梁为五国别为山阳国以封梁孝王子定武帝建元五年国除为郡天汉四年更为昌邑国昭帝元平元年复为山阳郡】济陰郡【汉初属梁国景帝中六年别为济陰国武帝建元三年国除为郡宣帝甘露二年更名帝陶国明年复为郡成帝河平四年复为定陶国哀帝建平二年复为济陰郡】泰山郡【高帝置】城阳国【高祖封子肥为齐王属齐国惠帝二年悼惠王献城阳郡以益鲁元公主邑更属鲁文帝二年封朱虚侯章为城阳王别为国】淮阳国【高帝十一年封子友始置国孝惠元年国除为淮阳郡高后元年封惠帝子强五年立子武孝文元年国除四年复为国十一年复为郡孝景二年复为国四年复为郡宣帝元康二年复为国】东平国【汉初属梁国景帝中六年封梁孝王子彭离别为济东国武帝元景元年国除为大河郡宣帝甘露二年为东平国】

右兖州刺史领郡国八

琅邪郡【秦置汉初属齐吕后七年封刘泽为琅邪王别为国文帝元年更为郡】东海郡【高帝置】临淮郡【武帝元狩六年置】泗水国【汉初属东海郡武帝元鼎四年封泗水勤上综别为国】楚国【高帝五年封韩王信六年封元王交宣帝地节元年国除为彭城郡黄龙元年仍复为楚国】右徐州刺史领郡国五

平原郡【高祖六年置】千乘郡【高帝置】济南郡【汉初为齐郡孝文十六年别为济南国景帝三年国除为郡】齐郡【秦置齐郡汉元年项羽分齐为三国田都为齐王田市为济北王田安为胶东王三年并属汉为郡六年封子肥为齐国孝文时分置城阳菑川胶西济南济北国而齐地浸狭武帝元朔中齐王次昌亡後国除为郡】北海郡【景帝中二年置】东莱郡【高帝置】胶东国【故齐地汉元年项羽立田市为胶东王五月并属齐文帝十六年封胶东王雄渠别为国】高密国【汉初属齐文帝十六年别为胶西国宣帝本始元年更为高密国】菑川国【汉初属齐文帝十六年封菑川王贤别为国地理志云十八年误也】

右青州刺史领郡国九

南阳郡【秦置】南郡【秦置高祖元年更为临江郡五年复故景帝二年封子荣为临江国中二年国除复为南郡】江夏郡【高帝置】桂阳郡【高帝置】武陵郡【高帝置】零陵郡【武帝元鼎六年置】广陵国【高帝六年封荆王贾属吴景帝四年封子非为江都国武帝元狩二年国除为广陵郡六年封子胥为广陵国】长沙国【本秦长沙郡高帝五年立吴芮为长沙国】

右荊州刺史领郡国八

庐江郡【汉初属淮南国文帝十六年别为国景帝四年国除为郡】九江郡【秦置高帝四年为淮南国武帝元狩元年国除复为郡】会稽郡【秦置高帝六年封刘贾为荆国十二年封刘濞为吴国景帝三年国除为会稽郡】丹阳郡【秦为鄣郡汉初属荆国後属吴国景帝四年置江都国更属江都武帝元狩二年国除为广陵郡元封二年别为丹阳郡】豫章郡【

高帝置】六安国【高帝元年分楚置衡山国五年国废属淮南国文帝十六年复为衡山国武帝元狩六年别为六安国】

右扬州刺史领郡国六

汉中郡【秦置】广汉郡【高帝置】巴郡【秦置】蜀郡【秦置】犍为郡【武帝建元六年开西南夷置】越巂郡【武帝元鼎六年定西南夷置】牂柯郡【武帝元鼎六年通夜郎置】益州郡【武帝元封二年滇举国降置以为郡】

右益州刺史领郡八

安定郡【武帝元鼎三年置】北地郡【秦置】陇西郡【秦置汉元年属雍国二年并三秦复置陇西郡】武威郡【武帝纪云元狩二年匈奴昆邪王杀休屠王并将其众来降以其地为武威郡地理志云太初四年开与纪不同】金城郡【昭帝始元六年置】天水郡【武帝元鼎三年置】武都郡【武帝元鼎六年置】张掖郡【本匈奴昆邪王地地理志云武帝太初元年开本纪云元狩二年置与志不同】酒泉郡【武帝纪云元狩二年置地理志云太初元年开与纪不同】炖煌郡【志云武帝後元元年分酒泉置本纪云元鼎六年置】

右凉州刺史领郡十

太原郡【秦置汉二年魏豹反尽有太原上党之地九月虜豹定魏地置上党太原等郡五年立韩王信为韩国六年复为郡十一年取山南太原之地益属代遂废太原郡文帝即位复分代为太原国三年复为郡】党郡【秦置汉二年魏豹有其地九月虜魏豹复置郡】上郡【秦置高帝元年封董翳为翟国七月复故】西河郡【武帝元朔四年置】朔方郡【武帝元朔二年置】五原郡【秦九原郡武帝元朔二年更名】云中郡【秦置高帝六年并属代国十一年诏以代之云中以西为云中郡以为代之屏蔽】定襄郡【高帝置】鴈门郡【秦置高帝六年并属代国後复为郡】

右并州刺史领郡九

涿郡【高帝六年分燕置涿郡】勃海郡【高帝置】代郡【春秋为代国秦置代郡高祖元年徙赵歇为代王是时云中鴈门之地皆属代国二年代王歇还王赵而以陈余为代王三年十月斩陈余以其地封兄喜为代王七年匈奴攻伐喜弃国自归立子如意为代王以陈豨为相九年如意徙王赵代地皆入赵十年陈豨反代地十一年汉破击之周勃入定代地上乃取山南太原之地益属代立子常为代王赵晋阳或云中都文帝即位分代为二国立子武为代王参为大原王三年武徙王淮阳更立参为代王而大原遂为郡参传至孙义徙清河而国除代亦复为郡盖元鼎三年也】上谷郡【秦置】渔阳郡【秦置】右北平郡【秦置】辽西郡【秦置】辽东郡【秦置】广阳国【高帝元年为燕国武帝元朔元年国除为郡元狩元年复置燕国昭帝元凤元年复为广阳郡宣帝本始元年为广阳国】乐浪郡【武帝元封

二年灭朝鲜置】

右幽州刺史领郡国十

南海郡【秦置秦败尉佗王此地武帝元鼎六年灭南粤後置郡】鬱林郡【故秦桂林郡属尉佗武帝元鼎六年开更名】苍梧郡【武帝元鼎元年开】交趾郡【武帝元鼎六年开】合浦郡【武帝元鼎六年开】九真郡【武帝元鼎六年开】日南郡【故秦东郡武帝元鼎六年开更名】

右交州刺史领郡七

废郡

苍海郡【武帝元朔元年东夷岁君南闾等口二十八万人降置以为苍海郡三年罢】

沈黎郡【武帝元鼎六年定西南夷以茆都为沈黎郡後罢】

文山郡【同上宣帝地节三年省并蜀郡】

儋耳郡【武帝元鼎六年灭南粤置昭帝始元五年罢】

珠厓郡【武帝元鼎六年灭南粤置元帝初元三年罢】

真番郡【武帝元封三年定朝鲜置昭帝始元五年罢真番并入玄菟】

临屯郡【置同昭帝始元五年罢并乐浪】

象郡【昭帝元凤五年罢分属鬱林牂牁】

初武帝灭南越开置珠厓儋耳郡在海中洲上吏卒皆中国人多侵陵之其民亦暴恶自以阻絶数犯吏禁率数年壹反杀吏汉辄发兵击定之二十余年间凡六反至宣帝时又再反元帝即位之明年珠厓山南县反发兵击之诸县更叛连年不定上博谋於郡臣欲大发军待诏贾捐之曰臣闻尧舜禹之圣德地方不过数千里西被流沙东渐于海朔南暨声教迄于四海言欲与声教则治之不欲与者不强治也故君臣歌德含气之物各得其宜武丁成王殷周之大仁也然地东不过江黄西不过氐羌南不过蛮荆北不过朔方是以颂声并作视听之类咸乐其生越裳氏重九译而献此非兵革之所能致以至乎秦兴兵远攻贪外虚内而天下溃畔孝文皇帝偃武行文当此时而断狱数百赋役轻简孝武皇帝厉兵马以攘四夷天下断狱数万赋烦役重寇贼并起军旅数发父既战死於前子鬪死於後女子乘亭障孤儿号於道老母寡妻饮泣巷哭是皆辟地泰大征伐不休之故也今关东民衆久困流离道路人情莫亲父母莫

乐夫妇至嫁妻卖子法不能禁义不能止此社稷之忧也今陛下不忍惻惻之忿欲驱士衆挤之大海之中快心幽冥之地非所以救助饥馑保全元元也诗云蠢尔蛮荆大邦为讐言圣人起则後服中国衰则先畔自古而患之何况乃复其南方万里之蛮乎骆越之人父子同川而浴相习以鼻饮与禽兽无异本不足郡县置也颡颥独居一海之中雾露气湿多毒草虫蛇水土之害人未见虏战士自死又非独珠厓有珠犀瑇瑁也弃之不足惜不击不损威其民譬犹鱼鼈何足贪也臣窃以往者羌军言之暴师曾未一年兵出不踰千里费四十余万万大司农钱尽廼以少府禁钱续之夫一隅为不善费尚如此况於劳使远攻亡士毋功乎求之往古则不合施之当今又不便臣愚以为非冠带之国禹贡所及春秋所治皆可且无以为愿遂弃珠厓专用恤关东为忧上以问丞相御史御史大夫陈万年以为当击丞相于定国以为前日兴兵击之连年护军都尉校尉及丞凡十一人还者二人卒士及转输死者万人以上费用三万余尚未能尽降今关东困乏民难摇动捐之议是上从之初元三年春诏曰珠厓虏杀吏民皆畔为逆今廷议者或言可击或言可守或欲弃之其指各殊朕日夜惟思议者之言羞威不行则欲诛之狐疑辟难则守屯田通於时变则忧万民夫万民之饥饿与远蛮之不讨危孰大焉且宗庙之祭凶年不备况乎辟不嫌之辱哉今关东大困仓库空虚无以相贍又以动兵非特劳民凶年随之其罢珠厓郡民有慕义欲内属便处之不欲勿疆珠厓由是罢【贾捐之传】

平帝元始四年置西海郡徙天下犯禁者处之分京师置前辉光後丞烈二郡更十二州名分界郡国所属【本纪】

西汉会要卷六十四

卷六十五

钦定四库全书

西汉会要卷六十五

宋 徐天麟 撰

方域二

论形势

沛公初入关或说曰秦富十倍天下地形疆今闻章邯降项羽号曰雍王王关中即来恐沛公不得有此可急使守函谷关毋内诸侯军【高纪】

高帝六年田肯贺上曰甚善陛下得韩信又治秦中秦形胜之国也带河阻山遥隔千里持戟百万秦得百二焉地埶便利其以下兵於诸侯譬犹居高屋之上建瓴水也夫齐东有琅邪即墨之饶南有泰山之固西有浊河之限北有勃海之利地方二千里持戟百万遥隔千里之外齐得十二焉此东西秦也【高纪】

韩生说项羽曰关中阻山带河四塞之地肥饶可都以伯【项羽传】

井陘之道车不得方轨骑不得成列【韩信传】

主父偃言齐临菑十万户市租千金人衆殷富钜於长安【高五王传】

陈留天下之冲四通五达之郊也【酈食其传】

梁为大国天下膏腴地北界泰山西至高阳曰十余城多大县【文三王传】

济北之地东接强齐南牵吴越北胁燕赵此四分五裂之国【邹阳传】

淮阳天下郊劲兵处【灌夫传】

齐东都钜海南有琅邪观乎成山射乎之罟浮勃澥游孟诸邪与萧真为邻右以汤谷为界秋田乎青丘彷徨乎海内吞若云梦者八凡其於胷中曾不蒂芥【司马相如传】越非有城郭邑里也处谿谷之间篁竹之中习於水鬪便於用舟地深昧而多水险中国之人不知其埶阻而入其地虽百不当【严助传】

会稽东接於海南近诸越北枕大江【上】

南山天下之阻也南有江淮北有河渭其地从汧陇以东商雒以西厥壤肥饶汉兴去三河之止霸产以西都泾渭之南此所谓天下陆海之地秦之所以虏西戎兼山东者也【东方朔传】

宫【正史无者不载後仿此】

长乐宫【高祖五年治长乐宫三辅黄图长乐宫本秦之兴乐宫也三辅旧事宫殿疏皆曰兴乐宫秦始皇造汉修饰周回二十里前殿东西二十九丈两栋中二十五丈深十二丈时帝迁都长安未有宫室先修秦旧宫以居之也】

未央宫【高祖七年萧何治未央宫立东阙北阙前殿武库大仓云云】

雒阳南宫【高祖置酒雒阳南宫】沛宫【高祖十二年过沛置酒沛宫】

北宫【在未央宫之北见霍光及张后传】建章宫【太初元年二月起】

甘泉宫【吾丘寿王传荐宝鼎於甘泉宫】林光宫【孟康曰甘泉一名林光秦离宫名见郊祀志】离宫【叔孙通传惠帝常出游离宫】明光宫【太初四年秋起明光宫在城西】长杨宫【成帝元延二年幸长杨宫师古曰在盩厔】五柞宫【武帝行幸盩厔五柞宫燕王传作五柞】萇阳宫【宣帝甘露二年行幸萇阳宫本纪注云左献秦文王所起萇音倍按东方朔传作倍阳宫】池阳宫【甘露三年上自甘泉宿池阳宫】章台宫【江都易王传】

宣曲宫【司马相如子虚赋注云宣曲宫名在昆明】棠梨宫【池西】

宜春宫【同上相如奏宜春】鼎胡宫【宫赋扬雄传黄图以】

兰池宫【为在蓝田杨仆传注】储元宫【云在渭城冯昭传仪黄】

云阳宫【图云】昭台宫【在上林】

长寿宫【苑同上】长门宫【霍后传元后传东方】

钩弋宫【朔传又傅】长信宫【皇后传赵婕妤传东】

永信宫【方朔传会朝长信宫哀帝祖母】中安宫【定陶恭皇太后称永】

东宫【信宫哀帝母恭皇后称中安宫刘向传依】中宫【东宫之尊师古曰东宫太后所居】

】

长定宫【也哀纪食邑中宫师】 桂宫【古曰中宫皇后之宫】

三雍宫【淳于长传又许后传成】 棫阳宫【帝纪太子祁居桂宫】

竹宫【河间献王献雅乐对】 步寿宫【三雍宫郊祀志幸雍】

平阳宫【棫阳宫礼乐志自竹宫而望拜宣】 德阳宫【帝起步寿宫见郊祀】

交门宫【志成帝时雍大雨坏】 万载宫【平阳宫垣】

黄山宫【见郊祀志景帝庙号德阳】 首山宫【讳不言庙太始四年】

思子宫【上幸交门】 犬台宫【宫燕刺王传东方】

回中宫【朔传西至黄山注云宫名元封】 蒲陶宫【六年作首山宫戾太子传江充召见】
龙渊宫【武帝元光三年河水决濮阳汜郡十六发卒十万救决河起龙渊宫服?曰宫在长安
西作铜飞龙故以冠名孟康曰在西平渭水可用淬刀剑师古曰孟说是】

宣防宫【沟洫志塞瓠子筑宫其上曰宣防】 寿宫【郊祀志武帝置寿宫比宫以礼神君】
万岁宫【宣纪神爵元年幸万岁宫】

殿

承明殿【在未央宫中成帝鸿嘉二年有雉飞集於承明殿】

长乐临华殿【永始四年灾】 紫殿【成帝永始四年幸甘泉郊泰畤降集紫殿】

甘泉前殿【郊祀志】

凤凰殿【宣帝作凤凰殿以表嘉瑞见郊祀志】 武台殿【李陵召见未央宫武台殿】
白虎殿【杜钦对策白虎殿】

显阳殿【广陵王传】 椒房殿【上官桀传在未央宫皇后所居】 温室殿【京房传公卿朝
臣会议温室注殿名】 高门殿【上】

麒麟殿【上】 玉堂殿【上】

金华殿【同上又见翼奉传】 曲台殿【翼奉传】

温明殿【上】 馱娑殿【扬雄传殿名也】

丙殿【元后传】 飞羽殿【元后传】

便殿【武帝高便殿灾】 宴【阙】殿

鸿宁殿【傅太后所居也见五行志】

殿前【霍光传师古曰古者宫室高大通呼为殿非止天子宫中】

室

宣室【贾谊传受厘坐宣室王嘉何武召见宣室东方朔曰宣室者先帝之正处也非法度之政不得入】

温室【京房传】 凌室【惠帝四年未央宫凌室灾凌室藏冰之所】 织室【惠帝四年织室灾注织室织造缯帛处】 作室【成纪太子入作室门】

非常室【五行志成帝时男子王褒衣绛衣入非常室中】 长乐鍾室【韩信传】

暴室 画室【霍光传止画室不入】

请室【爰盎传】 饰室【元后传】

玉堂【扬雄传上玉堂又郊祀志建章宫南有玉堂】 瑶堂【礼乐志眺瑶堂】

承明之庑【严助传注在右渠阁】 殿庑【金日碑传少疾卧庑师古曰殿中所止曰庑】

馆

长安飞廉馆【孝武纪元封二年】 上林礲氏馆【郊祀志】

长杨射熊馆【元帝永光五年幸长杨射熊馆布车骑大猎又见扬雄传师古曰在盩厔县其中有

长杨射熊馆】 长安飞廉桂馆【郊祀志】

甘泉益寿延寿馆【上】 上林平乐观【武帝纪】

云林馆【霍后传】 阳禄杯馆【班婕妤赋二馆名也】

尔馆【元后传】 东馆【同上】

上林涿沐馆【同上】 长平馆【元后传师古曰在长平坂】

甲馆画堂【元后传】 白鹤馆【孝武园白鹤馆见翼奉传】

鸿胪客馆【张汤传】

阙

东阙北阙【萧何治未央宫立东阙北阙】 凤阙【高二十余丈见郊祀志】

建章阙【戾太子传】 长乐宫东阙【宣纪五凤三年鸾凤集於长乐宫东阙】

台观

丛台【高后元年赵王宫丛台灾本纪云本六国时赵王故台连聚非一故名丛台】

露台【文帝却作露台本赞】

柏梁台【元鼎二年春起柏梁台以香柏为之见本纪下同】 甘泉通天台【元封二年作】

属玉观【宣纪甘露三年注云属玉水鸟似鵙】 渐台【同上又扬雄传注云渐台在泰液池中】 神明台【同上】

昆明东观【大皇太后避时昆明东观】 武台【李陵召见武台】

石阙 封峦 鵙鹄 露寒【司马相如子虚赋四观在甘泉中】

龙台【司马相如子虚赋注云龙台观名】 细柳【同上观】

颢天台【上】 归来望思台【上】

曲台【翼奉传】 平乐观【西域传】

河南成臯灵台【高祖薄姬传】 上兰观【元后传师古曰在上林中又见扬雄传晋灼注同】 甲观画堂【成帝纪生於甲观画堂】 阳云台【子虚赋】

兰台【掌图籍之所】 郎台【东方朔传陛下累郎台恐其不高也师古曰郎堂下周屋】

楼阁

宣室阁【甘露三年未央宫宣室阁火宣纪】 石渠阁【在未央宫北以藏秘书见施雠传】

天禄阁【扬雄传】 麒麟阁【苏武传图功臣於麒麟阁】 井干楼【郊祀志立井干楼高五十丈师古曰井干楼积木而高为楼若井干之形也井干者井上木栏也其形或四角或八角张衡西京赋云干接叠而百层即谓此楼也】

龙楼门【元帝尝急召太子出龙楼门不敢絶驰道注云门楼上有铜龙若白鹤蜚廉之为名也】

苑囿

上林苑【武帝作上林苑见东方朔传】 中牟苑【宣帝元凤三年罢中牟苑赋贫民本纪注云在荥阳】 乐游苑【宣帝神爵二年起乐游苑本纪云在枉陵西北曲池之北】

水衡禁囿【元帝初元二年与贫民】 博望苑【武帝为太子作博望苑令受宾客成帝建始二年罢】 黄山苑【霍云张围猎黄山苑中霍光传】

梁东苑【梁孝王筑东苑三百里本传】 宜春下苑【元纪】

边羣六牧师苑【百官表师古曰汉官仪牧师诸苑三十六所分布西边北边养马三十万头】 汉二年故秦苑囿园池令民得田之

平帝元始二年罢安定呼池苑为安民县【师古曰中山之安定也】

池籞

武帝元狩三年将讨昆明昆明有滇池方三百里乃作昆明池以习水战【臣瓚曰西南夷传有越嶲昆明国有滇池方三百里汉使求身毒国而为昆明所闭今欲伐之故作昆明池象之以习水战在长安西南周回四十里食货志又曰时越欲与汉用船战乃大修昆明池也】

少府饮飞外池【元纪假与贫民】 严籞池田【同上】

太液池【郊祀志扬雄传作泰液】 上林十池【百官表少府属官有上林十池监】 牛首池【司马相如传濯罽牛首张揖曰牛首池名也在上林苑西】 安池【霍光传安池监赏】

道路

复道【上居南宫从复道上见诸将耦语高纪如淳曰复音复上下有道故谓之复】

辇道【霍光传召内乐人辇道牟首如淳曰辇道阁道也】

驰道【成纪曰天子不敢絶驰道应劭曰驰道天子所行也】

诸门【城门附】

未央宫司马门【成纪永和四年灾】东司马门【东方朔传】

北司马门【五行志】殿东门【上】

未央宫掖门【高后纪注云门在两旁若人之臂掖】北掖门【杨敞传】

壁门【建章宫南有壁门见郊祀志】高门【未央宫中有高门汲黯传】

端门【燕刺王传又周勃传师古曰殿正门也】

龙楼门【成纪注云门楼上有铜龙若白鹤蜚廉之为名也】

黄门【元纪】作室门【成纪】

尚方掖门【成纪注云掖门者正门之旁小门也】金马门【公孙弘王褒待诏金马门】长秋门【未央宫殿长秋门见戾太子传】东交门【东方朔传】

尧母门【鉤弋赵婕妤传】

小苑东门【萧望之补小苑东门侯】上林延寿门【孝平王后传】上东门【贾谊传雒阳上东门师古曰东面最北门】十二城门【百官表有十二城门侯臣天麟按三辅黄图云都城十二门东出第一门曰霸城门第二曰清明门北头第一门曰宣平门南出东头第一门曰安门第二曰西安门又曰便门西出南头第一门曰章城门第二曰直城门西出北头第一门曰雍门东头第一门曰高门西头第一门曰横门】

春王城门【长安城东出北头第一门也旧名宣平门翟方进传】

横城门【北面西头第一门见成纪建始三年】

覆盆城门【刘屈氂传一名杜门】便门【长安城南头第一门薛广德传】雍门【赵婕妤传注云在长安西北孝里西南】章城门【五行志成帝元延元年章城门门牡日亡】直城门【成纪注云西出南头第二门】谯门【陈胜传师古曰谓门上为高楼以望者耳楼一名谯故谓美丽之谯为丽谯】

铺首【哀纪孝元庙殿门铜龟蛇铺首鸣如淳曰门铺首作龟蛇之形师古曰门之铺首所以衔环者也】

官寺

官寺【元纪败坏官寺师古曰凡府庭所在皆呼为寺又何并传注云诸官曹之所通呼为寺
风俗通曰寺嗣也理事之吏嗣续於其中】

西汉会要卷六十五

卷六十六

钦定四库全书

西汉会要卷六十六

宋 徐天麟 撰

方域三

宫苑杂录

高帝七年萧何治未央宫立东阙北阙前殿武库大仓上见其壮丽甚怒谓曰天下匈匈劳苦数岁成败未可知是何治宫室过度也何曰天下方未定故可因以就宫室且夫天子以四海为家非令壮丽亡以重威且母令後世有以加也上说

武帝建元三年微行始出北至池阳西至黄山【宫名在槐里】南猎长杨东游宜春丞相御史知指乃使右辅都尉徼循长杨以东後廼私置更衣从宣曲以南十二所中休更衣投宿诸宫长杨五柞倍阳宣曲尤幸於是上以为道远劳苦又为百姓所患廼使大中大夫吾丘寿王与待诏能用算者二人举籍阿城以南鰲屋以东宜春以西提封顷亩及其贾直欲除以为上林苑属之南山又诏中尉左右内史表属县草田欲以偿鄠杜之民吾丘寿王奏事上大说称善时东方朔在傍进谏曰臣闻谦逊静慤天表之应应之以福骄溢靡丽天表之应应之以异今陛下累郎台恐其丽不高也弋猎之处恐其不广也如天不为变则三辅之地尽可以为苑何必鰲屋鄠杜乎奢侈越制天为之变上林虽小臣尚以为大也夫南山天下之阻也南有江淮北有河渭其地从陇以东商雒以西厥壤肥饶汉兴去三河之地至霸产以西都泾渭之南此所谓天下陆海之地秦之所以虏西戎兼山东者也其山出玉石金银铜铁豫章檀栢异类之物不可胜原此百工所取给万民所仰足也又有秔稻粱粟桑麻竹箭之饶土宜姜芋水多鱼贫者得以人给家足无饥寒之忧故鄠镐之间号为土膏其贾亩一金今规以为苑絶陂池水泽之利而取民膏腴之地上乏国家之用下夺农桑之业弃成功就败事损耗五谷是其不可一也且盛荆棘之林而长养麋鹿广狐兔之苑大虎狼之虚又坏人塚墓发人室庐令幼小怀土而思耆老泣涕而悲是其不可二也经而营之垣而圃之骑驰东西车骛南北又有深沟大渠夫一日之乐不足以危无堤之舆是其不可三也故务苑囿之大不恤农时非所以强国富人也夫殷作九市之宫而诸侯畔灵王起章华之台而楚民散秦兴阿房之殿而天下乱粪土愚臣忘生触死逆盛意犯隆指罪当万死不胜大愿愿陈泰阶六符以观天变不可不省是日因奏泰阶之事上廼拜朔为大中大夫给事中赐黄金百斤然遂起上林苑如寿王所奏云【东方朔传】

元鼎二年春起柏梁台作承露盘高二十丈大七围以铜为之上有仙人掌以承露和玉屑饮之可以长生宫室之修自此日盛【郊祀志】

元封二年公孙卿曰僊人可见上往常遽以故不见今陛下可为馆如缑氏城置脯枣神人宜可致且僊人好楼居於是上令长安则作飞廉馆甘泉则作益寿延寿馆使卿持节设具而候神人迺作通天台置祠具其下将招来神僊之属於是甘泉更置前殿始广诸宫室【郊祀志下】

太初元年柏梁台灾越人勇之言於武帝曰粤俗有火灾复起屋必以大用胜服之於是作建章宫度为千门万户前殿度高未央其东则凤阙高二十余丈其西则商中楼十里虎圈其北治大池渐台高二十余丈名曰太液池中有蓬莱方丈瀛洲壶梁象海中神仙龟鱼之属其南有玉堂璧门大鸟之属立神明井干楼高五十丈辇道相属焉【郊祀志】

元帝延翼奉问以得失奉以为宫室苑囿奢泰难供以故民困国虚不改其本难以未正乃上疏曰孝文皇帝躬行节俭外省繇役其时未有甘泉建章及上林中诸离宫馆也未央宫又无高门武台麒麟凤凰白虎玉堂金华之殿独有前殿曲台渐台宣室温室承明耳孝文欲作一台度用百金重民之财废而不为其积土基至今犹存又下遗诏不起山坟故其时天下太和百姓洽足德流後嗣愿陛下迁都正本衆制皆定亡复缮治宫馆不急之费岁可余一年之蓄【翼奉传】

初元元年令诸宫馆希御幸者勿缮治【纪】

五年罢上林宫馆希御幸者

成帝建始元年罢上林宫馆希幸御者二十五所元延二年十二月羽猎扬雄从以为昔在二帝三王宫馆台榭沼池苑囿林?藪泽财足以奉郊庙御宾客充庖厨而已不夺百姓膏腴谷土桑柘之地女有余布男有余粟国家殷富上下交足故甘露零其庭醴泉流其唐凤凰巢其木黄龙游其沼麒麟臻其囿神雀栖其林昔者禹任益虞而上下和草木茂成汤好田而天下用足文王囿百里民以为尚小齐宣王囿四十里民以为大裕民之与夺民也武帝广开上林南至宜春鼎湖御宿昆吾旁南山而西至长杨五柞北绕黄山濒渭而东周袤数百里穿昆明池象滇河营建章凤阙神明馭娑渐台泰液象海水周流方丈瀛洲蓬莱游观侈靡穷妙极丽虽颇割其三垂以贍齐民然至羽猎田车戎马器械储侍营御所崇尚泰奢丽夸诩非尧舜成汤文王三驱之意也又恐後世复修前好不折中以泉台故聊因校猎赋以风【扬雄传上】

省中【昭纪长公主共养省中伏俨曰蔡邕云本为禁中门合有禁非侍御之臣不得妄入行道豹尾中亦为禁中孝元皇后父名禁避之故曰省中师古曰省察也言入此中皆当察视不可妄也】

掖庭【武帝改永巷为掖庭】

文石之陛赤墀之涂【梅福传愿一登文石之陛涉赤墀之涂应劭曰以丹淹涂泥殿上】法坐【梅福传师古曰法座正坐也犹言法宫法驾也】

内中【武纪甘泉宫内中师古曰谓後庭之室也】

行内【孔光传供养行内师古曰行内行在所之内犹言禁中也】

行在所【武纪天子或在京师或出巡狩故言行在所耳】

公车【东方朔传公车上书者所诣】

赤墀青琐【元后传孟康曰青琐以青画户边镂中天子制也】

青蒲【以青规地曰青蒲非皇后不得至此见史册传】

罽毼【文纪未央宫东阙罽毼灾师古曰罽毼连阙曲阁也以覆重刻垣墉之处其形罽毼然一曰屏也罽音浮】

珍台闲馆旋题玉英【甘泉赋应劭曰题头也榱桷之头皆以玉节】

阑入【成纪阑入尚方掖门应劭曰无符籍妄入宫曰阑】

街市

长安四市【百官表冯翊属官有长安四市长丞】

长安西市【惠帝六年起长安西市见本纪黄图云长安九市六市在道西三市在道东】东市【晁错传朝服斩东市】

柳市【葛洪居城西柳市本传】

章台街【张敞为京兆尹走马章台街三辅旧事云长安城中八街九陌张衡西京赋云参涂夷庭野涂相经?里端直薨宇齐平】

橐街【陈汤传蛮夷邸在橐街】

华阳街【刘屈氂妻臬首华阳街】

乡里

大率十里一亭一乡县大县方百里其民稠则减稀则旷乡亭亦如之凡县道邑千五百八十七乡六千六百二十二【百官表】

中阳里【高祖居丰中阳里汉旧仪云中阳里名】尚冠里【宣帝在民间时居尚冠里本纪】长安戚里【万石君石奋家长安戚里】陵里【万石君传】

关

关中【关中谓咸阳秦所都也东函谷关南嶢关武关西散关北萧关故咸阳曰关中】

沛公初入关武说曰秦富十倍天下地形强可急使守函谷关【纪文颖曰是时关在弘农县】

武帝元鼎三年徙函谷关於新安以故关为弘农县【本纪应劭曰时楼船将军杨仆数有大功耻为关外民上书乞徙东关以家财给其用度武帝意亦好广阔於是徙关於新安志弘农三百里】

武关【高纪应劭曰秦南关也通南阳文颖曰武关在析西百七十里】

嶢关【应劭曰嶢山之关李奇曰在上洛北蓝田南武关之西】

散关

萧关【李广传匈奴大入萧关如淳曰孔安定朝那县】

玉关【西域传云在炖煌西界】

阳关【同上】

天井关【成纪应劭曰天井关在上党高都】

五阮关【应劭曰在代郡】

壶口关【成纪应劭曰壶口在关】

壶关【壶关见三老上】

文帝十一年除关无用传【纪】

景帝四年复置诸关用传出入【纪】

武帝大初四年徙弘农都尉治武关税出入者以给关吏卒食【纪】

霍光曰函谷京师之固故以丞相弟为关都尉【魏相传】

城塞

汉二年缮治河上塞【高纪又邓通传注云东北谓之塞西南谓之徼也】

六年令天下县邑城【纪】

惠帝元年正月城长安【纪】

三年发长安六百里内男女十四万六千人城长安三十日罢【纪】

五月复发长安六百里内男女十四万五千人城长安三十日罢

九月长安城成赐民户爵一级

文帝时晁错请募民徙塞曰以为便之高城深堑具蔺石布渠答复为一城其内城间百五十步要害之处通川之道调立城邑无下千家为中周虎落【本传师古曰虎落者以竹箴相连遮蔽之也】

武帝元朔三年城朔方城

大初元年筑塞外受降城【纪】

三年遣光禄徐勲自为筑五原塞外列城西北至卢朐疆弩都尉路博德筑居延

昭帝元凤六年募郡国徙筑辽东玄菟城【纪】

传置

乘传【高纪五年田横乘传诣洛阳如淳曰律四马高足为置传四马中足为驰传四马下足为乘传一马二马为軺传急者乘传师一乘师古曰传者若今之驿古者以车谓之传车以後又单置马谓之驿骑传音张恋反】

传置【文纪二年太仆见马遗财足余皆以给传置史记正义曰乐产云传置一也谓乘传者以传受君命乘置者以置马取用也续汉书云驿马三十里一置广雅云置驿也】

传马【昭纪元凤二年省乘舆马及苑马以补边郡三辅传马】

传车【郊祀志与方士传车】

一封轺传【平纪如淳曰律诸当乘传及发驾置传者皆持尺五寸木传信封以御史大夫印章其乘传参封之参三也有期会累封两端端各两封凡四封也乘置驰传五封之两端各二中央一也轺传两马再封之一马一封也师古曰以一马驾轺车而乘传】

一乘传【郊祀志陈宝祀每见雍太祀以大牢遣候者乘一乘传驰诣行在所】

四乘传【司马相如谕蜀使者驰四乘之传见本传】

四马传【韩延寿传】

六乘传【文纪张武等六人乘六乘传诣长安师古曰传车六乘出】

七乘传【昌邑王传贺乘七乘传诣长安邸】

驰传【陈平传平乘驰传载周勃代樊哙将】

轺传【申公传弟子一人乘轺传从】

疾置【刘屈氂传】

骑置【李陵传因骑置以闻】

驿骑【赵充国传】

廐置【田詹传尸乡廐置】

置亭【冯奉世传】

传舍【酈食其传师古曰传舍者人所止息前人已去後人复来转也传一音张恋反谓传置之舍也其义两通】

县次传【汲黯传匈奴叛其主降徐以县次传之】

假轺传【梅福求假轺传诣行在所】

亭障

高祖为泗上亭长【师古曰秦制十里一亭亭长者主亭之吏也亭谓亭留宿食之所高纪】大率十里一亭亭有长十亭一乡县大率方百里其民稠则减稀则旷乡亭亦如之皆秦制也凡县道国邑千五百八十七乡六千六百二十二亭二万九千六百三十五【百官表】

武帝元光六年南夷始置邮亭【史记大事记按是时唐蒙通西夷南治夜郎道始成故置邮亭比内郡焉】

元鼎中天子行猎新秦中或千里无亭徼於是诛北地太守以下【食货志】

武帝征四夷开西域自炖煌西至盐津往往起亭【西域传】武帝通大宛诸国使者相望於道於是汉列亭障至玉门矣【西域传元封六年事】

武帝军旅数起女子乘亭障【贾捐之传】

大初三年匈奴入定襄云中坏光禄诸亭障【纪】

狄山乘一障【张汤传居一障间师古曰鄣为要险之处别筑为城因置吏士而为障蔽以扞寇也】宣帝神爵元年赵充国奏计度临羌东至浩亶羌虏故田及公田可二千顷以上其间邮亭多败坏者以前部士入山伐木六万余枝在水次臣愿罢兵屯田以闲暇时下所伐材缮治邮亭充入金城【传】

邮亭乡官【黄霸传师古曰邮行书舍谓传送文书所止处亦如今之驿馆矣乡官者乡所治处也】都亭【司马相如传往舍都亭师古曰临邛所治都之亭】

元帝时羌虏燔烧置亭

平帝置宗师得因邮亭书言宗伯请以闻【纪】

斥候

西边北边之郡斥候望烽燧不得卧【贾谊传】

赵充国常以远斥候为务传

东南一尉西北一候【扬雄解嘲】

邸

大鸿胪属官有郡邸长丞【师古曰主诸郡之邸在京师者也按郡国皆有邸所以通奏报待

朝宿也】初置郡国邸属少府中属中尉後属大鸿胪【表】武帝封禅诏诸侯治邸泰山下
【郊祀志】

蛮夷邸【元纪师古曰若今鸿胪客馆黄图云蛮夷邸在城外橐街】

西汉会要卷六十六

卷六十七

钦定四库全书

西汉会要卷六十七

宋 徐天麟 撰

方域四

黄河

汉兴三十有九年孝文时河决酸枣东溃金堤於是东郡大兴卒塞之其後三十六岁孝武元光中河决於瓠子东南注钜野通於淮泗上使汲黯郑当时兴人徒塞之辄复坏是时武安侯田蚡为丞相其奉邑食郿郿居河北河决而南则郿无水灾邑收入多蚡言於上曰江河之决皆天事未易以人力强塞强塞之未必应天而望气用数者亦以为然是以久不复塞也自河决瓠子後二十余岁岁因以数不登而梁楚之地尤甚上既封禪巡祭山川其明年乾封少雨上乃使汲仁郭昌发卒数万人塞瓠子决河於是上以用事万里沙则还自临决河湛白马玉璧令羣臣从官自将军以下皆负薪寘决河是时东郡烧草以故薪柴少而下淇园之竹以为楗上既临河决悼功之不成乃作歌曰瓠子决兮将奈何浩浩洋洋虑殫为河殫为河兮地不得宁功无已时兮吾山平於是卒塞瓠子筑宫其上名曰宣防而道河北行二渠复禹旧迹而梁楚之地复宁无水灾是时方事匈奴兴功利言便宜者甚衆齐人延年上书言河出昆仑经中国注勃海是其地勢西北高而东南下也可案图书观地形令水工準高下开大河上领出之胡中东注之海如此关东长无水灾北边不忧匈奴可以省堤防备塞士卒转输胡寇侵盗覆军杀将暴骨原野之患天下常备匈奴而不忧百越者以其水絶壤断也此功一成万世大利书奏上壮之报曰延年计议甚深然河乃大禹之所道也圣人作事为万世功通於神明恐难改更自塞宣房後河复北决於馆陶分为屯氏河东北经魏郡清河信都勃海入海广深与大河等故因其自然不堤塞也此开通後馆陶东北四五郡虽时小被水害而兖州以南六郡无水忧宣帝地节中光禄大夫郭昌使行河北曲三所水流之勢皆邪直贝丘县恐水盛堤防不能禁乃各更穿渠直东经东郡界中不令北曲渠通利百姓安之元帝永光五年河决清河灵鸣犊口而屯氏河絶成帝初清河都尉冯遂奏言郡承河下流与兖州东郡分水为界城郭所居尤卑下土壤轻脆易伤顷所以濶无大害者以屯氏河通两川分流也今屯氏河塞灵鸣犊口又益不利独一川兼受数河之任虽高增堤防终不能泄如有霖雨旬日不霁必盈溢灵鸣犊口在清河东界所在处下虽令通利犹不能为魏郡清河减损水害禹非不爱民力以地形有勢故穿九河今既灭难明屯氏河不流行七十余年新絶未久其处易浚又其口所居高於以分流杀水力道里便宜可复浚以助大河泄洪水备非常又地节时郭昌穿直渠後三岁河水更从故第二曲间北可六里复南合今其曲勢复邪直贝丘百姓寒心宜复穿渠东行不豫修治北决病四五郡南决病十余郡然後忧之晚矣事下丞相御史白博士许商治尚书善为算能度功用遣行视以为屯氏河盈溢所为方用度不足可且勿浚三岁河果决於馆陶及

东郡金堤泛滥兗豫入平原千乘济南凡灌四郡三十二县水居地十五万余顷深者三丈壤败官亭室庐且四万所御史大夫尹忠对方略疏濶上切责之忠自杀遣大司农非调【大司农名非调也】调均钱谷河决所灌之郡谒者二人发河南以东漕船五百徙民避水居丘陵九万七千余口河堤使者王延世使塞以竹落长四丈大九围盛以小石两船夹载而下之三十六日河堤成上曰东郡河决流漂二州校尉延世堤防三旬立塞其以五年为河平元年卒治河者为着外繇六月惟延世长於计策功费约省用力日寡朕甚嘉之其以延世为光禄大夫秩中二千石赐爵关内侯黄金百斤後二岁河复决平原流入济南千乘所壤败者半建始时复遣王延世治之杜钦说大将军王凤以为前河决丞相史杨焉言延世受焉术以塞之蔽不肯见今独任延世延世见前塞之易恐其虑害不深又审如焉言延世之巧反不如焉且水執各异不博议利害而任一人如使不及今冬成来春桃花水盛必羨溢有填淤反壤之害如此数郡种不得下民人流散盗贼将生虽重诛延世无益於事宜遣焉及将作大匠许商諫大夫乘马延年杂作延世与焉必相破坏深论便以相难极商延年皆明计算能商功利足以分别是非择其善者而从之必有成功凤如钦言白遣焉等作治六月乃成复赐延世黄金百斤治河卒非受平贾者为着外繇六月後九岁鸿嘉四年杨焉言从河上下患底柱隘可镌广之上从其言使焉镌之镌之裁没水中不能去而令水益湍怒为害甚於故是岁渤海清河信都河水溢灌县邑三十一败官亭民舍四万余所河堤都尉许商与丞相史孙禁共行视图方略禁以为今河溢之害数倍於前决平原时今可决平原金堤间开通大河令入故笃马河至海五百余里水道浚利又乾三郡水地得美田且二十余万顷足以偿所开伤民田庐处又省吏卒治堤救水岁三万人以上许商以为古说九河之名有徒骇胡苏鬲津今见在成平东光鬲界中自鬲以北至徒骇间相去三百余里今河虽数移徙不离此域孙禁所欲开者在九河南笃马河失水之迹处執平夷旱则淤絕水则为败不可许公卿皆从商言先是谷永以为河中国之经读圣王兴则出图书王道废则竭絕今溃溢横流漂没陵阜异之大者也修政以应之灾变自除是时李寻解光亦言陰气盛则水为之长故一日之间昼減夜增江河满溢所谓水不润下虽常於卑下之地犹日月变见於朔望明天道有因而作也衆庶见王延世蒙重赏竟言便巧不可用议者常欲求索九河故迹而穿之今因其自决可且勿塞以观水執河欲居之当稍自成川跳出沙土然後顺天心而图之必有成功而用财力寡於是遂止不塞满昌师丹等数言百姓可哀上数遣使者处业振贍之哀帝初平当使领河堤奏言九河今皆寔灭按经义治水有决河深川而无堤防雍塞之文河从魏郡以东北多溢决水迹难以分明四海之衆不可诬宜博求能浚川疏河者下丞相孔光大司空何武奏请部刺史三辅三河弘农太守举吏民能者莫有应书待诏贾让奏言治河有上中下策古者立国居民疆理土地必遗川泽之分度水執所不及大川无防小水得入陂障卑下为汗泽使秋水多得以有所休息左右游波寬缓而不迫夫土之有川犹人之有口也治土而防其川犹止儿啼而塞其口岂不遽止然其死可立而待也故曰善为川者决之使道善为民者宣之使言盖堤防之作近起战国雍防百川各以自利齐与赵魏以河为竟赵魏濒山齐地卑下作堤去河二十五里河水东抵齐堤则西泛赵魏赵魏亦为堤去河二十五里虽非其正水尚有所游荡时至而去则填淤肥美民耕田之或久无害稍筑室宅遂成聚落大水时至漂没则更起堤防以自救稍去其城郭排水泽而居之湛溺自其宜也今堤防陋者去水数百步远者数里近黎阳南故大金堤从河西西北行至西山南头乃折东与东山相属民居金堤东为庐舍住十余岁更起堤从东山南头直南与故大堤会又内黄界中有泽方数十里环之有堤住十余岁太守以赋民民今起庐舍其

中此臣亲所见者也东郡白马故大堤亦复数重民皆居其间从黎阳北尽魏界故大堤去河远者数十里内亦数重此皆前世所排也河从河内北至黎阳观石堤激使东抵东郡平刚又为石堤使西北抵黎阳观下又为石堤使东北抵东郡津北又为石堤使西北抵魏郡昭阳又为石堤激使东北百余里间河再西三东迫阨如此不得安息今行上策徙冀州之民当水冲者决黎阳遮害亭放河使北入海河西薄大山东薄金堤埶不能远泛滥晷月自定难者将曰若如此败坏城郭田庐冢墓以万数百姓怨恨昔大禹治水山陵当路者毁之故凿龙门辟伊阙折底柱破碣石堕断天地之性此乃人功所造何足言也今濒河十郡治堤岁费且万万及其大决所残无数如出数年治河之费以业所徙之民遵古圣之法定山川之位使神人各处其所而不相奸且以大汉方制万里岂其与水争咫尺之地哉此功一立河定民安千载无患故谓之上策若乃多穿漕渠於冀州地使民得以溉田分杀水怒虽非圣人法然亦救败术也难者将曰河水高於平田岁增堤防犹尚决溢不可以开渠臣窃按视遮害亭西十八里至淇水口乃有金堤高一丈自是东地稍下堤稍高至遮害亭高四五丈往五六岁河水大盛增丈七尺坏黎阳南郭门入至堤下水未踰堤二尺所从堤上北望河高出民屋百姓皆走山水留十三日堤溃二所吏民塞之臣循堤上行视水埶南七十余里至淇口水适至堤半计出地上五尺所今可从淇口以东为石堤多张水门初元中遮害亭下河去堤足数十步至今四十余岁适至堤足由是言之其地坚矣恐议者疑河大川难禁制荥阳漕渠足以卜之其水门但用木与土耳今据坚地作石堤埶必全安冀州渠首尽当叩此水门治渠非穿地也但为东方一堤北行三百余里入漳水中其西因山足高地诸渠皆往往股引取之旱则开东方下水门溉冀州水则开西方高门分河流通渠有三利不通有三害民常罢於救水半失作业水行地上湊润上彻民则病湿气木皆立枯卤不生谷决溢有败为鱼鼈食此三害也若有渠溉则盐卤下隤填淤加肥故种禾麦更为秔稻高田五倍下田十倍转漕舟船之便此三利也今濒河堤吏卒郡数千人伐买薪石之费岁数千万足以通渠成水门又民利其溉灌相率治渠虽劳不罢民田适治河堤亦成此诚富国安民兴利除害支数百岁故谓之中策若乃缮全故堤增卑倍薄劳费无已数逢其害此最下策也王莽时召能治河者以百数但崇空语无施行者【沟洫志】

西汉会要卷六十七

<史部,政书类,通制之属,西汉会要>

卷六十八

钦定四库全书

西汉会要卷六十八

宋 徐天麟 撰

蕃夷上

匈奴

匈奴其先夏后氏之苗裔曰淳维自淳维以至头曼千有余岁时大时小别散分离尚矣单于头曼有太子曰冒顿冒顿杀父自立是时汉初定徙韩王信於代都马邑匈奴大攻围马邑韩信降匈奴匈奴得信因引兵南踰句注攻大原至晋阳下高帝自将兵往击之会东大寒雨雪卒之堕指者十二三於是冒顿阳败走诱汉兵汉逐击冒顿冒顿匿其精兵见羸弱高帝先至平城步兵未尽到冒顿纵精兵三十余万骑围高帝於白登七日高帝乃使使间厚遗阼氏阼氏乃谓冒顿曰两主不相困今得汉地单于终非能居之冒顿与韩信将王黄赵利期而兵久不来疑其与汉有谋亦取阼氏之言乃开围一角於是高皇帝令士皆持满傅矢外乡从解角直出得与大军合而冒顿遂引兵去汉亦引兵罢使刘敬结和亲之约奉宗室女翁主为单于阼氏岁奉匈奴絮缯酒食物各有数约为兄弟以和亲孝惠高后时冒顿寢骄乃为书使使遗高后曰孤僂之君生於沮泽之中长於平野牛马之域数至边境愿游中国陛下独立孤僂独居两主不乐无以自虞愿以所有易其所无高后大怒召丞相平及樊噲季布等议斩其使者发兵击之樊噲曰臣愿得十万衆横行匈奴中季布曰噲可斩也前陈豨反於代汉兵三十二万噲为上将军时匈奴围高帝於平城噲不能解围今伤痍者甫起而噲欲摇动天下妄言以十万衆横行是面谩也且匈奴远处絶漠得其善言不足喜恶言不足怒也高后曰善令大谒者张泽报书曰单于不忘敝邑赐之以书敝邑恐惧退日自图年老气衰发齿堕落行步失度单于过听不足以自汗敝邑无罪宜在见赦窃有御车二乘马二驷以奉常驾冒顿得书复使使来谢曰未尝闻中国礼义陛下幸而赦之因献马遂和亲至孝文即位复修和亲其三年夏匈奴右贤王入居河南地为寇於是文帝遣丞相灌婴将军击右贤王走出塞其明年单于遗汉书曰愿寢兵休士养马除前事复故约以安边民书至汉议击与和亲孰便公卿皆曰和亲甚便汉许之孝文前六年遗匈奴书曰汉与匈奴约为兄弟所遗单于甚厚背约离兄弟之亲者常在匈奴然右贤王事已在赦前勿深诛单于若称书意明告诸吏使无负约有信敬如单于书使者言单于自将并国有功甚苦兵事服绣袷绮衣长襦锦袍各一比疎一黄金饰具带一黄金犀毗一绣十匹锦二十匹赤绋緑缯各四十匹使中大夫意谒者令肩遣单于後顷之冒顿死子稽粥立号曰老上单于文帝复遣宗人女翁主为单于阼氏使宦者中行说傅翁主说不欲行汉强使之说曰必我也为汉患者中行说既至因降单于单于爱幸之日夜教单于候利害处孝文十四年匈奴单于十四万骑入朝那萧关杀北地都尉卬虏人民蓄产甚多遂至彭阳使骑兵入烧回中宫候骑至雍甘泉於是文帝以中尉周舍郎中令张武为将军发车

千乘十万骑军长安旁以备胡寇而拜昌侯卢卿为上郡将军甯侯魏邀为北地将军隆虑侯周竈为陇西将军东阳侯张相如为大将军成侯董赤为将军大发车骑往击胡单于留塞内月余汉逐出塞即还匈奴日以骄岁入边汉甚患之乃使使遗匈奴书单于亦使当户报谢复言和亲事孝文後二年使使遗匈奴书曰朕与单于皆捐细故俱蹈大道也堕坏前恶以图长久和亲之後汉过不先单于其察之後四年老上单于死子军臣单于立汉复与匈奴和亲军臣单于立岁余匈奴复絶和亲大入上郡云中各三万骑所杀略甚衆於是汉使三将军军屯北地代屯句注赵屯飞狐口缘边亦各坚守以备胡寇又置三将军军长安西细柳渭北棘门霸上以备边後岁余文帝崩景帝立复与匈奴和亲通关市给遗单于遣翁主如故约终景帝世时时小入盗边无大寇武帝即位明和亲约束厚遇关市饶给之汉使马邑人聂翁壹闲阑出物与匈奴交易阳为卖马邑城以诱单于单于信之而贪马邑财物乃以十万骑入武州塞汉伏兵三十余万马邑旁御史大夫韩安国为护军将军四将军以伏单于单于入汉塞见畜布野而无人牧者怪之时鴈门尉史知汉谋具告单于单于大惊曰吾固疑之乃引兵还汉以恢本建造兵谋而不进诛恢自是後匈奴絶和亲自马邑军後五岁之秋汉使四将各万骑击胡关市下将军卫青出上谷至龙城得胡首虏七百人公孙贺出云中无所得公孙敖出代郡为胡所败七千李广出鴈门为胡所败匈奴生得广广道亡归其明年秋匈奴二万骑入汉杀辽西太守略二千余人又败渔阳太守军千余人围将军安国安国时千余骑亦且尽会燕救之至匈奴乃去又入鴈门杀略千余人於是汉使将军卫青将三万骑出鴈门李息出代郡击胡得首虏数千其明年卫青复出云中以西至陇西击胡之楼烦白羊王於河南得胡首虏数千羊百余万於是汉遂取河南地筑朔方复缮故秦时蒙恬所为塞因河而为固汉亦筑上谷之斗辟县造阳地以予胡是岁元朔二年也其冬军臣单于死其弟左谷蠡王伊穉斜自立为单于攻败军臣单于太子於单於单亡降汉数月死伊穉斜单于既立其夏匈奴数万骑入代郡秋又入鴈门明年又入代郡定襄上郡匈奴右贤王怨汉夺之河南地而筑朔方数寇盗边及入河南侵扰朔方杀掠吏民甚衆其明年春汉遣卫青将六将军十余万人出朔方高阙夜围右贤王脱身逃走汉将军得右贤王人衆男女万五千人裨小王十余人其明年春汉复遣大将军卫青将六将军十余万骑仍再出定襄数百里击匈奴得首虏前後万九千余级而汉亦亡两将军三千余骑右将军建得以身脱而前将军赵信兵不利降匈奴其明年胡数万骑入上谷杀数百人明年春汉使票骑将军去病将万骑出陇西过焉耆山千余里得胡首虏八千余级得休屠王祭天金人其夏骠骑将军复与合骑侯数万骑出陇西北地二千里过居延攻祁连山得胡首虏三万余级裨小王以下十余人是时匈奴亦来入代郡鴈门杀掠数百人汉使博望侯及李将军广出右北平击匈奴左贤王左贤王围李广广军四千人死者过半会博望侯军救至李将军得脱尽亡其军其秋单于怒昆邪王休屠王居西方为汉所杀虏数万人欲召诛之昆邪王杀休屠王并将其衆降汉汉已得昆邪则陇西北地河西益汉少胡寇徙关东贫民处所夺匈奴河南地新秦中以实之西减北地以西戍卒半明年春匈奴入右北平定襄各数万骑杀掠千余人其年春汉令大将军青骠骑将军去病中分军大将军出定襄骠骑将军出代咸约絶幕击匈奴单于闻之远其辎重以精兵待於幕北与汉大将军接战一日会暮大风起汉兵纵左右翼围单于单于自度战不能与汉兵遂独与壮骑数百溃汉围西北遁走骠骑封於狼居胥山禅姑衍临翰海而还後匈奴远遁而幕南无王庭汉度河自朔方以西至令居往往通渠置田官吏卒五六万人会骠骑将军去病死於是汉久不北击胡数岁伊穉斜单于立十三年死子乌维立为单于是岁元鼎三年也其後汉方南诛两越不击匈奴

匈奴亦不入边乌维立三年汉已灭两越天子巡边亲至朔方勒兵十八万骑以见武节而使郭吉风告单于曰南越王头已垂於汉北阙下令单于即能与汉战天子自将兵待边即不能亟南面而臣於汉何但远走亡匿於幕北寒苦无水草之地为语卒单于大怒留郭吉不归迁辱之北海上而单于终不肯为寇於汉边休养士马习射猎数使使好辞甘言求和亲汉使王乌等闚匈奴匈奴法汉使不去节不以墨黥其面不得入穹庐王乌北地人习胡俗去其节黥面入庐单于爱之阳许曰吾为遣其太子入质於汉以求和亲汉使杨信使於匈奴是时汉东拔濊貉朝鲜以为郡而西置酒泉郡以隔絶胡与羌通之路又西月氏大夏以翁主妻乌孙王以分匈奴西方之援国又北益广田至眩雷为塞而匈奴终不敢以为言乌维单于立十岁死子詹师庐立年少号为儿单于是岁元封六年也明年春汉使浞野侯破奴将二万骑出朔方北二千余里期至浚稽山而还匈奴生得浞野侯军遂没於匈奴儿单于立三岁而死子少匈奴乃立其季父乌维单于弟右贤王句黎湖为单于是岁太初三年也句黎湖单于立汉使光禄徐自为出五原塞数百里远者千里筑城障列亭至卢朐而使游击将军韩说长平侯卫伉屯其旁使强弩都尉路博德筑居延泽上其秋匈奴大入云中定襄五原朔方杀掠数千人行坏光禄所筑亭障又使右贤王入酒泉张掖掠数千人会任文击救尽复失其所得而去句黎湖单于立一岁死其弟左大都尉且鞮侯立为单于汉既诛大宛威震外国天子意欲遂困胡乃下诏曰高皇帝遗朕平城之忧昔齐襄公复九世之讐春秋大之是岁太初四年也汉遣中郎将苏武厚币赂遗单于单于益骄礼甚倨明年汉使贰师将军将三万骑出酒泉击右贤王於天山得首虏万余级而还匈奴大围贰师几不得脱汉兵物故什六七汉又使因杆将军出西河与强弩都尉会涿邪山亡所得使骑都尉李陵将步兵五千人出居延北千余里与单于会合战陵所杀伤万余人兵食尽欲归单于围陵降匈奴其兵得脱归汉者四百人单于乃贵陵以其女妻之後二岁汉使贰师将军六万骑步兵七万出朔方强弩都尉路博德将万余人与贰师会游击将军说步兵三万人出五原因杆将军敖将骑万步兵三万人出鴈门匈奴闻悉远其累重於余吾水北而单于以十万待水南与贰师接战贰师解而引归与单于连鬪十余日游击亡所得因杆与左贤王战不利引归明年且鞮侯单于死立五年长子左贤王立为狐鹿姑单于以左大将为左贤王数年病死其子先贤掸不得代更以为日逐王日逐王者贱於左贤王单于自以其子为左贤王单于既立六年而匈奴入上谷五原杀掠吏民其年匈奴复入五原酒泉杀两部都尉於是汉遣贰师将军七万人出五原御史大夫商丘成将三万余人出西河重合侯莽通将四万骑出酒泉千余里单于闻汉兵大出悉遣其辎重徙赵信城北邸郅居水左贤王驱其人民度余吾水六七百里居兜衔山单于自将精兵左安侯度姑且水御史大夫军至追邪径无所见还匈奴使大将与李陵将三万余骑追汉军至浚稽山合转战九日汉兵陷陈却敌杀伤虏甚衆至蒲奴水虏不利还去贰师将军出塞匈奴使右大都尉与卫律将五千骑要击汉军於夫羊句山狭贰师遣属国胡骑二千与战虏兵坏散死伤者数百人汉军乘胜追北匈奴奔走莫敢距敌会贰师妻子坐巫蛊收闻之忧惧其掾胡亚夫说贰师曰夫人室家皆在吏若还不称意适与狱会贰师由是狐疑欲深入要功长史与决眭都尉輝渠侯谋曰将军怀异心欲危衆求功恐必败谋共执贰师贰师闻之斩长史引兵还至速邪乌燕然山单于知汉军劳倦自将五万骑遮击贰师相杀伤甚衆夜堑汉军前深数尺从後急击之军大乱败贰师降单于以女妻之尊宠在卫律上其明年单于遣使遗汉书云南有大汉北有强胡胡者天之骄子也不为小礼以自烦今欲与汉闔大关取汉女为妻岁给遗我麋酒万石糴米五千斛杂繒万匹它如故约则边不相盗矣汉遣使者报送其使单于留使者三

岁乃得还贰师在匈奴岁余卫律害其宠会母阼氏病律饬胡巫言先单于怒曰胡故时祠兵常言得贰师以社今何故不用於是收贰师贰师骂曰我死必灭匈奴遂屠贰师以祠武帝崩前此者汉兵深入穷追二十余年匈奴孕重堕殯罢极苦之後三年单于欲求和亲会病死更立子左谷蠡王为壶衍鞬单于是岁始元二年也後复得匈奴降者言乌桓尝发先单于冢匈奴怨之方发二万骑击乌桓大将军霍光欲发兵邀击之以问护军都尉赵充国充国以为蛮夷自相攻击而发兵要之招寇生事非计也光更问中郎将范明友明友言可击於是拜明友为度辽将军将二万骑出辽东匈奴闻汉兵至引去明友因乘乌桓敝击之斩首六千余级获三王首还匈奴繇是恐即使使之乌孙求欲得汉公主击乌孙取车延恶师地乌孙公主上书下公卿议救未决昭帝崩宣帝即位乌孙昆弥复上书言连为匈奴所侵削昆弥愿发国半精兵人马五万匹尽力击匈奴唯天子出兵哀救公主本始二年汉大发关东轻锐士选郡国吏三百名伉健习骑射者皆从军遣御史大夫田广明为祁连将军四万余骑出西河度辽将军范明友三万余骑出张掖前将军韩增三万余骑出云中後将军赵充国为蒲类将军三万余骑出酒泉云中太守田顺为虎牙将军三万余骑出五原凡五将军兵十余万骑出塞各二千余里及校尉常惠使护发兵乌孙西域昆弥自将翕侯以下五万余骑从西方入与五将军兵凡二十余万衆匈奴闻汉兵大出老弱犇走毆蓄产远遁逃是以五将少所得度辽将军出塞千二百余里至蒲离 水斩首捕虏七百余级前将军出塞千二百余里至乌员斩首捕虏至 山百余级蒲类将军兵当与乌孙合击匈奴蒲类泽乌孙先期至而去汉兵不与相及蒲类将军出塞千八百余里西去 山斩首捕虏得单于使者蒲陰王以下三百余级祁连将军出塞千六百里至鸡秩山斩首捕虏十九级虎牙将军出塞八百余里至丹余吾水上即止兵不进斩首捕虏千九百余级校尉常惠与乌孙兵至右谷蠡庭获单于父行及嫂居次名王犁汗都尉干长将以下三万九千余级虏马牛羊驴羸橐驼七十余万汉封惠为长罗侯然匈奴民衆死伤而去者及蓄产远移死亡不可胜数於是匈奴遂衰耗怒乌孙其冬单于自将数万骑击乌孙颇得老弱欲还会天大雨雪一日深丈余人民蓄产冻死还者不能什一於是丁令乘弱攻其北乌桓入其东乌孙击其西凡三国所杀数万级马数万匹牛羊甚衆又重以饿死人民死者什三蓄产什五匈奴大虚弱诸国羈属者皆瓦解攻盗不能理其後汉出三千余骑为三道并入匈奴捕虏得数千人还匈奴终不敢取当兹欲乡和亲而边境少事矣壶衍鞬单于立十七年死弟左贤王立为虚闾权渠单于是岁地节二年也虚闾权渠单于立九年死握衍胸鞬单于立复修和亲遣弟伊酋若王胜之入汉献见日逐王素与握衍胸鞬单于有隙即率其衆数万骑归汉汉封日逐王为归德侯时单于已立二岁暴虐杀伐国中不附及太子左贤王数谗左地贵人左地贵人皆怨其明年乌桓击匈奴东边姑夕王颇得人民单于怒姑夕王恐即与乌禅幕及左地贵人共立稽侯犍为呼韩邪单于发左地兵四五万人西击握衍胸鞬单于至姑且水北未战握衍胸鞬单于兵败走自杀左大且渠都隆奇亡之右贤王所其民衆尽降呼韩邪单于是岁神爵四年也

呼韩邪单于归庭数月罢兵使各归故地乃收其兄呼屠吾斯在民间者立为左谷蠡王使人告右贤贵人欲令杀右贤王其冬都隆奇与右贤王共立日逐王薄胥堂为屠耆单于发兵数万人东袭呼韩邪单于呼韩邪单于兵败走屠耆单于还以其长子都涂吾西为左谷蠡王少子姑督楼头为右谷蠡王留居单于庭明年秋屠耆单于使日逐王先贤掸兄右奥鞬王为乌藉都尉各二万骑屯东方以备呼韩邪单于是时西方呼揭王来与唯犁当户谋共谗右贤王

言欲自立为乌藉单于屠耆单于杀右贤王父子後知其冤复杀唯犁当户於是呼揭王恐遂畔去自立为呼揭单于右奥鞬王闻之即自立为车犁单于乌藉都尉亦自立为乌藉单于凡五单于屠耆单于自将兵东击车犁单于使都隆奇击乌藉乌藉车犁皆败西北走与呼揭单于兵合为四万人乌藉呼揭皆去单于号共并力尊辅车犁单于屠耆单于闻之使左大将都尉将四万骑分屯东方以备呼韩邪单于自将四万骑西击车犁单于车犁单于败西北走屠耆单于即引西南留闾敦地其明年呼韩邪单于遣其弟右谷蠡王等西袭屠耆单于屯兵杀略万余人屠耆单于闻之即自将六万骑击呼韩邪单于行千里未至噶姑地逢呼韩邪单于兵可四万人合战屠耆单于兵败自杀都隆奇乃与屠耆少子左谷蠡王姑督楼头亡归汉车犁单于东降呼韩邪单于呼韩邪单于左大将乌厉屈与父呼遼累乌厉温敦皆见匈奴乱率其衆数万人南降汉封乌厉屈为新城侯乌厉温敦为义阳侯是时李陵子复立乌藉都尉为单于呼韩邪单于捕斩之遂复都单于庭然衆裁数万人屠耆单于从弟休旬王将所主五六百骑击杀左大且渠并其兵至右地自立为闰振单于在西边其後呼韩邪单于兄左贤王呼屠吾斯亦自立为郅支骨都侯单于在东边其後二年闰振单于率其衆东击郅支单于郅支单于与战杀之并其兵遂进攻呼韩邪呼韩邪破其兵走郅支都单于庭呼韩邪之败也左伊秩訾王为呼韩邪计劝令称臣入朝事汉从汉求助如此匈奴乃定呼韩邪议问诸大臣皆曰匈奴之俗本上气力而下服役以马上战鬪为国故有威名於百蛮战死壮士所有也今兄弟争国不在兄则在弟虽死犹有威名子孙常长诸国汉虽强犹不能兼并匈奴柰何乱先古之制臣事於汉卑辱先单于为诸国所笑虽如是而安何以复长百蛮左伊秩訾曰不然强弱有时今汉方盛乌孙城郭诸国皆为臣妾今事汉则安存不事则危亡呼韩邪从其计引衆南近塞遣子右贤王铄娄渠堂入侍郅支单于亦遣子右大将驹于利受入侍是岁甘露元年也明年呼韩邪单于款五原塞愿朝三年正月汉遣车骑都尉韩昌迎发过所七郡二千骑为陈道上单于正月朝天子于甘泉宫汉宠以殊礼位在诸侯王上赞谒称臣而不名赐以冠带衣裳黄金玺璽绶玉具劔佩刀弓一张矢四发棨戟十安车一乘鞍勒一具马十五匹金二十斤钱二十万衣被七十七袭锦绣绮縠杂帛八千匹絮六千斤单于就邸留月余遣归国郅支单于亦遣使奉献汉遇之甚厚明年两单于俱遣使朝献汉待呼韩邪使有加明年呼韩邪单于复入朝礼赐如初加衣百一十袭锦帛九千匹絮八千斤始郅支单于以为呼韩邪降汉兵弱不能复自还即引其衆西欲攻定右地又屠耆单于小弟本侍呼韩邪亦亡之右地收两兄余兵得数千人自立为伊利目单于道逢郅支合战郅支杀之并其兵五万余人闻汉出兵谷助呼韩邪即遂留居右地自度力不能定匈奴乃益西近乌孙欲与并力遣使见小昆弥乌就屠乌就屠见呼韩邪为汉所拥郅支亡虏欲攻之以称汉乃杀郅支使持头送都护在所发八千骑迎郅支郅支见乌孙兵多其使又不反勒兵逢击乌孙破之因北击乌揭乌揭降发其兵西破坚昆北降丁令并三国数遣兵击乌孙常胜之坚昆东去单于庭七千里南去车师五千里郅支留都之元帝初即位呼韩邪单于复上书言民衆困乏汉诏云中五原郡转谷二万斛以给焉郅支单于自以道远又怨汉拥护呼韩邪遣使上书求侍子汉遣谷吉送之郅支杀吉汉不知吉音问而匈奴降者言闻瓠脱皆杀之呼韩邪单于使来汉辄簿责之甚急明年汉遣车骑都尉韩昌光禄大夫张猛送呼韩邪侍子求问吉等因赦其罪勿令自疑昌猛见单于民衆益盛塞下禽兽尽单于足以自卫不畏郅支闻其大臣多劝单于北归者恐北去後难约束昌猛即与为盟约曰自今以来汉与匈奴合为一家世世毋得相诈相攻其後呼韩邪竟北归庭人衆稍稍归之国中遂定郅支既杀使者自知负汉又闻呼韩邪益强恐见袭击欲远去会康

居王数为乌孙所困与诸闐侯计以为匈奴大国乌孙素服属之今郅支单于困阨在外可迎置东边使合兵取乌孙以立长无匈奴忧矣即使使至坚昆通语郅支郅支素恐又怨乌孙闻康居计大说遂与相结引兵而西康居亦遣贵人橐驼驴马数千匹迎郅支郅支人衆中寒道死余财三千人到康居其後都护甘延壽与副陈汤发兵即康居诛斩郅支郅支既诛呼韩邪单于且喜且惧上书言曰常愿谒见天子诚以郅支在西方恐其与乌孙俱来击臣以故未得至汉今郅支已伏诛愿入朝见竟宁元年单于复入朝礼赐如初加衣服锦帛絮皆倍於黄龙时单于自言愿婿汉氏以自亲元帝以後宫良家子王墙字昭君赐单于单于驩喜上书愿保塞上谷以西至敦煌传之无穷请罢边备塞吏卒以休天子人民天子令下有司议议者皆以为便郎中侯应习边事以为不可许对奏天子有诏勿议罢边塞事王昭君号宁胡阏氏生一男伊屠智牙师为右日逐王呼韩邪立二十八年建始二年死雕陶莫臯立为复株累若鞮单于复株累若鞮单于立遣子右致卢儿王醯谐屠奴侯入侍河平元年单于遣右臯林王伊邪莫演等奉献朝正月河平四年正月遂入朝加赐绣缯帛二万匹絮二万斤它如竟宁时复株累单于立十岁死弟且靡胥立为搜谐若鞮单于搜谐若鞮单于立遣子左祝都韩王胸留斯侯入侍以且莫车为左贤王搜谐单于立八岁元延元年为朝二年发行未入塞病死弟且莫车立为车牙若鞮单于车牙单于立遣子右於涂仇掸王乌夷当入侍以囊知牙斯为左贤王车牙单于立四岁死弟囊知牙斯立为乌珠留若鞮单于乌珠留单于立以第二阏氏子乐为左贤王以第五阏氏子舆为右贤王遣子右股奴王乌鞮牙斯入侍建平四年单于上书愿朝五年时哀帝被疾或言匈奴从上游来厌人自黄龙竟宁时单于朝中国辄有大故上由是难之以问公卿亦以为虚费府帑可且勿许单于使辞去未发黄门郎扬雄上书谏曰今单于上书求朝国家不许而辞之臣愚以为汉与匈奴从此隙矣书奏天子悟焉召还匈奴使者更报单于书而许之赐缯帛五十匹黄金十斤单于未发会病复遣使愿朝明年故事单于朝从名王以下及从者二百余人单于又上书言蒙天子神灵人民盛壮愿从五百人入朝以明天子盛德上皆许之元壽二年单于来朝上以大岁厌胜所在舍之上林苑蒲陶宫告之以加敬於单于单于知之加赐衣三百七十袭锦绣缯帛三万匹絮三万斤他如河平时既罢遣中郎将韩况送单于初上遣稽留昆随单于去到国复遣稽留昆同母兄大且方与妇入侍还归复遣且方同母兄左日逐王都与妇入侍是时汉平帝幼太皇太后称制王莽秉政乃风单于令遣王昭君女须卜居次云入侍太后所以赏赐之甚厚会西域车师後王句姑去胡来王唐兜皆怨恨都护校尉将妻子人民亡降匈奴单于受置左谷蠡地遣使上书言状曰臣谨已受诏遣中郎将韩隆王昌副校尉甄阜侍中谒者帛敞长水校尉王歙使匈奴告单于曰西域内属不当得受今遣之单于叩头谢罪执二虏还付使者诏使中郎将王萌待西域恶都奴界上逆受单于遣使送到国因请其罪使者以闻有诏不听会西域诸国王斩以示之乃造设四条中国人亡入匈奴者乌孙亡降匈奴者西域诸国佩中国印绶降匈奴者乌桓降匈奴者皆不得受遣中郎将王骏王昌副校尉甄阜王寻使匈奴班四条与单于杂函封付单于令奉行因收故宣帝所为约束封函还时莽奏令中国不得有二名因使使者以风单于宜上书慕化为一名单于从之上书言幸得备藩臣窃乐太平圣制臣故名囊知牙斯今谨更名曰知莽大说白太后遣使者答谕厚赏赐焉【匈奴传】

西汉会要卷六十八

卷六十九

钦定四库全书

西汉会要卷六十九

宋 徐天麟 撰

蕃夷中

西南夷

南夷君长以十数夜郎?大其西靡莫之属以十数滇?大自滇以北君长以十数印都?大此皆椎结耕田有邑聚其外西自桐师以东北至叶榆名为犂昆明编发随畜移徙亡常处亡君长地方可数千里自犂以东北君长以十数徙苴都?大自苴以东北君长以十数冉駹?大其俗或土着或移徙在蜀之西自駹以东北君长以十数白马?大皆氐类也此皆巴蜀西南外蛮夷也建元六年大行王恢击东粤东粤杀王郢以报恢因兵威使番禺令唐蒙风晓南粤南粤食蒙蜀枸酱蒙问所从来曰道西北?柯江江广数里出番禺城下蒙归至长安问蜀贾人独蜀出枸酱多持窃出市夜郎夜郎者临牂牁江江广百余步足以行船南粤以财物役属夜郎西至桐师然亦不能臣使也蒙乃上书说上曰南粤王黄屋左纛地东西万余里名为外臣实一州主今以长沙豫章往水道多絶难行窃闻夜郎所有精兵可得十万浮船牂牁出不意此制粤一奇也诚以汉之强巴蜀之饶通夜郎道为置吏甚易上许之乃拜蒙以中郎将将千人食重万余人从巴苴关入遂见夜郎侯多同厚赐谕以威德约为置吏使其子为令夜郎旁小邑皆贪汉缯帛以为汉道险终不能有也乃且听蒙约还报乃以为犍为郡发巴蜀卒治道自犍道指牂牁江蜀人司马相如亦言西夷印苴可置郡使相如以中郎将往谕皆如南夷为置一都尉十余县属蜀当是时巴蜀四郡通西南夷道载转相饷数岁道不通土罢饿餒离暑湿死者甚衆西南夷又数反发兵兴击耗费亡功上患之使公孙弘往视问焉还报言其不便及弘为御史大夫时方筑朔方据河逐胡弘等因言西南夷为害可且罢专力事匈奴上许之罢西夷独置南夷两县一都尉稍令犍为自保就及元狩元年博望侯张骞言使大夏时见蜀布印竹杖问所从来曰从东南身毒国可数千里得蜀贾人市或问印西可二千里有身毒国骞因盛言大夏在汉西南慕中国患匈奴隔其道诚通蜀身毒国道便近又亡害於是天子乃令王然于栢始昌吕越人等十余辈间出西南夷指求身毒国至滇滇王当羌乃留为求道四岁余皆闭昆明莫能通滇王与汉使言汉孰与我大及夜郎侯亦然各自以一州王不知汉广大使者还因盛言滇大国足事亲附天子注意焉及至南粤反上使驰义侯因犍为发南夷兵且兰君恐远行旁国虏其老弱乃与其衆反杀使者及犍为太守汉乃发巴蜀罪人当击南粤者八校尉击之会越已破汉八校尉不下中郎将郭昌卫广引兵还行诛隔滇道者且兰斩首数万遂平南夷为牂牁郡夜郎侯始倚南粤南粤已灭还诛反者夜郎遂入朝上以为夜郎王南粤破後及汉诛且兰印君并杀苴侯冉駹皆震恐请臣置吏以印都为粤犂郡苴都为沈黎郡冉駹为文山郡广汉西白马为武都郡使王然于以粤破及诛南夷兵威风谕滇王入朝滇王

者其衆数万人其旁东北劳深靡莫皆同姓相杖未肯听劳莫数侵犯使者吏卒元封二年天子发巴蜀兵击灭劳深靡莫以兵临滇滇王始首善以故弗诛滇王离西夷滇举国降请置吏入朝於是以为益州郡赐滇王王印复长其民西南夷君长以百数独夜郎滇受王印滇小邑也取宠焉後二十三岁孝昭始元元年益州廉头姑繒民反杀长吏牂牁谈指同并等二十四邑凡三万余人皆反遣水衡都尉发蜀郡犍为犇命万余人击牂牁大破之後三岁姑繒叶榆复反遣水衡都尉吕辟胡将郡兵击之辟胡不进蛮夷遂杀益州太守乘胜与辟胡战士战及溺死者四千余人明年复遣军正王平与大鸿胪田广明等并进大破益州斩首捕虏五万余级获蓄产十余万上曰钩町侯亡波卒其邑君长人民击反者斩首捕虏有功其立亡波为钩町王大鸿胪广明赐爵关内侯食邑三百户後间岁武都氏人反遣金吾马适建龙頔侯韩增与大鸿胪广明将兵击之至成帝河平中夜郎王兴与钩町王禹漏卧侯俞更举兵相攻牂牁太守请发兵诛兴等议者以为道远不可击乃遣大中大夫蜀郡张匡持节和解兴等不从命刻木象汉吏立道旁射之杜钦说大将军王凤宜因其罪恶未成未疑汉家加诛陰敕旁郡守尉练士马大司农豫调谷积要害处选任职太守往以秋凉时入诛其王侯尤不轨者即以为不毛之地亡用之民圣王不以劳中国宜罢郡放弃其民絶其王侯勿复通如以先帝所立累世之功不可堕坏亦宜因其萌芽早断絶之及已成形然後战师则万姓被害大将军凤於是荐金城司马陈立为牂牁太守及至牂牁谕告夜郎王兴兴不从命立请诛之未报乃从吏数十人出行县至兴国且同亭召兴兴将数千人往至亭从邑君数十人入见立立数责因断头邑君曰将军诛亡状为民除害愿出晓士衆以兴头示之皆释兵降钩町王禹漏卧侯俞震恐入粟千斛牛羊劳吏士立还归郡兴妻父翁指与兴子邪务收余兵迫胁旁二十二邑反至冬立奏募诸夷与都尉长史分将攻翁指等翁指据阬为垒立使奇兵絶其饟道纵反间以诱其衆都尉万年曰兵久不决费不可共引兵独进败走趋立营立怒叱戏下令格之都尉复还战立引兵救之时天大旱立攻絶其水道蛮夷共斩翁指持首出降

南粤

南粤王赵佗真定人也秦二世时南海尉任嚣病且死召龙川令赵佗书行南海尉事嚣死佗即击并桂林象郡自立为南粤武王高帝已定天下为中国劳苦故释佗不诛十一年遣陆贾立佗为南粤王高后时有司请禁粤关市铁器佗曰此必长沙王计乃自尊号为南武帝发兵攻长沙边败数县焉高后遣将军隆虑侯竇击之会暑湿士卒大疫兵不能踰岭岁余高后崩即罢兵佗因此以兵威财物赂遣闽粤西瓯骆役属焉东西万余里乃乘黄屋左纁称制与中国侔文帝元年初镇抚天下使告诸侯四夷从代来即位意谕盛德焉乃为佗亲冢在真定置守邑岁时奉祀召其从昆弟尊官厚赐宠之诏丞相平举可使粤者平言陆贾先帝时使粤上召贾为大中大夫谒者一人为副使赐佗书曰服领以南王自治之虽然王之号为帝两帝并立亡一乘之使以通其道是争也争而不逊仁者不为也愿与王分弃前患终今以来通使如故故使贾驰谕告王朕意王亦受之母为寇灾矣上褚五十衣中褚三十衣下褚二十衣遗王愿王听乐娱忧存问邻国陆贾至南粤王恐乃顿首谢愿奉明诏长为藩臣奉贡职於是下令國中曰吾闻两雄不俱立两贤不并世汉皇帝贤天子自今以来去帝制黄屋左纁因为书称蛮夷大长老夫臣佗昧死再拜上书皇帝陛下今陛下幸哀怜复故号通使汉如故老夫死骨不腐改号不敢为帝矣谨北面因使者献白璧一双翠鸟千犀角十紫贝五百桂蠹一器生翠

四十双孔雀二双昧死再拜以闻皇帝陛下陆贾还报文帝大说遂至孝景时称臣遣使入朝请然其居国窃如故号其使天子称王朝命如诸侯至武帝建元四年佗孙胡为南粤王立三年闽粤王郢兴兵南击边邑胡使人上书曰两粤俱为藩臣毋擅兴兵相攻击今东粤擅兴兵侵臣臣不敢兴兵唯天子诏之於是天子多南粤义守职约为兴兵遣两将军往讨闽粤兵未踰岭闽粤王弟余善杀郢以降於是罢兵天子使严助往谕意南粤王胡顿首曰天子乃兴兵诛闽粤死亡以报德遣太子婴齐入宿卫谓助曰国新被寇使者行矣胡方日夜装入见天子助去後其大臣谏胡曰汉兴兵诛郢亦行以惊动南粤且先王言事天子期毋失礼要之不可以怵好语入见入见则不得复归亡国之势也於是胡称病竟不入见後十余岁胡实病甚太子婴齐请归胡薨諡曰文王婴齐嗣立即藏其先武帝文帝玺婴齐在长安时取邯郸嫪氏女生子兴及即位上书请立嫪氏女为后兴为嗣汉数使使者风谕婴齐犹尚乐擅杀生自恣惧入见要以用汉法比内诸侯固称病遂不入见遣子次公入宿卫婴齐薨諡为明王太子兴嗣立其母为太后太后自未为婴齐妻时尝与霸陵人安国少季通及婴齐薨後元鼎四年汉使安国少季谕王王太后入朝令辩士谏大夫终军等宣其辞勇士魏臣等辅其决卫尉路博德将兵屯桂阳待使者王年少太后中国人安国少季往复与私通国人颇知之多不附太后太后恐乱起亦欲倚汉威劝王及幸臣求内属即因使者上书请比内诸侯三岁一朝除边关於是天子许之赐其丞相吕嘉银印及内史中尉太傅印余得自置除其故黥劓刑用汉法诸使者留填抚之王太后飭治行装重资为入朝具相吕嘉数谏止王王不听有畔心乃陰谋作乱天子遣千秋与太后弟嫪乐将兵二千人往入粤境吕嘉乃遂反攻杀太后王尽杀汉使者遣人告苍梧秦王及其诸郡县立明王长男粤妻子术阳侯建德为王而韩千秋兵之入也破数小邑其後粤直开道给食未至番禺四十里粤以兵击千秋等灭之使人函封汉使节置塞上好为谩辞谢罪发兵守要害处於是天子令粤人及江淮以南楼船十万师往讨之元鼎五年秋卫尉路博德为伏波将军出桂阳下湟水主爵都尉杨仆为楼船将军出豫章下横浦故归义粤侯二人为戈船下濑将军出零陵或下离水或抵苍梧使驰义侯因巴蜀罪人发夜郎兵下牂柯江咸会番禺六年冬楼船将军将精卒先陷寻陋破石门得粤船粟因推而前挫粤锋以粤数万人待伏波将军伏波将军将罪人道远後期与楼船会乃有千余人遂俱进楼船居前至番禺建德嘉皆城守楼船自择便处居东南面伏波居西北面会暮楼船攻败粤人纵火烧城粤素闻伏波莫不知其兵多少伏波乃为营遣使招降者赐印绶复纵令相招楼船力攻烧敌反殴而入伏波营中迟旦城中皆降伏波吕嘉建德以夜与其属数百人亡入海伏波又问降者知嘉所之遣人追故其校司马苏弘得建德粤郎都尉稽得嘉南粤已平遂以其地为儋耳珠崖南海苍梧鬱林合浦交趾九真日南九郡

闽粤

闽粤王无诸及粤东海王摇其先皆粤王句践之後也姓驹氏秦并天下废为君长以其地为闽中郡及诸侯畔秦无诸摇率粤归番阳令吴芮所为番君者也从诸侯灭秦当是时项王主命不王也以故不佐楚汉击项籍无诸摇帅粤人佐汉汉五年复位无诸为闽粤王王闽中故地都冶孝惠三年举高帝时粤功曰闽君摇功多其民便附乃立摇为东海王都东甌世号曰东甌王后数世孝景三年吴王濞反欲从闽粤闽粤未肯行独东甌从及吴破东甌受汉募杀吴王丹徒以故得不诛吴王子驹亡走闽粤怨东甌杀其父常劝闽粤击东甌建元三年闽粤

发兵围东瓯东瓯使人告急天子天子问太尉田蚡蚡对曰粤人相攻击固其常不足以烦中国往救也中大夫严助诘蚡言当救天子遣助发会稽郡兵浮海救之汉兵未至闽粤引兵去东瓯请举国徙中国乃悉与衆处江淮之间六年闽粤击南粤南粤守天子约不敢擅发兵而以闻上遣大行王恢出豫章大司农韩安国出会稽皆为将军兵未踰岭闽粤王郢发兵距险其弟余善与宗族谋曰王以擅发兵不请故天子兵来诛汉兵衆强即幸胜之後来益多灭国乃止今杀王以谢天子天子罢兵固国完不听乃力战不胜即亡入海皆曰善即鋹杀王使使奉其头致大行大行曰所为来者诛王王头至不战而殒利莫大焉乃以便宜案兵告大司农军而使使奉王头驰报天子诏罢两将军兵曰郢等首恶独无诸孙繇君丑不与谋乃使中郎将立丑为粤繇王奉闽粤祭祀余善以杀郢威行国中民多属窃自立为王繇王不能制上闻之为余善不足复兴师曰余善首诛郢师得不劳因立余善为东粤王与繇王并处至元鼎五年南粤反余善上书请以卒八千从楼船击吕嘉等兵至揭阳以海风波为解不行持两端陰使南粤及汉破番禺楼船将军仆上书愿请引兵击东粤上以士卒劳倦不许罢兵令诸校留屯豫章梅领待命明年秋余善闻楼船请诛之汉兵留境且往乃遂发兵距汉道号将军驺力等为吞汉将军入白砂武林梅领杀汉三校尉是时汉使大司农张成故山州侯齿将屯不敢击却就便处皆坐畏懦诛余善刻武帝玺自立诈其民为妄言上遣横海将军韩说出句章浮海从东方往楼船将军仆出武林中尉王温舒出梅领粤侯为戈船下濑将军出如邪白沙元封元年冬咸入东粤自兵未往故粤衍侯吴阳前在汉汉使归谕余善不听及横海军至阳以其邑七百人反攻粤军於汉阳及故粤建成侯敖与繇王居股谋俱杀余善以其衆降横海将军封居股为东成侯万户封敖为开陵侯封阳为卯石侯於是天子曰东粤陋多阻闽粤悍数反覆诏军吏皆将其民徙处江淮之间东粤地遂虚

朝鲜

朝鲜王满燕人自始燕时尝略属真番朝鲜为置吏筑障秦灭燕属辽东外徼汉兴为远难守复修辽东故塞至涿水为界属燕燕王卢绾反入匈奴满亡命聚党千余人椎结蛮夷服而东走出塞度涿水居秦故空地上下障稍役属真番朝鲜蛮夷及故燕齐亡在者王之都王险会孝惠高后初定天下辽东太守即约满为外臣保塞外蛮夷传子至孙右渠所诱汉亡人滋多又未尝入见真番辰国欲上书见天子又雍闾弗通元封二年汉使涉何谯谕右渠终不肯奉诏何去至界临涿水使驭刺杀送何者朝鲜裨王长即度水驰入塞遂归报天子曰杀朝鲜将上为其名美弗诘拜何为辽东东部都尉朝鲜怨何发兵攻袭杀何天子募罪人击朝鲜其秋遣楼船将军杨仆从齐浮勃海兵五万左将军荀彘出辽东诛右渠右渠发兵距险左将军卒多率辽东士兵先纵败散多还走坐法斩楼船将齐兵七千人先至王险右渠城守窥知楼船军少即出击楼船楼船军败走将军仆失其衆遁山中十余日稍求收散卒复聚左将军击朝鲜涿水西军未能破左将军数与楼船期战楼船欲就其约不会左将军亦使人求间隙降下朝鲜不肯心附楼船以故两将不相得左将军心意楼船前有失军罪今与朝鲜和善而又不降疑其有反计未敢发天子曰两将围城又乖异以故久不决使故济南太守公孙遂往正之有便宜得以从事遂至左将军曰朝鲜当下久矣不下者楼船数期不会具以素所意告遂曰今如此不取恐为大害非独楼船又且与朝鲜共灭吾军遂亦以为然而以节召楼船将军入左将军军计事即令左将军戏下执缚楼船将军并其军以报天子许遂左将军并兵两军即

急击朝鲜相路人相韩陶尼谿相参将军王挾相与谋曰始欲降楼船楼船今执独左将军并将战益急恐不能与王又不肯降陶挾路人道死元封三年夏尼谿相参乃使人杀朝鲜王右渠来降王险城未下故右渠之大臣成已又反复攻吏左将军使右渠子长降相路人子取告谕其民诛成已故遂定朝鲜为真番临屯乐浪玄菟四郡

西汉会要卷六十九

卷七十

钦定四库全书

西汉会要卷七十

宋 徐天麟 撰

蕃夷下

西域

西域以孝武时始通本三十六国其後稍分至五十余皆在匈奴之西乌孙之南南北有大山中央有河东西六千余里南北千余里东则接汉阨以玉门阳关西则限以葱岭其南山东出金城与汉南山属焉其河有两原一出葱岭山一出于阨于阨在南山下其河北流与葱岭河合东注蒲昌海蒲昌海一名盐泽者也去玉门阳关三百余里广袤三百里其水亭居冬夏不增减皆以为潜行地下南出於积石为中国河云汉兴至於孝武事征四夷广威德而张骞始开西域之迹其後骠骑将军击破匈奴右地降浑邪休屠王遂空其地始筑令居以西初置酒泉郡後稍发徙民充实之分置武威张掖敦煌列四郡据两关焉自贰师将军伐大宛之後西域震惧多遣使来贡献汉使西域者益得职於是自敦煌西至盐泽往往起亭而轮台渠犂皆有田卒数百人置使者校尉领护以给使外国者至宣帝时遣卫司马使护鄯善以西数国及破姑师未尽殄分以为车师前後王及山北六国时汉独护南道未能尽并北道也然匈奴不自安矣其後日逐王畔单于将衆来降护鄯善以西使者郑吉迎之既至汉封日逐王为归德侯吉为安远侯是岁神爵三年也乃因使吉护北道故号曰都护都护之起自吉置矣僮仆都尉由此罢匈奴益弱不得近西域於是徙屯田田於北胥鞬披莎车之地屯田校尉始属都护都护督察乌孙康居诸外国动静有变以闻可安辑安辑之可击击之都尉治乌垒城去阳关二千七百三十八里与渠犂田官相近土地肥饶於西域为中故都护治焉至元帝时复置戊己校尉屯田车师前王庭是时匈奴束蒲类王兹力支将人衆千七百余入降都护都护分车师後王之西为乌贪訾离地以处之自宣元後单于称藩臣西域服从其土地山川王侯户数道里远近翔实矣

婼羌国 鄯善国 且末国

小宛国 精絕国 戎卢国

扞弥国 渠勒国 于阨国

皮山国 乌秣国 西夜国

蒲犁国 依耐国 无雷国

难兜国 罽宾国 乌弋山离国

安息国 大月氏国 康居国

奄蔡国 大宛国 桃槐国

休循国 捐毒国 莎车国

疏勒国 尉头国 乌孙国

姑墨国 温宿国 龟兹国

乌垒国 渠犂城 尉犂国

危须国 焉耆国 乌贪訾离国

卑陆国 卑陆後国 都立师国

单桓国 蒲类国 蒲类後国

西且弥国 东且弥国 劫国

狐胡国 山国 车师前国

车师後国 车师都尉国 车师後城长国初武帝感张骞之言甘心欲通大宛诸国使者相望於道一岁中多至十余辈楼兰姑师当道苦之攻劫汉使王恢等又数为匈奴耳目令其兵遮汉使汉使多言其国有城邑兵弱易击於是武帝遣从票侯赵破奴将属国骑及郡兵数万击姑师王恢数为楼兰所苦上令恢佐破奴将兵破奴与轻骑七百人先至虏楼兰王遂破姑师因暴兵威以动乌孙大宛之属还封破奴为浞野侯恢为浩侯於是汉列亭障至玉门矣楼兰既降服贡献匈奴闻发兵击之於是楼兰遣一子质匈奴一子质汉後贰师军击大宛匈奴欲遮之贰师兵盛不敢当即遣骑因楼兰候汉使後过者欲絶勿通时汉军正任文将兵屯玉门关为贰师後距捕得生口知状以闻上诏文便道引兵捕楼兰王将诣阙簿责王对曰小国在大国间不两属无以自安愿徙国入居汉地上直其言遣归国亦因使候伺匈奴匈奴自是不甚亲信楼兰征和元年楼兰王死国人来请质子在汉者欲立之质子常坐汉法下蚕室宫刑故不遣报曰侍子天子爱之不能遣其更立其次当立者楼兰更立王汉复责其质子亦遣一子质匈奴後王又死匈奴先闻之遣质子归得立为王汉遣使诏新王令入朝天子将加厚赏楼兰王後妻故继母也谓王曰先王遣两子质汉皆不还柰何欲往朝乎王用其计谢使曰新立

国未定愿待後年入见天子然楼兰国在东垂近汉当白龙堆乏水草常主发导负水儋粮送迎汉使又数为吏卒所寇怨艾不便与汉通後复为匈奴反间数遮杀汉使其弟尉屠耆降汉具言状元凤四年大将军霍光白遣平乐监傅介子往刺其王介子轻将勇敢士齎金币扬言以赐外国为名既至楼兰诈其王欲赐之王喜与介子饮醉将其王屏语壮士二人从後刺杀之贵人左右皆散走介子告谕以王负汉罪天子遣我诛王当立王弟尉屠耆在汉者汉兵方至毋敢动自令灭国介子遂斩王尝归首驰传诣阙县首北阙下封介子为义阳侯乃立尉屠耆为王更名其国为鄯善为刻印章赐以宫女为夫人备车骑辎重丞相将军百官送至横门外祖而遣之王自请天子曰身在汉久今归单弱而前王有子在恐为所杀国中有伊循城其地肥美愿汉遣一将屯田积谷令臣得依其威重於是汉遣司马一人吏士四十人田伊循以镇抚之其後更置都尉伊循官置始此矣

自武帝始通罽宾自以絶远汉兵不能至其王乌头劳数剽杀汉使乌头劳死子代立遣使奉献汉使关都尉文忠送其使王复欲害忠忠觉之乃与容屈王子陰末赴共合谋攻罽宾杀其王立陰末赴为罽宾王授印绶後军侯赵德使罽宾杀与陰末赴相失陰末赴锁琅当德杀副已下七十余人遣使者上书谢孝元帝以絶域不録於其使者於县度絶而不通成帝时复遣使献谢罪汉欲遣使者报送其使杜钦说大将军王凤曰前罽宾王陰末赴本汉所立後卒畔逆夫德莫大於有国子民罪莫大於执杀使者所以不报恩不惧诛者自知絶远兵不至也有求则卑辞无欲则骄谩终不可怀服其乡慕不足以安西域虽不附不能危城郭前亲逆节恶暴西域故絶而不通今悔过来而无亲属贵人奉献者皆行贾贱人欲通货市买以献为名故烦使者送至县度恐失实见欺凡遣使送客者欲为防护寇害也起皮山南更不属汉之国四五斥候士百余人五分夜击刀斗自守尚时为所侵盗驴畜负粮须诸国禀食得以自赡国贫小不能食或桀黠不肯给拥强汉之节馁山谷之间乞匄无所得离一二旬则人畜弃捐旷野而不反又历大头痛小头痛之山赤土身热之阪令人身热无色头痛呕吐驴畜尽然又有三池盘石阪道陜者尺六七寸长者径三十里临峥嵘不测之深行者骑步相持绳索相引二千余里乃到县度蓄队未半阬谷尽靡碎人堕埶不得相收视险阻危害不可胜言圣王分九州制五服盛内不求外今遣使者承至尊之命送蛮夷之贾劳吏士之衆涉危难之路罢弊所恃以事无用非久长计也使者业已受节可至皮山而还於是凤白从钦言罽宾实利赏赐贾市其使数年而壹至云

武帝始遣使至安息王令将将二万骑迎於东界东界去王都数千里行比至过数十城人民相属因发使随汉使者来观汉地以大鸟卵及犁靬人献於汉天子大说

宣帝时匈奴乖乱五单于并争汉拥立呼韩邪单于而郅支单于怨望杀汉使者西阻康居其後都护甘延壽副校尉陈汤发戊己校尉西域诸国兵至康居诛灭郅支单于是时元帝建昭三年也至成帝时康居遣子侍汉贡献然自以絶远独骄谩不肯与诸国相望都护郭舜数上言本匈奴盛时非以兼有乌孙康居故也及其称臣妾非以失二国也汉虽皆受其质子然三国内相输遗交通如故亦相候伺见便则发合不能相亲信离不能相臣役以今言之结配乌孙竟未有益反为中国生事然乌孙既结在前今与匈奴俱称臣义不可距而康居骄黠讫不肯拜使者都护吏至其国坐之乌孙诸使下王及贵人先饮食已乃饮都护吏故为无所省以

夸旁国以此度之何故遣子入侍其欲贾市为好辞之诈也匈奴百蛮大国今事汉甚备闻康居不拜且使单于有自下之意宜归其侍子絶勿复使以章汉家不通无礼之国敦煌酒泉小郡及南道八国给使者往来人马驴橐驼食皆苦之空罢耗所过送迎骄黠絶远之国非至计也汉为其新通重致远人终羈縻而未絶大宛国多善马马汗血言其先天马子也张骞始为武帝言之上遣使者持千金及金马以请宛善马宛王以汉絶远大兵不能至爱其宝马不肯与汉使妄言宛遂攻杀汉使取其财物於是天子遣贰师将军李广利将兵前後十余万人伐宛连四年宛人斩其王母寡首献马三千匹汉军乃还

宣帝时乌孙公主小子万年莎车王爱之莎车王无子死时万年在汉莎车国人计欲自托於汉又欲得乌孙心即上书请万年为莎车王汉许之遣使者奚充国送万年万年初立暴恶国人不悦莎车王弟呼屠徵杀万年并杀汉使者自立为王约诸国背汉会卫侯冯奉世使送大宛客即以便宜发诸国兵击杀之更立它昆弟子为莎车王还拜奉世为光禄大夫是岁元康元年也始张骞言乌孙虽强大可厚赂招令东居故地妻以公主与为昆弟以制匈奴武帝令骞齎金币往骞既致赐谕指昆莫发使送骞因献马数十匹报谢匈奴闻其与汉通怒欲击之乌孙恐使使献马愿得尚汉公主为昆弟汉遣江都王建女细君为公主以妻焉昆莫以为右夫人匈奴亦遣女妻昆莫昆莫以为左夫人昆莫年老欲使其孙岑陁尚公主公主不听上书言状天子报曰从其国俗岑陁遂妻公主昆莫死岑陁代立江都公主死汉复以楚王戊之孙解忧为公主妻岑陁岑陁以国与季父大禄子翁归靡复尚楚主解忧昭帝时公主上书言匈奴发骑田车师车师与匈奴为一共侵乌孙惟天子幸救之汉议欲击匈奴会昭帝崩宣帝即位公主及昆弥皆遣使上书言匈奴复发大兵侵击乌孙惟天子出兵以救公主昆弥汉兵大发十五万骑五将军分道并出获单于父行及嫂居次名王犁污都尉千长骑将以下四万级元康二年乌孙昆弥上书愿以汉外孙元贵靡为嗣令得复尚汉公主上乃以乌孙主解忧弟子相夫为公主而遣之未出塞闻乌孙昆弥翁归靡死乌孙贵人共立岑陁子泥靡代为昆弥号狂王天子召还少主狂王复尚楚主解忧後翁归靡袭杀狂王自立为昆弥宣帝立元贵靡为大昆弥乌就屠为小昆弥自分立两昆弥後汉用忧劳且无宁岁

自武帝初通西域置校尉屯田渠犂是时军旅连出师行三十二年海内虚耗征和中贰师将军李广利以军降匈奴上既悔远征伐而搜粟都尉桑弘羊与丞相御史奏言故轮台以东捷枝渠犂皆故国地广饶水草有溉田五千顷以上处温和田美可益通沟渠种五谷与中国同时熟其旁国少锥刀贵黄金采繒可以易谷食宜给足不可乏臣愚以为可遣屯田卒诣故轮台以东置校尉三人分护各举图地形通利沟渠务使以时益种五谷张掖酒泉遣骑假司马为斥侯属校尉事有便宜因骑置以闻田一岁有积谷募民有壮健有累重敢徙者诣田所就蓄积为本业益垦溉田积筑列亭连城而西以威西国辅乌孙为便臣谨遣徵事臣昌分部行边严勅太守都尉明烽火选士马谨斥侯蓄茭草愿陛下遣使使西国以安其意臣昧死请上乃下诏深陈既往之悔曰前有司奏欲益民赋三十助边用是重困老弱孤独也而今又请遣卒田轮台轮台西於车师千余里乃者以缚马书徧视丞相御史二千石诸大夫郎为文学者乃至郡属国都尉成忠赵破奴等皆以虏自缚其马不祥甚哉或以为欲以见强夫不足者视人有余易之卦得大过爻在九五匈奴困败公车方士太史治星望气及大卦龟蓍皆以为吉匈奴必破时不可再得也又曰北伐行将於鬴山必克卦诸将贰师取吉故朕亲发贰师下鬴

山诏之必无深入今计谋卦兆皆反繆重合侯得虏候者言闻汉军当来匈奴使巫埋羊牛所出诸道及水上以诅军单于遗天子马裘常使巫祝之缚马者诅军事也又卜汉军一将不吉匈奴常言汉极大不能饥渴失一狼走千羊乃者贰师败军士死略离散悲痛常在朕心今请远田轮台欲起亭隧是扰劳天下非所以优民也今朕不忍闻大鸿胪等又议欲募囚徒送匈奴使者明封侯之赏以报忿五伯所弗能为也且匈奴得汉降者常提掖搜索问以所闻今边塞未正阑出不禁障侯长吏使卒猎兽以皮肉为利卒苦而烽火乏失亦上集不得後降者来若捕生口虏乃知之当今务在禁苛暴止擅赋力本农修马复令以补缺毋乏武备而已郡国二千石各上进蓄马方略补边状与计对由是不复出军而封丞相车千秋为富民侯以明休息思富养民也初贰师将军李广利击大宛还过杆弥杆弥遣太子赖丹为质於龟兹广利责龟兹曰外国皆臣属於汉龟兹何以得受杆弥质即将赖丹入至京师昭帝乃用桑弘羊前议以杆弥太子赖丹为校尉将军田轮台轮台与渠犂地皆相连也龟兹贵人姑翼谓其王曰赖丹本臣属吾国今佩汉印绶来迫吾国而田必为害王即杀赖丹而上书谢汉汉未能征宣帝时长罗侯常惠使乌孙还便宜发诸国兵合五万人攻龟兹责以前杀校尉赖丹龟兹王谢曰乃我先王时为贵人姑翼所误我无罪执姑翼诣惠惠斩之时乌孙公主遣女来至京师学鼓琴汉遣侍郎乐奉送主女过龟兹龟兹前遣人至乌孙求公主女未还会女过龟兹龟兹王留不遣复使使报公主主许之後公主上书愿令女比宗室入朝而龟兹王绛宾亦爱其夫人上书言得尚汉外孙为昆弟愿与公主女俱入朝元康元年遂来朝贺王及夫人皆赐印绶夫人号称公主赐以车骑旗鼓歌吹数十人绮绣杂增琦珍凡数千万留且一年厚赠送之後数来朝贺乐汉衣服制度归其国治宫室作徼道周卫出入传呼撞钟鼓如汉家仪外国胡人皆曰驴非驴马非马若龟兹王所谓羸也绛宾死其子承德自谓汉外孙成哀帝时往来尤数汉遇之亦甚亲密

武帝天汉二年以匈奴降者介和王为开陵侯将楼兰国兵始击车师匈奴遣右贤王将数万骑救之汉兵不利引去征和四年遣重合侯马通将四万骑击匈奴道过车师北复遣开陵侯将楼兰尉犂危须凡六国兵别击车师勿令得遮重合侯诸国兵共围车师车师王降服臣属汉昭帝时匈奴复使四千骑田车师宣帝即位遣五将将兵击匈奴车师田者惊去车师复通於汉匈奴怒召其太子军宿欲以为质车宿焉耆外孙不欲质匈奴亡走焉耆车师王更立子乌贵为太子及乌贵立为王与匈奴结婚姻教匈奴遮汉道通乌孙者地节二年汉遣侍郎郑吉校尉司马熹将免刑罪人田渠犂积谷欲以攻车师至秋收谷吉熹发城郭诸国兵万余人自与所将田士千五百人共击车师攻交河城破之王尚在其北石城中未得会军食尽吉等且罢兵归渠犂田收秋毕复发兵攻车师王於石城王闻汉兵且至北走匈奴求救匈奴未为发兵王来还与贵人苏犹议欲降汉恐不见信苏犹教王击匈奴边国小蒲类斩首略其人民以降吉车师旁小金附国随汉军後盗车师车师王复自请击破金附匈奴闻车师降汉发兵攻车师吉熹引兵北逢之匈奴不敢前吉熹即留一侯与卒二十人留守王吉等引兵归渠犂车师王恐匈奴兵复至而见杀也乃轻骑奔乌孙吉即迎其妻子置渠犂东奏事至酒泉有诏还田渠犂及车师益积谷以安西国侵匈奴吉还传送车师王妻子诣长安赏赐甚厚每朝会四夷常尊显以示之於是吉始使吏卒三百人别田车师得降者言单于大臣皆曰车师地肥美近匈奴使汉得之多田积谷必害人国不可不争也果遣骑来击田者吉乃与校尉尽将渠犂田士千五百人往田匈奴复益遣骑来汉田卒少不能当保车师城中匈奴将即其城下谓

吉曰单于必争此地不可田也围城数日乃解後常数千骑往来守车师吉上书言车师去渠犂千余里间以河山北近匈奴汉兵在渠犂者势不能相救愿益田卒公卿议以为道远烦费可且罢车师田者诏遣长罗侯将张掖酒泉骑出车师北千余里杨威武车师旁胡骑引去吉乃得出归渠犂凡三校尉屯田车师王之走乌孙也乌孙留不遣遣使上书愿留车师王备国有急可从西道以击匈奴汉许之於是汉召故车师太子军宿在焉耆者立以为王尽徙车师国民令居渠犂遂以车师故地与匈奴车师王得近汉田官与匈奴絶亦安乐亲汉後汉使侍郎殷广德责乌孙求车师王乌孙遣将诣阙赐第与其妻子居是岁元康四年也其後置戊己校尉屯田居车师故地元始中车师後王国新道出五船北通玉门关往来差近戊己校尉徐普欲开以省道里半避白龙堆之阨车师後王姑句以道当为挂置心不便也地又颇与匈奴南将军地接普欲分明其界然後奏之召姑句使证之不肯击之姑句数以牛羊赂吏求不得姑句家矛盾生火其妻服紫陬谓姑句曰矛盾生火此兵气也利以用兵前车师前王为都护司马所杀今久系必死不如降匈奴即驰突出高昌壁入匈奴又去胡来王唐兜国比大种赤水羌数相寇不胜告急都护都护但钦不以时救助唐兜困急怨钦东守玉门关玉门关不内即将妻子人民千余人亡降匈奴匈奴爱之而遣使上书言状是时新都侯王莽秉政遣中郎将王昌等使匈奴告单于西域内属不当得受单于谢罪执二王以付使者莽使中郎王萌待西域恶都奴界上逢受单于遣使送因请其罪使者以闻莽不听诏下会西域诸国王陈军斩姑句唐兜以示之至莽篡位莽死崇遂没西域因絶取凡国五十自译长城长君监吏大禄百长千长都尉且渠当户将相至侯王皆佩汉印绶凡三百七十六人而康居大月氏安息罽宾乌弋之属皆以絶远不在数中其来贡献则相与报不督録总领也

西汉会要卷七十